

隋書

唐 魏 徵 等撰

華 書 局

卷六七至卷八五(傳)第 六 册

册

隋書卷六十七

列傳第三十二

虞世基

陳,釋褐建安王法曹參軍事,歷祠部殿中二曹郎、太子中舍人。遷中庶子、散騎常侍、尚書 之,世基不往。後因公會,陵一見而奇之,顧謂朝士曰:「當今潘、陸也。」因以弟女妻焉。仕 學有高才,兼善草隸。陳中書令孔與見而歎曰:「南金之貴,屬在斯人。」少傅徐陵聞其名,召 虞世基字茂世,會稽餘姚人也。 父荔,陳太子中庶子。 世基幼沉靜,喜慍不形於色,博

左丞。 陳主嘗於莫府山校獵,令世基作講武賦,於坐奏之曰:

治兵於丹浦。 讓殊風,世或澆淳,解張累務。雖復順紀合符之后,望雲就日之君,且修戰於版泉,亦 夫玩居常者,未可論匡濟之功,應變通者,然後見帝王之略。何則?化有文質,進 是知文德武功,蓋因時而並用,經邦創制,固與俗而推移。所以樹鴻名,

傳第三十二 處世點

垂大訓,拱揖百靈,包舉六合,其唯聖人乎!

禮,沮 絕 如 百萬 足食足兵、猶載懷於履薄,可久可大,尚懷乎於御朽。 可得而言焉。 於是頌德,長楊校獵, 書,府無虛月。 鶉 勸賞罰 貔豹千羣,利盡 火之歲, ,迺示民以 其辭日 皇上御宇之四年也。 貝 〈冑雍弧 |五材,威加 子雲退而 知禁。盛矣哉,信百王之不易,千載之 之用,犀渠闕鞏之殷,鑄 四海。 爲賦。 萬物交泰,九有乂安,俗躋仁壽, 爱於農隙, 雖則體物緣情,不同年而語矣, 有 名 事 一劍於 至 春 如 鬼 尚 昆吾遠賮, 方,積琱 舍爵策 時 也 ! 戈於武 肅愼 民資日用 勳 昔上林從幸,相 英聲茂實,蓋 觀 奇 使臣 庫 賝 之以 熊羆 然

德, 亦 陳之創業,乃撥亂而爲武。 玉 而 有截。 帛 乃武而 盡生民之能事。 一以積 而 惟 萬 則天以稽古, 國歡 乃文。 德,諒重規 旣搜揚於帝難,又文思之安安。 昧 北怨勞乎殷履,南伐盛於唐勛。 旦丕顯, 於是禮暢樂和,刑淸政肅。 而襲矩。 統資始於羣 戡定艱難,平壹區宇。從喋喋之樂推,爰蒼蒼 未明思治。 惟皇帝之休烈,體徇齊之睿哲。 分。 膺錄圖 道藏往而 幽明請吏,俊乂在官。 而 出震,樹 西暨析支,東漸蟠木。 彼周干與夏戚,粤可得而 知來, 司 功參天 牧以 敷 爲君。 而兩地。 御璇 九疇而咸敍,奄四 璣 罄圖諜而効祉 旣濟寬而 而 運聖人之上 前聞 而再補 七 政辨, 濟猛 我大 朝 海 故

漏 |||泉而 視福。 在靈貺而必臻,亦何思而不服。

鞅。 導 洞 咸 閶 旬 重 闔 屯 始 義 雖 之 左 以 至 丽 弘 矩 前 治 輕 敞。 以啓行, 驅,伏鉤 生。 之隆平, 遂乃因農隙以 跨玄武 撃右 陳而後殿。抗鳥旌於析羽,飾魚文於被練。 **猶戒** 而 鍾而 國而强兵。 東臨 傳響。 へ 教 民 , 一款黃 山而 在春蒐而 交雲罕之掩 選羽林於六郡, 北 上。 習戰。 隱圓 映, 闕 紛劍騎而 詔蹶張於五營。 命司 之迢 馬以示法, 一遰,屆方澤之塏爽。 來往。 爾乃革 帥掌 兼折 指攝提於斗極 ·軒按轡,玉虬齊 固 衝而餘勇, 而 淸 甸。

鏜。 宇宙。 耀 縱 乍交綏 銅 於庸、蜀、躪鐵騎 頭。 於孟獲 八陳 于斯時也,青春晚候,朝陽 加 熊渠殪兕,武勇操牛。 乘 漢乃 諒窈冥之不測,羌進退而難常。 弗傷。 乃 肅 m 兩擒於下莊。始軒軒而鶴舉,遂離離 成列,六軍儼以相望。 御太一之玉堂,授軍令於紫房。 於 裁應變而 漁陽。 蛇擊,俄蹈厲以鷹揚。 彀神弩而持滿, 彏天孤 雖任鄙 明岫。 與實、育,故無得 拒飛梯於縈帶,聳樓車於武岡。 日月光 亦有投石 華,煙雲吐秀。 **蘊龍韜之妙算,誓武旅** 以雁 而 中小枝於戟刃,徹蹲札於甲裳。 扛鼎,超乘挾輈。 並 行。 張。 而爲仇。 振 曳虹旗之正 Щ 澄波瀾於江海,靜氛 谷而横八表,蕩海 於戎場。 衝冠聳劍, 一正,振夔鼓之鏜 或掉鞅而 銳 直指, 聊七 埃於 金顔 鐵楯 岳 而

列 傳 九 第 攻旣決、三略已周。 =: + __ 麽 世: 基 鳴鐲振響,風卷電收。 於是勇舒班, 金奏設,登元、凱而陪

位

命

方

邵 而 就 列。 三獻 武序, 八音未闋。 舞干 戚 而 有豫,聽鼓 神而 載 悅 俾 挾 纊 與

Hi -比

投醪 咸忘 軀 而 殉 節 方席卷 而 横行 ٠, 見王 實皇王之神武,信蕩蕩而難名者 一師之 有 征 登 燕山而戮封豕,臨 瀚 海 而 斬

陳主嘉之,賜馬一匹。

長鯨

望雲亭而

載蹕,

禮升中而告成。

及陳滅歸國,爲通 直郎,直內史省。 貧無產業,每傭書養親,怏怏不平。 嘗爲五言詩以

見意,情理悽切,世以爲工,作者莫不吟詠。 未幾,拜內史舍人。

令視 機 下。 天下 日 密, 煬帝 多 帝使謂之曰:「 事 海內當共推 與納言蘇威 事 ,,拜見之日,殆不能起,帝令左右扶之。 即位, 四 「方表 顧遇彌隆。 此一人,非吾儕所及也。」俄遷內史侍郎,以母憂去職,哀毀骨立。 奏日 、左翊衞大將 方相 有百 :委任,當爲國惜身。」前後敦勸者數矣。 數。 秘書監河東柳顧言博學有才,罕所推謝,至是與世基相見, 軍宇文述、黃門侍郎裴矩、御史大夫裴蘊 帝方疑重 一事不 哀其羸瘠,詔令進肉,世基食輒 庭決, 入閤之後,始召世 帝重 其才, 基 等參掌 口 親 授 禮 節 朝 悲哽, 逾 度。 政。 厚, 有詔 不 于 專 能 歎 時 典 起

爲賞格,親自撫循,又下詔停遼東之事。 遼東之役,進位金紫光祿 大 夫。 後 從幸 帝從之,師乃復振。 雁 門, 帝 爲突厥 所圍, 及圍解, 戰 勳格 士多敗。 不行, 世 基 又下伐遼 勸 帝 重

至省

方為

勑書,日且

一百紙,

無

所

遺謬。

其

精

審

如

是

之詔。由是言其詐衆,朝野離心。

帝乃勃然怒曰:「善達小人,敢廷辱我!」因使經賊中,向康陽催運,善達遂爲羣盜所殺。此 告敗者,乃抑損表狀,不以實聞。 後外人杜口,莫敢以賊聞奏。 咽,帝爲之改容。 逼京都。 義臣,放其兵散。 北,降賊數十萬,列狀上聞。 禍及己,雖居近侍,唯諾取容,不敢忤意。 盜 鼠 卿是書生,定猶恇怯。」于時天下大亂,世基知帝不可諫止,又以高頗、張衡等相繼 (竊雖多,未足爲慮。|義臣剋之,擁兵不少,久在閩 帝幸江都,次鞏縣, 賊據洛口倉, 世基見帝色憂,進曰:「越王年小,此輩誑之。 又越王侗遣太常丞元善達問行賊中,詣江都奏事。 城內無食。若陛下速還, 烏合必散; 不然者, 世基以盜賊日盛,請發兵屯洛口倉,以備不虞。 帝歎曰:「我初不聞賊頓如 是後外間有變,帝弗之知也。 賊 日甚,郡縣多沒。 .分,此最非宜。」帝曰:「卿言是也。」遽追 此, 義臣降賊何多也」世基對日 若如所言,善達何緣來至?」 嘗遣太僕楊義臣捕盜於河 世基知帝惡數聞之,後有 東都決沒。 稱李密有衆百 帝不從,但答云: 因歔欷 誅戮,懼 萬, 重

其聚斂。 之,恣其奢靡。 世基貌沉審,言多合意,是以特見親愛,朝臣無與爲比。其繼室孫氏,性驕淫,世基惑 鬻官 賣獄,賄賂公行,其門如市,金寶盈積。其弟世南,素國士,而清貧不立,未曾 雕飾器服,無復素士之風。孫復攜前夫子夏侯儼入世基舍,而頑鄙無賴,爲

列

傅第三

+ =

瓞

世基

有所 贍。 由 [是爲 [論者所譏,朝野咸共疾怨。 宇文化及殺逆也,世基 一 一 元 見 害焉

禍 晦 同 並宣 長子 死 何益 義 肅,好學多才藝,時人 郎 熙謂伋曰:「棄父背君,求生何地? 感尊之懷,自此訣矣。」及難作,兄弟競請 化及將亂之夕, 稱 宗人虞伋 有家 風。 知而告熙曰:「事勢以 弱冠 早沒。 庸弟熙, 然, 大業末為符 吾將濟 卿 1璽郎, 南 渡 次子 且得免

裴竑

先死,行刑人於是先世基殺之。

優洽。 江 在 上 心,超授 北、陰奉表於高祖、請爲內應。及陳平、上悉閱江南衣冠之士、次至蘊、上以爲夙有向化之 夏郡公,在隋十餘年而卒。 叉 加 裴蘊 蘊 歷洋、直、棣三州 人儀同。 ,河東聞喜人也。祖之平,梁衞將軍。父忌,陳都官尚書,與吳明徹同沒于周,賜爵 上儀同、頻復進諫,上曰:「可加開府。」頗乃不敢復言,卽日拜開府儀同三司, 左僕射高頗不悟上旨,進諫曰:「裴蘊無功於國,寵踰倫輩,臣未見其可。」 刺史,俱有能 **蘊性明辯,有吏幹。在陳,仕歷直閤將軍、興寧令。** 蘊以其父

非 正 聲清商 大 業 初 及九部四儛之色,皆罷遣從民。 ,考績連最。 煬帝聞其善政,徵爲太常少卿。 至是,蘊揣知帝意,奏括天下周、齊、梁、陳樂家 初,高祖不好聲技,造牛弘定樂,

聲咸萃樂府,皆置博士弟子,遞相敎傳,增益樂人至三萬餘。 子弟,皆爲樂戶。 其六品已下,至于民庶,有善音樂及倡優百戲者,皆直太常。 帝大悦,遷民部 侍 是後異技淫 郎

発租 由 計帳,進丁二十四萬三千,新附口六十四萬一千五百。 人,致此罔冒。今進民戶口皆從實者,全由裴蘊一人用心。古語云,得賢而治,驗之信矣。」 長皆遠流配。 是漸見親委,拜京兆贊治,發擿纖毫,吏民懾憚。 賦。蘊 于時猶承高祖和平之後,禁網疎闊,戶口多漏。 歷爲刺史,素知其情,因是條奏,皆令貌閱。 又許民相告,若糾得一丁者,令被糾之家代輸賦役。是歲大業五 或年及 。若一人不實,則官司 帝臨朝覽狀,謂百官曰:「前代無好 成丁,猶詐爲 小, 解職, 未至於老,已 年也。 鄕 諸郡 IE. 里

莫敢 剖析 帝惡之,乃奏曰:「道衡負才恃舊,有無君之心。 戮者數萬 萬,益知天下 法 順 情,鍛成其罪。所欲宥者,則附從輕典,因而釋之。是後大小之獄皆以付癰,憲部大理 明敏,時 與奪,必禀承進止,然後決斷。 未 幾,擢授御史大夫,與裴矩、虞世基參掌機密。 皆籍沒其家。 人不 人不 能致詰。 欲多,多 即相聚爲盜耳。 楊玄感之反也,帝遣蘊推其黨與,謂蘊 帝大稱善,賜奴婢十五口 蘊亦機辯,所論法理,言若懸河,或重或輕,皆由其口 不盡 見詔書每下,便腹非私議,推惡於國,妄造 加誅,則後 0 **蘊善候伺入主微意,若欲罪者,則曲** 司 隸 無以勸。」蘊 大夫薛道衡以忤意獲 曰「玄感一呼而 由是乃峻法治之,所 **避**,蘊 從者十 知

功 鼠 楫 得 禍 賊 奴 欲 我 脅我 童 令帝 端 處其死。 竊 ,浮滄海 賊 反 安能 耳 及 稚 論 Ш 知 共 欲搭 公論 濟乎?」威 東 天 其 道, 高 帝 下 罪 歷 顃 必喜於 其口,但隱忍之,誠 名 曰「未忍便殺。」遂父子及孫三 多 其 Щ 賊, 賀 飛 似 逆,妙體 出後,蘊 若酮等外 乃詭 張 如 **免罪**,競務 金 隱 答 本 稱 昧,源其情意,深爲悖逆。」帝曰:「然。 奏日 等 日 心 擅 頭 威 一一此 於 立 別 今者之役,不 權,自 極 是 功 爲 難耐。」蘊 誅 大不遜,天下 軍 道衡 知 歲 , 罪當 之 出 一世並 知上 間 願發 遼 叉帝 誣 西 誷 可 一意,遣 蒢 道, 兵, 何 滅 間 名 處 諸 但 蘇 高 及 有許 麗 記 河 威 我 張行本奏威罪惡, 矣。」帝 以討 南 赦 卽 多 位 賊 羣 贼 一,懷 盜, 我 遼之策, 王 薄 少時 不 自 帝 不自安, 懌 孟 可 悟日 與 日 得 讓 威 此 等十 數 帝付蘊 不 賴 我 人 + 老革 願 相 去 天 餘 萬 帝 尙 下 隨 頭 多姦, 推鞫 復 行 猶 無 遣 並 給 關 Ħ. 舟 內

耳. 光 禄 蘊 爲 大 叉 令 朋 欲 御 黨 重 更監之。 郡 己權勢, 縣 有不附者,陰中之。 賓客附隸,偏於郡國, 令虞世基奏罷 司 于時 隸 刺史以下官屬 軍 侵擾百姓, 國多務 凡是興師動衆,京都留守, 帝 弗之知也。 增置御史百餘人。 以渡遼之役,進位 於 及 是引 與 諸 致

公 來 護 及 見節度 司 馬 德 戡 Ź 將 收在外逆黨宇文化及等, 爲 亂,江陽 長張 惠紹 夜 馳 仍發羽林殿脚, 告之。蘊 共 惠紹 謀,欲 遣范富婁等入自西苑, 矯 韶發郭 下 兵民,盡 取 取

青

蕭 作,蘊嘆曰:「謀及播郎,竟悞人事。」遂見害。 鉅及燕王處分,扣門援帝。 謀議已定,遣報虞世基。 子悟爲尙輦直長,亦同日死。 世基疑反者不實,抑 其計。 須臾,難

裴矩

及長 世之務。」矩始留情世事。齊北平王貞爲司州牧,辟爲兵曹從事,轉高平王文學。及齊亡, 不得調。 好學,頗愛文藻,有智數。世父讓之謂矩曰:觀汝神識,足成才士,欲求官達,當資幹 裴矩字弘大,河東聞喜人也。祖他,魏都官尚書。父訥之,齊太子舍人。矩繦褓而孤, 高祖 爲定州總管,召補記室,甚親敬之。以母憂去職

大庾嶺 時|俚 還報,上大悅,命升殿勞苦之,顧謂高頗、楊素曰:「韋洸將二萬兵,不能早度巓。 自南 汪文進等相聚作亂,吳、越道閉,上難遣矩行。 元 帥 記室 海援廣州。 帥 高 祖 王仲宣逼廣州,遣其所部將周師舉圍東衡州。 ,共爲聲援。 作相,遣使者馳召之,參相府記室事。及受禪,遷給事郎,奏舍人事。伐陳之役,領 旣破丹陽,晉王廣令矩與高頗收陳圖籍。 仲宣懼 矩進擊破之,賊懼,釋東衡州 而 潰散。 矩所級集者二十餘州,

又承制署其渠帥爲刺史、縣令。及 矩請 ,據原長嶺。「三又擊破之,遂斬師舉 速進,上許之。 矩與大將軍應愿赴之,賊立九栅,屯 明年,奉詔巡撫嶺南,未行而 行至南康,得兵數千人。 朕每患其 高智慧、 一進軍

兵 少 o 段。 袭 矩 除民 以三千敝 部 侍 卒,徑至南康。 郎 尋 遷內 史侍 有臣若此,朕亦何憂」」以功拜開 郎 府,賜爵聞喜縣公,賚

稱 書 長 後 胡 左丞 (史, 破 都藍 私 職 通 時 突厥 ,長孫晟先發其 與突利 達頭 其年, 强 可 盛 可汗搆難,屢犯亭鄣。 汗於塞外 文獻皇后崩,太常舊無儀注,矩與牛弘據齊禮參定之。 都藍 、事,矩請 可 汗 妻大義公主, 萬歲被誅,功竟不 出使 說都藍 詔太平公史萬歲爲行 即宇文氏之女也, ,顯戮宇文氏。 錄。 上以啓民 軍 上從之。 可汗初 由 一總管, 是數爲邊患。 附, 出定襄道, 竟 令矩撫慰之,還 如 轉吏部侍郎, 其言,公主 後 以矩 因公主 爲 見殺。 名為 一與從 行 爲 尙 軍

帝 冷矩掌 煬 帝 其 即位,營建 事。 矩 知帝方勤遠略,諸商胡至者,矩誘令言其國俗山川險易,撰西域圖 東都, 矩職修府省, 九旬 而就。 時西域諸蕃, 多至張掖, 與中國交市

卷,入朝奏之。

其序日

之世 其 裔 後 禮 分立, 臣 教之所不及,書典之所罕傳。 頻廢此官。 聞 禹定九州,導河 功 五 + Ħ. 雖大宛以來, 玉。 不踰積石,秦兼六國,設防止及臨洮。 仍置 一校尉、 略知戶 自 都護, 漢 數 氏 興基,開 而諸 以 存 國山川未有名目。 招 撫。 拓 河 然 右 叛 始 服 稱 不 故 名號者, 恒, 知 至如 西胡雜種,僻居遐 屢 經 姓氏風 有三十六國 征 瓜土,服 後 漢

是故邦 窮驗o 章物產, 于闐之北,葱嶺以東,考于前史,三十餘國。其後更相屠滅,僅有十存。 一、改從今號,或人非舊類,因襲昔名。 全無纂錄,世所弗聞。 復以春秋遞謝,年代久遠,兼幷誅討,互有興亡。 兼復部民交錯,封疆移改,戎狄音殊,事難 自餘淪 或地

沒,掃地俱盡,空有丘墟,不可記識。

國。 闕。 餘千戶,利盡西海,多產珍異。其山居之屬,非有國名,及部落小者,多亦 大賈,周遊經涉,故諸國之事罔不徧知。復有幽荒遠地,卒訪難曉,不可憑虛,是以致 本國服飾儀形,王及庶人,各顯容止,卽丹青模寫,爲西域圖記,共成三卷,合四十四 無遠不至。臣旣因撫納,監知關市,尋討書傳,訪採胡人,或有所疑,卽詳衆口。 仍別造地圖,窮其要害。從西頃以去,北海之南,縱橫所亘,將二萬里。諒由富商 而二漢相踵,西域爲傳,戶民數十,卽稱國王,徒有名號,乃乖其實。今者所編,皆 皇上膺天育物,無隔華夷,率土黔黎,莫不慕化。風行所及,日入以來,職貢皆通, 不載 依其

可汗 道從鄯善、于闐、朱俱波、喝槃陀、〔三度葱嶺,又經護密、吐火羅、挹怛、忛延、〔四漕國 叉 經 鍛汗 :庭,度北流 發自敦煌,至于西海,凡爲三道,各有襟帶。北道從伊吾,經蕭類海鐵勒部,突厥 ,蘇對沙那國,康國,曹國,何國,大、小安國,穆國,至波斯,達于西海。 河水,至拂森國,達于西海。 其中道從高昌,焉耆,龜茲,疏勒,度葱嶺 其南

是

、咽喉之

國 婆 並 羅 眄, 隨 其所往,諸 達于西海。其三道諸國,亦各自有路,南北交通。 處得 達。 故知伊吾、高昌、鄯善,並 西域之門戶 其東女國、「吾南婆羅 也。 總湊敦煌,

願爲 突厥 旣 從,渾、厥 臣妾。 、吐渾 以 國家 分領羌胡之國,爲 可滅 威德,將士驍雄,汎濛汜而揚旌,越崐崙 聖情含養,澤及普天,服 混 一戎夏,其在茲乎! 其擁遏, 而 故朝貢不 撫之,務存 不有所記,無以表威化之遠 通 安 0 輯。 |而躍馬,易如反掌,何往不至 今並 故皇華遣使, 因 商 人密送誠 也 弗動 款 兵車 引 領 翹首, 但

帝 可 大悅,賜物五 帝由是甘心,將通西域,四夷經略,咸以委之。 一百段。 每日引矩至御坐,親問西方之事。 矩盛言胡中多諸寶物, 吐谷渾易

觀 吾 年 兵戍之。 國。謁 一騎 吐屯設等,陷以厚利,導使入朝。 ·,帝有事於恒岳,咸來助祭。帝將巡河右,復令矩往敦煌。 轉民部侍郎,未視事,遷黃門侍郎。帝復令矩往張掖,引致西蕃,至者十餘國。 乘 於道左。 塡咽,周 每歲委輸巨億萬計,諸蕃懾懼,朝貢相續。 亘數十里,以示中國之盛。 皆令佩金玉,被錦罽,焚香奏樂,歌儛諠譟。 及帝西巡,次燕支山,高昌王、伊吾設等,及 帝見 而 大悦。 帝謂矩有綏懷之略,進位銀青光祿大 竟破 復令武威、張 矩遣使說高昌王麴伯 吐 谷 渾, 拓 地 掖 數 士女 西 干 蕃 单, 雅 大業三 盛 胡 及 飾 並 伊

就 月 街,衣錦 坐,醉 乃罷。 綺、珥金翠者,以十數萬。 飽而散。 又令三市店肆皆設帷帳,盛列酒食,遣掌蕃率蠻夷與民貿易,所至之處,悉令邀延 帝至東都,矩以蠻夷朝貢者多 蠻夷嗟歎,謂中國為神仙。 又勒百官及民士女列 ٠, 諷帝令都下大戲。 帝稱其至誠,顧謂字文述、牛弘曰:「裴矩大識 坐棚閣而縱觀焉。 徵四方奇技異藝, 皆被服鮮麗、終 陳於端門

羅 所 **朕意,凡所** 以 語 城 遣 在 伊吾耳。」咸以爲然,不復來競。 西突厥傳。「台後處羅爲射匱所迫, 將軍薛世雄城伊吾,令矩共往經略。 《陳奏,皆朕之成算。 未發之頃,短輒以聞。 及還,賜錢 竟隨使者入朝。 矩諷諭西域諸國曰:「天子為蕃人交易懸遠、 四十萬。 自非奉國用心,孰能若是! 矩又白狀,令反間射匱,潛攻處 帝大悦, 賜矩以貂裘及西域

珍器

狀 本 靈 不臣 不 事,使 國,遣語其王,令速朝觀。 日 之遠暢,慮後 一高麗之地 從帝巡于 別 此 爲 冠 外域,故先帝 一帶之境,仍爲 塞北,幸啓民帳。 伏之先亡。 一、本孤 竹國 疾焉,欲征 蠻貊之鄉乎? 也。 脅令入朝,當 不然者,當率突厥,即日誅之。」帝納焉。 周代以之封于箕子,漢世 時高麗遣使先 之久矣。 可致也。」帝曰:「如何?」 今其使者朝於突厥 但以楊諒不肖, 通于突厥, 一分爲 啓民不敢隱,引之見帝。 親 師 出 三郡,晉氏 見啓民, 矩目: 無 功。 高元不用命, 請 合國 當 亦統 陛 面 下 從 詔 遼東 -之時, 其使, 化, 始建征 矩因 必 放還 懼 安得 今乃 奏 皇

大 帝 遼 之策。 將 令 矩 軍 宇文述、 兼 掌 王 兵 師 臨 事 內史侍郎虞世基等用事, 遼 以前後渡遼之役,進位 以本官領武賁郎將。 右 文武多以賄聞 明 光祿 年, 大夫。 復從至 于時 遼 東。 唯知守常, 皇綱 兵部侍. 不振 無贓穢之響, 郎斛斯 人皆變節 政亡入高 左 以是為 翊 衞

世

所

稱

告始 受,始 萬 殺 導之耳。 矩 寇 日 一,史蜀 **¹吐谷**渾 以 圍帝於 始畢 畢,率其 還 今已斬之, 大 畢 至 聞 出 胡 ··,頻 涿郡 臣 可 珍 雁 而 聞 汗 悉忽領 門。 部 物 有 漸 史蜀 部 ,帝以楊玄感初平,令矩安集隴右。 落,盡 一个个在 怨。 演獲, 故令往 衆 詔 漸盛 胡 部落走 令 矩 矩 馬邑、欲 悉尤多姦計,幸 部落致富。 驅六畜,星 又言於帝 報。」始 一,獻 與虞世 來至 策 共 分 畢 此,云背 日一 其勢, 基 蕃 馳 亦 還 每宿朝堂, 內 爭 知 而 進, 突厥 多 於 其狀 奏狀,帝大賞之。 將 作 始 可 冀先互 以宗女嫁其弟 汗,請 交 畢 本淳易 , 關 ٠, 由 請 以待顧問。 是 我容 市 誘殺之。」 若前 不 可 因之會寧,存問曷薩那部落,遺闕達度設 o 離 朝。 納。 矩伏兵馬邑下 來 間 叱吉設,拜 者, 十 一 後從師至懷遠鎭,詔護 突厥 但 及圍解,從至東都 帝 由 即得 年, 日 其 旣 一。暴口... ·好物。」 內多 是 帝北 我臣 爲 ٠, 南 有羣 誘 巡 矩 一,彼 面 而 狩, 胡 因遣 胡 斬 可汗。 悉貪 有 透盡 始畢 之。 背 人 屬 告胡 而 皆 叛 北 射匱 叱吉 率 韶 信 蕃 桀黠,敎 報 騎 我 之, 悉 軍 同汗 始 不敢 數 當 共 畢 不

遣

其猶子,率西蕃諸胡朝貢,詔矩醼接之。

通敗問至,矩以聞,帝失色。 靜,遙為處分,恐失事機。 接候蕃客,以疾不行。 尋從幸江都宮。 時四方盜賊蜂起,郡縣上奏者不可勝計。 及義兵入關, 唯願鑾輿早還, 方可平定。」矩復起視 矩素勤謹,未嘗忤物,又見天下方亂,恐爲身禍,其待遇人,多 帝令虞世基就宅問矩方略 矩言之,帝怒, 遺矩 詣京師 事。 矩曰:「太原有 俄而 驍衛大將軍屈突 京畿

卽配之。 未嫁女,皆集宮監,又召將帥及兵等恣其所取。因聽自首,先有姦通婦女及尼、女冠等,並 室。」帝大喜曰:「公定多智,此奇計也。」因令矩檢校爲將士等娶妻。矩召江都境內寡婦及 今車駕留此,已經二年。

驍果之徒,盡無家口,人無匹合,則不能久安。

臣請聽兵士於此納 由是驍果等悅,咸相謂曰:「裴公之惠也。」

過其所望,故雖至厮役,皆得其歡心。

時從駕驍果數有逃散,帝憂之,以問矩。

矩答曰:「方

|矩爲侍| 裴黃門。」旣而化及從百餘騎至,矩迎拜,化及慰諭之。 宇文化及之亂,矩晨起將朝,至坊門,遇逆黨數人,控矩馬詣孟景所。 內,隨化及至河北。 及僭帝位,以矩爲尚書右僕射, 令矩參定儀注,推秦王子浩爲帝,以 加光祿大夫,封蔡國公,爲河北 賊皆曰:「不關

僕射,專掌選事。 及宇文氏敗,爲竇建德所獲,以矩隋代舊臣,遇之甚厚。 建德起自羣盜,未有節文,短爲制定朝儀。 旬月之間, 復以爲吏部尚書,尋轉尚書右 憲章頗備, 擬於王

道安撫大使

牢,羣帥未知所屬,曹旦長史李公淹、大唐使人魏徵等說旦及齊善行令歸順。 令矩與徵、公淹領旦及八璽,舉山東之地歸于大唐。 建德大悦, 每諮訪焉。 及建德渡河討孟海公, 授左庶子,轉詹事、民部尚書。 矩與曹旦等於洛州留守。 旦等從之,乃 建德敗於武

中,未 玉門。 幹局,至於恪勤匪懈,夙夜在公,求諸古人,殆未之有。 裴蘊素懷姦險,巧於附會,作威作福,唯利是視,滅亡之禍,其可免乎? 幄之謀,國危未嘗思安, 君昏不能納諫。 史臣曰一世基初以雅澹著名、兼以文華見重、亡國羇旅、特蒙任遇。 虧廉謹之節,美矣。 關右騷然,頗亦矩之由也。 然承望風旨,與時消息,使高昌入朝,伊吾獻地, 方更鬻官賣獄,贖貨無厭,顚隕厥身, 與聞政 事, 多歷歲年, 雖處危 裴矩學涉經史,頗有 **參機衡之職,預帷** 聚粮且末, 亦其所也 師出 亂之

校勘記

= 原長嶺 「原」原作「愿」、據北史本傳及册府六五六改。

〇三 | 喝槃陀 23 __/ 「喝」原作「唱」,據北史本傳改。

万五 東女國 北史本傳作「東安國」。

西突厥傳 原脱「西」字,今補。 忛延 本書煬帝紀下作「失范延」,又漕國傳作「帆延」。

隋書卷六十八

列傳第三十三

宇文愷

平郡公,邑二千戶。愷少有器局。家世武將,諸兄並以弓馬自達,愷獨好學,博覽書記,解 屬文,多伎藝,號爲名父公子。 宇文愷字安樂,杞國公忻之弟也。在周,以功臣子,年三歲,賜爵雙泉伯,七歲,進封安 初爲千牛,累遷御正中大夫、儀同三司。

公,邑千戶。 **忻有功於國,使人馳赦之,僅而得免。後拜營宗廟副監、太子左庶子。** 後決渭水達河,以通運漕,詔愷總督其事。 高祖爲丞相,加上開府中大夫。及踐阼,誅宇文氏,愷初亦在殺中,以其與周本別,兄 **外不得調。** 及遷都,上以愷有巧思,詔領營新都副監。 會朝廷以魯班故道外絕不行,令愷修復之。旣而上建仁壽宮,訪可任者, 後拜萊州刺史,甚有能名。兄忻被誅,除名 高頻雖總大綱,凡所規畫,皆出於 廟成,別封甑 山縣

列

傳

第三十

Ξ

宇文愷

爲將作少監。 右僕射楊素言愷有巧思,上然之,於是檢校將作大匠。 文獻皇后崩,愷與楊素營山陵事,上善之,復爵安平郡公,邑千戶。 歲餘,拜仁壽宮監,授儀同三司

欲 **齊不可勝紀** 百 制 、誇戎狄,令愷爲大帳,其下坐數千人。 帝大悅,賜物千段。 度 人,離合爲之,下施輪軸,推移倏忽,有若神功。 窮 煬帝卽位,遷都洛陽,以愷爲營東都副監,尋遷將作大匠。愷揣帝心在宏侈,於是東京 極壯麗。 帝大悅之,進位開府,拜工部尚書。 戎狄見之,莫不驚駭。 及長城之役,詔愷規度之。 又造觀風行殿,上容侍衞者數 帝彌悅焉,前後賞 時帝北巡,

自 永嘉 之亂,明堂廢絕,隋有天下,將復古制,議者紛然,皆不能決。 博考羣籍,奏明堂

議表日

之序,五室九宫,統 展宁,盡妙思於規摹,凝睟冕旒,致子來於矩 臣 聞在天 成象,房心爲布政之宮,在地成形,丙午居正陽之位。 人神之際。 金口木舌,發令兆民, 玉瓚黃琮, 式嚴宗祀。 觀雲告月,順 何嘗不矜 生殺

嬳

甘,造物資生,澄源反朴。 用百姓之異心,驅一代以同域,康哉康哉,民無能而名矣。 伏惟皇帝陛下,提衡握契,御辯乘乾,減五登三,復上皇之化,流凶 九圍清謐,四表削平,襲我衣冠,齊其文軌。 故使天符地寶,吐醴 茫茫上玄,陳珪 去暴,丕下 ·武之 飛

里。 綺井爲重屋,或以圓楣爲隆棟,各以臆說,事不經見。今錄其疑難,爲之通釋,皆出證 堂,爱韶下臣,占星揆日。 於散逸。 壁之敬,肅肅淸廟,咸霜露之誠。正金奏九韶、六莖之樂,定石渠五官、三雍之禮。 瀍西,爰謀洛食,辨方面勢,仰禀神謀,敷土濬川,爲民立極。 兼 臣之此圖,用一分爲一尺,推而演之,冀輪與有序。 總集衆論,勒成一家。昔張衡渾象,以三分爲一度,裴秀輿地,以二寸爲千 於是採崧山之祕簡,披汶水之靈圖,訪通議於殘亡,購冬官 而經構之旨,議者殊途,或以 主遵先言,表置明 乃

據,以相發明。

議日

章。」周官考工記曰:「夏后氏世室,堂脩二七,博四脩一。」「□注云:「脩,南北之深也。 夏度以步,今堂脩十四步, [三] 其博益以四分脩之一,則明堂博十七步半也。」臣愷按, 承天立五府,以尊天重象。赤曰文祖,黄曰神斗,白曰顯紀,黑曰玄矩,蒼曰靈府。」 襲,燥濕不能傷,遷延而入之。」臣愷以爲上古朴略,創立典刑。尚書帝命驗曰:「帝者 冬藏,月省時考,終歲獻貢,以時嘗穀,祀于明堂。 三王之世,夏最爲古,從質尙文,理應漸就寬大,何因夏室乃大殷堂。相形爲論,理恐 云「唐、虞之天府,夏之世室,殷之重屋,周之明堂,皆同矣。」尸子曰:「有虞氏曰總 臣愷謹案淮南子曰:「昔者神農之治天下也,甘雨以時,五穀蕃植,春生夏長,秋收 明堂之制,有蓋而無四方,風雨不能 注

未愜。 不爾。 乃是增益記文。殷、周二堂獨無加字,便是其義,類例不同。 所說,並云下方,鄭注周官,獨爲此義,非直與古違異,亦乃乖背禮文。 尋文求理,深恐 兩 乃桑間俗儒信情加減。黃圖議云:「夏后氏益其堂之大一百四十四尺,周人明堂以爲 何得殷無加尋之文,周闕增筵之義。研覈其趣,或是不然。 杼 問。」馬宮之言,止論堂之一面,據此爲準,則三代堂基並方,得爲上圓之制。諸書 記云「堂脩七,博四脩一」,「三若夏度以步,則應脩七步。注云「今堂脩十四步」, 讎校古書,並無「二」字,此 山東禮本輒加二七之字,

綴戶,白綴牖。 堂高三尺,東西九仞,南北七筵。 [圖云:「於內室之上,起通天之觀,觀八十一尺,得宮之數,其聲濁,君之象也。」 大戴禮 五穀災,生於天道不順。天道不順,生於明堂不飾。 曰:「明堂者,古有之。 廟,複廟重檐。」鄭注云:「複廟,重屋也。」注、玉藻云:「天子廟及露寢,皆如明堂制。」 禮 之筵,東西九筵,南北七筵。堂崇一筵。五室,凡室二筵。」「恩」禮記明堂位曰:「天子之 云:「其脩七尋,五丈六尺,放夏周則其博九尋,七丈二尺。」又曰:「周人明堂,度九尺 凡九室,一室有四戶八牖。 其宮方三百步。 以茅蓋,上圓下方,外水曰壁雝。 故有天災,則飾明堂。」周書明堂 凡 人民疾,六畜疫,

與月令同,並不論尺丈。臣愷案,十二階雖不與禮合,一月一階,非無理思。 棟,重廊累屋也。」禮圖曰:「秦明堂九室十二階,各有所居。」。呂氏春秋曰:「有十二堂。」 八尺,博四尺。」作浴曰:「明堂太廟露寢,咸有四阿,重亢重廊。」「哥孔氏注云:「重亢累 曰:「堂方百一十二尺,高四尺,階博六尺三寸。室居內,方百尺,室內方六十尺。 戶高

行。 月,三十六戶法極陰之變數,七十二牖法五行所行日數。八達象八風,法八卦。通天 之策也, 圓象天。 太室九宮,[云] 法九州。 太室方六丈, 法陰之變數。 十二堂法十二 内,法地陰也。 高三尺,土階三等,法三統。堂四向五色,法四時五行。殿門去殿七十二步,法五行所 臺徑九尺,法乾以九覆六。高八十一尺,法黃鍾九九之數。二十八柱象二十八宿。堂 三丈,應覲禮經。」武帝元封二年,立明堂汶上,無室。其外略依此制。 門堂長四丈,取太室三之二。垣高無蔽目之照,牖六尺,其外倍之。殿垣方,在水 黃圖曰:「堂方百四十四尺,法坤之策也,方象地。屋圓楣徑二百一十六尺,法乾 水四周於外,象四海,圓法陽也。 水闊二十四丈,象二十四氣。水內徑 泰山通議今亡,

周,堤壤高四尺,和會築作三旬。五年正月六日辛未,始郊太祖高皇帝以配天,二十二 元始四年八月,起明堂、辟雍長安城南門,制度如儀。 一殿,垣四面,門八觀,水外 不可得而辨也。

列

傳第三十三

宇

文愷

親扶三老五更,袒而割牲,跪而進之。因班時令,宣恩澤。諸侯王、宗室、四夷君長、匈 日丁亥、宗祀孝文皇帝於明堂以配上帝、及先賢、百辟、卿士有益者、於是秩而祭之。

奴、西國侍子,悉奉貢助祭。

維牛維羊」。據此則備太牢之祭。今云一犢,恐與古殊。 之南,少退西面,各一犢,奏樂如南郊。」臣愷按詩云,我將祀文王於明堂,「我將我享, 永平二年,祀五帝於明堂,五帝坐各處其方,黃帝在未,皆如南郊之位。 舟淸池,惟水泱泱。」薛綜注云:「複重廇覆,謂屋平覆重棟也。」續漢書祭祀志云:「明帝 瓦,瓦下藉茅,以存古制。」東京賦曰:「乃營三宮,布政頒常。 複廟重屋,八達九房。 造 十八日。內堂正壇高三尺,土階三等。」 胡伯始注漢官云:「也「古淸廟蓋以茅,今蓋以 辰,九室法九州。室八牕,八九七十二,法一時之王。室有二戶,二九十八戶,法土王 禮圖曰「建武三十年作明堂,明堂上圓下方,上圓法天,下方法地,十二堂法日 光武位在青帝

空堂乖五室之義,直殿違九階之文。非古欺天,一何過甚! 天垂象,聖人則之。辟雍之星,旣有圖狀,晉堂方構,不合天文。 義 明著,廟宇之制,理據未分。直可爲一殿,以崇嚴祀,其餘雜碎,一皆除之。」臣愷案, 自晉以前,未有鵄尾,其圓牆壁水,一依本圖。晉起居注裴頠議曰:「尊祖配天,其 旣闕重樓,又無璧水,

三相 重,不依古制,室間通巷,違舛處多。 後魏於北臺城南造圓牆,在壁水外,門在水內迥立,不與牆相連。 其室皆用墼累,極成編陋。 後魏樂志曰:「孝 其堂上九室,三

昌二年立明堂,議者或言九室,或言五室,詔斷從五室。 後元叉執政,復改爲九室,遭

亂不成。」

於廟。 祀。 並。 殘柱,毁斫之餘,入地一丈,嚴然如舊。 後,移床時太極殿以爲明堂。 周、齊二代,闕而不修,大饗之典,於焉靡託 依漢汶上圖儀,設五帝位。 凡安數重。〔〈〕宮城處所, 宋起居注曰:「孝武帝大明五年立明堂,其牆宇規範,擬則太廟,唯十二間,以應朞 止一獻,用淸酒。」平陳之後,臣得目觀,遂量步數,記其尺丈。 無室,十二間。 乃在郭 太祖文皇帝對饗,鼎俎簠簋 內。 柱下以樟木爲跗,長丈餘, 雖湫隘 禮疑議云、「祭用純漆俎瓦樽,文於郊,質 . 卑陋,未合規摹,祖宗之靈,得崇嚴 依廟禮。」梁武卽位之 闊 **猶見基內有焚燒** 四尺許, 兩 兩相

建武三十年作,禮圖有本,不詳撰人。 自古明堂圖惟有二本,一是宗周,劉熙、阮諶、劉昌宗等作,三圖略同。 臣遠尋經傳,傍求子史,研究衆說,總撰今圖 一是後漢

其樣以木爲之,下爲方堂,堂有五室,上爲圓觀,觀有四門。

帝可其奏。會遼東之役,事不果行。

列

俳

第

三 十

Ξ

宇文

[圖]記 以渡 二十卷、明堂圖議二卷、釋疑一卷,見行於世。 (遼之功,進位金紫光祿大夫。 其年卒官,時年五十八。帝甚惜之,諡 子儒童,游騎尉。 少子溫,起部承務郎。 目 康。 撰東都

閻眦

牛左右。 隸,尤善畫,爲當時之妙。 石保縣公,邑千 閻 毗 · 、 榆林盛樂 户。 人也。 及長,儀貌矜嚴,頗好經史。 周武帝見而悅之,命尚淸都公主。 祖進,魏本郡太守。父慶, 受漢書於蕭該, 周上柱國、寧州 宣帝卽位,拜儀同三司, 略 通大旨。 總管。 能篆 毗 七 書, 歲, 襲爵

然。 爲。 尋拜車騎, 願言之於上,特蒙賜帛。俄兼太子宗衞率長史,尋加上儀同。太子服玩之物,多毗所 及太子廢,毗坐杖一百,與妻子俱配爲官奴婢。 高 祖受禪,以技藝侍東宮,數以琱麗之物取悅於皇太子,由是甚見親待, 宿衞東宮。上嘗遣高頗大閱於龍臺澤,諸軍部伍多不齊整,唯毗 後二歲,放発爲民。 一軍,法制肅 每稱之於上。

輿, 多所增損,語在輿服志。擢拜起部郎 煬帝嗣位,盛修軍器,以毗性巧,諳練舊事,詔典其職。 尋授朝請郞。 毗立議、輦輅車

帝嘗大備法駕,嫌屬車太多,顧謂毗曰:「開皇之日,屬車十有二乘,於事亦得。 今八十

平陳 乘, 九』是 故實,據漢胡 江左,惟設五 乎? 乘,以牛駕車,不足以益文物。 儉 」, 因 不 也。 中 以爲法。 禮。 次及法駕,三分減一,爲三十六乘。 乘,尚書令、建平王宏曰:『八十一 伯始、蔡邕等議,屬車八十一乘, 但帝王文物,旂旒之數,爰及冕玉,皆同 今憲章往古,大駕依秦,法駕依漢, 朕欲減之,從何爲可。」毗對曰:「臣初定數,共宇文愷參詳 此漢制 乘,議兼九國,三十六乘,無所 此起於秦, 小駕依宋, 也。 + = ; 遂爲後式。 又據宋孝建時, 今宜準此,設十二 以爲差等。」 故張衡 有 帝日 準憑。 民賦云 司 奏議,晉 乘。』開 『屬 何用秦 江左 車 九 五 遷

法

大駕宜三十六,法駕宜

用

十二,小駕除之。」毗研精故

事

,皆此

類

也。

將 騎二千追之,不及。 宮。 亂發,所乘馬 東之役,自洛口 作 Ŧ 及征 朝 少 長 監 于行 城之役 遼東,以本官領武賁郎將,典宿衞 事 o 所 中流矢,毗顏色不變,辭氣抑揚,卒 後復 韶 ,毗總其 開渠,達於涿郡,以通 毗 從帝征遼東,會楊玄感作逆,帝班師 政據高麗柏崖城,毗攻之二日,有詔徵還。 持節迎勞, 事。 及帝 逐將護 有事 運 恒 入東 漕。 岳, 詔 都 毗督其 時衆軍 毗 事 營立 尋 而 以 役。 圍 去。 一壇場。 母 ,兵部侍郎斛斯政奔遼東,帝令毗率 遼東 憂去 明年, 尋拜朝請大夫,遷殿內少監,又領 城 職 葬 ,帝令毗詣城下宣諭 兼領 轉殿 o 從至高陽,暴卒,時年五十。 未春, 右 內 翊衞 丞, 起令 從幸 長史, 視 事 張 營建 掖 0 賊 將興遼 郡。 弓弩 臨 朔

列

傳

帝甚悼惜之,贈殿內監

何稠 劉龍 黃亘 亘弟袞

年 十餘歲, 何 稠 字桂 遇江陵陷,隨安入長安。仕周御飾下士。 林, 國子祭酒安之兄子也。 父通, 善斵 及高祖 玉。 稠性絕巧, 爲 丞 相,召 有智思, 補 參 用 軍 意 , 兼掌細 精 微

組 織 殊麗,上命稠爲之。 開 皇初,授都督,累遷御府監,歷太府丞。稠博覽古圖,多識舊物。 稠錦 旣成、踰所獻者,上甚 悦。 時中國 **久絕瑠** 璃之作,匠 波斯嘗獻金縣 人無敢厝 錦袍,

稠至五 崇解 首領 分遣 逆,至是惶懼,請身入朝。 意 非崇之罪也。」乃命釋之,引崇共坐,幷從者四人,爲設酒食而遣之。 ,關以綠瓷爲之,與眞不異。 為州縣官而還,衆皆悅服。 建州開府梁昵討叛夷羅壽,羅州刺史馮暄討賊帥李大檀, 兵降款。 開皇末,桂州俚李光仕聚衆爲亂 一更,掩入其洞,悉發俚兵,以臨餘賊。 桂州長史王文同鎖崇以詣稠所。 **稠以其疾篤,因示無猜貳,遂放還州,與之約曰:「八九月間,可詣** 尋加員 有欽州刺史甯猛力,帥衆迎軍。 , 外散騎侍郎 詔稠召募討之。 象州逆帥杜條遼、羅州 **稠詐宣言曰:「州縣不能綏養,致邊民擾叛,** 師 次衡嶺, 並平之,傳首軍門。 初,猛力倔强 遣使者諭 逆帥龐靖等相 **崇大悦**,歸洞 其渠 山洞,欲圖 帥洞 不設備 繼降款。 承 制署

矣。」 京師 誡 其子 稠 相見。」稠還奏狀,上意不懌。其年十月,猛力卒,上謂稠曰:「汝前不將猛力來,今竟死 長眞 一 猛力共臣爲約,假令身死,當遣子入侍。 曰:「我與大使爲約,不可失信於國士。 汝葬我訖,卽宜上路。」長眞 越人性直,其子必來。」初,猛力臨終, 如言入朝,

上 大悅曰「何稠著信蠻夷,乃至於此。」以勳授開府。

有知,當相 及 E |疾篤,謂||稠日:「汝旣曾葬皇后,今我方死,宜好安置。 仁壽初,文獻皇后崩,與宇文愷參典山陵制度。 見於地下。」上因攬太子頭謂曰:「何稠用 心,我付以 **稠性少言,善候上旨,由是漸見親昵。** 屬此 後事,動靜當共平章。」 何益,但不能忘懷耳。 魂其

創。 及車 討閱圖籍,營造輿服羽儀,送至江都也。」其日,拜太府少卿。 臣 故弁施象牙簪導,自稠始也。 億計。帝使兵部侍郎明雅、選部郎薜邁等勾覈之,數年方竟,毫釐無舛。稠參會今古,多所 子與參乘同 高 帝 魏、晉以來,皮弁有纓而無笄導。 ·輿辇輅、皇后鹵簿、百官儀服,依期而就,送于江都。 所役工十萬餘人,用金銀錢物鉅 大業初,煬帝將幸揚州,謂稠曰:「今天下大定,殷承洪業,服章文物,闕略猶多。 而 一去印綬,兼無佩玉之節乎。」乃加獸頭小綬及佩一隻。 在 箱 内。 周曰:「君臣同所,過爲相逼。」乃廣爲盤輿,別搆欄楯,侍臣立於其中。 又從省之服,初無佩綬。 **稠曰:「此古田獵之服也。** 問曰:「此乃晦朔小朝之服。安有人 稠於是營黃麾三萬六千人仗, 舊制,五輅於轅上起箱,天 今服以入朝,宜變其制。」 卿可 改

列

傳

第

三十

=

何稠

戎 於 《車萬乘,鈎陳八百連,帝善之,以稠守太府卿。 內復起須 爾平坐,天子獨居其上。自餘麾幢文物, 增損極多,事見威儀志。 帝復令稠造

遼東之役,攝右屯衞將軍,領御營弩手三萬人。

文愷造遼水橋不成,師不得濟, 後三歲,兼領少府監。 右屯衞大將軍麥鐵杖因而遇害。 帝遣稠造 橋,二日而 時工部尚書字

神功。 高 十仞),上布 是歲, 甲士,立仗建旗,四隅置闕,面別一觀,觀下三門,遲 加金紫光祿大夫。 明年,攝 左屯衞將軍,從至遼左 明 而畢。 高麗望見,謂若

初

稠

制行殿及六合城,至是,帝於遼左與賊相對,夜中施之。

其城周廻八里,

城及女垣合

建德,建德復以爲工部尚書、舒國公。 十二年,加 右 光祿大夫,從幸江都。 建德敗,歸于大唐,授將作少匠,卒。 遇宇文化及作亂,以爲工部 尚書。 化及敗,陷于竇

而 歷 職 開 通顯。 皇時,有劉龍者,河間 及高祖踐作,大見親委,拜右衞將軍,兼將作大匠。 人也。 性强明,有巧思。 齊後主知之,令修三爵臺,甚稱旨,因 遷都之始,與高頻參掌制

度,代號爲能。

大業時,有黃亘者,不知何許人也,及其弟袞,俱巧思絕人。 煬帝每令其兄弟直少府將

善,莫能有所損益。 于時改創多務,亘、滾每參典其事。凡有所爲, **亘官至朝散大夫,滾官至散騎侍郎。** 何稠先令亘、袞立樣,當時工人皆稱其

章,成一代之文物。雖失之於華盛,亦有可傳於後焉。 至於考覽書傳,定明堂圖,雖意過其通,有足觀者。 起仁壽宮,營建洛邑,要求時幸,窮侈極麗,使文皇失德,煬帝亡身,危亂之源,抑亦此之由 史臣曰:宇文愷學藝兼該、思理通贍、規矩之妙、參蹤班、爾、當時制度、咸取則焉。 毗、稠巧思過人,頗習舊事,稽前王之采 其

校勘記

[1] 堂脩二七博四脩一「博」,周禮考工記匠人原作「廣」,隋人諱改。 下同。

[二] 今堂脩十四步 「今」,考工記注原作「令」。下同。

堂脩七博四脩一 原脫「一」字,據考工記補。「堂脩七」,是宇文愷據古本修改後的引文。

「四〕凡室二筵 原脫「室」字、據册府五八四補。

CHJ 重亢 册府五八四作「重甍」。下同。

列

傳

第

三十

校勘記

「六」 太室九宮 . -Lz |______ 胡伯始 胡廣字伯始。隋人避諱,不稱其名。 原脫「大」字,據册府五八四補。

凡安數重 「凡」原作「瓦」,據北史本傳、册府五八四改。

隋書卷六十九

列傳第三十四

王劭

古事,有所遺忘,討閱不能得,因呼励問之。一劭具論所出,取書驗之,一 尚書僕射魏收辟參開府軍事,累遷太子舍人,待詔文林館。 人所許,稱其博物。 王劭字君懋,太原晉陽人也。父松年,齊通直散騎侍郎。 後遷中書舍人。齊滅,入周,不得調 時祖孝徵、魏收、陽休之等嘗論 劭少沈默,好讀書。 無舛誤。自是大爲時 弱冠,齊

時疾必興。 火之義,近代廢絕,於是上表請變火,曰:「臣謹案周官,四時變火,以救時疾。 所奏。上怒,遣使收其書,覽而悅之。於是起爲員外散騎侍郎,修起居注。劭以古有鑽燧改 高祖受禪,授著作佐郎。 聖人作法,豈徒然也!在晉時,有以洛陽火渡江者,代代事之,相續不滅,火色 以母憂去職,在家著齊書。時制禁私撰史,爲內史侍郎李元操 明火不數變,

列傳

變靑。 食厨,不可不依古法。」上從之。一酚又言上有龍顏戴干之表,指示羣臣。上大悅,賜物數百 五時取五木以變火,用功甚少,救益方大。縱使百姓習久,未能頓同,尚食內厨及東宮諸主 火、竹火、草火、麻荄火,氣味各不同。以此推之,新火舊火,理應有異。 拜著作郎。] 劭上表言符命曰: 昔師曠食飯,云是勞薪所爨。晉平公使視之,果然車輞。 今溫酒及炙肉,用石炭、柴 伏願遠遵先聖,於

段。

聖,實屬大隋。 得受命之辰,允當先見之兆。 曰:「聖人受命,瑞先見於河。河者最濁,未能清也。」竊以靈貺休祥,理無虛發,河淸啓 元曰河淸。是月,至尊以大興公始作隋州刺史,歷年二十,隋果大興。臣謹案易坤靈圖 昔周保定二年,歲在壬午,五月五日,青州黃河變清,十里鏡澈,齊氏以爲己瑞,改 午爲鶉火,以明火德,仲夏火王,亦明火德。 月五日五,合天數地數,旣

與上名符合。龜腹七字,何以著龜?龜亦久固,兼是神靈之物。孔子歎河不出圖,洛不 石龜,文曰:「天子延千年,大吉。」臣以前之三石,不異龍圖。 有文曰:「天卜楊興。」安邑掘地,得古鐵版,文曰:「皇始天年,賚楊鐵券,王興。」同州得 云:「八方天心。」永州又得石圖,剖爲兩段,有楊樹之形,黃根紫葉。 開皇初,邵州人楊令悊近河,得青石圖一,紫石圖一,皆隱起成文,有至尊名,下 何以用石?石體 汝水得神龜,腹下 **外固**,義

八尺。 州熒陽龍 商 升天者,當乾位天門。 蓋象至尊以龍鬭之歲爲亳州總管,遂代周有天下。後鬭於ঙ陽者,「熒」字三火,明火 薄,乍合乍離,自午至申,白龍升天,黑龍墜地。謹案:龍,君象也。前關於亳州周村者, 初 命。」謹案:此言皆爲大隋而發也。 商名宮,黃色,長八尺,六十世,河龍以正月辰見,白龍與五黑龍鬭,白龍陵,故泰人有 德之盛也。白龍從東方來,歷陽武者,蓋象至尊將登帝位,從東第入自崇陽門也。西北 鬭 越、滕五王,一時伏法,行了亦當五數。 色白也。 也。 見白氣屬天,自東方歷陽武而來。及至,白龍也,長十許丈。有黑龍乘雲而至,兩相 能去敵日除。 建德六年,亳州大周村有龍鬭,白者勝,黑者死。大象元年夏,熒陽汴水北有龍鬭 名宮者,武元皇帝諱於五聲爲宮。 河龍以正月辰見者,泰正月卦,龍見之所,於京師爲辰地。 關是也。 死龍所以黑者,周色黑。所以稱五 臣以泰人有命者,泰之爲言通也,大也,明共人道通德大,有天命也。 勝龍所以白者,楊姓納音爲商,至尊又辛酉歲生,位皆在 坤靈圖曰:「聖人殺龍。」龍不可得而殺,皆盛氣也。 又曰:「泰姓 聖人殺龍者,前後龍死是也。姓商者,皇家於五姓爲 白龍陵者, 黄色者,隋色尚黄。長八尺者,武元皇帝身長 一者,周閔、明、武、宣、靖凡五帝。趙、陳、代、 陵猶勝也。 鄭玄說:「陵當爲除。」凡 白龍與黑龍鬭者,亳 西方,西方

干。」臣伏見至尊有戴干之表,益知泰人之表不爽毫釐。 乾鑿度 又稱「漢四百年」,終如其言,則知六十世亦必然矣。昔宗周卜世三十,今則倍之。 曰: 「泰表戴干。」鄭玄注云:「表者,人形體之彰識也。 坤靈圖所云,字字皆驗。 干,盾也。 泰人之表戴

也。 東南 齊王高洋爲是誅陳留王彭樂。其後武元皇帝果將兵入幷州。 平主出於亳州陳留之地,皆如所言 尊牧亳州 老子將度世,云待枯柏生東南枝廻指,當有聖人出,吾道復行。 |州有天子氣,於是殺亳州刺史紇豆陵恭,至尊代爲之。 叉陳留老子祠有枯柏,世傳云 明至尊者爲陳留公世子,亳州總管,遂受天命,海內均同,不偏不黨,以成太平之風化 平之政,猶有不能均同,唯平均乃不鳴條,故欲風於亳。 在大統十六年,武元皇帝改封陳留公。是時齊國有秘記云、「天王陳留入幷州。」 上指。 稽覽圖云:「太平時,陰陽和合,風雨咸同,海內不偏,地有阻險,故風有遲疾。雖太 ,親至祠樹之下。 夜有三童子相與歌曰:「老子廟前古枯樹,東南狀如傘,聖主從此去。」及至 自是柏枝廻抱,其枯枝,漸指西北,道教果行。校考衆事,太 亳者,陳留也。」 謹案:此言蓋 周武帝時,望氣者云毫 至齊,枯柏從 下生枝,

年以來,遠近山石,多變爲玉。石爲陰,玉爲陽。 稽覽圖又云:「治道得,則陰物變爲陽物。」鄭玄注云:「葱變爲韭亦是。」謹案:自六 又左衞園中葱皆變爲韭。

上覽之大悅,賜物五百段。

未幾,劭復上書曰:

位在未,六月建未,言至尊以六月生也。 之者,明陰類被服楊氏之風化,莫不隨從。陰謂臣下也。王用享于西山者,蓋明至尊常 萬物隨陽而出者,明天地間萬物盡隨楊氏而出見也。上六欲九五拘係之者,五爲王,六 者,明楊氏之德教施行於天下也。 豬覽圖 「坤六月,有子女,任政,一年,傳爲復。 五月貧之從東北來立,大起土邑,西北 藩決難解,萬物隨陽而出。故上六欲九五拘係之,維持之,明被陽化而陰隨從之也。」易 周后,任理內政也。一年傳爲復者,復是坤之一世卦,陽氣初起,言周宣帝崩後一年, 以歲二月幸西山仁壽宮也。凡四稱隨,三稱陽,欲美隋楊,丁寧之至也。 以義」,此二句亦是乾鑿度之言。 爲宗廟,明宗廟神靈欲令登九五之位,帝王拘民以禮,係民以義也。「拘民以禮」,「係民 凡此易緯所言,皆是大隋符命。隨者二月之卦,明大隋以二月卽皇帝位也。 地動星墜,陽衞。屯十一月神人從中山出,趙地動。北方三十日,千里馬數至。」謹案: 易乾鑿度曰:「隨上六,拘係之,乃從維之,王用享于西山。隨者二月卦,陽德施行, 維持之者,明能以綱維持正天下也。被陽化而欲陰隨 藩決難解者,明當時藩鄣皆是通決,險難皆解散也。 有子女任政者,言樂平公主是皇帝子女,而爲 坤六月者,坤 陽德施行

列

西北 傳位 人 師東北,本而言之,故曰眞人從 五 從 月 中 崩 地 與楊氏也。 Щ 動 眞 出者。此卦動 星墜者,蓋天意去周授隋,故變動 八人革 命,當在此 五月貧之從東北來立者了「貧之」當爲「眞人」,字之誤也。 而大亨作,故至尊以十 時。 至尊 東北來立。大起土邑者,大起卽大興,言營大興城 一謙讓 而逆天意,故踰年乃立。 也。 月被授亳州總管,將從 陽衛者、言楊氏得天衞 昔為定州總管,在京 中山 助。屯十一月神 言周宣帝以 Mi 出 也。趙 邑也。

足,坎於馬爲美脊,是故騧騮馬脊有肉鞍,行則先作弄四足也。 之時,停留三十日 地 動 者, 中山 爲趙地,以神人將去,故變動也。 也。 千里馬者,蓋至尊舊所乘騧騮馬也。 北方三十日者、蓋 屯卦震下坎上,震於馬作 數至者,言曆數至 至尊從北方將往亳州 也。

不格。 元訖。 也。 形 大隋符命。 文文注 兆之瑞始出,天象則爲之變動。北斗主天之法度,故曰矩衡。 故隋以火德爲赤帝天子。 河圖帝通紀曰:「形瑞出,變矩衡。 亦以爲法玉衡之神。 道終始,德優劣。 道無爲,治率。 形瑞出、變矩衡者,矩,法也,衡,北斗星名,所謂璿璣玉衡者也。大隋受命, 被遂矩,戲作術。 帝任政,河曲出。協輔嬉,爛可述。」謹案:凡此河圖所言,亦是 與此河圖 協靈皇者,協,合也,言大隋德合上靈天皇大帝也。又年 **矩衡義同。赤應隋者,言赤帝降精,感應而** 赤應隨,協靈皇。」河圖皇參持曰:「皇辟出, 開皇色,握神日。投輔提,象不絕。立皇後,翼 易緯「伏戲矩衡神」, 生隋

言前東宮道終而德劣,今皇太子道始而德優也。帝任政、河曲出者,言皇帝親任政事, 格,至也,言本立太子以爲皇家後嗣,而其輔翼之人不能至於善也。道終始、德優劣者, 者,言投授政事於輔佐,使之提挈也。象不絕者,法象不廢絕也。立皇後、翼不格者, 蓋謂至尊受命出爲天子也。承元訖者,言承周天元終訖之運也。道無爲、治率者,治下 政治、爛然可紀述也。所以於皇參持、帝通紀二篇陳大隋符命者,明皇道帝德,盡在 而邵州河濱得石圖也。協輔嬉、爛可述者,協,合也,嬉,興也,言羣臣合心輔佐,以興 年易服色也。握神日者,握持羣神,明照如日也。又開皇以來日漸長,亦其義。投輔提 戲作八卦之術,言大隋被服三皇之法術也。遂皇機矩,語見易緯。 脫一字,言大道無爲,治定天下率從。 號開皇,與靈寶經之開皇年相合,故曰協靈皇。 被逐矩、戲作術者、矩、法也。 皇辟出者,皇,大也,辟,君也,大君出, 開皇色者,言開皇 昔遂皇握機矩,伏

隋也。

大悅,以劭爲至誠,寵錫日隆。

行、十日、十二辰之名,凡二十七字。又有『天門地戶人門鬼門閉』九字。 日「其大玉 時 ·有人於黃鳳泉浴,得二白石,頗有文理,遂附致其文以爲字,復言有諸物象而 一有日月星辰,八卦五岳,及二麟雙鳳,青龍 朱雀,騶驥玄武,各當其方位。又有五 又有却非及二鳥, 上奏

砂集諸 仙人玉女乘雲控鶴之象。別有異狀諸神,不可盡識,蓋是風伯、雨師、山精、海若之類。又有 喜,賞賜 謠,引圖書讖緯,依約符命,捃摭佛經,撰爲皇隋靈感誌,合三十卷,奏之。 上令宣示 天下。 也。於次玉則皇帝名與九千字次比,兩『楊』字與『萬年』字次比,『隋』與『吉』字正並,蓋明長 天皇大帝、皇帝及四帝坐,鉤陳、北斗、三公、天將軍、土司空、老人、天倉、南河、北河、五星、 其鳥皆人面 八吉慶也。」

劭復廻互其字,作詩二百八十篇奏之。

上以爲誠,賜帛千匹。

劭於是採民間歌 日字正鼎足。 二十八宿,凡四十五官。諸字本無行伍,然往往偶對。於大玉則有皇帝姓名,並臨南面,與 [州朝集使,冼手焚香,閉目而讀之,曲折其聲,有如歌詠。 經涉旬朔,徧而後罷。上益 優洽 〕則抱朴子所謂『千秋萬歲』也。其小玉亦有五嶽、却非、虯、犀之象。二玉俱有 復有老人星,蓋明南面象日而長壽也。皇后二字在西,上有月形,蓋明象月

中,奄然如寐,便卽升遐,與經文所說,事皆符驗。 符,備諸 日,大寶殿後 放 大光明,以香花妓樂來迎之。 仁壽中,文獻皇后崩,劭復上言曰:「佛說人應生天上,及上品上生無量壽國之時,天佛 秘記,皆云是妙善菩薩。 夜有神光。 二十四 日卯時,永安宮北有自然 如來以明星出時入涅槃。 臣謹案:八月二十二日,仁壽宮內再雨 臣又以愚意思之,皇后遷化,不在仁壽、 種種音樂,震滿虛空。 伏惟大行皇后聖德仁慈,福善禎 金銀之花。二十三 至 夜 五更

大興宮者、蓋避至尊常居正處也。 在永安宮者,象京師之永安門,平生所出入也。后升遐後

二日,苑內夜有鍾聲三百餘處,此則生天之應顯然也。」上覽而 且悲且喜。

祖,李猶李老,二人扶侍,實爲長壽之徵。」上聞之,喜見容色。其年,上崩。未幾,崔彭亦卒。 因謂彭曰 夏有五觀,周有三監。」上然其言。 王,皆不能移不肖之子。黃帝有二十五子,同姓者二,餘各異德。 時蜀王秀以罪廢,上顧謂伽曰:「嗟乎!吾有五子,三子不才。」伽進曰:「自古聖帝明 :「死生當與爾俱。」劭曰:「此夢大吉。 其後上夢欲上高山而不能得,崔彭捧脚,李盛扶肘得上, 上高山者,明高崇大安,永如 堯十子,舜九子,皆不肖。 山也。 彭猶彭

黄帝同 常法。 信亦 知古者同德則同姓,異德則異姓,故黃帝有二十五子,其得姓者十有四人,唯靑陽、夷鼓,與 天倫。 煬帝嗣位,漢王諒作亂,帝不忍加誅。劭上書曰:「臣聞黃帝滅炎,蓋云母弟,周公誅管, "為姬姓。 今陛下置此逆賊,度越前聖,含弘寬大,未有以謝天下。謹案賊諒毒被生民者也。是 叔向戮叔魚,仲尼謂之遺直,石碏殺石厚,丘明以爲大義。 諒旣自絕,請改其氏。」<u>劭以此求媚,帝依違不從。遷秘書少監,數載,卒官</u> 此皆經籍明文,帝王

聞。 之言,以類相從,爲其題目,辭義繁雜,無足稱者,遂使隋代文武名臣列將善惡之迹,堙沒無 初撰齊誌,爲編年體,二十卷,復爲齊書紀傳一百卷,及平賊記三卷。或文詞鄙野,或不 励在著作,將二十年,專典國史,撰<u>隋</u>書八十卷。多錄口勑,又採迂怪不經之語及委巷

孙

傳

第三十

pu

王劭

不物,駭人視聽,大爲有識所嗤鄙。然其採擿經史謬誤,爲讀書記三十卷,時人服其精

盤中之肉,輒爲僕從所噉。 博。 妣 爰自志學, 暨乎暮齒, 篤好經史, 遺落世事。用思旣專, 性頗怳忽, 每至對食, 閉目凝思, 励弗之覺,唯責肉少,數罰厨人。 厨人以情白劭, 励依前閉目,

袁充

伺而獲之,厨人方免答辱。

其專固如此。

晉安王文學、東部侍郎、散騎常侍。 應聲答曰:「唯絺與緣,服之無斁。」以是大見嗟賞。仕陳,年十七,爲秘書郎。 年 ·十餘歲,其父黨至門,時冬初,充尙衣葛衫。 袁充字德符,本陳郡陽夏人也。其後寓居丹陽。祖昂,父君正,俱爲梁侍中。充少警悟, 客戲充曰:「袁郎子絲兮絲兮,淒其以風。」方 歷太子舍人、

充復表奏,隋興已後,日影漸長,日:「開皇元年,冬至日影一丈二尺七寸二分,自爾 至影一尺四寸八分,自爾漸短。至十六年,夏至影一尺四寸五分。周官以土圭之法正日影, 十七年,冬至影一丈二尺六寸三分。四年冬至,在洛陽測影,一丈二尺八寸八分。二年,夏 太子,正窮治東宮官屬,充見上雅信符應,因希旨進曰:「比觀玄象,皇太子當廢。」上然之。 及陳滅歸國,歷蒙、鄜二州司馬。完性好道術,頗解占候,由是領太史令。 時上將廢皇 漸短。至

悅,告天下。將作役功,因加程課,丁匠苦之。 道,升平行次道,霸世行下道。』伏惟大隋啓運,上處乾元,影短日長,振古未之有也。」上大 道則去極近,外道則去極遠。堯典云:『日短星昴,以正仲冬。』據昴星昏中,則知堯時仲冬, <u>秋元命包云:『日月出內道,琁璣得常,天帝崇靈,聖王祖功。』 与京房別對曰:『太平日行上</u> 日在須女十度。以曆數推之,開皇已來冬至,日在斗十一度,與唐堯之代去極並近。謹案表 七年冬至之影,短於舊影三寸七分。日去極近則影短而日長, 去極遠則影長而日短, 行內 日至之影尺有五寸。 鄭玄云:『冬至之影一丈三尺。』今十六年夏至之影,短於舊影五分,十

合天地之心,得仁壽之理。故知洪基長算,永永無窮。」上大悅,賞賜優崇,儕輩莫之比。 止 神 光瑞氣,嘉祥應處,至於本命行年,生月生日,並與天地日月、陰陽律呂運轉相符,表裏 仁壽初,充言上本命與陰陽律呂合者六十餘條而奏之,因上表曰「皇帝載誕之初,非 此誕聖之異,寶曆之元。今與物更新,改年仁壽,歲月日子,還共誕聖之時並同,明

陛下卽位,其年卽當上元第一紀甲子,天正十一月庚戌冬至,正與唐堯同。 帝即位,與堯受命年合。昔唐堯受命四十九年,到上元第一紀甲子,天正十一月庚戌冬至, 經八上元,其間縣代,未有仁壽甲子之合。謹案:第一紀甲子,太一在一宮,天目居武德,陰 自放勳以 一來,凡

仁壽四年甲子歲,煬帝初卽位,充及太史丞高智寶奏言:「去歲冬至,日影逾長,今歲皇

列傳第

哉者矣。」仍諷齊王陳率百官拜表奉賀。其後熒惑守太微者數旬,于時繕治宮室,征役繁重,

充上表稱「陛下修德,熒惑退舍」。百僚畢賀。 帝大喜,前後賞賜將萬計。 時軍國多務,充候

帝意欲有所爲,便奏稱天文見象,須有改作,以是取媚於上。

大業六年,遷內史舍人。從征遼東,拜朝請大夫、祕書少監。其後天下亂,帝初罹雁門

之厄,又盜賊益起,帝心不自安。充復假託天文,上表陳嘉瑞,以媚於上曰:

臣聞皇天輔德,皇天福謙,七政斯齊,三辰告應。伏惟陛下握錄圖而馭黔首,提萬

善而化八紘,以百姓爲心,匪以一人受慶,先天罔違所欲,後天必奉其時。是以初膺寶 曆,正當上元之紀,乾之初九,又與天命符會。斯則聖人冥契,故能動合天經。謹按去

年已來,玄象星瑞,毫釐無爽,謹錄尤異,上天降祥、破突厥等狀七事

其一,去八月二十八日夜,大流星如斗,出王良北,正落突厥營,聲如崩牆。其二,

斗主殺伐,賊必敗。其四,歲星主福德,頻行京、都二處分野。依占,國家之福。其五, 賊所,賊必敗散。 八月二十九日夜,復有大流星如斗,出羽林,向北流,正當北方。 其三,九月四日夜,頻有兩星大如斗,出北斗魁,向東北流。 依占,頻二夜流星墜 依占,北

乾元初九爻及上元甲子符合。此是福地,永無所慮。旋觀往政,側聞前古,彼 則異時 間出,今則一朝總萃。豈非天贊有道,助殲兇孽,方淸九夷於東穢,沉五狄於北溟,告 五日夜,通漢鎭北有赤氣亘北方,突厥將亡之應也。依勘城錄,河南洛陽並當甲子,與 七月內,熒惑守羽林,九月七日已退舍。依占,不出三日,賊必敗散。其六,去年十一月 二十日夜,有流星赤如火,從東北向西南,落賊帥盧明月營,破其橦車。其七,十二月十

意,在位者皆切患之。宇文化及殺逆之際,并誅充,時年七十五。 書奏,帝大悅,超拜秘書令,親待逾昵。 帝每欲征討,充皆預知之,乃假託星象,獎成帝

成岱岳,無爲汾水。

隋朝 繁雜。 物。 晷影。厚誣天道,亂常侮衆,刑茲勿捨,其在斯乎! 且劭爲河朔淸流, 充乃江南望族,乾沒榮 ,更以玄象自命。 雅好著述,久在史官,旣撰齊書,兼修隋典。 史臣曰:王劭爰自幼童,迄乎白首,好學不倦,究極羣書。 搢紳洽聞之士,無不推其博 直愧南、董,才無遷、固,徒煩翰墨,不足觀採。 並要求時幸,干進務入。劭經營符瑞,雜以妖訛,充變動星占,謬 好詭怪之說,尚委巷之談,文詞鄙穢,體統 袁充少在江左,初以警悟見稱,委質 增

列

傳

第三

十四四

袁充

校勘記

利,得不以道,頹其家聲,良可歎息。

校勘記

[一] 趙陳代越滕五王一時伏法 「滕」原作「當」,據北史王慧龍傳附王劭傳改。 按:周宣帝大象二

年秋冬,趙王括、陳王純、代王達、越王盛、滕王逌五人先後被殺。「當」字當是「滕」字之訛,今

改正。

〔三〕聖王祖功 北史袁充傳、「祖」作「相」。

一六一四

隋書卷七十

列傳第三十五

楊玄感

郢州 列。 敢欺隱。 「此兒不癡也。」及長,好讀書,便騎射。以父軍功,位至柱國,與其父俱爲第二品,朝會則齊 其後高祖命玄鳳降一等,玄鳳拜謝曰:「不意陛下寵臣之甚,許以公廷獲展私敬。」初拜 刺史,到官,潛布耳目,察長吏能不。其有善政及贓污者,纖介必知之,往往發其事,莫 楊玄威,司徒素之子也。 吏民敬服、皆稱其能。 體貌雄偉,美鬚髯。少時晚成,人多謂之癡,其父每謂所親曰: 後轉宋州刺史,父憂去職。歲餘,起拜鴻臚卿,襲爵楚國公,

列傳第三十五 楊玄越

遷禮部尙書。

甚,內不自安,遂與諸弟潛謀廢帝,立秦王浩。及從征吐谷渾,還至大斗拔谷,時從官狼狽,

自以累世尊顯,有盛名於天下,在朝文武多是父之將吏,復見朝綱漸紊,帝又猜忌日

性雖驕倨,而愛重文學,四海知名之士多趨其門。

玄 感 欲 襲 擎行 宮。 其叔慎謂玄處曰:「士心尚一、國未有釁,不可圖 也 _____ 玄 感 乃 止

兵革 不 涯 虚 分 是司 也 時 自非 帝 敦 於是賚物千 好 立 征 布 效邊裔, 伐 S) ,玄感 腹 心。」文振 段,禮遇 何 欲立威 以塞責 因言於帝, 《名,陰 益 1 隆,頗 若方隅 求 帝嘉 將 預 有 朝 領 Ź, 風 政 謂 塵 顧謂羣臣曰:「將門必 之警,庶 兵部 尚書段文振 得 執 鞭行 日 陣, 有將, 少展 玄 感 絲 # 相 髮 門 荷 之功。 必有 國 思, 相, 寵 明 公 故 踰

兵備 夫。 有 於倉所。以東光縣尉元務本爲黎州刺史,趙懷義 動 東 玄 汲 个,玄感 春門,衆至十餘萬。 衆 衆,乃遣家奴僞爲使者,從東方來,謬稱護兒失軍 感 郡 贊治 禦。 且 揚言曰 於是取 帝 征 潛遣 萬,將襲洛陽。 遼東 修 趙懷義等謀議,欲令帝 武縣民相率守臨淸關,玄處不得濟,遂於汲郡 帆布爲牟甲,署官屬,皆準開皇之舊。 人召之。 「水路多 命玄感 盜 子蓋令河南贊治裴弘策拒之,弘策戰敗。 時將軍來護兒以舟師自東萊將入海, 於黎陽督 賊,不可前後而發。」其弟武賁郎將 唐禪至河內,馳往東都告之。 所軍 運。 于時 衆飢 一餒,每爲逗遛,不時進發。 百 姓苦役,天下思 為衛州刺史,河 移書傍郡,以討 期而 越王 反。 南渡河, 亂 侗、民部 玄縱、 趣 玄威 玄威 平 內 瀍、洛父老競致 ·壤城, 從 郡 護兒爲名, **遂入黎陽縣,閉城大索男** 鷹揚 亂者 尚書樊子蓋 主簿唐禕爲懷 遂與武賁 帝遲之, 郎將萬碩並 軍未發。 如 市 各令發兵, (郎將王 遣使 牛酒。玄威 等 數 玄感無以 人者逼 州 日 大 從幸遼 1, 屯兵 一种伯 懼 刺 勒 促,

滅族者,但爲天下解倒懸之急,救黎元之命耳。」衆皆悅,詣轅門請自效者,日 屯兵尚書省,每誓衆曰、「我身爲上柱國,家累鉅萬金,至於富貴,無所求也。 有 今者不顧破家 "數千。 與 樊

子蓋書曰

夫建忠立義,事有多途,見機而作,蓋非一揆。 昔伊尹放太甲於桐宮,霍光廢劉賀

於昌邑,此並公度內,不能一二披陳。

流, 離 賊於是滋多,所在修治,民力爲之凋盡。荒淫酒色,子女必被其侵,躭玩鷹犬, 士卒塡溝壑,骸骨蔽原野。黃河之北,則千里無煙,江淮之間,則鞠爲茂草。 其毒。 垂拱而天下治。今上纂承寶曆,宜固洪基,乃自絕於天,殄民敗德。 高祖文皇帝誕膺天命,造茲區宇,在琁璣以齊七政,握金鏡以馭六龍,無爲 朋黨相扇,貨賄公行,納邪佞之言,杜正直之口。 加以轉輸不息,徭役無期, 頻年 肆告, 而至化 禽獸皆 盜

黔黎 之。」所以上禀先旨,下順民心,廢此淫昏,更立明哲。四海同心,九州響應,士卒用命, 如 赴 私 在念,社稷爲心,勿拘小禮,自貽伊戚。 玄感世荷國恩,位居上將,先公奉遺詔曰:「好子孫爲我輔弼之,惡子孫爲我屛黜 ·讎,民庶相趨,義形公道。 天意人事,較然可知。 誰謂國家一旦至此,執筆潸泫,言無所具。 公獨守孤城,勢何支久!願以

遂進逼都城

列

是戰. 親運 逐之,伏兵發,前軍盡沒。後數日,玄復與玄處戰, 兵始合, 玄處詐令人大呼曰:「官軍已得 玄感矣。」玄軍稍怠。玄感與數千騎乘之,於是大潰,擁八千人而去。玄感驍勇多力,每戰 無不 長矛,身先士卒,喑嗚叱咤,所當者莫不震懾。論者方之項羽。又善撫馭,士樂致死,由 刑部尚書衞玄,率衆數萬,自關中來援東都。以步騎二萬渡瀍、澗挑戰,玄感僞北。 捷。 玄軍日蹙,糧又盡,乃悉衆決戰,陣於北邙,一日之間,戰十餘合。玄威弟玄挺

担通。 「我已破東都,取關西矣。」宇文述等諸軍躡之。至弘農宮,父老遮說玄處曰:「宮城空虛,又 東面而爭天下,此亦霸王之業。」會華陰諸楊請爲鄉導,玄感遂釋洛陽,西圖關中,宣言曰: 至,我師屢敗,不可久留。不如直入關中,開水豐倉以賑貧乏,三輔可指麾而定。據有府庫, 曉習兵事,若一渡河,則勝負難決,不如分兵拒之。通不能濟,則變、衞失援。」玄感然之,將 中流矢而斃,玄鳳稍却。樊子蓋復遣兵攻尚書省,又殺數百人。 多積栗,攻之易下。進可絕敵人之食,退可割宜陽之地。」玄鳳以爲然,留攻之,三日城不下, 東拒屈突通。 兵繼進,右驍衞大將軍來護兒復來赴援。」玄感請計於前民部尚書李子雄,子雄曰:「屈突通 帝遣武賁郎將陳稜攻元務本於黎陽,武衞將軍屈突通屯河陽,左翊衞大將軍宇文述發 子蓋知其謀,數擊其營,玄處不果進。 子蓋復出兵,於是大戰,玄處軍頻北。復請計於子雄,子雄曰:「東都援軍益 。通遂濟河,軍於破陵。玄處爲兩軍,西抗衞玄,

追兵遂至。 杜原,諸軍擊之,玄威大敗,獨與十餘騎竄林木間,將奔上洛。 玄威 西至閿鄉,上槃豆,布陣亘五十里,與官軍且戰且行,一日三敗。 追騎至,玄威叱之,皆懼而 復陣於董

戮辱,汝可殺我。」 積善抽刀斫殺之,因自刺,不死,爲追兵所執,與玄感首俱送行在所。磔其 至葭蘆戍,玄感窘迫,獨與弟積善步行。自知不免,謂積善曰:「事败矣。我不能受人 返

所殺。 屍於東都市三日,復臠而焚之。餘黨悉平。其弟玄獎爲義陽太守,將歸玄感,爲郡丞周琁玉 玄縱弟萬碩,自帝所逃歸,至高陽,止傳舍,監事許華與郡兵執之,斬於涿郡。萬碩弟

民行,官至朝請大夫,斬於長安。 並具梟磔。 公卿請改玄感姓爲梟氏,詔可之。

初,玄咸圍東都也,梁郡人韓相國舉兵應之,玄咸以爲河南道元帥。旬月間,衆十餘萬,

攻剽郡縣。 至于襄城、遇玄感敗、兵漸潰散、爲吏所執、傳首東都。

拿子雄 [

歸於周,官至冀州刺史。子雄少慷慨,有壯志。弱冠從周武帝平齊,以功授帥都 李子雄、渤海蓨人也。 祖伯賁,魏諫議大夫。 父桃枝, 三東平太守,與鄉人高仲密同

伐陳之役,以功進位大將軍、歷郴、江二州刺史,並有能名。 高 祖作相,從韋孝寬破尉迥於相州,拜上開府,賜爵建昌縣公。高祖受禪,爲驃騎將軍。 仁壽中,坐事免。

列傳

第

=:

Ŧî.

李子

雄

漢王諒之作亂 也,煬帝將發幽州兵以討之。時竇抗爲幽州總管,帝恐其有二心, 止傳舍,召募得千餘人。 問 可

相見,因擒抗。遂發幽州兵步騎三萬,自井陘以討諒。時諒遣大將軍劉建略地燕、趙,正攻 恃素貴 任 者於楊素。 ,不時相見。 素進子雄,授大將軍,拜廉州刺史,「言馳至幽州, 子雄遣人諭之。後二日,抗從鐵騎二千,來詣子雄所。 子雄伏甲,請與 抗

才也。」尋轉右武候大將軍,後坐事除名。 從幸江都。 者曰:「自至已來,此言之外,未見無禮。」憲司以子雄失詞,奏劾其事,竟坐觅。 使者曰:「皮弁遺象。安有大國君子而不識皮弁也!」子雄因曰:「中國無禮,求諸四夷。」使 |井脛,相遇於|抱犢山下,力戰,破之。 遷||幽||總管,尋徵拜民部尚書。 子雄明辯有器幹,帝甚任之。新羅嘗遣使朝貢,子雄至朝堂與語,因問其冠制所由。其 帝以仗衞不整,顧子雄部伍之。 子雄立指麾,六軍肅然。 帝大悅曰:「公眞武候 俄而復職,

之,詔鎖子雄送行在所。 遼東之役,帝令從軍自效, 子雄殺使者,亡歸玄感。 因從來護兒自東平將指滄海。四會楊玄感反於黎陽,帝疑 玄威每請計於子雄,語在玄威傳。及玄威

趙元淑

敗、伏誅、籍沒其家

作,恒典宿衞。後從晉王伐陳,先鋒遇賊,力戰而死。朝廷以其身死王事,以元淑襲父本官, 博陵趙元淑,父世模,初事高寶寧,後以衆歸周,授上開府,寓居京兆之雲陽。高祖踐

意何 別,元淑再拜致謝,連復拜曰:「鄙人竊不自量,敬慕公子。今有一女,願爲箕帚妾,公子 酣,奏女樂,元淑所未見也。元淑辭出,連曰:「公子有暇,可復來也。」後數日,復造之,宴樂 時長安富人宗連,家累千金,仕周爲三原令。有季女,慧而有色,連獨奇之,每求賢夫。聞 更侈。如此者再三,因謂元淑曰:「知公子素貧,老夫當相濟。」因問元淑所須,盡買與之。臨 元淑如是,請與相見。連有風儀,美談笑,元淑亦異之。及至其家,服玩居處擬於將相。 賜物二千段。 .如?<u>」元</u>淑感愧,遂娉爲妻。<u>連復送奴婢二十口、良馬十餘匹,加以縑帛錦綺及金寶珍</u> 元淑性疎誕,不治產業,家徒壁立。後數歲,授驃騎將軍,將之官,無以自給。 酒

太守,並有威惠。 及煬帝嗣位,漢王諒作亂,元淑從楊素擊平之。以功進位柱國,拜德州刺史,尋轉潁川 因入朝,會司農不時納諸郡租穀,元淑奏之。 帝謂元淑曰:「如卿意者,幾

玩。

元淑遂爲富人。

日當了。」元淑曰:「如臣意不過十日。」帝即日拜元淑爲司農卿,納天下租,如言而了。

悅焉。

列傳

第三十

五.

趙元淑

禮 部尚書楊玄感潛有異志,以元淑可與共亂,遂與結交,多遺金寶。遼東之役,領將軍,

一六二二

典 魏氏復言初不受金。 及 自 玄威 帝 宿 所 衞 敗,人有告其 逃歸 加加 授 路經 光 祿 臨渝 大夫,封葛公。 事者 帝親 0 元淑出 ,帝以屬吏。 臨問,卒無異辭。 其小 明年,帝復 妻魏氏 元淑言與玄感結婚,所得 帝大怒,謂侍臣曰: 征高麗,以元淑 見玄縱 對 宴極 歡 鎭 に臨渝 「此則反狀, 因 金寶則為 與 八通謀 及玄感 , 財 幷授 作 娉, 何勞重問!元 亂,其弟 實無 玄縱 他 賂 故。 遺。

解斯政

淑

及魏氏俱斬於涿郡、籍沒其家

奏事 器 幹 ,未嘗不稱旨。 河 初 南斛斯政,祖椿、魏太保、尚書令、常山文宣王,父恢,散騎常侍、新蔡郡公。政明悟有 爲 親 衞,後以軍功授儀同,甚爲楊素所禮。 煬帝悅之,漸見委信。 楊玄感兄弟俱與之交。 大業中,爲尚 書兵曹郎。 政有風 风神, 每

請 斯 計 事 政 降 也。 四 之罪,天地所不容,人神所同忿。 夷,軍 遼東之役,兵部 求 帝在 執送 國 遼東, 政 「多務,政處斷辯 將 帝 許 班 尚書段文振卒,侍郎明 之, 師 逐鎖 窮治 速,稱 玄縱 政 加 爲 還。 黨 幹理 與。 若同常刑, 至京 雅復 內不自安,遂亡奔高麗。 玄感之反也,政與通謀。及 師 ,以政告廟,左翊衞 以罪廢,帝彌屬意。 賊臣逆子何以懲肅, 大將軍 尋遷兵部侍郎。于時外 明 請變常法。」帝許之。 年, 玄縱等亡歸,亦政 宇文述 帝 復 東征 奏日 ___ |斛 高 之 麗

於是將政出金光門,縛政於柱,公卿百僚並親擊射,臠割其肉,多有噉者。 噉後烹養,收其

餘骨,焚而揚之。

劉元進

餘杭劉元進,少好任俠,爲州里所宗。 兩手各長尺餘,臂垂過膝。

骨不歸;今天下已罷敝,是行也,吾屬其無遺類矣。」於是多有亡散,郡縣捕之急。 之,變戰死,元進引趣建安,休兵養士。二將亦以師老,頓軍自守。 阿,與朱爕、管崇合軍,衆至十萬。 萬緒、光祿大夫魚俱羅率兵討焉。 子,變、崇俱爲僕射,署置百官。 江,而玄感敗。吳郡朱爕、晉陵管崇亦舉兵,有衆七萬,共迎元進,奉以爲主。 | 咸起於黎陽,元進知天下思亂,於是舉兵應之。 征遼東,徵兵吳、會,士卒皆相謂曰:「去年吾輩父兄從帝征者,當全盛之時,猶死亡太半,骸 煬帝興遼東之役,百姓騷動,元進自以相表非常,陰有異志,遂聚衆,合亡命。會帝復 毗陵、東陽、會稽、建安豪傑多執長東以應之。 緒進軍逼之,相持百餘日,爲緒所敗,保於黃山。 元進西屯茅浦,以抗官軍,頻戰互有勝負。 。 |三吳苦役者莫不響至,旬月衆至數萬。將渡 據吳郡,稱 帝令將軍吐 元進退保曲 既而楊玄 緒復破

俄而二將俱得罪,帝令江都郡丞王世充發淮南兵擊之。有大流星墜於江都,未及地而

南逝 於是出挑戰、俱爲世充所殺。 充簡銳卒掩擊,大破之,殺傷太半,自是頻戰輒敗。 遣兵,人各持茅,因風縱 險爲盜。 數 百,)磨拂 失石 其後董道冲、沈法興、李子通等乘此而起,戰爭不息,逮於隋亡。 所在。 竹木皆有聲,至吳郡而落于地。 世充旣渡江,元進將兵拒戰,殺千餘人。 火。 世充大懼,將棄營而 其衆悉降,世充坑之於黃亭澗,死者三萬人。 元進惡之,令掘地,入二丈,得一石,徑丈餘。 遁。 元進謂管崇曰:「事急矣,當以死決之。」 遇反風,火轉,元進之衆懼燒而 世充窘急,退保延陵 其餘黨往往保 棚 退。世 元 後

李密

及隋 勵 刎 爲己任。 精忘倦,愷門徒皆出 頸之交。 ,數經將領,至柱國、蒲山郡公,號爲名將。 李密字法主,真鄉公衍之從孫也。 開皇中,襲父爵蒲山公,乃散家產,賙贍親故,養客禮賢,無所愛吝。 後更折節,下帷耽 其下。 大業初,授親衞大都督,非其所好,稱疾 學,尤好兵書,誦皆在口。 祖耀、周邢國公。父寬、驍勇善戰,幹略過人,自周 密多籌算,才兼文武,志氣雄遠,常以濟物 師事 國子助教包愷,受史記 而 歸。 與楊 玄感爲

而密至,玄感大喜,以爲謀主。 及楊玄感 在黎陽, 有逆謀 玄鳳謀計於密,密曰:「愚有三計,惟公所擇。今天子出征 **陰遺家僮至京師召密,令與弟玄挺等同** 赴黎陽。 玄感 奉兵

擁 遠在遼外,地去幽州,懸隔千里。 殊未可知,此計之下也。」玄咸曰:「不然。公之下計,乃上策矣。 勢,此計之中也。 率衆,經城勿攻,輕齎鼓行,務早西入。 召,其衆自降,不戰而擒,此計之上也。 不取之,安能 出其不意,長驅入薊,直扼其喉。 動物? 若隨近逐便,先向東都,唐禕告之,理當固守。 且經 一城不拔,何以示威。」密計遂不行。 南有 巨海之限,北有胡戎之患,中间一道,理極艱危。今公 天子雖還,失其襟帶,據險臨之,故當必剋,萬全之 前有高麗,退無歸路,不過旬月,齎糧必盡。 又關中四塞,天府之國,有衞文昇,不足爲意。 引兵攻戰,必延歲月,勝負 今百官家口並在東都,若 舉麾一 今宜

不肯。 所 聽其是非, 親 日 ,不專歸密。 玄感 密揣 楚公好反 既至東都,皆捷,自謂天下響應,功在朝夕。 必爲所誤矣。 知其 、情、因謂 福嗣 而 不欲勝 旣非同謀,因戰被執,每設籌畫,皆持 玄感 請斬 心, 如 日「福嗣元 謝 何? 衆, 方可: 吾屬 安輯。」玄處曰:「何至於此!」密知言之不 非 今爲虜 同盟,實懷觀望。 矣」後玄感將西 及獲韋福嗣, 兩端。後使作檄文, 明公初起大事,而 入,福嗣 又委以腹心,是以軍旅 竟亡歸東都 姦 福 人在 用,退謂 嗣 固

何者? 魏 武 將 時 兵 李 求 (起已來,雖復頻捷,至於郡縣,未有從者。 九 子雄勸玄 錫 有彧 感 止 速稱 而 見疎。 尊號,玄感 今者密 以問 欲 於密。 正言,還恐追蹤二子,阿諛順 密曰:「昔陳勝 東都守禦尚强,天下救兵益至,公當身 自欲稱王, 意, 張耳諫 叉 非 密 而被外, 之本圖

列

第

三 十

Ŧī.

李

密

先士衆、早定關 中。 廼欲急自尊崇,何示不廣也!」玄感笑而 止

陜縣 至於閿鄉,追兵遂及 今可揚言其反,遣使迎公,因此入關,可得紿衆。」玄感遂以密謀,號令其衆,因引西入。至 據關 、欲圍 及宇文述、來護兒等軍且至,玄感謂密曰:「計將安出。」密曰:「元弘嗣統强兵於隴右, ,退無所守,大衆一散,何以自全。」玄感不從,遂圍之,三日攻不能拔,方引而西。 弘農宮,密諫之曰「公今詐衆入西,軍事在速,況乃追兵將至,安可稽留!若前

陶心。 有金, 若 授。 備遭饑饉,至削樹皮而 次邯鄲,夜宿村中,密等七人皆穿牆而遁,與王仲伯亡抵平原賊帥 金,遂相 囚於京兆 至高陽 玄感 經 密令出示使者曰 眺聽良多感,慷慨獨霑襟。霑襟何所爲?悵然懷古意。 數月,密鬱鬱不得志,爲五 然許。 敗, ,必爲葅 獄。 ,密間行入關,與玄感從叔詢相隨,匿於馮翊詢妻之舍。尋爲鄰人所告, 是時煬帝在高陽,與其黨俱送帝所。 及出關: 醢。 食。 「吾等死日,此金並留付公, 外,防禁漸弛,密請通市酒食, 今道中猶可 仲伯潛歸天水,密詣淮陽, |言詩日:「金風蕩初節,玉露凋 爲計,安得行就 鼎鑊,不規逃避 在途謂其徒曰:「吾等之命, 幸用相瘞。 每讌飲喧譁竟夕, 舍於村 中,變姓名稱 秦俗猶未平,漢道將何冀! 晚 其餘即 林。 郝孝德。 也。」衆咸然之。 此 皆報德。」 使者不以 夕 劉智遠,聚徒教 窮塗士,空軫鬱 孝德不甚禮之, 同 爲意。 使者利其 遂捕獲, 於朝露, 其徒

泣下 ·數行。 市井徒、蕭何刀筆吏。 時人有怪之者,以告太守趙他。 一朝時運合,萬古傳名器。寄言世上雄,虛生眞可愧。」詩成而 縣捕之,密乃亡去,抵其妹夫雍丘令丘君明。後

明 從子 懷義以告,帝令捕密,密得遁去,君明竟坐死。

勒 陁 兵衆 館穀 與讓合擊,大破之,遂斬須陁於陣。 太守郇王慶及通守張須陁以兵計 乃 因 兵將戰,密分兵千餘人於林木間設伏。讓與戰不利,軍稍却,密發伏自後掩之,須陁衆潰。 勇 而 ,待士馬肥充,然可與 旣 王伯當以策干讓。 東 多 無謀,兵又驟 `, 糧無所出,若矌日持久,則人馬困敝,大敵一臨,死亡無日。 郡 賊 帥翟讓聚黨萬餘人,密歸之。 勝,旣驕 讓遣說諸小賊,所至輒降下,讓始敬焉,召與計事。密謂讓曰「今 人爭利。」讓從之,於是破金堤關,掠滎陽諸縣,城堡多下之。滎陽 且狠,可一戰而擒。公但列陣以待, 讓。 讓於是令密建牙,別統所 讓數爲須陁所敗,聞其來,大懼,將遠避之。密曰:「須 其中有知密是玄感亡將,潛勸讓害之。密大懼, 部。 保為 未若直趣滎陽,休兵 公破之。」 讓不得已,

留守諸官,政令不一。明公親率大衆,直掩興洛倉,發粟以賑窮乏,遠近孰不歸附! 雄 之旅,宜當廓淸天下,誅剪羣凶,豈可求食草間,常爲小盜而已!今東都 密 朝可集,先發制人,此機不可失也。」讓曰:「僕起隴畝之間,望不至此。 復 | 說| 譲日:「昏主蒙塵,播蕩吳、越,蝟毛競起,海內饑荒。 明公以英桀之才,而統驍 士庶,中外離心, 必如所圖,請 百萬之

列

傅

第

三十

五

李密

春,出 君先發, 陽) 僕領 城 北踰 諸 軍 方 ,便爲後殿。 川 ,自羅 口襲興洛倉,破之。 得倉之日,當別議之。」密與讓領精兵七千人,以 開倉恣民所取,老弱繦負,道 路 大業十三年 不

都出 賊孟 右長 初辭不受,諸將等固請,乃從之。 劉 基 密 復 以 長 以武牢歸密,因遣仁基與孟讓率兵二萬餘人襲廻洛倉,破之,燒天津橋,遂縱兵大掠。 爲 恭 主。 兵乘之,仁基等大敗,僅以身免。密復親率兵三萬逼東都,將軍段達、武賁郎將高毗、 史,楊德方左司馬,鄭德韜右司馬。 鄭 讓掠東都,至燒豐都市而歸。 頲 等出兵七萬拒之,戰於故都,官軍敗走,密復下廻洛倉而據之。俄而德韜、德方俱死 侗 密城洛口 爲 武 在司馬,鄭虔象爲右司馬 **| 賁郎將劉長恭率步騎二萬五千討密,密一戰破之,長恭僅以身免。** 周廻四十里以居之。房彥藻說下豫州,東都大懼。 設壇場,即位,稱元年,置官屬以房彥藻爲 密攻下鞏縣,獲縣長柴孝和,拜爲護軍。 拜讓司徒,封東郡公。 其將帥封拜各有差。長白 讓上密號爲魏公。密 左長史,邴元眞 武賁郎將裴仁 譲於 是推 Ш 東

固 廻 朝失之,噬臍何及「」密曰「君之所圖,僕亦思之久矣,誠爲上策。但昏主尚在,從兵猶衆, 兵 洛 强 翟 孝 方 讓守洛口 和說密曰:「秦地 更 長 驅 属、函 ,明公親簡精銳,西襲長安,百姓孰 掃 阻 蕩京、洛,傳檄指撝,天下可定。 山帶河,西楚背之而亡,漢高都之而霸。 不 郊迎,必當 但今英雄 有 征 競起,實恐 如愚意者,令仁基守 無戦 旣 他 剋京邑,業 人 我先

矢所 者,殆將敗 和 我之所部,並山東人,既見未下洛陽,何肯相隨西入!諸將出於羣盜,留之各競雌雄。 與 中,臥於營內,後數日,東都出兵擊之。密衆大潰,棄廻洛倉, 數數 千 ·騎至陝縣,山賊歸 矣。」孝 和 日「誠 之者萬餘人。 如公言,非所 及 密時兵鋒甚銳, 也。 大軍. 既未 可 毎入 西出,請 苑, 歸洛口。 與官軍 間 行觀隙。」密從之。孝 連戰。 孝和之衆聞密 會密 若然 爲流

退,各分散

加

去。

孝和

輕騎

歸

密

清河 附密,齊郡賊帥徐圓朗、任城大俠徐師仁、淮陽太守趙他等前後款附,以千百數。 世充營於洛西、與密相拒 帝遣 , 賊帥趙君德、平原賊帥郝孝德並歸於密, 共襲破黎陽倉據之。 王世充率江、淮勁卒五萬來討密,密逆拒之,戰不利。 百餘日。武陽郡丞元寶藏、黎陽賊帥李文相、洹水賊帥張昇 柴孝和溺死於洛水,密甚傷 。周法明舉江、黃之地以

會日 之,爲世充所擊退者數百步。 作, 分令就 密遣壯 安得與人? 暮 翟讓所部王儒信勸讓爲大冢宰,總統衆務,以奪密權。 食。 密固止之。 士<u>察</u>建自後斬之,[2] 殞於牀下。 諸門並設備,讓不之覺也。 ·汝若不能作,我當爲之。」密聞其言,有圖讓之計。 明日,讓與數百人至密所,欲爲宴樂。 密與單雄信等率精銳赴之,世充敗走。 密引讓入坐,有好弓,出示讓,遂令讓射。 <u>遂殺其兄寬及王儒信</u>,幷其從者亦有死焉。 密 讓兄寬復謂讓曰:「天子止可自 具饌以待之,其所將 會世 譲欲 充列陣而至,讓出拒 乘勝進破其營, 讓 左右, 引滿 讓 將

剢

衆 所部將徐世 而 慰諭 無敢 動者。 於是率左右數百人詣讓本營。 動,爲亂兵所斫中,重創,密遽止之,僅而得免。 乃令徐世勣、單雄信、王伯當分統其衆。 王伯當、邴元眞、單雄信等入營,告以殺讓之意, 單雄信等皆叩頭求哀,密並釋

其夜 世舉 數百 其後 門,留守韋津出拒戰,密擊敗之,執津於陣。 《雨雪尺餘,衆隨之者,死亡殆盡。 劉 人,分爲三隊出擊之。 遂於

洛水造浮橋,悉衆以擊密。 未幾,世充夜襲倉城,密逆拒破之,斬武賁郎將費靑奴。 長恭、梁德重、董智通等諸將率皆沒于陣。 官軍稍却,自相陷溺, 密與千騎拒之,不利而 密於是修金墉故城居之,衆三十 其黨勸密即尊號,密不許。 死者數萬 世充僅 而 人,武賁郎將楊威、王辯、日祖 退。世充因薄其 獲免,不敢還東都,遂走河陽。 世充復移營洛北, ·餘萬。 及義師圍東都 城下,密 復來攻上春 南對鞏縣, 簡銳卒

王侗 出軍爭之,交綏 其歸路,使不得西。 後 卿本匈奴阜隸破野頭耳,父兄子弟並受隋室厚恩,富貴累世,至妻公主,光榮隆顯,舉朝莫 入朝輔政。 稱尊號,遣使者授密太尉、尚書令、東南道大行臺、行軍元帥、 俄而宇文化及殺逆,率衆自江都北指黎陽,兵十餘萬。 密遣使報謝焉。 而退 密遣徐世勣守倉城,化及攻之,不能下。密與化及隔水而語,密數之日 化及與密相遇,密知其軍少食,利在 密乃自率步騎二萬拒之。 .急戰,故不與交鋒,又遏 魏國公,令先平化及,然 會越

惡逆。 孫,傍立支庶,擅自尊崇,欲規篡奪,污辱妃后,枉害無辜。不追諸葛瞻之忠誠,乃爲霍禹之 荷國士之遇者,當須國士報之,豈容主上失德,不能死諫,反因衆叛,躬行殺虐,誅及子 天地所不容,人神所莫祐,擁逼良善,將欲何之!今若速來歸我,尚可得全後嗣。」化

懦 如此,忽欲圖爲帝王,斯乃趙高、聖公之流,吾當折杖驅之耳。」化及盛修攻具,以逼黎陽

及默然,俯視良久,乃瞋目大言曰:「共你論相殺事,何須作書語邪。」密謂從者曰:「化及庸

倉城,

密領輕騎五百馳赴之。

倉城兵又出相應,

焚其攻具,

經夜火不滅。

以獻 楚等,乃歸金墉。 舉郡降密,以軌爲滑州總管。密引兵而西,遣記室參軍李儉朝於東都,執殺煬帝人于弘達 兵歸于密者,前後相繼。初,化及以輜重留於東郡,遣其所署刑部尚書王軌守之。至是,軌 自辰達酉。 下有人獲罪,亡投化及,具言密情。化及大怒,其食又盡,乃渡永濟渠,與密戰于童山之下, 越王侗。侗以儉爲司農少卿,使之反命,召密入朝。密至溫縣,聞世充已殺元文都、盧 密知化及糧且盡,因爲與和,以敝其衆。化及不之悟,大喜,恣其兵食,冀密饋之。會密 密爲流矢所中,頓於汲縣。化及掠汲郡,北趣魏縣,其將陳智略、張童仁等所部

密初難之,哪元眞等各求私利,遞來勸密,密遂許焉。初,東都絕糧,人歸密者, 世 一元旣得擅權,乃厚賜將士,繕治器械,人心漸銳。然密兵少衣,世充乏食,乃請交易。 日有數百。

列 傅

第 Ξ -|-Ji.

李 密

城降於 遣 向 充 遇 渡御河,密遣裴行嚴率衆逆之。 悉衆來決戰,密留王伯當守金墉,自引精兵就偃師,北阻邙山以待之。 「不殺元眞,公難未已。」密不答,而元眞知之,陰謀叛密。 於是衆心漸怨。 至 人潛 軍 洛 此, 重 至 Π̈́ 創 得食,而降人益少,密方悔而止。密雖據倉,無府庫,兵數戰不獲賞,又厚撫初附之兵, 世充 引 ,密候騎不 ,密甚惡之。 世充 世充 夜圍 矣。 時遣邴元眞守興洛倉。 ·時覺,比將出戰,世充軍悉已濟矣。 密陰知之而 偃師,守將鄭頗爲其部下所翻,以城降 世充夜潛濟師 不發其 會日暮,暫交而退,行儼、孫長樂、程饒金等驍將十數 ,詰朝而陣,密方覺之,狼狽出戰,於是敗績,與萬餘 事 大 因 元眞 與衆謀,待世充之兵半濟洛水,然後 起自微賤,性又貪鄙,宇文溫疾之,每謂密曰 密自度不能支,引騎而遁。 揚慶聞而告密,密固疑焉。會世充 世
充。 密將入洛口 世充軍至,令數百騎 [倉城, 擊之。及世 元眞竟以 元眞 人馳 人 皆

當 心 明公與長安宗族有疇昔之遇,雖不陪起義,然而阻東都,斷隋歸路,使唐國不戰而據京師, 兵敗矣! 共 安可保乎。」密乃止。 歸 密 關中。 衆 漸 久苦諸君,我今自刎,請以謝衆。」衆皆泣,莫能仰視。 離 將 密身雖愧無功,諸君必保富貴。」其府掾柳變對曰:「昔盆子歸漢 如黎陽。 時王伯當棄金墉,保河陽,密以輕騎自武牢渡河以歸之,謂伯當 人或謂密曰:「殺翟讓 之際,徐世勣幾至 密復日:「諸君幸 於死。 今創 尚 猶未復, 食均 不相

此 亦公之功也。」衆咸曰:「然。」密遂歸大唐,封邢國公,拜光祿卿。

装仁基

|皇 初 匹。 **賁郎將,從將軍李景討叛蠻向思多於黔安,以功進位銀青光祿大夫,賜奴婢百口,** 位,諒舉兵作亂,仁基苦諫。諒大怒,囚之於獄。 麗,進位光祿大夫。 擊吐谷渾於張掖,破之,加授金紫光祿大夫。斬獲寇掠靺鞨,拜左光祿大夫。 ,爲親衞。平陳之役,先登陷陣,拜儀同,賜物千段。 河 東裴仁基,字德本。 祖伯鳳,周汾州刺史。 及諒敗,帝嘉之,超拜護軍。 父定,上儀同。 以本官領漢王諒府親信。 仁基少驍武,便弓馬。 數歲,改授武 絹五 從征高 煬帝 開 百

基 ||陁 善戰,密復 前,士卒勞敝,所得軍資,即用分賞。 長短,欲有所奏劾。 爲密所殺,仁基悉收其衆,每與密戰,多所斬獲。 帝幸江都,李密據洛口,令仁基爲河南道討捕大使,據武牢以拒密。 以 爲絳郡公,甚相委昵。 仁基懼,遂殺懷靜,以其衆歸密。 監軍御史蕭懷靜每抑止之,衆咸怨怒。 時隋大亂 密以為 ,有功者不錄。 河東郡公。 及滎陽通守張須 其子行儼,驍勇 | 懷 仁基 見强 又陰持仁 寇在

王世 列 元 傅 第 以 Ξ 東都食盡,悉衆詣偃師,與密決戰。 + 五. 裴 仁 基 密問計於諸將,仁基對曰:「世充盡銳而

階下。 尚食直長陳謙、祕書丞崔德本等謀反,令陳謙於上食之際,持七首以劫世充,行儼以兵應於 人敵」。 難違諸將之言,戰遂大敗,仁基爲世充所虜。世充以其父子並驍銳,深禮之,以兄女妻行儼。 器械精,一也,決計而來,二也,食盡求鬭,三也。我按甲蓄力,以觀其敝,彼求鬭不得,欲走 出,數戰以疲之,多方以誤之』者也。」密曰:「公知其一,不知其二。 我且按甲,世充重出,我又逼之。 無路,不過十日,世充之首可懸於麾下。」單雄信等諸將輕世充,皆請戰,仁基苦爭不得。 至,洛下必虚,可分兵守其要路,令不得東。 及僭尊號,署仁基爲禮部尚書,行儼爲左輔大將軍。行儼每有攻戰,所當皆披靡,號爲「萬 世充憚其威名,頗加猜防。 指麾事定、然後出越王侗以輔之。 如此則此有餘力,彼勞奔命,兵法所謂『彼出我歸,彼歸我 仁基知其意,不自安,遂與世充所署尚書左丞宇文儒童、 事臨發,將軍張童仁知其謀而告之,「八」俱爲世充 簡精兵三萬,傍河西出,以逼東都。 東都兵馬有三不可當: 世充却還,

史臣曰:古先帝王之興也,非夫至德深仁格於天地,有豐功博利,弘濟艱難,不然,則其

所殺。

外禦, 然後 變謳歌,遷寶鼎。 自 日 周 不 邦不競,隋運將隆,武元、高祖並著大功於王室,平南國,摧東夏,總百揆,定三方, 暇給,委心膂於俊傑,寄折衝於爪牙,文武爭馳,羣策畢舉。 于時 匈奴驕倨,勾吳不朝,既爭長於黃池,亦飲 馬於清渭。 服猾夏之虜,掃黃旗 高祖 內綏

之寇,峻五

岳以作鎭,環四海以爲池,厚澤被於域中,餘威震於殊俗

艱難 不修。 識旌旗什伍之容,安知行師用兵之勢!但人自爲戰,衆怒難犯,故攻無完城,野無橫陣,星離 羣下,足以轥轢軒、唐,奄吞周、漢,子孫萬代,人莫能窺,振古以來,一君而已。 遂乃外疎猛 海。 有 以 顯 士,內忌忠良,恥有盜竊之聲,惡聞 踐三韓之域。 無罪 陳沙亡 竭 ,不務以道恤人,將以申威海外。 民力凋盡,徭戍無期,率土之心,鳥驚魚潰。方西規奄於,南討流求,親總八狄之師,屢 煬帝蒙故業,踐丕基,阻伊、洛而固崤、函,跨兩都而總萬國。 於是鑿通渠,開馳道,樹以柳杞,隱以金槌。西出玉門,東踰碣石,塹山堙谷,浮河達 趸 誠 秦之志 ,畏首畏尾,進退維谷。 克勝者,以功高蒙隱戮。或斃鋒刃之下,或殞鴆毒之中,賞不可以有功求,刑不可 自以威行萬物,顧指無違,又躬爲長君,功高曩列,寵不假於外戚,權不逮於 張角 亂漢之謀 哉 彼山東之羣盜,多出 喪亂之事。 皆苦於上欲 運拒諫之智,騁飾非之辯,恥轍迹之未遠,忘德義之 出師命將,不料衆寡,兵少力屈者,以畏懦受 無厭,下不堪命,飢寒交切,救死萑蒲。 厮役之中,無尺土之資,十家之產,豈 矜曆數之在己,忽王業之

列

莫之能禦。 舟中,思早告而莫追,唯請死而獲可。身棄南巢之野,首懸白旗之上,子孫勦絕,宗廟爲墟 棊布,以千 百數。 煬帝魂褫氣懾,望絕兩京,謀竄身於江湖,襲永嘉之舊迹。 豪傑因其機以動之,乘其勢而用之,雖有勇敢之士,明智之將,連踵覆沒, 旣而禍生轂下,釁起

吞六國 之所由 事。 始要終,若合符契矣 益 寇讎,勞近以事遠,求名而喪實。 兵纏魏闕,阽危弗圖,圍解雁門,慢遊不息。 天奪之魄,人 之迹同,所用之心異也。 語人謀則勾麗不侔於陳國。 之虛實,九鼎之譬鴻毛,未喻輕重,培塿之方嵩岱,曾何等級!論地險則遼隧未擬於長江, 興也勃焉。 |其災,羣盜並興,百殃倶起,自絕民神之望,故其亡也忽焉。 訊之古老,考其行事,此高 然其動也,思以安之,其勞也,思以逸之。是以民致時雍,師無怨讟,誠在於愛利,故其 夫以開皇之初,比於大業之盛,度土地之廣狹,料戶口之衆寡,算甲兵之多少,校倉廪 [興,而煬帝之所以滅者也。 ,高祖統一九州 煬帝嗣承平之基,守已安之業,肆其淫放,虐用其民,視億兆如草芥,顧羣臣 ,二世虐用威刑,煬帝肆行猜毒,皆禍起於羣盜,而身殞於匹夫。 高祖北却强胡,南幷百越,十有餘載,戎車屢動,民亦勞止,不爲無 高祖掃江南以清六合,煬帝事遼東而喪天下。其故何哉?所爲 可不謂然乎!其隋之得失存亡,大較與秦相 類。 始皇幷 如 原

玄感宰相之子,荷國重恩,君之失德,當竭股肱。未議致身,先圖問鼎,遂假伊、霍之事,

密遭會風雲,奮其鱗翼,思封函谷,將割鴻溝。 將肆莽、卓之心。 四方,威行萬里。 雖運乖天眷,事屈興王,而義協人謀,雄名克振,壯矣!然志性輕狡,終致 人神同疾,敗不旋踵,兄弟就葅醢之誅, **朞月之間**, 先人受焚如之酷,不亦甚乎 衆數十萬,破化及,摧世充,聲動 ! 李

校勘記

顚覆,其度長挈大,抑陳、頂之季孟歟?

- (一) 李子雄 北史本傳作「李雄」。
- = 十八年改爲臺城縣,大業初州廢。」 廉 州 原作「廣州」,據北史李雄傳改。 廉州距幽州較近,而 按:本書地理志中趙郡稾城縣條:「【開皇】十年置廉州, 廣州則距幽州甚遠。 作廉州,是。
- 【8】東平 本書來護兒傳作「東萊」。
- 〔五〕東都 原作「東郡」,據本書煬帝紀下、御覽一○七改。
- C 以 | 蔡建 通鑑隋義寧二年作「蔡建德」。
- [七]王辯 原作「王辨」、據本書本傳及恭帝紀改。
- 八 張 童 仁 北史王世充傳及本書字文化及傳、又王世充傳作「張童兒」。

列

傳

列傳第三十六

誠節

誠節傳。 也。 千載之後,懍懍如生。 固知士之所重,信在茲乎!非夫內懷鐵石之心,外負凌霜之節,孰能安之若命,赴蹈如歸者 雄、嵇紹,凡在立名之士,莫不庶幾焉。至於臨難忘身,見危授命,雖斯文不墜,而行之蓋寡, 於夏癸,比干竭節於商辛,申蒯斷臂於齊莊,弘演納肝於衞懿。爰逮漢之紀信、欒布,晉之向 名,在乎仁義而已。故仁道不遠,則殺身以成仁,義重於生,則捐生而取義。 皇甫誕等,當擾攘之際,踐必死之機,白刃臨頸,確乎不拔,可謂歲寒貞柏,疾風勁草, 易稱「聖人大寶日位,何以守位日仁。」又云:「立人之道日仁與義。」然則士之立身成 豈獨聞彼伯夷,懦夫立志,亦冀將來君子有所庶幾。 故掇採所聞,爲 是以龍逢投軀

列 傳 第 = + 六

誠 飾

劉弘

郎中、襄城、沛郡、穀陽三郡太守、西楚州刺史。及齊亡,周武帝以爲本郡太守 劉弘字仲遠,彭城叢亭里人,魏太常卿芳之孫也。 少好學,有行檢,重節概。 仕齊行臺

子長信,襲其官爵。 餓,欲降之,弘抗節彌厲。 死亡太半,糧盡無所食,與士卒數百人煮犀甲腰帶,及剝樹皮而食之,一 封濩澤縣公,拜泉州刺史。 在立功,不安佐職。平陳之役,表請從軍,以行軍長史從總管吐萬緒度江。 尉迥之亂也,遣其將席毗掠徐、兗。 賊悉衆來攻,城陷,爲賊所害。 會高智慧作亂,以兵攻州,弘城守百餘日,救兵不至。前後 弘勒兵拒之,以功授儀同、永昌太守、齊州 上聞而嘉歎者久之,賜物二千段。 無離叛。 以功加 賊 上 長史。志 知其飢 出戰, 一儀同,

皇甫誕 子無逸

入爲比部、刑部二曹侍郎,俱有能名。 有器局。周畢王引爲倉曹參軍。高祖受禪,爲兵部侍郎。 皇甫 誕字玄慮,三安定烏氏人也。 遷治書侍御史,朝臣無不肅憚。 祖和、魏膠州刺史。父璠、周隋州刺史。誕少剛毅、 數年,出爲魯州長史。開皇中,復 上以百姓多流亡,令

誕 爲 河南道大使以檢括之。 及還,奏事稱旨,上甚 悦, 令判大理少卿。 明年,一 遷尙書右

餓 以 母 漫去 職。 未朞,起令視事。 尋轉尙書左丞

贊務 計,敢 之謀 拜弁 逐潛 累代之榮。 顯名節, 協謀,閉 君臣 ", 聲績 與義 州 位定,逆順勢殊,士馬雖精,難以 , 三 發兵作亂。 時 以死 總管司 漢王諒爲 有 城 徒據城抗 請 克宣。 國 拒 如 諒 。」諒怒而囚之。 更遷延,陷身叛逆,一挂刑書,爲布衣黔首不可得也。願察區 通規,加等飾終,抑惟令典。 、馬、總府政事,一以諮之,諒甚敬焉。 并州總管,朝廷盛選僚佐,前後長 値狂 諒襲擊破之,並抗節而 拒。 誕數諫止,諒不納。 悖 衆寡一 構禍,凶威 不敵,奄致非 及楊素將至,諒 孔熾, 、取勝。 遇害。 幷州 命。 確殉 誕因流涕曰:「竊料大王兵資,無敵京師 願王奉詔入朝, 屯淸源 單誠,不從妖逆。 總管司馬皇甫誕,性 可 帝以誕亡身徇國 贈 (史、司馬,皆一時名士。上以)誕公方著稱 及煬帝卽位,徵諒入朝,諒 柱國 以拒之。諒主簿豆盧毓 一,封 弘義 守臣子之節,必有松、喬之壽, 公 雖 ,嘉悼者久之,下 諡 幽 理淹通 繁寇 日 之後, 明 區之心,思萬全之 手,而 一志懷審 出 誕於獄,相 用 子 無逸 雅 諮 ·詔曰:「褒 者。 正,効官 志 議 彌厲 嗣 加以 王 頍 與

無 逸尋爲 清陽太守, 政甚有聲。 大業令行,舊爵例除, 以無逸誠義 賜爵平輿侯

入爲刑部 侍郎 守岩 武 衛將 軍

列

傅

第

==

+

六

誠

節

初,漢王諒 之反也,州縣莫不響應。 有嵐州司馬陶模、繁畤令敬釗,並抗節不從。

大 四 二

陶 模

煬帝嘉之,拜開府,授大興令。 之。軍吏進曰:「若不斬模,何以壓衆心。」於是囚之於獄,悉掠取資財,分賜黨與。 將 赴 皇帝梓宮未掩,翻爲厲階」鍾葵失色曰:「司 一逆,模拒之曰:「漢王所圖不軌,公荷國厚恩,致位方伯, 陶模,京兆人也。 性明敏,有器幹。 楊玄處之反也,率兵從衛玄擊之,以功進位銀青光祿大夫, 仁壽初,爲嵐州司馬。 **"馬反邪。」臨之以兵,辭氣** 謂當竭誠 諒旣作亂,刺史喬鍾葵發兵 效命以答慈造, 不撓, 葵義 及諒 而

復 則可,不然當斬!」釗答曰:「忝爲縣宰,遭逢逆亂,進不能保境,退不能死節,爲辱已多,何乃 將 及 以爲官相迫也?死生唯命,餘非所聞。」鍾葵怒甚,熟視到曰「卿不畏死邪。」復將殺之。 喬 , 贼至,力戰城陷。 賊帥墨弼掠其資產而臨之以兵, 釗辭氣不撓。 弼義而止之,執送於 爲 鍾葵所。 敬釗字積善,河東蒲坂人也。父元約,周布憲中大夫。釗,仁壽中爲繁時令,甚有能名。 敬釗 鍾葵釋之,署爲代州總管司馬,釗正色拒之,至於再三。 鍾葵忿然曰「受官 豈有 平, 釋

會楊義臣軍至,鍾葵遽出戰,因而大敗,釗遂得免。

虞世基奏格而止。 大業三年,煬帝避暑汾陽宮,代州長史柳銓、司馬崔寶山上其狀,付有司將加褒賞, 後遷朝邑令,未幾,終。

游元

六,齊司徒徐顯秀引爲參軍事。 爲殿內侍御史。 游元字楚客,廣平任人,「三魏五更明根之玄孫也。父寶藏,位至太守。元少聰敏,年十 晉王廣爲揚州總管,以元爲法曹參軍,父憂去職。後爲內直監。煬帝嗣位, 周武帝平齊之後,歷壽春令、譙州司馬,俱有能名。開皇中,

遷尙

書度支郎。

造,欲何所道。」按之愈急,仍以狀劾之。 請屬。元不之見。他日,數述曰:「公地屬親賢,腹心是寄,當咎身責己,以勸事君,乃遣人相 軍 敗績,帝令元按其獄。 遼東之役,領左驍衞長史,爲蓋牟道監軍,四拜朝請大夫,兼治書侍御史。宇文述等九 述時貴倖,其子士及又尚南陽公主,勢傾朝廷。 帝嘉其公正,賜朝服一襲。 遣家僮造元,有所

以陷身絕域之所,軍糧 九 年,奉使於黎陽督運,楊玄感作逆,乃謂元曰:「獨夫肆虐,天下士大夫肝腦塗 斷絕,此亦天亡之時也。 我今親率義兵,以誅無道,卿意如何。」元正 一地,加

列

百匹。 聞 節,上答鴻恩。 色答曰:「尊公荷國寵靈,功參佐命,高官重祿,近古莫儔。公之弟兄,青紫交映,當謂竭誠盡 命。」玄感怒而囚之,屢脅以兵,竟不 拜其子仁宗爲正議大夫、弋陽郡通守。 土未乾,親圖 反噬,深爲 屈節,於是害之。帝甚嘉歎,贈銀靑光祿大夫,賜縑五 明公不取 、願思 禍 福之端。僕有 死 mi 已,不敢

馮慈明

邸 年,攝 時兵部侍郎斛斯政亡奔高麗,帝見慈明,深慰勉之。俄拜尚書兵曹郎,加位朝請大夫。十三 受禪,開三府官,除司空司倉參軍事。累遷行臺禮部侍郎。晉王廣爲幷州總管,盛選僚屬 年十四,爲淮陽王開府參軍事。 以慈明爲司士。後歷吏部員外郎,兼內史舍人。煬帝卽位,以母憂去職。 ,後更在臺,意甚銜之,至是謫爲伊吾鎭副。未之官,轉交阯郡丞。大業九年,被徵入朝 馮慈明字無佚,信都長樂人也。父子琮,仕齊官至尚書右僕射。慈明在齊,以戚屬之故, 江都郡丞事 尋補司州主簿,進除中書舍人。周武平齊,授帥都督。高祖 帝以慈明始事藩

明於坐,勞苦之,因而謂曰:「隋祚已盡,區宇沸騰,吾躬率義兵,所向無敵,東都危急,計 李密之逼 東都 也,詔令慈明安集瀍、洛,追兵擊密。 至鄢陵,爲密黨崔樞所執。密延慈 日

贈柱國、戶部尚書、昌黎郡公,諡曰壯武。 帝歎惜之、贈銀青光祿大夫。拜其二子惇、怦俱爲尚書承務郎。王充推越王侗爲主,至重 食至此。 黨所獲。 魏公相待至厚,曾無咸戴。寧有畏乎。」慈明勃然曰:「天子使我來,正欲除爾輩,不圖爲賊 守,論賊形勢。 不義之言,非所敢對。」密不悅,冀其後改,厚加禮焉。 今欲率四方之衆,問罪於江都,卿以爲何如。」慈明答曰:「慈明直道事人,有死而已, 官軍且至,早爲身計。」讓益怒,於是亂刀斬之。時年六十八。梁郡通守楊汪上狀, 我豈從汝求活耶。欲殺但殺,何須駡詈」」因謂羣賊曰:「汝等本無惡心,因饑饉逐 密知其狀,又義而釋之。 出至營門,賊帥翟讓怒曰:「爾爲使人,爲我所執, 慈明潛使人奉表江都,及致書東都留

幾,又盛花燭納室。時論醜之。 長子忱,先在東都,王克破李密,忱亦在軍中,遂遣奴負父屍柩詣東都,身不自送。未

張須陁

康之役,百姓失業,又屬歲饑,穀米踊貴,須陁將開倉賑給,官屬咸曰:「須待詔勑,不可擅 三百段。 張 須陁,弘農閿鄉人也。性剛烈,有勇略。 煬帝嗣位,漢王諒作亂幷州,從楊素擊平之,加開府。大業中,爲齊郡丞。 弱冠,從史萬歲討西爨,以功授儀同,賜物 會興遼

列傅

第三

十六

誠節

六四六

與。」須陁曰:「今帝在遠、遣使往來、必淹歲序。百姓有倒懸之急、 吾若以此 養罪,死無所恨。」先開倉而 後上狀,帝知之而不責 也 如待報至,當委溝壑矣。

邑,復破之,斬五千餘級,獲六畜萬計。時天下承平日久,多不習兵,須陁獨勇決善戰。又長 意擊之,薄衆大潰,因乘勝斬首數千級。薄收合亡散,得萬餘人,將北度河。須陁追之,至臨 爲 餘萬攻章丘。須陁遣舟師斷其津濟,親率馬步二萬襲擊,大破之,賊徒散走。 於撫馭,得士卒心,論者號爲名將。薄復北戰,連豆子航賊孫宣雅、石秪闍、郝孝德等衆 遂引軍南,轉掠魯郡。 須陁躡之,及于岱山之下。 薄恃驟勝,不設備。 舟 **'師所拒,前後狼狽,獲其家累輜重不可勝計,露布以聞。 帝大悅,優詔褒揚,令使者圖** 明 ,賊帥王薄,聚結亡命數萬人,寇掠郡境。 官軍擊之,多不利。 須陁選精銳,出其不 須陁發兵拒之,薄 旣至津梁,復

謂 敗走。 級,獲輯重三千兩。 ,

財競赴之,

圍百餘重,

身中數創,

勇氣彌厲。

會城中兵至,

財稍却,

須陁督軍復戰,

長才 我不能 其年 後數旬,賊帥秦君弘、郭方預等合軍圍北海,兵鋒甚銳,須陁謂官屬曰「賊自恃强, ·,賊裴長才、石子河等衆二萬,奄至城下,縱兵大掠。 須陁未暇集兵,親率五 救,吾今速去,破之必矣。」於是簡精兵,倍道而進,賊果無備,擊大破之,斬數萬 司隸刺史裴操之上狀,帝遣使勞問之。 一騎與

其形容

而奏之。

緍 迫 面 縛來降。其黨解象 賊左孝友衆將十萬,屯於 、王良、鄭大彪、李畹等衆各萬計,須陁悉討平之,威振 蹲 狗 Щ 須陁列八風營以逼之,復分兵扼其要害。孝友 東夏。

功遷齊郡通守,領河南道十二郡黜陟討捕大使。

陁軍 走之。 備總父兵,元備時在齊郡,遇賊 兵, 晝夜 四,衆皆敗散, 滎陽,須陁拒之。讓懼而退,須陁乘之,逐北十餘里。 霍 小漢等衆各萬餘,擾濟北,須陁進軍擊走之。 干,逐敗 俄 轉榮陽通守。 而 、號哭,數日不 賊盧明月衆十餘萬,將寇河北,次祝阿,須陁邀擊,殺數千人。 績。 乃仰天曰:「兵敗如 密與讓合軍圍之,須陁潰圍輒出,左右不能盡出,須陁躍馬入救之。 時李密說讓取洛口倉,讓憚須陁,不敢進。 止。 越王侗造左 竟不果行 此, 何面 光祿 大夫裴仁基,招撫其衆,移鎭武牢。 見天子乎。乃下馬戰死。時年五十二。 尋將兵拒東郡賊翟讓,前後三十餘戰,每破 時李密先伏數千人於林木間,邀擊須 密勸之,讓遂與密 賊呂明星、帥仁泰 帝令其子元 率 其所部 來往數 兵逼

楊善會

俄 而 Щ 楊 善 東饑饉,百姓 |會字 敬仁, 【相聚爲盜,善會以左右數百人逐捕之,往皆克捷。其後賊帥張金稱衆數 弘農華陰 人也。 父初,官至毗陵太守。善會,大業 中爲鄃令,以清正 聞

列

傅

之策 萬 斬 餘 嘗 于 戰 煬 來 冠 鋒 漳南 黨。 時 援 負 其 氏 進止 敗 山 遣 頻 天 善會 將軍段達來討金 賊 東思亂 毎 與辯 縣界, 與 一以謀之,於是大克。金稱 | 會 善會 帥 決 恨 追 高 與 戦 衆 戰,不利 平原 以 士 捕 屠 從 寡 達, 賊 勁 城剽邑, 斬 懸 盜 Ż, 乃 通守楊元弘步騎數萬 兵千人邀擊,破之,擢 感殊,未 傳首 如 退 傳首 市 善會選 走 稱,善會進 郡 江 郡 能 都 縣 行 乘 縣 滅 莫能 宮。 在 精銳五 微 勝 賊 所 逐 弱 復引 帝 ò 計於達,達不能用, 禦。 、陷沒 破 會太僕楊 帝 百赴之,所當皆靡,辯 下 其 詔 渤海賊孫宣雅、高士達等衆數十萬,破 賜 善會率勵所領, 營, 衆, 拜朝請大夫、淸河郡丞。 相 褒 以 湯 繼 盡 襲其本營。 尙 義 芝。 0 方 俘 臣討 甲 能抗 其 矟 衆 金稱 弓 0 賊 軍竟敗 金稱 與賊搏 劍 武賁 者 復 軍 將 唯 進 爲 復 郎 焉 (拜清) 善會 數 戦 賊所 振 將 百 賊 王辯 金稱稍 達深謝善會 或 河 人 而 敗,退保臨 H 已。前 通 遁 退守本營, 軍亦至, 有 守。 逃, 更屯 數 後七 其年 後 黎陽 聚,以 歸 金稱 淸 諸 ,從楊義 百 漳 後 毎 南 餘 軍 復 挫 而 取 輕 還,軍 陣, 各還 其鋒 與 兵掠 善會 冠 招 未 氏 賊 集

陷 會 7,不能擒汝等。 胧 達 所 之。 所 執 部 建德 將 建 竇 德 我豈是汝屠酤兒輩,敢欲更相吏邪。」臨之以兵,辭氣不 旣 建 釋 德 下 而 信都 禮 自 之,用 號 で、復擾 長 樂王 為具 清河 州 來攻信 善善 刺 會 史。 逆 都 善會 拒 臨清 之,反爲所 駡 之日 賊 王 [:「老 安 敗 阻 嬰城 兵 賊 、數千、高 何 敢 固 守 擬 與 議 建 賊 或 德 重 建德猶欲活 士 之 相 影 四 恨 響 旬 吾 力 城

之,爲其部下所請,又知終不爲己用,於是害之。 清河士庶莫不傷痛焉。

獨孤盛

獨孤盛,上柱國楷之弟也。 性剛烈,有膽氣。 煬帝在藩,盛以左右從,累遷爲車騎 將

軍。 及帝嗣位,以藩邸之舊,漸見親待,累轉爲右屯衞將軍

物語 兵? 形勢太異 宇文化及之作亂也,裴虔通引兵至成象殿,宿衛 |不及被甲,與左右十餘人逆拒之,爲亂兵所殺。 也」。處通曰:「事勢已然,不預將軍事。 者皆釋仗而 將軍愼無動。」盛大駡曰:「老 越王侗稱制, 走。 贈光祿大夫、紀國公, 盛謂虔通曰:「何物 賊 是何

元文都

諡

日武節。

丞,轉太府少卿。 仕周爲右侍上士。 元文都,洵陽公孝矩之兄子也。父孝則,周小冢宰、江陵總管。 煬帝嗣位,轉司農少卿、司隸大夫,尋拜御史大夫,坐事免。 開皇初,授內史舍人,歷庫部、考功二曹郎,俱有能名。 文都性鯁直,明辯有器 未幾,授太府 擢爲尚書左

卿,帝漸任之,甚有當時之譽。

軍、攝右翊衞將軍、魯國公。 都 與達、 大業十 津等共推越王侗爲帝。 三年,帝幸江都宮,詔文都與段達、 密於是請降,因授官爵,禮其使甚厚。 旣而宇文化及立秦王浩爲帝,擁兵至彭城 侗署文都為內史令、開府 皇甫 無逸、韋津等同 王充不悦,因 儀同三司 爲 光 東都 禄 與文都有隙 ,所在響震。 大夫、左驍 留守。 及帝崩 文都 文 衞 都 大 知 將 諷

侗

遣使通

於李密。

陰有

侗復以文都領御史大夫,充固執而止。

盧楚說文都曰:「王充外軍一將

耳, 遣 以 盛,度終不 城 除 方方 謀 出 人謂之日 本 作 爲 非留守之徒,何得預 文都 亂 或 ·免,謂文都 患。」文都然之,遂懷奏 顧謂 文都 何爲者 侗日 領規遣 [] 百. 「公自 呼之, 臣 吾事 今朝亡, 陛 日 一元文都、盧楚謀相 充稱 見 1 王將 入人殿。 且洛口 疾 不赴。 |下亦當夕及。] |侗慟哭而 軍 之敗,罪不容誅,今者敢懷跋扈,宰制時政,此 事 也。」文都遷延而 至夜作亂,攻東太陽門而 臨發,有人以告充。 殺害,請 泣,侗遣 斬文都,歸罪司寇。」侗 遣之,左右莫不憫 充時在朝堂,懼而馳還含嘉 其 入,拜於紫微觀下。 署 將 軍黃桃樹 默。 見 兵 執 出 勢 至 文 丽 都 漸 興 不 侗

盧楚

教門,

| 充令左右亂斬之, 諸子並見害

盧楚,涿郡范陽人也。 祖景祚、魏司空掾。 楚少有才學, 鯁急口吃, 言語澀難。大業中,

爲尙書右司郎,當朝正色,甚爲公卿所憚。 及帝幸江都,東都官僚多不奉法,楚每存糾舉

無所廻避。

官署,賊黨執之,送於充所。一充奮袂令斬之,於是鋒刃交下,肢體糜碎。 同去。 文都等同心勠力以輔幼主。及王充作亂,兵攻太陽門,武衞將軍皇甫無逸斬關逃難,呼楚 越王侗稱尊號,以楚爲內史令、左備身將軍、攝尙書左丞、右光祿大夫,封涿郡公,與元 楚謂之曰:「僕與元公有約,若社稷有難,誓以俱死,今捨去不義。」及兵入,楚匿於太

劉子翊

素見而 而亡。 仕 齊 殿中將軍。 劉子翊,彭城叢亭里人也。父偏,齊徐州司馬。子翊少好學,頗解屬文,性剛謇,有吏幹。 黑之,奏爲侍御史。時永寧令李公孝四歲喪母,九歲外繼,其後父更別娶後妻,至是 河間劉炫以無撫育之恩,議不解任。子翊駁之曰 開皇初,爲南和丞,累轉秦州司法參軍事。十八年,入考功,尚書右僕射楊

子之情,猶須隆其本重。 「爲人後者,爲其父母朞」。報朞者,自以本生,非殊親之與繼也。父雖自處傍尊之地,於 (標云:「繼母如母,與母同也。」當以配父之尊,居母之位,齊杖之制,皆如 是以令云:「爲人後者,爲其父母並解官,申其心喪。 父卒母 親 母。 叉

×1

傳

第三

十

六

誠節

父後者雖不服,亦申心喪。 其繼母嫁不解官。」此專據嫁者生文耳。 將知繼母在

可獨異?三省令旨,其義甚明。今言令許不解,何其甚謬, 父之室,則制同親母。 若謂非有撫育之恩,同之行路,何服之有乎。服旣有之,心喪焉

養,必由父命,無命而出,是爲叛子。」於是下詔從之。然則心服之制,不得緣恩而 制,王昌復何足云乎。又晉鎭南將軍羊祜無子,取弟子伊爲子。ो枯薨,伊不服重,討妻 不攝職事。于時議者,不以爲非。 极也妻,是爲白也母。 則 之者始至,此復可以無撫育之恩而不服重乎。昔長沙人王毖,漢末爲上計詣京 母之來,在子出之後,制有淺深者,考之經傳,未見其文。 人敦之以孝慈,弘之以名義。是使子以名服,同之親母,繼以義報,等之己生。 爲 論云:「禮者稱情而立文,仗義而設敎。」還以此義,諭彼之情。 繼母之黨服。」豈不以出母族絕,推而遠之,繼母配父,引而親之乎。子思曰:「 且 伊辭曰:「伯生存養己,伊不敢違。 後 人者爲其父母春,未有變隔以親繼,親繼旣等,故知心喪不殊。服問云:「母出 不爲假也妻,是不爲白也母。」定知服以名重,情因父親,所以聖 然則繼母之與前母,於情無別。若要以撫育始生服 然無父命,故還本生。」尚書彭權議:「子之出 譬出後之人,所後者初亡,後 稱情者,稱如母之 如謂繼 (師) 旣 生也。

字,義用不殊,禮律兩文,所防是一。將此明彼,足見其義,取譬伐柯,何遠之有。 論」者,即同眞法。律以弊刑,禮以設敎,准者准擬之名,以者卽眞之稱。「如」「以」一 本父之後妻也。」然本父後妻,因父而得母稱,若如來旨,本父亦可無心喪乎。何直父 情,仗義者,仗爲子之義。名義分定,然後能尊父順名,崇禮篤敬。苟以母養之恩始成 復有異乎。斯不然矣,斯不然矣。今炫敢違禮乖令,侮聖干法,使出後之子,無情於本 如禮云:「其父析薪,其子不克負荷。」傳云:「衞雖小,其君在焉。」 若其父而有異,其君 以言之?「其」「舊」訓殊,所用亦別,舊者易新之稱,其者因彼之辭,安得以相類哉?至 別有所重,非復純孝,故言『其』已見之。「尽」目以其父之文,是名異也。」此又非通論。何 之後妻。論又云:「禮言舊君,其尊豈復君乎? 已去其位,非復純臣,須言『舊』以殊之。 之辭,卽同重法,若使輕重不等,何得爲「如」。律云「准枉法」者,但准其罪,「以枉法 之子猶子也,私昵之心實殊,禮服之制無二。彼言「以」輕「如」重,自以不同。此謂如重 下,而居齊朞之上,禮有倫例,服以稱情。繼母本以名服,豈藉恩之厚薄也。 臨己養己,同之骨血。」若如斯言,子不由父,縱有恩育,得如母乎。 其慈繼雖在三年之 母子,則恩由彼至,服自己來,則慈母如母,何得待父命?又云:「繼母慈母,本實路人, 又論云:「取子爲後者,將以供承祧廟,奉養己身,不得使宗子歸其故宅,以子道事 至於兄弟

傳

第三

生,名義之分,有虧於風俗。 徇飾非於明世,强媒蘗於禮經,雖欲揚已露才,不覺言之

傷 理

事 奏,竟從子翊之議

仁壽中,爲新豐令,有能名。 大業三年,除大理正,甚有當時之譽。擢授治書侍御史,每

朝 延疑議,子翊爲之辯析,多出衆人意表。

知而 告城中,云「帝已崩」。子翊反其言,於是見害,時年七十。 遣於上江督運,爲賊吳棊子所虜。子翊說之,因以衆首。復遣領首賊淸江。遇煬帝被殺,賊 告之。 從幸江都。 子翊弗信,斬所言者。 值天下大亂,帝猶不悟,子翊因侍切諫,由是忤旨,令子翊爲丹陽留守。 賊又欲請以爲主,子翊不從。羣賊執子翊至臨川城下,使

堯君素

堯君素,魏郡湯陰人也。 煬帝爲晉王時,君素以左右從。及嗣位,累遷鷹擊郎將。

東。 及通軍敗,至城下呼之。 俄 大業之末,盜賊蜂起,人多流亡,君素所部獨 而 通引兵南遁 ,以君素有膽略 君素見通,歔欷流涕,悲不自勝,左右皆哽咽,通亦泣下霑衿, ,署領河東通守。 全。 後 義師遣將呂紹宗、韋義節等攻之,不 從 **驍衞大將軍屈突通拒義兵於河**

剋。

微

夜皆光見。

下

因

卒無降 李斷 隋日外,及逢義舉,人有息肩之望。 武衞 都。 年,食盡 家,未嘗不歔欷。 曰:「吁!君素,我力屈而來。」君素曰:「方今力猶未屈,何用多言。」通慚而退。時圍甚急,行 不思報効,以至於此。 「公當爪牙之寄,爲國大臣,主上委公以關中,代王付公以社稷,國祚隆替,懸之於公。 問謂 知 事 江都傾覆。 非 絕 將軍皇甫無逸前後自東都歸義,俱造城下,爲陳利害。 越王侗見而歎息,於是承制拜君素爲金紫光祿大夫,密遣行人勞苦之。監門直閤龐玉、 君素曰「吾軍已敗,義旗所指,莫不響應。事勢如此,卿當早降,以取富貴。」君素答曰 婦 心。其妻又至城下謂之曰:「隋室已亡,天命有屬,君何自苦,身取禍敗。」君素曰:「天 一此穀,足知天下之事。 君素乃爲木鵝,置表於頸,具論事勢,浮之黃河,沿流而下。 人所知。」引弓射之,應弦而倒。 月餘,君素爲左右所害。 又粮食乏絕,人不聊生,男女相食,衆心離駭。 嘗謂將士曰:「吾是藩邸舊臣,累蒙獎擢,至於大義,不得不 縱不能遠慚主上,公所乘馬,即代王所賜也,公何面目乘之哉!通 必若隋室傾敗,天命有歸,吾當斷頭以付諸君也。」時百 然君素善於統領,下不能叛。 君素亦知事必不濟,然要在守死不易, 大唐又賜金券,待以不死。君素 白虹降於府門, 兵器之端, 歲餘, 河陽守者得之,達于東 頗得外生口 苑。 **今**穀 每言及國 奈何 支 城中 姓 苦 數

陳孝意

解,謝 伏,動若有神,吏民稱之。 聲,未嘗不絕倒,柴毀骨立, 鹿 太守蘇威嘗欲 馴擾其廬,時人以爲孝感 河 而遣之。 東 陳孝意,少有志尙,弱冠,以貞介知名。 殺一囚,孝意固諫,至於再三,威不 漸 加禮 敬 0 之應。 見者哀之。 及威爲納言、奏孝意爲侍御史。 未朞,起授雁門郡 于時政刑日紊,長吏多贓污,孝意淸節彌厲, 許。 大業初,爲魯郡司法書佐,郡 丞。 孝意因解衣、請先受死。 在郡菜食 後以父憂去職,居喪 、齋居、朝 夕哀 良 內號爲廉平。 臨, 過 久,威意乃 禮, 發姦擿 毎 有白 發

戰 確等,並桀黠,爲無賴所歸,謀應武周。 重 江 武 城 都 唐 於下館城,反爲所敗。 引兵來攻,孝意拒之,每致克捷。 百餘日,粮盡,爲校尉張倫所殺, 煬帝幸江都,馬邑劉武周殺太守王仁恭,舉兵作亂。孝意率兵與武賁郎將王智辯討之, ,道路隔絕,竟無報命。 武周遂轉攻傍郡,百姓凶凶,將懷叛逆。 孝意亦知帝必不反,每每旦暮向詔勑庫俯伏流涕,悲動左右 以城歸武周 但孤城獨守,外無聲援,孝意執志,誓以必死。每遣使 孝意陰知之,族滅其家,郡中戰慄,莫敢異志。 前郡丞楊長仁、雁門令王 俄而

用命。 水監,卒官。 燒!神其有靈,可降雨相救。」言訖,廟上雲起,須臾驟雨,其火遂滅。 下。 |壽 末 祥 京兆 ,漢王諒舉兵反,遣其將劉建略地燕、趙。 城 見百姓驚駭,其城側有西王母廟,祥登城望之再拜,號泣而言曰:「百姓何罪,致此焚 圍 張季珣,父祥,少爲高祖所知,其後引爲丞相參軍事。 月餘,李雄援軍至,日以賊遂退走。 以功授開府、歷汝州刺史、靈武太守,入爲都 至井陘,祥勒兵拒守,建攻之,復縱火燒其郭 開皇中,累遷幷州司馬。 士卒 威其至誠, 莫不

城下, 珣 得,撤屋而爨,人皆穴處,季珣撫巡之,一無離叛。粮盡,士卒羸病不能拒戰,遂爲所陷。 讓 坐聽 (子爪牙之臣,何容拜賊也!]密壯而釋之。 |攻陷倉城,遣人呼之。||季珣駡||密極口,||密怒,遣兵攻之,連年不能克。 季珣 季珣四面阻絕,所領不過數百人,而執志彌固,誓以必死。經三年,資用盡,樵蘇 事,顏色自若,密遣兵擒送之。羣賊曳季珣令拜密,季珣曰:「吾雖爲敗軍之將,猶是 少慷慨,有志節。 大業末,為鷹擊郎將,其府據箕山為固,與洛口連接。及李密、翟 翟讓從之求金不得,遂殺之,時年二十八。 時密衆數十萬在其 無所 季

一六五八

千牛左右,宇文化及之亂遇害。 季珣家素忠烈,兄弟俱死國難,論者賢之。

松贇公

朝散大夫、本郡通守。 卒完。煬帝遣戶曹郎郭子賤討厚破之,以贇亡身殉節,嗟悼不已,上表奏之。優詔褒揚,贈 敢致辱賢良,禍自及也!」言未卒,賊已斬斷其腰。城中望之,莫不流涕扼腕,銳氣益倍。北海 賊徒寡弱,旦暮擒剪,不足爲憂。」賊以刀築

贇口,引之而去,殿擊交下。

灣罵厚曰:「老賊何 旣至城下,大呼曰:「我是松贇,爲官軍覘賊,邂逅被執,非力屈也。今官軍大來,並已至矣, 贇從郡兵討之。 北海松贇,性剛烈,重名義,爲石門府隊正。大業末,有賊楊厚擁徒作亂,來攻北海 贇輕騎覘賊,為厚所獲,厚令贇謂城中,云郡兵已破,宜早歸降。贇偽許之。

矣。 理全者也,生有輕於鴻毛,死與義合者也。 楊諒、玄感、李密反形已成,凶威方熾、皇甫誕、游元、馮慈明臨危不顧,視死如歸,可謂 史臣曰:古人以天下至大,方身則小,生爲重矣,比義則輕。然則死有重於太山,生以 然死不可追,生無再得,故處不失節,所以 爲難

徇忠貞之節。雖功未存於社稷,力無救於顚危,然視彼苟免之徒,貫三光而洞九泉矣。須陁、 勇於蹈義矣。 獨孤盛、元文都、盧楚、堯君素豈不知天之所廢,人不能興,甘就葅醢之誅,以 國家昏亂有忠臣,誠哉斯言也。

善會有溫序之風,子翊、松贇蹈解揚之烈。

校勘記

字玄慮 洪頤煊諸史考異:皇甫誕碑作「字玄憲」。

王頻 「頻」原作「頗」,據本書王類傳及北史皇甫誕傳改。

3 6

廣平任人

「任」下原行「城」字。

按:漢書地理志下,廣平國有任縣。

至北魏,

仍設此縣。

魏書

游明根傳(元是明根的玄孫)也作「廣平任人」。 今據删。

29 蓋牟道 「牟」,本書煬帝紀下作「蓋馬道」。

Ŧī. 王充 卽王世充。 原避唐諱,省「世」字。

ッ'マ 故言其已見之 「已」,册府五八四作「以」。

-ti 李雄 即李子雄

松贇 北史杜松贇傳,「松」上有「杜」字。

列

傳 第

三十

六

校

勘 記

隋書卷七十二

列傳第三十七

孝義

社,長守其祿位。匹夫匹婦行之於閭閻,則播徽烈於當年,揚休名於千載。此皆資純至以 明王行之於四海,則與天地合其德,與日月齊其明。諸侯卿大夫行之於國家,則永保其宗 至,百邪去,天下順者,其唯孝乎!」然則孝之爲德至矣,其爲道遠矣,其化人深矣。故聖帝 悌也者,其爲仁之本與」,呂覽云、一夫孝,三皇、五帝之本務,萬事之綱紀也。執一術而百善 孝經云:「夫孝,天之經也,地之義也,人之行也。」論語云:「君子務本,本立而道生。孝

四體,竭股肱之力,盡愛敬之心,自足膝下之歡,忘懷軒冕之貴。不言之化,人神通感。 田翼、郎方貴等闕稽古之學,無俊偉之才,並能任其自然,情無矯飾。 篤於天性,勤其 雖

感物,故聖哲之所重。

列

傳

一六六二

或位 一登台 1輔,爵列王侯,祿積萬鍾,馬踰千駟,死之日,曾不得與斯人之徒隸齒。 孝之大也,

陸彦師

不其然乎

!

故述其所行,爲孝義傳。

與 爲 、兄卬廬於墓次,負土成墳。 公卿重之,多就墓側存問,晦朔之際,車馬不絕。 邦族所稱,長而 陸彥師字雲房,魏郡臨漳人。 好學,解屬文。 魏襄城王元旭引爲參軍事。 祖希道、魏定州刺史。 父子彰,中書監。 以父艱去職 ,哀毁殆不勝喪。 彦師 齊文宣聞而 少有行檢,

嘉歎,旌表其閭,號其所住爲孝終里

周武 輩。 兄卬當襲父始平侯,以彥師昆弟 門。 平齊,授載師下大夫。 歷中書黃門侍郎,以不阿宦者, 中 書令河間 遷中書舍人,尋轉通直散騎侍郎。 邢邵表薦之,未報,彭城王敝爲司州牧,召補主簿。 宣帝時,轉少納言,賜爵臨水縣男,奉使幽、薊 中最幼, 遇讒,出爲中山 表讓封焉。 每陳使至,必令高選主客,彥師所接對者,前後六 I 太守, 彦師固辭而止。 有惠政。 數年, 後歷中外府東閣祭酒。 時稱友悌孝義, 徴為 東部郎中。 總萃

高祖嘉之,授內史下大夫,拜上儀同。 俄 而 高祖爲丞相,彥師遇疾,請假還鄴。 **高祖受禪,拜尚書左丞,進爵爲子。** 尉迥將爲亂,彥師微知之, **遂委妻子,潛歸長** 彦師素多

清濁,彥師在職,凡所任人,頗甄別於士庶,論者美之。 病、未幾,以務劇疾動,乞解所職,有詔聽以本官就第。 後復以病出爲汾州刺史,卒官。 歲餘,轉吏部侍郎。 隋承周制,官無

田德懋

自抑 理天下,思弘名教,復與汝通家,情義素重,有聞孝感,嘉歎兼深。 就吊焉。 子千牛備身。 ·割,以禮自存也。」 幷賜縑二百匹,米百石。 大業中,爲給事郎、尚書駕部郎,卒官。 田德懋,觀國公仁恭之子也。 復降璽書曰「皇帝謝田德懋。 丁父艱,哀毀骨立,廬於墓側,負土成墳。 少以孝友著名。 知在窮疾,哀毁過禮,倚廬墓所, 復下詔表其門閭。 開皇初,以父軍功,賜爵平原郡公,授太 上聞而嘉之,遣員外散騎侍郎元 春日 後歷太子舍人、義州司 暄 和,氣力何似? 負土成墳。 股孝 志 宜

薛濬

周天 養母 和中,襲爵虞城侯,歷納言上士、新豐令。 以孝聞。幼好學,有志行,尋師於長安。 薛濬字道賾,刑部尚書、內陽公冑之從祖弟也。父琰,周渭南太守。 時初平江陵,何妥歸國,見而異之,授以經業。 濬少喪父,早孤,

詔 瘡 懷。」嗟異久之。濟竟不勝喪,病且卒。 喪 杖,四時珍味 不許。 血 事 流 ,歸葬夏陽。 開 離 皇 及至京, ,朝野爲之傷痛。 初 ,當時榮之。 擢 拜尙書虞部侍郎,尋轉考功侍郎。 于時隆冬極寒,濬衰絰徒跣,冒犯霜雪,自京及鄉, 上見其毀瘠 後其母 州里賵助,一 過甚,爲之改容,顧謂羣臣曰:「吾見薛濬哀毁,不覺悲感傷 疾,濟貌甚憂瘁,親故弗之識 其弟謨時爲晉王府兵曹參軍事,在揚州, 無所受。 尋起令視事,濟屢陳誠欵, 帝聞|濬事母至孝,以其母老,賜輿服机 也。 暨丁 五百餘里, 母艱,詔 請終喪制 足凍墮指, 潛遺書與 鴻 .臚監護 , 優

| 謨日:

是 然 死 親,庶保期頤,得終色養。何圖精誠無感,禍酷荐臻,兄弟俱被奪情,苫廬靡申哀訴。 彌篤,服膺教義,爰至長成。自釋耒登朝,于茲二十三年矣。雖官非聞達,而祿喜逮 之訓,獲禀母氏聖善之規,負笈裹糧,不憚艱遠,從師就業,欲罷不能。 如 用 永別,爲恨何言。 何 而 可言。 扣 有 吾以不造,幼丁艱酷,窮遊約處,屢絕簞瓢。 知 心泣血,隕氣摧魂者也。 ,得從先人於地下矣,豈非至願哉。 適已有書,冀得與汝面訣,忍死待汝,已歷一旬。 勉之哉,勉之哉 旣而創巨釁深,不勝荼毒,啓手啓足,幸及全歸。 但念爾伶俜孤宦,遠在邊服,顧此 晚生早孤,不聞詩、禮,賴奉先人貽厥 汝旣未來,便成今古,緬 砥行厲心,困而 恨恨, 使夫

書成而絕,時年四十二。有司以聞,高祖爲之屑涕,降使齎册書弔祭曰:「皇帝咨故考功侍 爾誠孝,感于朕懷,奠酹有加,抑惟朝典。故遣使人,指申往命,魂而有靈,歆茲榮渥。嗚呼 郎薛濬。 於戲!惟爾操履貞和,器業詳敏,允膺列宿,勤謇克彰。及遘私艱,奄從毀滅。 嘉

哀哉!

耳。」言終而出,忽然不見,時咸異之。旣而終於四十二,六七之言,於是驗矣。 僧詣宅乞食,濟母怖而告之,僧曰:「此乃兒之吉應。且是兒也,早有名位,然壽不過六七 角及足,召羣兒共視,了無見者。。濬以爲不祥,歸大憂悴。母逼而問之,濬以實對。時有胡 濬性清儉,死之日,家無遺資。 濬初為童兒時,與宗中諸兒遊戲于澗濱。見一黃蛇有 子乾福,武

王頒

安郡司倉書佐。

慟而 召授左侍上士,累遷漢中太守,尋拜儀同三司。 局。其父平侯景,留頒質於荆州,遇元帝爲周師所陷,頒因入關。聞其父爲陳武帝所 一絕,食頃乃蘇,哭泣不絕聲,毀瘠骨立。 王頒字景彥,太原祁人也。 祖神念,梁左衞將軍。父僧辯,太尉。随少俶儻,有文武幹 至服闋,常布衣蔬食,藉藁而臥。 周明帝嘉之, 殺,號

列

開皇初 ,以平蠻功,加開府,封蛇丘縣公。獻取陳之策,上覽而異之,召與相見,言畢而

加柱 落,其本皆出自骨中。頒遂焚骨取灰,投水而飲之。旣而自縛,歸罪於晉王。王表其狀,高 朝,事乃彰露,若之何。」諸人請具鍫鍤,一旦皆萃。於是夜發其陵,剖棺,見陳武帝鬚並不 矣。」頒頓額陳謝,額盡流血,答之曰:「其爲帝王,墳塋甚大,恐一宵發掘,不及其屍,更至明 終不敢當。」高祖從之。 祖曰:「朕以義平陳,王頒所爲,亦孝義之道也,朕何忍罪之!」舍而不問。 已雪,而悲哀不止者,將爲霸先早死,不得手刃之邪? 密召父時士卒,得千餘人,對之涕泣。 歔 不堪復鬭、悲威嗚咽。 **[國,賜物五千段,頒固辭曰:「臣緣國威靈,得雪怨恥,本心徇私,非是爲國,所加官賞,** 及大 夜中因睡,夢有人授藥,比寤而創不痛,時人以爲孝感。 拜代州刺史,甚有惠政。 舉伐陳,頒自請行, 其間壯士或問頒曰:「郎君來破陳國,滅其社稷,讎恥 率徒數百人,從韓擒先鋒夜濟。 母憂去職。後爲齊州刺史,卒官,時年五 請發其丘壟,斷櫬焚骨, 有司錄其戰功,將 力戰被傷,恐 亦可申孝心 及陳滅、頒

十二。弟類,見文學傳。

楊慶

楊慶字伯悅,河間人也。 祖玄,父剛,並以至孝知名。 慶美姿儀,性辯慧。年十六,齊

緜十屯, 國子博士徐遵明見而異之。 疾,不解襟帶者七旬。 栗五十石。 高祖受禪, 及居母憂,哀毀骨立,負土成墳。 及長,頗涉書記。年二十五,郡察孝廉,以侍養不行。 屢加褒賞, 擢授儀同三司, 版授|平陽太守。 齊文宣帝表其門閭,賜帛三十匹, 年八十五,終 其母有

郭儁

於家。

閭。 感之應。 漢王諒爲幷州總管,聞而嘉歎,賜兄弟二十餘人衣各一襲。 郭儁字弘义,太原文水人也。 州縣上其事,上遣平昌公宇文敬詣其家勞問之。 家門雍睦,七葉共居,犬豕同乳,烏鵲通巢, 治書御史柳彧巡省河北,表其門 時人以爲義

田翼

食,母不食則不食。 田翼,不知何許人也。 母患暴痢,翼謂中毒,遂親嘗惡。 性至孝,養母以孝聞。其後母臥疾歲餘,翼親易燥濕,母食則 及母終,翼一慟而絕,其妻亦不勝哀

而死。

鄉人厚共葬之。

紐 回

紐回字孝政,河東安邑人也。性至孝,周武成中,父母喪,廬於墓側,負土成墳。 廬前 時

生麻一株、高丈許、圍之合拱、枝葉鬱茂、冬夏恒青。 有鳥棲其上,回舉聲哭,鳥卽悲鳴,

人異之。周武帝表其閭,擢授甘棠令。 開皇初,卒。

雄居喪,樹遂枯死。服闋還宅,死樹復榮。 子土雄,少質直孝友,喪父,復廬於墓側,負土成墳。其庭前有一槐樹,先甚鬱茂,及土 高祖聞之,歎其父子至孝,下詔褒揚,號其所居

爲累德里。

劉士儁

劉 士儁, 彭城人也。 性至孝,丁母喪,絕而復蘇者數矣。勺飲不入口者七日,廬於墓

側,負土成墳,列植松柏。 狐狼馴擾,爲之取食。 高祖受禪,表其門閭

郎方貴

郞方貴,淮南人也。 少有志尚,與從父弟雙貴同居。 開皇中,方貴嘗因出行遇雨,淮水

當流 **悲恨** 死。 汎 長,於津所寄渡,船人怒之,撾方貴臂折。 门遂向 州 .狀以聞,上聞而異之,特原其罪,表其門閭,賜物 兄弟二人爭爲首坐,縣司 津殿擊船人致死。 守津者執送之縣官,案問其狀,以方貴 不能斷,送詣州。 至家,其弟雙貴驚問所由,方貴具言之。 兄弟各引咎,州不能定,二人爭欲赴水而 百段。 後爲州主簿。 爲首,當 死,雙貴 從坐,

翟普林

於墓側,負土爲墳。 察,奏其孝感,擢授孝陽令。 犬亦悲號,見者嗟異焉。 爲楚丘先生。 翟普林,楚丘人也。 後父母疾,親易燥濕,不解衣者七 盛冬不衣繒絮,唯著單線而已。家有一鳥犬,隨其在墓,若普林哀臨 有二鵲巢其廬前柏樹,每入其廬,馴狎無所驚懼。 性仁孝,事親以孝聞。 旬。 州郡辟命、皆固辭不就、躬耕色養、 大業初,父母俱終,哀毁殆將滅性 大業中,司隸巡 鄉鄰謂

李德饒

好學,有至性 李德饒,趙郡 一,宗黨 柏人人也。 咸 敬 Ź 弱 祖徹, 冠爲校書郎,仍直內史省,參掌文翰 魏尚書右丞。 **父純**, 開皇中為介州長史。 轉監察御 德饒 史, 糾 少 正不 聰敏

41

傳

第

一六七〇

幾絕。 當時所重,凡與交結,皆海內髦彦。 北、詣其廬弔慰之、因改所居村名孝敬村、里爲和順里 水漿不入口五日,哀慟嘔血數升。 避貴戚。 會葬者千餘人, 大業三年、遷司隸從事、每巡四方、理雪寃枉、褒揚孝悌。 莫不爲之流涕。後甘露降於庭樹, 及送葬之日,會仲冬積雪,行四十餘里,單縗徒 性至孝,父母寢疾,輒終日不食,十旬不解衣。 有鳩巢其廬。 雖 位秩未通, 納言楊達巡省河 其德行爲 跣,號踴 及丁憂,

是遣 許其歸首 德饒往渤海慰諭諸賊。 後爲金河長,未之官,值羣盜蜂起,賊帥格謙、孫宣雅等十餘頭,聚衆於渤海。 ,謙等懼不敢降,以德饒信行有聞,遣使奏曰:「若使德饒來者,卽相率歸首。」帝於 行至冠氏,會他盜攻陷縣城,德饒見害。 時有勑

崇遇害,棄尸城下,德侶赴哭盡哀,收瘞之。 子崇官,令德侶爲使者,往離石禮葬子崇焉 其弟德侶,性重然諾。 大業末,爲離石郡司法書佐,太守楊子崇特禮之。及義兵起,子 至介体,詣義師,請葬子崇。 大將軍嘉之,因贈

華秋

悴,鬚鬢頓改,州里咸嗟異之。 華秋, 汲郡 臨河 人也。 幼喪父,事母以孝聞。 及母終之後,遂絕櫛沐,髮盡禿落。 家貧, 傭賃爲養。 **廬於墓側,負土成墳,有** 其 母 「遇患, 秋容貌毁

秋膝 聞。 人 欲助之者,秋輒拜而止之。 下。 煬帝降使勞問,表其門閭。 獵人至廬所, 異而発之。 大業初,調狐皮,郡縣大獵。 後羣盜起,常往來廬之左右,咸相誠曰:勿犯孝子。」鄉人 自爾此冤常宿廬中, 馴 其左 有一兔,人逐之,奔入秋廬中,匿 右。 郡縣 《嘉其孝 感, 具 以 狀

徐孝肅

賴|秋

而

全者甚衆。

終,孝 十年, 被髮徒跣,遂以 父,及長,問 齒,宗黨間每有爭訟,皆至孝肅所平論之,爲孝肅所短者,無不引咎而退。 徐孝肅,汲郡 肅茹蔬飲 家人未見其有忿恚之色。 其母父狀。 身終。 水、盛冬單線、毀精骨立。祖父母、父母墓皆負土成墳、廬於墓所四十餘載 人也。 因求 宗族數千家,多以豪侈相尚,唯孝肅性儉約,事親以孝聞。 畫工,圖其形像,構廟置之而定省焉,朔望享祭。 及母 老疾, 孝肅親易燥濕,憂悴數年,見者無不悲悼。 孝肅早孤,不識 養母至孝,數 雖在幼 母

其弟德備, 聰敏, 通涉五經,河朔間稱爲儒者。 德備終, 子處默又廬於墓側,奕葉稱

孝焉。

列

史臣曰: 昔者弘愛敬之理,必籍王公大人,近古敦孝友之情,多茅屋之下。 而彥師、道

郎貴昆弟,爭死而身全,田翼夫妻俱喪而名立,德饒仁懷羣盜,德侶義咸興王,亦足稱也。紐 **賾,或家傳纓冕,或身誓山河,遂乃負土成墳,致毀滅性。雖乖先王之制,亦觀過以知仁矣。** 回、劉儁之倫,翟林、華秋之輩,或茂草嘉樹榮枯於庭宇,或走獸翔禽馴狎於廬墓,非夫孝悌

之至,通於神明者乎!

隋書卷七十三

列傳第三十八

循吏

然則五帝、三王不易人而化,皆在所由化之而已。故有無能之吏,無不可化之人。 恤其災患,導以忠厚,因而利之,惠而不費。其暉映千祀,聲芳不絕,夫何爲哉?用此道也。 悅之,愛而親之。若子產之理鄭國,子賤之居單父,賈琮之牧冀州,文翁之爲**蜀郡**,皆可以 其所好而勸之。如父母之愛子,如兄之愛弟,聞其飢寒爲之哀,見其勞苦爲之悲,故人敬而 古之善牧人者,養之以仁,使之以義,敎之以禮,隨其所便而處之,因其所欲而與之,從

列傳第三十八 循吏

察臨下。

馬跡,將偏天下,綱紀弛紊,四維不張。其或善於侵漁,强於剝割,絕億兆之命,遂一人之求

高祖膺運撫圖,除凶靜亂,日旰忘食,思邁前王。然不敦詩書,不尙道德,專任法令,嚴

東存苟免,罕聞寬惠,乘時射利者,多以一切求名。 暨煬帝嗣興,志存遠略,車轍

,謂之奉 卽時 升擢。 其或顧名節,存綱紀,抑奪攘之心,以從百姓之欲者, 則謂之附

狂之主,執心平允,终行仁恕,餘風遺愛, 下 賞,猶或 ·,旋 及 不 誅 爲。 夷。 況於. 夫吏之侵漁、得其所欲 上賞其姦,下得其欲,求 雖 沒而不忘, 重 其 一其禁,猶 廉 潔次 或 寬惠之音, 不 爲之。 亦難 乎 更之清平,失 ! 足以傳於來葉。 彦光等立嚴察之朝, 八其所 欲,雖 故列其行 崇其 屬昏

毁瘁 禮。 紫 封 中 可愈。 岐嶷,有至性,其父每謂所親曰:「此兒有風骨,當興吾宗。」七歲時,父遇篤疾,醫云餌五 者 ,爲御正下大夫。 華陽郡公,增邑五百戶,以陽城公轉封一子。 石英也。 ,以緊循吏之篇爾。 過 解褐 梁彥光字修芝,安定烏氏人也。祖茂,魏秦、華二州刺史。父顯,周荆州刺史。 禮。 時求紫石英不得。 秘 梁彦光 未幾,起令視事,帝見其毁甚,嗟歎久之,頻蒙慰諭。 書郎,時年十七。 親屬咸異之,以爲至孝所感。 從帝平齊,以功授開府、陽 彦光憂瘁不知所爲,忽於園中見一物,

彦光所不識,怪而持歸,即 周受禪,遷舍人上士。 魏大統末,入太學,略涉經史,有規檢,造次必以 城縣公,邑千戶。 尋進位上大將軍 武帝時,累遷小馭下大夫。 宣帝 後轉 · ,遷御正 即位 小內史下大夫。 一,拜華州 上大夫。 母憂去職, 刺 俄拜柱 彦光少 史,進 建

國、靑州刺史、屬帝崩,不之官。

內,凡曰官人,慕高山而仰止,聞淸風而自勵。」未幾,又賜錢五萬。 匱乏,且宜旌善。 連 履平直 理,出於州境。 及高祖受禪 「,識用凝遠,布政<u>岐下,</u>威惠在人,廉愼之譽,聞於天下。 三載之後, ,以爲岐州刺史,兼領岐州宮監,增邑五百戶,通前二千戶。甚有惠 可賜粟五百斛,物三百段,御傘一枚,庶使有感股心,日增其美。 開皇二年,上幸岐州,悅其能,乃下詔曰:「賞以勸善,義兼訓物。 自當遷陟, 政,嘉禾 四海之 彦 恐其 光 操

有若神 下第 試。 販 隆恩。」上從之,復爲相州刺史。 之,竟坐発。 乃 廢黜,無復衣冠之望,不謂天恩復垂收採。 及樂戶 用 一。及居相部,如岐州法。 秩 後數歲,轉相州刺史。彥光前在岐州,其俗頗質,以靜鎭之,合境大化,奏課連最,爲天 有勤學異等,聰令有聞者,升堂設饌,其餘並坐廊下。 俸 明,於是狡猾之徒莫不潛竄,合境大駭。 之家移實州 之物,招致山東 歲餘,拜趙州刺史,彥光言於上曰:「臣前待罪相州,百姓呼爲戴帽錫。 郭。 大儒,每鄉立學,非聖哲之書不得教授。常以季月召集之, 由是人情險詖,妄起風謠,訴訟官人,萬端千變。 豪猾者聞彦光自請而來,莫不嗤笑。 鄴都雜俗,人多變詐,爲之作歌,稱其不能理化。 請復爲相州,改絃易調,庶有以變其風俗,上答 初,齊亡後,衣冠士人多遷關內,唯技巧、商 有好諍訟, 彦光下車,發摘姦隱, 惰業無成者, 彦光 欲革其弊, 上聞 坐之庭 親臨策 臣自分 而譴

中,設以草具。 及大成,當舉行賓貢之禮, 又於郊外祖道, 幷以財物資之。 於是人皆剋勵,

於 風 俗大改。 孔子廟。 于時廟中有韓伯瑜母杖不痛,哀母力弱,對母悲泣之像。 有滏陽人焦通,性酗酒,事親禮闕,爲從弟所訟。 彦光弗之罪, 通遂感悟,旣悲 將至州學, 且愧, 令觀

若無自容。 彦光訓諭 而遣之。 後改過勵行, 卒爲善士。以德化人, 皆此類也。 吏人感悦,

略 無諍訟。 後數歲,卒官,時年六十。 贈冀、定、凊、瀛四州刺史,諡曰襄。 子文謙嗣

年五 以本 饒州 弟 武 賁 官 刺史。 文 謙 郎將 兼 弘 檢校太府、衞尉二少卿。 雅有 玄縱先隸文謙,玄處反問未至而玄縱逃走,文謙不之覺,坐是配防桂林 歲餘,爲鄱陽 父風,以 太守,稱爲天下之最。 上柱國嫡子,例授儀同。 明年,又領武賁郎將,爲盧龍道軍 徵拜戶部侍郎。 開皇十五年,拜上州刺史。 遼東之役,領武賁郎 副。 會楊 煬帝 玄 一感作 即位,轉 而 卒,時 將,尋 亂 ,其

少 子文讓,初封陽城縣公,後爲鷹揚郎將。 從衞玄擊楊玄感於東都,力戰而死,贈通議

大夫。

樊叔略

樊叔略,陳留人也。 父歡, 住魏爲南兗州刺史、 阿陽侯。 屬高氏專權,將謀興復之計,

奇之。 執 公,邑千四百戶。 儀 內 構監,宮室制度皆叔略所定。 爲 政 高 同 不自安,遂奔關 三司 引為 氏 建德五年,從武帝伐齊,叔略部率精銳, 所 中尉。 護誅後,齊王憲引為園苑監 叔略時 西。 拜汴州刺史,號爲明決。 叔略多計數, 周太祖 功未就而帝崩。 見而器之, 曉習時 刑,給使殿省。 事 0 護 引置 時憲素 宣帝時,於洛陽營建東京, 漸 尉迥之亂,高祖令叔略鎮大梁。 左右。 毎戦 委信之, 有吞關 身先 身長 尋 兼督 授 力士卒。 東 九尺, 都 之志 內 督 外。 , 以 志氣 襲 叔略因 功加 爵 累遷 不凡, 爲 以叔略有 上 侯。 事數進兵謀 驃 一開府,進封清 騎 頗爲高氏 大冢宰宇文 大 迥將字文威 巧 將 思 軍 所忌 拜 鄕 憲 開 護 營 縣 甚 府

滯,公 莫不 丈, 上 五. 化 所 朝廷 備水陸 親 流 石 高 卿 涕 祖受禪, 班 辺 所 叔略 未 相 示 高 能 與立 支 顃 下。 所 决 四 加位 一碑頌 在 楊 者 年 著 素 百 上大 叔略輒 從祠 姓 其德政。 稱,遷相州刺史, 亦禮遇之。 為之語 《將軍,進爵安定郡公。在 太山 爲 行 評 一日 自 理。 至洛陽 叔略 爲 司 智無窮,淸鄉公。 雖 農 雖 政爲當時第 無 爲司 ,上令錄囚徒。 學 凡 術,有 種 農 植,叔 往 州 所 往 、數年, 依 略 0 上下正,樊安定。」徵拜司 | 参督 據, 別爲條 上降璽書褒美之, 具狀將奏, 然 甚有聲譽。 九 卿 師 制,皆出 事 心 獨 o 晨 見, 性 起, 人意表。 鄴都俗薄, 頗 闇 豪 至 賜物三百段,粟 與理 獄 侈 眄, '農卿',吏 朝廷 合。 毎 號日 食 於馬上 甚 有 必 難 方 人 爲 疑

來

寇,叔略擊走之。

以功拜大將軍,復爲汴州

刺史。

列

傳

第

==:

暴卒, 時年五十九 上悼惜久之,贈亳州刺史,諡曰襄。

趙軌, 河南洛陽人也。 父肅,魏廷尉卿。 軌少好學,有行檢。 周蔡王引爲記室,以清苦

聞。遷衞州治中。

餞。」 軌受而飲之。 旣至京師,詔與奇章公牛弘撰定律令格式。 各揮涕曰:「別駕在官、水火不與百姓交,是以不敢以壺酒相送。公清若水、請酌一杯水奉 持節使者郃陽公梁子恭狀上,高祖嘉之,賜物三百段,米三百石,徵軌入朝。父老相送者, 子曰:「吾非以此求名,意者非機杼之物,不願侵人。汝等宜以爲誡。」在州四年,考績連最。 高祖受禪,轉齊州別駕,有能名。其東鄰有桑,甚落其家,軌遣人悉拾還其主,誠其諸

右 馬逸入田 時 衞 王 ||爽爲原州總管,上見爽年少,以軌所在有聲,授原州總管司馬。 中,暴人禾。 **軌駐馬待明**,訪禾主酬 直而去。 原州人吏聞之,莫不改操 在道夜行,其左

穢 不修。 後 数年 ໜ ,遷硤州刺史,撫緝萌夷,甚有恩惠。 於是勸課人吏,更開三十六門, 灌田五千餘頃, 尋轉壽州總管長史。 人賴其利。 芍陂舊有五 秩滿歸鄉里, 卒于 門堰,蕪

家,時年六十二。子弘安、弘智,並知名。

房恭懿

仕 齊, 房恭懿字慎言,河南洛陽人也。 釋褐開府參軍事,歷平恩令、濟陰守,並有能名。會齊亡,不得調。 父謨,齊吏部尚書。 恭懿性沉深,有局量,達於從政。 尉迥之亂 ,恭懿預

焉,迥敗,廢于家。

賜物百段,良馬一匹。 令每朔朝謁, 上見恭懿, 必呼至榻前, 訪以理人之術。 開皇初,吏部尙書蘇威薦之,授新豐令,政爲三輔之最。 蘇威重薦之,超授澤州司馬,有異績 上聞而嘉之, 賜物四百段, 上聞 而止之。 時雍州諸縣

愈屬 乎! 朕卽 朝集使曰:「如房恭懿志存體國, 於是下詔曰:「德州司馬房恭懿出宰百里,毗贊二藩,善政能官,標映倫伍。 所 在之處,百姓視之如父母。 遷德州司馬,在職歲餘,盧愷復奏恭懿政爲天下之最。 ·委以方岳,聲實 |拜爲刺史。豈止爲一州而已,當令天下模範之,卿等宜師斅也。| 上又曰:「房恭懿 八俱美。 可使持節、海州諸軍事、海州刺史。」 朕若置之而不賞,上天宗廟其當責我。 愛養我百姓, 此乃上天宗廟之所 助, 上甚異之,復賜百段,因謂諸 內外官人宜知我意。」 **豈**朕寡薄能致之 班條按部,實允 州

未幾,會國子博士何妥奏恭懿尉迥之黨,不當仕進,威、愷二人朋黨,曲相薦舉。

怒,恭懿竟得罪,配防嶺南。 未幾,徵還京師,行至洪州,遇患卒。 論者于今冤之。

公孫景茂

甲科、爲襄城王長史、兼行參軍。遷太常博士、多所損益、時人稱爲書庫。後歷高唐令、大 正,俱有能名。及齊滅,周武帝聞而召見,與語器之,授濟北太守。 公孫景茂字元蔚,河間阜城人也。容貌魁梧,少好學,博涉經史。在魏,察孝廉,射策 以母憂去職

者、景茂撤減俸祿,爲饘粥湯藥,分賑濟之,賴全活者以千數。 骸骨,優韶不許。俄遷息州刺史,法令清靜,德化大行。 開皇初,詔徵入朝,訪以政術,拜汝南太守。郡廢,轉曹州司馬。 時屬平陳之役,征人在路, 上聞而嘉之,詔宣告天下 在職數年,以老病乞 有疾病

三百段。 哀其老、嗟嘆久之。景茂再拜曰:「呂望八十而遇文王,臣踰七十而逢陛下。」上甚悅,賜物 十五年,上幸洛陽,景茂謁見,時年七十七。上命升殿坐,問其年幾。 韶曰:「景茂修身潔己,耆宿不虧,作牧化人,聲績顯著。 年終考校,獨爲稱首,宜 景茂以實對。

明年,以疾徵,吏人號泣於道。 及疾愈,復乞骸骨, 又不許,轉道州刺史。 悉以秩俸買

升戎秩、兼進藩條。可上儀同三司、伊州刺史。」

時乃褒揚稱述。 牛犢雞猪,散惠孤弱不自存者。好單騎巡人,家至戶入,閱視百姓產業。 如有過惡, 隨郎訓導, 而不彰也。 由是人行義讓, 有無均通, 有修理者,於都會 男子 相 助耕

耘,婦人相從紡績。 大村或數百戶,皆如一家之務。 其後請致事,上優詔聽之。

馬轝,便道之官。 前後歷職,皆有德政,論者稱爲良牧。

仁壽中,上明公楊紀出使河北,見景茂神力不衰,還以狀奏。

於是就拜淄州刺史,賜以

大業初卒官,年八十七。 諡曰康。 身死之日,諸州人吏赴喪者數千人,或不及葬,皆望

墳慟哭,野祭而去。

辛公義

邊境。 掌治上士、掃寇將軍。高祖作相,授內史上士,參掌機要。開皇元年,除主客侍郎,攝內史 義。 養、親授書傳。周天和中、選良家子任太學生,以勤苦著稱。 舍人事,賜爵安陽縣男,邑二百戶。每陳使來朝,常奉詔接宴。 辛公義,隴西狄道人也。 每月集御前令與大儒講論,數被嗟異,時輩慕之。建德初,授宣納中士。從平齊,累遷 七年 ·,使勾檢諸馬牧,所獲十餘萬匹。 祖徽,魏徐州刺史。父季慶,青州刺史。 高祖喜曰:「唯我公義,奉國罄心。」 武帝時,召入露門學,令受道 轉駕部侍郎,使往江陵安輯 公義早孤,爲母氏所

一六八一

從 軍 平 陳 以功除岷州刺史。 上俗畏病, 若一人有疾,即合家避之, 父子 夫妻不相 看

養,孝 君, 以牀 戚 H 連 而 其家 那 諭 :興來,安置 夕 義道絕,由 得 ′,對之理 無親 不死,病 死 屬 廳 事 是病 見復差 生 因留養之。 o 事。 由 所得 命 者多死。 暑月疫 一不關 秩 汝 俸,盡 始 等 (時,病 相着。 公義 相 勿復信之。」諸 用 慈愛,此 市藥, 人或至數百,廳廊悉滿。 患之,欲變其俗。 前汝 風 棄之,所以死耳。 爲迎醫療之,躬勸 《遂革, 病家 合境之內 子孫慚謝 因分遣官人巡檢部內, 呼爲 今我聚病者,坐臥 而 公義 其飲食, 去。 慈 我親設一 母 後 於是悉差, 人 有遇病者, 榻 獨坐 凡 其間,若言 有 方召其 其間 疾病 爭就 使 相 親 終 皆

其鄉 還 汝至于滄海 人, 卽 宿 大 尚 閭 廳。 廳 後 令百 父老 遷 事 牟 , 受領 姓 終不 逐相 州 ,皆苦水災。境內 係 新 刺 於囹 一還閣 **、 影**,皆 史,下 曉日:「此蓋 圄 一,豈有 車,先 不立文案,遣當 人或諫之曰:「此 7大牙, 禁人 至 小 事 獄 了,何 在 中 獨 ·, 因 獄 無所損 忍勤 直 而 露 佐 心自安乎 事 勞使 坐牢 有 僚 程, 一人,侧 君。」 側, 山出黄銀,獲之以獻。 使君)?]罪 \Box 訟 坐訊 親 者 何自苦也!」 人聞 自 多 問。 |驗問 兩讓 己,咸 事 而 自款 若 + 答曰 止 不 餘 韶水部郎婁崱就 盡 服 日 時 間, Щ 刺 應 後 東霖 史無德 決斷 須 有 〈禁者 欲 酮 咸 諍 可 自陳、 訟者 以導 公 方

仁壽元年,追充揚州道黜陟大使。 豫章王陳恐其部內官僚犯法,未入州境, 預令屬公 **禱焉,乃聞**

空中

有

金石絲竹之響

王弘 內史侍郎。 義 公義答曰 入爲黃門侍郎,因言公義之短,竟去官。 丁母憂。 ...「奉詔不敢有私。」及至揚州, 未幾、起爲司隸大夫、檢校右禦衞武賁郎將。 皆無所縱捨, 吏人守闕訴 陳銜之。 冤,相 繼 不 從征至柳城郡卒,時年 及煬帝卽位, 絕 後 、數歲, 揚州長 帝悟, 史 除

柳儉

六十二。子融

州刺 廢。 訟者 儉 有局量,立行清苦,爲州里所敬,雖至 時高 史。 庭遣 及 柳儉字道約,河東解人也。祖元璋,魏司州大中正、 高 一, 不 在職 祖 祖 初 受禪,擢拜水部侍郎, 爲文書,約束佐 十餘年 有天下 - , 勵精 ,萌夷 (悅服) 思政, 史,從容而 妙簡良能, 蜀 封率道縣伯。 王 秀之得罪也,儉坐與交通 親昵,無敢狎侮。 Ë 出爲牧宰, 獄無繫囚 未 幾, 以儉 出為 相華二州刺史。父裕, 蜀 周代歷宣納上士、畿伯大 王 廣漢 仁 秀時鎮益州 . 明 一,免職 著稱,擢 太守,甚 及還鄉里,乘敝 拜蓬州 有 列 :能名。 上 周聞喜令 其 刺 事、遷 夫。 俄而 史。 郡 卭 獄

用,特授朝散 煬帝 嗣 位,徵之。 大 夫, 拜弘化 于時 太守,賜物 以 功臣 任 一百段而遣之。 職,牧州 領郡者 ,並帶戎 儉清節逾 資,唯儉起自 勵。 大業 五. 良 年入朝, 吏。 帝嘉 郡國 其績 畢

羸

馬,

妻子衣食不

贍,見者咸歎服焉。

京師,相國賜儉物三百段,就拜上大將軍。 無離叛,竟以保全。 朝集使送至郡邸,以旌 次,威以涿郡 集,帝謂 納言 I蘇威 丞郭 絢 、吏部尚書牛弘曰:「其中淸名天下第一者爲誰。」 威等以 及義兵至長安,尊立恭帝,儉與留守李粲編素於州,南 潁 異焉。 川郡 丞敬肅等二 論者美之。 一人對。 及大業末,盜賊蜂起,數被攻逼。 歲餘,卒于家,時年八十九。 帝賜儉帛二百匹, 絢 肅各 儉 一百 向慟哭。 |儉撫結 對。 匹。 帝 人夷,卒 旣而 又問 令天 其

郭絢

盜賊 衝要 皆 死,人吏哭之,數月不息。 有能名。 起,絢 一,訪可 郭絢, 任者。 逐捕之,多所剋獲。 河東安邑人也。 大業初,刑部尚書宇文強巡省河北, 聞絢 有幹局 家素寒微。 ,拜涿郡丞,吏人悅服。 時諸郡無復完者,唯涿郡獨全。 初爲尚書令史,後以軍功拜儀同,歷數州司馬長史, 引絢爲副。 數載, 遷爲通守, 煬帝將有事於遼東,以涿郡爲 後將兵擊竇建德於河間,戰 兼領留守。 及山 東

敬肅

敬肅字弘儉, 河東蒲坂人也。 少以貞介知名, 釋褐州主簿。 開皇初,爲安陵令, 有能

使者持去。 年老,有治名,將擢爲太守者數矣,輒爲述所毁,不行。大業末,乞骸骨,優詔許之。 名, 擢拜秦州司馬, 轉豳州長史。 仁壽中, 爲衞州司馬, 俱有異績。 而彌篤。」時左翊衞大將軍宇文述當塗用事,其邑在潁川,每有書屬肅。 肅未嘗開封,輒令 大業五年,朝東都,帝令司隸大夫薛道衡爲天下羣官之狀。道衡狀稱肅曰:「心如鐵石,老 述賓客有放縱者,以法繩之,無所寬貸。 由是述銜之。 。八年,朝於涿郡,帝以其 煬帝嗣位,遷潁川郡丞。

劉曠

之日,家無餘財。

歲餘,終于家,時年八十。

卿能獨異於衆, 訟者,輒丁寧曉以義理,不加繩劾,各自引咎而去。 善政,爲天下第一。 皆生草 更相篤勵,曰:「有君如此,何得爲非!」在職七年,風敎大洽,獄中無繫囚,爭訟絕息,囹圄盡 劉曠,不知何許人也。 ·,庭可張羅 良足美也」顧謂侍臣曰:「若不殊獎,何以爲勸」」於是下優詔, 尚書左僕射高頌言其狀,上召之,及引見,勞之曰:「天下縣令固多矣, 及去官,更人無少長,號泣於路,將送數百里不絕。 性謹厚,每以誠恕應物。 所得俸祿, 賑施窮乏。 開皇初,爲平鄉令,單騎之官。 遷爲臨潁令,清名 百姓感其德化, 擢拜莒州 人有諍

刺

史。

一六八六

王伽

赴憲司 伽 萬 敎 咸 於 謝 受死。」舍之而去。 犯 曰:「汝等雖犯憲法,枷鎖亦大辛苦。吾欲與汝等脫去,行至京師總集,能不違期不。」皆拜 十餘 姓,思 之儔,人皆李傪之輩,刑厝不用,其何遠哉!」於是擢伽爲確令,政有能名。 廢絕,官 是悉召流人,幷令攜負妻子俱入,賜宴於殿庭而赦之。 國 知好惡,並識是非。若臨以至誠,明加 曰:「必不敢違。」伽於是悉脫其枷,停援卒,與期曰:「某日當至京師,如致前却,吾當爲汝 刑,虧損名教,身嬰縲紲,此其職 人詣京師。 王 伽 遵聖 明是率土之人非爲難敎,良是官人不加 ,河間章武人也。 開皇末, 為齊州行參軍, 初無足稱。 人無慈愛之心,兆庶懷姦詐之意,所以 法,以德化人,朝夕孜孜,意在於此。 時制,流人並枷鎖傳送。 流人咸悅,依期而至,一無離叛。上聞 也。 勸導,則俗必從化, 伽行次榮陽,哀其辛苦,悉呼而謂之曰:「卿輩旣 今復重勞援卒,豈獨不愧於心哉!」參等辭謝。 、曉示, 獄訟不息, 而 伽深識朕意,誠心宣導。 致令陷罪, 乃下詔曰:「凡在有生,含靈禀性, 而驚異之,召見與語,稱善久之。 澆薄難治。 人皆遷善。 後被州使送流囚李參等七 無由 自新 股受 往 以海 命 參等威悟,自 若使官盡王 上天, 內 亂 離,德 安養 伽

勝餘 言 武陽 猶 發於 堪 反 命 興 深 不 (其事 能 諸 縣 遼 初 人, 魏 城 德深 濟。 東 唯 爲文帝挽郎 使 動 多被 ,皆歔欷 德深 之役 以軍 百姓勞苦。 德深. 本鉅 一、徴稅 淪 一縣,有 一法從事 各問 陷 鹿 流涕,語不 後歷 唯 人也。 百端,使人往來,責成郡縣。 其所欲任 貴鄉獨 , 如 無 然在下各 相通 馮翊書佐、武陽司戶書佐, 此 祖沖 成聲。 者數 一不竭 全。 污隨 自 矣。 仕周 郡 竭 便 其力 及將 修 ì 丞元寶藏受詔 其鄰城營造 爲刑部大夫、 常常 營 ,所求皆給 赴任,傾城送之,號泣 一官府寂 爲 諸縣 于 之最 然,恒 ,皆聚於 逐捕 ,百姓不擾,稱爲大治。 時王綱 以能遷貴鄉 建州 0 岩 盗賊 尋轉館 刺 無事。 廳 弛紊,吏多 史, 一一年戦 事 之聲、 ,更 因家 長。 陶 唯 長, 不利,則 人 約 道 弘農。 爲政清淨 |贓賄 遞 路 束長 貴 相 木 鄕 督 所 器 吏,所修 絕 吏 于 父毗 壹 人 械 時 在 一不 聞 晝夜 徴 必 盜 一般,下 之, 盡 **賊羣起**, 嚴 鬱林 不 心喧嚣, 朝 而治 相 須 過 與

來 前 加 後 令長 詐 市 旣 至 館陶 貴 未 郡 鄕 有 不 父老 能 不 闔 決。 受其指 境老幼皆 冒 會持節使者韋霽、杜整等至,兩縣詣使訟之, 涉 艱 麾 者。 險, 如 見其 詣闕 自 德 請留 、父母。 深至縣 德深, 有猾 君 有詔 實 人員 (屏處 許之。 外郎趙 於室, 館陶 君實 未嘗 . 父 輒 與郡 老復 乃斷從貴鄉。 敢 能都 出 丞元 門。 寶藏 相 逃 訟、以 竄 深 貴鄉吏人 之徒, 相 貴 交 郷文 歸

列

傅

第

歌 呼滿 道 百. 相 稱 館 陶 衆庶合境悲哭,因而居住者數百家

謂之曰 於陣、貴鄉、館陶 皆垂泣曰:「我與魏明府同來,不忍棄去,豈以道路艱難乎!」其得人心如此。 陽 歸李密。 寶藏深 李密兵馬近在金墉,去此二十餘里。 (害其 德深所領,皆武陽 能。 人庶至今懷之。 會越王 侗徵兵於 人也,以本土從賊,念其親戚,輒出 郡 , 寶藏遂令德深 汝必欲歸,誰 率 兵千 能相禁, 都門 入赴 何爲自苦如此!」其人 東都 東向 慟哭 俄 後與賊戰,沒 而 而 寶藏 反。 以武 或

| 贓污,衡、高及熾淸節逾厲,風敎大洽,獄無繫囚,爲吏人所稱。 時有櫟陽令渤海高世衡、蕭令彭城劉高、城皐令弘農劉熾,俱有恩惠。 大業之末,長史

之化 直道 則 之父母。」豈徒言哉!恭懿所在尤異,屢簡帝心,追旣往之一眚,遂流亡於道路,惜乎! 不 行 一至誠待 犯於憲章 史臣 所部,德深之愛結人心 曰:古語云,善爲水者 物,故得所居而 然則 易俗 移 化 風 ,雖信臣 服 ,所去見思。 ,引之使平,善化人者,撫之使靜。 教從義, 、杜詩、鄭渾、朱邑, 不資於明察,必藉於循 至於景茂之遏惡揚善, 不能繼也。 水平則無損於隄防,人靜 公義 良者也。 詩云 之撫視疾 彦光等皆 愷悌 君子 病 柳儉 內懷 劉 ٦, 曠

校勘記

〔一〕因露坐牢側 「因」原作「囚」,據北史本傳及御覽六三九、叉八一二改。

傅第三十八 校勘記

隋書卷七十四

列傳第三十九

酷吏

則令之煩苛,吏之嚴酷,不能致理,百代可 衣滿道。 可以立威 法令刑罰,政之末也。 夫爲國之體有四焉·一曰仁義,二曰禮制,三曰法令,四曰刑罰。 漢革其風,矯枉過正,禁網疎闊,遂漏 而不可以繁用。 無本不立,無末不成。 老子曰:「其政察察,其人缺缺。」又曰:「法令滋章,盗賊多有。」然 知。 然敎化遠而 吞舟,大姦巨猾,犯義侵禮。 考覽前載, 有時 刑罰近,可以助化而不可以專行, 而 用 之矣。 仁義禮制,政之本也, 故剛克之吏,摧 昔秦任獄吏,赭

斫夷者,所在蔑聞焉。 高 祖膺期,平一江左,四海九州,服教從義。至於威行郡國,力折公侯,乘傳賦 無曩時之弊,亦已明矣。 士文等功不足紀,才行 無聞 遭遇時來,叨 人,探丸

拉

列

傳

第

三十

九

酷吏

|凶邪,一切禁姦,以救時弊,雖垂敎義,或有所

取焉。

一大九二

竊 在 如 無辜 蛇 非 據, 虺 ·,察其所爲,豺狼之不若也。 肆 過 其 其 境 褊 者 性 多多 逃 行 之 如 無禮、君 寇 讎。 子小人,咸罹其毒。凡厥所莅,莫不 與 無禁姦除猾之志,肆殘虐幼賤之心, 人之恩,心非好善,加 人 之罪,事 懍 非 然。 疾 君子惡之, 悪 居 其 下 其 所 答辱, 者,視 故編 之 爲

厙狄士文

酷吏

傳

也。

里 迎 至 周 親莫與通狎。 厙 狄 師,唯士文閉門自守。 士文,代人也。 少讀書。 祖干,齊左丞相。 在齊、襲封章武郡王、官至領軍將軍。 帝奇之,授開府儀同三司、隨州 父敬,武衞將軍、肆州刺史。 刺史。 周武 帝平齊, 士文性孤直, 山東衣 雖鄰 冠

物,勞而遣之。 常 過, 銜 絹 噉 官 凡 高 深文陷 匹, 有出 加 厨餅,士文枷之於獄累日,杖之一百,步送還京。 受禪,加上開府,封湖陂縣子,尋拜貝州刺 兩 入,皆封署 害。 手 各 士文至州 持 嘗 入 朝, 匹。 其門,親舊絕跡,慶弔 ·發擿姦隱,長吏尺布升粟之贓, 遇上 上問 置 其故,士文曰:「臣 酒高 會,賜公卿 不通。 入左藏 口 法 史。 手俱 令嚴 僮 性清苦,不受公料,家無餘財。其子 任 無所寬貸。 滿 肅 隸 ‴, 無敢 取多 餘 無所 人股戰, 少。 出門,所買鹽菜,必於外 須。」 得千餘人而奏之,上 皆 道 上 極 不拾遺。 異 重, 之, 士文 別 加 獨 有 賞 П 細

悉配 哭士文。 爲淸河令,二人並苛刻,唯長史有惠政。 防嶺南、親戚相送、哭泣之聲編於州境。 士文聞之,令人捕捉,過捶盈前,而哭者彌甚。 時人爲之語曰:「刺史羅剎政,司馬蝮蛇瞋,長史含 至嶺南,遇瘴癘死者十八九,於是父母妻子唯 有京兆韋焜爲貝州司馬,河東趙達

笑判,清河生喫人。」上聞而歎曰:「士文之暴,過於猛獸。」竟坐免。

憤恚而 薛國 應州 執 法 刺 嚴正,不避貴戚 公 未幾,以爲雍州 死。 史唐君明居母 長孫覽爲妾。 家無餘財,有子三人,朝夕不繼,親友無內之者。 ,賓客莫敢至門,人多怨望。 長史,士文謂人曰:「我向法深,不能窺候要貴,必死此官矣。」及下車 憂,娉以爲妻,由是士文、君明 覽妻鄭氏性妬,譖之於文獻后,后令覽離絕。 士文從父妹爲齊氏嬪,有色,齊滅之後,賜 並 |爲御史所劾。 士文恥之,不 士文性剛, 在獄數日 與 相 見。後

藝,拳勇絕人。 賜爵信都縣公,擢拜延州刺史。 重足而立,無敢違法者。 田 式字顯標,馮翊下邽人也。 周明帝時,年十八,授都督,領鄉兵。 遷本郡太守,親故屛跡,請託不行。武帝聞而善之,進位儀同三司, 從帝平齊,以功加上開府,徙爲建州刺史,日改封梁泉 祖安興,父長樂,仕魏,俱爲本郡太守。 後數載,拜渭南太守,政尚嚴猛, 式性剛果,多武

列

傳

縣公

百姓。 穢,令其苦毒,自非身死,終不得出。 之,刃中於閾。 卿放辱者多矣,旋復升用,大人何能久乎?乃至於此!」武歘然而起,抽刀斫信,信遽走避 棄之。」式恚臥。 去之。」式以爲慢己,立棒殺之。或僚吏姦贓,部內劫盜者,無問輕重,悉禁地牢中, 竊上北 者,雖至親昵,無所容貸。 拜襄州總管,專以立威爲務。 二人給使左右。 高 其刻暴如此。由是爲上所譴,除名爲百姓。 樓,以暢羈思。 祖總百揆,尉迥作亂鄴城,從韋孝寬擊之。 上知之,以式爲罪己之深,復其官爵。尋拜廣州總管,卒官。 其子信時爲儀同,至式前流涕曰:「大人旣是朝廷舊臣,又無大過。 從家中索椒,欲以自殺,家人不與。陰遣所侍僮詣市買毒藥,妻子又 式知之,答寧五十。 其女婿京兆杜寧,自長安省之,式誡寧無出 每視事于外,必盛氣以待其下,官屬股慄,無敢仰視。 每赦書到州,武未暇讀,先召獄卒,殺重囚,然後宣示 其所愛奴,嘗詣式白事, 以功拜大將軍,進爵武山郡公。及受禪, 式慚恚不食,妻子至其所,輒怒,唯侍僮 有蟲上其衣衿,揮袖拂 外。 寧久之不得還, 比見公 寢處糞 有犯禁 奪而

燕榮

燕樂字貴公,華陰弘農人也。父煰,周大將軍。 **繁性剛嚴,有武藝,仕周爲內侍上士。**

入太湖 畏若 率精 晉州 及辭,上賜宴于內殿,詔王公作詩 吏人 從 武 甲五千躡之,囐敗走,爲榮所執,晉陵、 寇讎,不敢休息。 過之者,必加詰問,輒楚撻之,創多見骨。 刺 一帝伐齊,以功授開府儀同三司,封高邑縣公。 史。 ,取吳郡。 從河間王弘擊突厥,以 既破丹陽,吳人共立蕭瓛爲主,阻兵於晉陵,爲宇文述所敗,退保包山。榮 上甚善之。 以餞之。 後因入朝覲,特加勞勉。榮以母老,請每歲入朝,上許之。 功拜上柱國,遷靑州總管。 伐陳之役,以爲行軍總管,率水軍自康萊傍海, 會稽悉平。檢校揚州總管。 姦盜屏迹,境內肅然。他州縣人行經其界者, 明年,起爲 高祖受禪, 幽州 進位大將軍,封落叢郡公,拜 樂在州,選絕有力者爲伍 總管。 尋徵爲右武候將軍。

突厥 爲 之,輒以試人。人或自陳無咎,榮曰:「後若有罪,當免爾。」及後 於是遺弘嗣監納倉栗,颺得一糠一粃,輒罰之。每笞雖不滿十,然一日之中,或至三數。 日被杖,使君許有罪宥之。」樂曰:「 屈 人 一榮所 及百 辱之。 寇邊,以爲行軍總管,屯幽 榮性嚴酷,有威容,長史見者,莫不惶懼自 [姓妻女有美色,輒舍其室而 ,固辭。上知之,勑榮曰「弘嗣杖十已上罪,皆須奏聞。」榮忿曰「豎子 鞭笞左右,動至千數,流血盈前,飲噉 州 淫之。 無過尙爾,況有過邪! 母憂去職。 貪暴放縱 自若。 失。 日甚。 范陽 嘗按部,道次見叢荆 盧氏, 榜捶 是時 代爲著姓,榮皆署爲吏卒以 犯細過,將檛之, 元弘嗣被除爲幽 如 舊。 樂每巡省管內,聞 ,堪爲笞棰 何敢弄我 州 人曰 長 一,命取 史,懼 前 如

列傳

第三十

九

酷吏

一六九六

是 家 一遣考 歷 寢室無故 年 一,怨隙 功侍 郎劉 有蛆數斛,從地墳出。 日構,際遂收付獄,禁絕其糧。 士龍馳驛鞫問 奏樂虐毒非虛,又贓 未幾,際死於蛆出之處。有子詢。 弘嗣飢餒,抽衣絮,雜水咽之。 穢狼籍,遂徵還京師 場賜 其妻詣 死。 先是,際 闕稱寃,

趙仲卿

後 大夫。 從擊齊,攻臨秦、統戎、威遠、伏龍、張壁等五城,盡平之。又擊齊將段孝先於姚襄城,苦戰連 日,破之。以功授大都督,尋典宿衞。 一十七陣。 趙仲卿,天水隴西人也。 王謙作亂,仲卿使在利州,即與總管豆盧勣發兵拒守。為賺所攻,仲卿督兵出戰,前 及謙平,進位大將軍,封長垣縣公,邑千戶。 父剛, <

三周大將軍。 平齊之役,以功遷上儀同,兼趙郡太守。入爲畿伯中 仲卿性粗暴,有膂力,周齊王憲甚禮之。

總管。 曳於荆棘中。 長 卿 吏, 別 道俱 高 輒 于時 祖 至二百。 進,無虜 受禪,進爵河北郡公。 塞北 時人謂之猛獸。 盛 而還。 官人戰慄,無敢違犯,盜 興屯田,仲卿總統之。 復鎭平涼,尋拜石州刺史。 事多克濟,由是收穫歲廣,邊戍無餽運之憂。 開皇三年,突厥犯塞,以行軍總管從河間王弘出賀蘭山。仲 微有 賊屏息,皆稱其能。 不理者,仲卿輒 法令嚴猛,纖微之失, 遷兗州 召主掌 刺史,未之官,拜 ,撻其胸背,或解衣倒 無所容捨,鞭笞 朔州

騎一萬鎭恒安。 里。 迫, 遇,交戰七日,大破之。追奔至乞伏泊,復破之,虜千餘口,雜畜萬計。 督役築金河、定襄二城,以居啓民。時有表言仲卿酷暴者,上令御史王偉按之,並實,惜其功 掩襲啓民,令仲卿屯兵二萬以備之,代州總管韓洪、永康公李藥王、蔚州刺史劉隆等,將步 爲方陣,四面拒戰。經五日,會高頗大兵至,合擊之,虜乃敗走。追度白道,踰秦山七百餘 至者二萬餘家。其年,從高頗指白道以擊達頭。仲卿率兵三千爲前鋒,至族蠡山,與虜相 不罪也。 與隋使長孫晟投通漢鎭。 時突厥降者萬餘家,上命仲卿處之恒安。以功進位上柱國,賜物三千段。朝廷慮達頭 會突厥啓民可汗求婚於國,上許之。 因勞之曰「知公清正,爲下所惡。」賜物 達頭騎十萬來寇,韓洪軍大敗,仲卿自樂寧鎭邀擊,斬首虜千餘級。 仲卿率騎千餘馳援之,達頭不敢逼。 仲卿因是間其骨肉,遂相攻擊。十七年,啓民窘 五百段。 仲卿益态,由是免官。 潛遣人誘致啓民所部, 突厥悉衆而至,仲卿 明年,

深 文致法,州縣長東坐者太半。 |壽中,檢校司農卿。 蜀王秀之得罪,奉詔往益州窮按之。 上以爲能,賞婢奴五十口,黃金二百兩,米粟五千石,奇寶 秀賓客經過之處, 仲卿必

雜物稱是。

煬帝嗣位,判兵部、工部二曹尚書事。 其年,卒, 時年六十四。 諡曰肅。 贈物五百段。

子弘嗣。

列

傅

崔弘度 弟弘昇

以戰勳 之,訓曰:「 儀 貌 時護子中山公訓爲蒲州刺史, 魁岸,鬚 崔 ,授儀同。從武帝滅齊,進位上開府,鄴縣公,賜物三千段,粟麥三千石,奴婢百 弘 度字 可畏也。」弘度曰:「此何足畏」、歘然擲下,至地無損傷。 面甚偉。 摩訶衍,博陵安平人也。 性嚴 酷。 年 十七, 令弘度從焉。 祖楷 周大家 魏 司空。 宰宇文護引 嘗與訓登樓, **父說**,周敷州 爲 親信。 至上層, 訓以其拳捷,大奇之。後 刺史。 葬 去 授 都 地 弘度膂力絕 督, 四 五. 累轉大都 丈, 口,雜 俯 臨

畜 干計。 尋從汝南公宇文神舉破盧昌期於范陽。

爲 迥子 守將吳文立,弘度功最。 爲 陳 身計, 將 行 相 爲 軍 潘琛率兵數千來拒戰,隔水而陣。忻遣弘度諭以禍福,琛至夕而 宣帝嗣位,從鄖國公韋孝寬經略淮南。弘度與化政公宇文忻、 識 妻,及破鄴城, 總管,從韋孝寬討之。 何所待也?」 不? 今日 各圖 迥擲弓於地, 迎窘迫: 國 以前後勳,進位上大將軍,襲父爵安平縣公。及尉迥作亂,以弘 事,不得 升樓, 弘度募長安驍雄數百 弘度直 顧私。 罵大丞相極口 上龍尾追之。 以親戚 之情,謹遏亂 而自殺。 人爲別隊,所當無不披靡。 迥彎弓將射 弘度顧其弟弘昇曰:「汝可取迥 兵,不許侵辱。 弘度, 司水賀婁子幹至肥口 遁。進攻壽陽, 弘度脫兜鍪謂 事 弘度妹 勢 如 此,早 降 先 度 陳 詗 滴

頭。」弘昇遂斬之。 進位 上柱國。 時行軍總管例封國公,弘度不時殺迥,致縱惡言。 由是降

爵一等,爲武鄉郡公。

警氣 拜華 甚禮之。 復 窺荆州。 陵總管,鎭荆州。 以 行行 ·,<u></u>素言多不用。 州 開 聞其聲,莫不戰慄。所在之處,令行禁止,盜賊屛跡。 軍 刺 皇初,突厥入寇,弘度以行軍總管出原州以拒之。 史。 復以其弟弘昇女爲河南王妃。 總管出泉門道,隸於楊素。 平陳之役,以行軍總管從秦孝王出襄陽道。 納其妹爲秦孝王妃。 弘度未至,而踪叔父巖擁居人以叛,弘度追之不及。 素亦優容之。 及還,檢校原州事,仍領行軍總管以備胡,無虜而還,上 尋遷襄州總管。 弘度與素,品同而年長,素每屈下之。一旦隸太,意甚 弘度素貴,御下嚴急, 及陳平,賜物五千段。高智慧等作亂, **虜退,弘度進屯靈武。** 梁王蕭琮來朝,上以弘度爲江 陳人憚弘度,亦不敢 動行 月餘 捶罰,吏人 而還,

美。」 誑。」皆曰 弘度。 流汗 弘度 「諾。」後嘗食鼈,侍者八九人,弘度一 大駡曰:「傭奴何 中,檢校太府卿。 無敢欺隱。時有屈突蓋 寧茹三升艾,不逢屈突蓋。」然弘度理家如官,子弟斑白,動行捶楚, 敢誑我? 自以一門二妃,無所降下,每誠其僚吏曰:「人當誠恕, 爲 汝初未食鼈,安知 武候驃騎,亦嚴刻,長安 一問之曰:「鼈美乎。」人懼之,皆云:「鼈 其美。」俱杖八十。 爲之語曰:「寧飮三升酢,〔三不 官屬百工見之者, 閨門整肅, 無得欺

六九九

爲當時所稱 未幾、秦王妃以罪誅,河南王妃復被廢黜。 弘度憂恚,謝病於家,諸弟乃與之

別居,彌不得志。

知 也。 煬帝卽位,河南王爲太子,帝將復立崔妃,遣中使就第宣旨。 使者返,帝曰「弘度有何言。」使者曰:「弘度稱有疾不起。」帝默然,其事竟寢。 使者詣弘昇家,弘度不之 弘度

憂憤,未幾,卒。

慈州 弘昇 上開 亦
発
官 刺 府,封黃臺縣侯,邑八百戶。高祖受禪,進爵爲公,授驃騎將軍。 弘昇字上客。 史。 數歲,轉鄭州刺史。 在周爲右侍上士。 後以戚屬之故,待遇愈隆,遷襄州總管。 尉迥作亂相州,與兄弘度擊之,以功拜上儀同。 宿衞· 及 十餘年,以勳舊遷 河南王妃罪廢, 尋 加

左武 衛大將軍事,指平壤。 煬帝 即位,歷冀州刺史、信都太守,進位金紫光祿大夫, 與字文述等同敗績,奔還,發病而卒,時年六十。 轉涿郡 太守。 遼東之役,檢校

元弘嗣

元弘嗣,河南洛陽人也。 祖剛,魏漁陽王。 父經,周漁陽郡公。弘嗣少襲爵,十八爲左

嗣 事 親 丁,吏 衞。 心不伏,榮遂禁弘嗣於獄,將殺之。 人多怨之。 開皇九年,從晉王平陳,以功授上儀同。十四年,除觀州總管長史,在州專以嚴峻任 二十年,轉幽州總管長史。于時燕榮爲總管,肆虐於弘嗣,每被笞辱。 及榮誅死,弘嗣爲政,酷又甚之。 每推鞫囚徒,多以 弘

督役,晝夜立於水中,略不敢息,自腰以下,無不生蛆, 大業初,煬帝潛有取遼東之意,遣弘嗣往東萊海口監造船。 仁壽末,授木工監,修營東都 ,死者十三四。 諸州役丁苦其捶楚,官人 **尋遷黃門侍郎,轉殿內**

酢灌鼻,或椓弋其下竅,無敢隱情,姦僞屛息。

少監。 及 玄感 遼東之役,進位金紫光祿大夫。 作亂,逼 東都,弘嗣 屯兵安定。或告之謀應玄感者,代王侑遣使執之,送行在所。 明年,帝復征遼東,會奴賊寇隴右,詔 弘嗣擊之。

以 (無反形當釋,帝疑不解,除名,徙日南,道死,時年四十九。 有子仁觀

王文同

煬 埋 咸 [©]憚之。 小 帝嗣位 橛。 王 文同,京兆 一、徵爲 **令**其 文同 、人踣心於木橛上,縳四支於小橛,以棒毆其背,應時潰爛。 下車,聞其名,召而數之。因令左右剡木爲大橛,埋之於庭,出尺餘,四 光祿 頻陽 少卿,以 人 也。 件旨 冒性 口,出爲 一明辯, 恒 Щ 有幹用。 郡 丞。 有一人豪猾, 開皇中,以軍 功拜儀同,尋授桂 每持長吏長短,前 郡中大駭,吏人相 州 後 司 角各 守令

列

傳

第 =

+

ル

酺

吏

隋 耆 卷 七 + 四

視 懾氣

斬於河間,以謝百姓。讎人剖其棺,臠其肉而噉之,斯須咸盡 將殺之。郡中士女號哭於路,諸郡驚駭,各奏其事。 佛會者數百人,文同以爲聚結惑衆,盡斬之。 至河間,召諸郡官人,小有遲違者,輒皆覆面於地而箠殺之。求沙門相聚講論,及長老共爲 及帝征遼東,令文同巡察河北諸郡。 文同見沙門齋戒菜食者,以爲妖妄,皆收繫獄。比 又悉裸僧尼,驗有淫狀非童男女者數千人,復 帝聞而大怒,遣使者達奚善意馳鎖之,

以爲有天道焉。 木石、輕人性命、甚於芻狗。 不嚴而化,前哲所重。 史臣曰:御之良者,不在於煩策,政之善者,無取於嚴刑。故雖寬猛相資,德刑互設,然 嗚呼!後來之士,立身從政,縱不能爲子高門以待封,其可令母掃墓而望 土文等運屬欽明,時無桀黠,未閑道德,實懷殘忍。 長惡不悛,鮮有不及,故或身嬰罪戮,或憂恚顚隕。 賊人肌體,同諸 凡百君子,

校勘記

喪乎?

〔三〕父剛 「剛」原作「網」,據周書、北史趙剛傳改。

建州刺史

[三] 三升酢 升,册府四四八作「斗」。下文「三升艾」同。

載美原縣南有頻陽故城。

頻陽 原作「穎陽」、據北史本傳改。按:本書地理志上,華原縣有頻山。 元和志二、寰宇記三一

隋書卷七十五

列傳第四十

儒林

時也。 荀卿見珍於强楚,叔孫取貴於隆漢。其餘處環堵以驕富貴,安陋巷而輕王公者,可勝數哉! 化之本源,鑿生民之耳目,百王損益,一以貫之。雖世或污隆,而斯文不墜,經邦致治,非一 儒之爲敎大矣,其利物博矣!篤父子,正君臣,尚忠節,重仁義,貴廉讓,賤貪鄙,開政 涉其流者,無祿而富,懷其道者,無位而尊。 故仲尼頓挫於魯君,孟軻抑揚於齊后,

安國,左傳則杜元凱。 義,宋及齊、梁不能尚也。 道未弘。暨夫太和之後,盛修文教,搢紳碩學,濟濟盈朝,縫掖巨儒,往往傑出,其雅誥奧 自晉室 分崩,中原喪亂,五胡交爭,經籍道盡。 河、洛左傳則服子愼,尚書、周易則鄭康成。 南北所治,章句好尚,互有不同。 魏氏發迹代陰,經營河朔,得之馬上,茲 江左周易則王 詩則並主於毛公,禮則 輔嗣,尚書則 孔

成名,殊方同致矣。

同 遵於鄭氏。 大抵南人約簡,得其英華,北學深蕪,窮其枝葉。 考其終始, 要其會歸,

未 **昔齊列康莊之第,多士如** 賤,明達之人,志識之士,安肯滯於所習,以求貧賤者哉?此所以儒罕通 代左右邦家,咸 有望於靑紫,或數將運舛,必委棄於草澤。 今,而皆明哲於往昔。在乎用與不用,知與不 爰自漢、魏,碩學多淸通,逮乎近古,巨儒必鄙俗。 文、武不墜,弘之在人,豈獨愚蔽於 取士於刀筆。縱有學優入室,勤踰刺股,名高海內,擢第甲科,若命偶時來, 林,燕起碣石之宮,羣英自遠。 然則古之學者,祿在其中, · 知耳。 然囊之殉諧庶績,必舉德於鴻儒,近 是知俗易風移,必由上之所好,非 人,學多鄙 **今之學者**, 俗者也。 困於貧

趙、魏,學者尤多,負笈追師,不遠千里,講誦之聲,道路不絕。中州儒 異同,積滯羣疑,渙然冰釋。 乘,率百僚,遵問道之儀,觀釋奠之禮。 夫 / 聖明 時而已。及高祖暮年,精華稍竭,不悅儒術,專尚刑名,執政之徒,咸非篤好。 資旌 自 御 IE. 帛以禮之, 設好爵以縻之, 朔不一 世 一, 亦 無 ,將三百 以 振 斯 年,師 頹俗矣。 於是超擢 說紛綸,無所取正。 於是四海九州强學待問之士靡不畢 奇雋,厚賞諸儒,京邑遙乎四方, 博士罄懸河之辯,侍中竭 高祖膺期纂曆,平一 重席之奧,考正亡逸,研覈 雅之盛,自漢、魏 皆啓黌校。 集焉。 寰宇, 頓天 天子乃 **暨仁壽間** 齊、魯、 網 以 以掩 整萬

君子 焉。于時舊儒多已凋亡,二劉拔萃出類,學通南北,博極今古,後生鑽仰,莫之能測。 在,有國有家者可不愼歟!諸儒有身沒道存,遺風可想,皆採其餘論,綴之於此篇云。 皆懷攘奪之心、「同相與陷於不義。、俱曰:「學者將植,不學者將落。」然則盛衰是繫,興亡攸 之徒,亦多轉死溝壑。 諸經義疏,搢紳咸師宗之。旣而外事四夷,戎馬不息,師徒怠散,盜賊羣起,禮義不足以 開皇之初 **遂廢天下之學,唯存國子一所,弟子七十二人。 煬帝卽位,復開庠序,國子郡縣之學,盛於** 7,刑罰 不足以威小人,空有建學之名,而無弘道之實。 徵辟儒生,遠近畢至,使相與講論得失於東都之下,納言定其差次, 凡有經籍,自此皆湮沒於煨塵矣。 遂使後進之士不復聞詩、書之言, 其風漸墜,以至滅亡,方領矩步 一以聞奏 所製 防

元善

聘,上令善就館受書,雅出門不拜。 初,拜內史侍郎,上每望之曰:「人倫儀表也。」凡有敷奏,詞氣抑揚,觀者屬目。 景之亂,善歸於周。武帝甚禮之,以爲太子宮尹,賜爵江陽縣公。 至征北大將軍、淸冀二州刺史。善少隨父至江南,性好學,遂通涉五經,尤明左氏傳。及侯 元善,河南洛陽人也。祖叉,魏侍中。父羅、「三初爲梁州刺史,及叉被誅,奔於梁,官 善論舊事有拜之儀,雅不能對,遂拜,成禮 每執經以授太子。 而去。後遷 陳使袁雅來 開 皇

列傳

一七〇八

之說,更起朕心。」賚絹百匹,衣一襲。 國子祭酒。 上嘗親臨釋奠,命善講孝經。 於是敷陳義理,兼之以諷諫。 上大悅曰:「聞江陽

有隙 幸無相苦。」妥然之。 歸。 妥每懷不平,心欲屈善。因善講春秋,初發題,諸儒畢集。 善之通博,在何安之下,然以風流醞藉,俯仰可觀,音韻淸朗,聽者忘倦,由是爲後進所 及就講肆,妥遂引古今滯義以難,善多不能對。 善私謂安曰:「名望已定, 善深銜之,二人由是

先患消渴,於是疾動而卒,時年六十。 以付社稷者,唯獨高頗。」上初然之,及頗得罪,上以善之言爲頗游說,深責望之。 善以高頗有宰相之具,嘗言於上曰:「楊素粗疎,蘇威怯愞,元胄、元旻,正似鴨耳。 善憂懼, 可

辛彦之

尋拜中書侍郎。及周閔帝受禪,彦之與少宗伯盧辯專掌儀制。明、武時,歷職典祀、太祝、 外府禮曹,賜以衣馬珠玉。 不交非類,博涉經史,與天水牛弘同志好學。後入關,遂家京兆。周太祖見而器之,引爲中 辛彥之,隴西狄道人也。 時國家草創,百度伊始,朝貴多出武人,修定儀注,唯彥之而已。 祖世敍,魏涼州刺史。 父靈輔,周渭州刺史。 彦之九歲而孤,

樂部 御正 尋進爵五原郡公,加邑千戶。 宣帝卽位,拜少宗伯 一四曹大夫,開府儀同三司。 奉使迎突厥皇后還,賚馬二百匹,賜爵龍門縣公,邑

}典 貢珍玩,唯<u>彦之</u>所貢,並供祭之物。 避席而謝曰:「辛君所謂金城湯池,無可攻之勢。」高祖大悅。 書,與秘書監牛弘撰新禮。 潞 開皇十一年,州人張元暴死,數日乃蘇,云遊天上,見新構一堂,制極崇麗。元問其故,人云 之力也。」遷潞州刺史,前後俱有惠政。彦之又崇信佛道,於城內立浮圖二所,並十五層。 一部,六官 州刺史辛彦之有功德,造此堂以待之。 高 祖受禪,除太常少卿,改封任城郡公,進位上開府。 部、祝文一部、禮要一部、新禮一部, 五經異義一部, 並行於世。 吳興沈重名爲碩學,高祖嘗令彥之與重論議。 高祖善之,顧謂朝臣曰:「人安得無學!彦之所貢,稽古 彦之聞而不悅。 尋轉國子祭酒。 其年卒官。諡 後拜隨州刺史。于時州牧多 日宣。 重不能抗,於是 歲餘,拜禮部尚 有子仲龕, 彦之撰墳

何妥

至猗氏令。

因致巨富,號爲西州大賈。 何妥字栖鳳,西城 人也。 安少機警,八歲遊國子學,助教顧良戲之曰:「汝旣姓何,是荷葉 父細胡、「三通商 入蜀,遂家郫縣,事梁武陵王紀,主 知金帛,

列

傳

第

之,授太學博士。 之荷,爲是河水之河。」應聲答曰:「先生姓顧,是眷顧之顧,是新故之故。」衆咸異之。十七, 頭,時人爲之語曰:「世有兩儁,白楊何妥,靑楊蕭眘。」其見美如此。江陵陷,周武帝尤重 以技巧事湘東王,後知其聰明,召爲誦書左右。時關陵蕭眘亦有儁才,住靑楊巷,妥住白楊 五。」妥駁曰:「帝嚳四妃,舜又二妃,亦何常數?」由是封襄城縣伯。 宣帝初欲立五后,以問儒者辛彥之,對曰:「后與天子匹體齊尊,不宜有

立 言,面欺陛下,是其不誠。不誠不孝,何以事君!且夫子有云:『不讀詩無以言,不讀禮無以 亦然之。 時納言蘇威嘗言於上曰:「臣先人每誠臣云,唯讀孝經一卷, 以掌天文律度,皆不稱職,妥又上八事 一。』豈容蘇綽敎子獨反聖人之訓乎。」威時兼領五職,上甚親重之,俀因奏威不可信任。 高祖受禪,除國子博士,加通直散騎常侍,進爵爲公。妥性勁急,有口才,好是非人物。 妥進曰:「蘇威所學,非止孝經。厥父若信有此言,威不從訓,是其不孝。 以諫 足可立身治國,何用多爲」上 若無此

叉

署之官。人之不服,實由於此。臣聞爵人於朝,與士共之,刑人於市,與衆棄之。伏見 則民不服。」由此言之,政之治亂, 人,良異于此,無論諂直,莫擇賢愚。 其一事曰:臣聞知人則哲,惟帝難之。 必愼所舉, 心欲崇高,則起家喉舌之任,意須 孔子曰:「舉直錯諸枉則民服,舉枉錯諸直 故進賢受上賞,蔽賢蒙顯戮。 抑屈,必白首郎 察今之舉

宜然。 留心獄訟,愛人如子,每應決獄,無不詢訪羣公,刑之不濫,君之明也。 若有懋功簡在帝心者,便可擢用。自斯以降,若選重官,必須參以衆議,勿信一 刑旣如 此,爵亦

人之舉。則上 其二事曰:孔子云:「是察阿黨、則罪無掩蔽。」又曰:「君子周而不比, 小人比而不 |不偏私,下無怨望。

滯 讟之言出矣。伏願廣加逖訪,勿使朋黨路開,威恩自任。有國之患,莫大於此。 周。」所謂比者,卽阿黨也。謂心之所愛,旣已光華榮顯,猶加提挈。心之所惡,旣已沈 屈辱,薄言必怒。提挈旣成,必相掩蔽,則欺上之心生矣。屈辱旣加,則有怨恨,謗

軸,好 職,爲 望、傅說之能,自負傅巖、滋水之氣,不慮憂深責重,唯畏總領不多,安斯 任,不相侵濫,故得四門雍穆,庶績咸熙。今官員極多,用人甚少,有一人身上乃兼數 力舉重,不能 方朔言曰:「尊之則 其三事曰:臣聞舜舉十六族,所謂八元、八愷也。計其賢明,理優今日,猶復擇才授 致 是國無人也?爲是人不善也?今萬乘大國,髦彦不少,縱有明哲,無由自達。 [顯蹶,實此之由。 為用。 爲將,卑之則爲虜。」斯言信矣。今當官之人,不度德量力,旣無呂 伏願 更任賢良,分才參掌,使各行有餘力,則庶 易曰:「鼎折足,覆公餗,其形渥凶。」言不勝其任 事 康哉 寵 也。 任, 輕 臣聞窮 彼 權 東

共 四事曰"臣聞禮云"「析言破律,亂名改作, 執左道以亂政者殺。」孔子曰:「仍舊

列

傳

第

四十

儒

時,王渥亂名,曾無紀極。 其言不驗,必加重罰,庶令有所畏忌,不敢輕奏狂簡 轢太史。 年方決。 何必改作!」伏見比年以來,改作者多矣。 公孫濟迂誕醫方,費逾巨萬,徐道慶廻互子午,糜耗飲食。 莫不用其短見,便自夸毗,邀射名譽,厚相誣罔。請今日已後,有如此者,若 張山居未知星位,前已蹂藉太常,曹魏祖不識北辰,今復轔 至如范威漏刻,十載不成,趙翊尺稱,七 常明破律,多歷歲

奏,威大銜之。 安應聲曰:「無蘇威,亦 其餘文多不載。 十二年,威定考文學,又與安更相訶詆。 時蘇威權兼數司,先嘗隱武功,故妥言自負傅嚴、滋水之氣,以此激上。 何憂無執事 」由是與威有隙 |威勃然日:「無何妥,不慮無博士」 書

其後上令妥考定鍾律,妥又上表曰:

其君驕;商亂則跛,其官壞;角亂則憂,其人怨;徵亂則哀,其事勤,羽亂則危,其財匱。 怨,禮至則 日。「放鄭聲、遠佞人。」故鄭、衞、宋、趙之聲出, [而和樂興焉。] [閏] 故樂行而倫淸, 夫姦聲感人而逆氣應之,「逆氣成象 臣 聞 .明 不爭, 則有禮樂,幽 揖讓 而治天下者, . 則 有 鬼神、然則動天地、感鬼神、莫近於禮樂。 耳目聰明,血氣 禮樂之謂 而淫樂與焉。 也。 內 '則發疾,外則傷人。是以宮亂 臣聞樂有二,一日 正聲感 和平,移風易俗,天下皆寧。 人,而順氣應之,心順氣 「姦聲, 又云樂至 二日 則荒, 成象, īE 孔子 則 無

矣。紂爲無道,太師抱樂器以奔周。晉君德薄,師曠固惜淸徵。 能知樂者,其唯君子!不知聲者,不可與言音,不知音者,不可與言樂,知樂則幾於道 者,禽獸是也,知音而不知樂者,衆庶是也。故黃鍾大呂,弦歌干戚,僮子皆能儛之。 也。 鄭、衞之音者,姦聲以亂,溺而不止,獶雜子女,不知父子。今君所問者樂也,所愛者音 不和順;在閨門之內,父子同聽之則莫不和親。此先王立樂之方也。故知聲而不知音 目 而不知倦,何也。」子夏對曰:「夫古樂者,始奏以文,復亂以武,修身及家,平均天下。 五者皆亂,則國亡無日矣。魏文侯問子夏曰「吾端冕而聽古樂則欲寐,聽鄭、衞之音 而已矣。欲使在宗廟之內,君臣同聽之則莫不和敬;在郷里之內,長幼同聽之則莫 夫樂之與音,相近而不同,爲人君者,謹審其好惡。」案聖人之作樂也,非止苟悅耳

瑟,漢高擊筑,元帝吹簫。漢高祖之初,叔孫通因秦樂人制宗廟之樂。迎神于廟門,奏 周,備于詩頌。故自聖賢已下,多習樂者,至如伏羲減瑟,文王足琴,仲尼擊磬,子路鼓 **夏,湯作大護,武王作大武,從夏以來,年代久遠,唯有名字,其聲不可得聞。自殷至** 以配祖考。」至于黃帝作咸池,顓頊作六莖,帝嚳作五英,堯作大章,舜作大韶,禹作大 上古之時,未有音樂,鼓腹擊壤,樂在其間。易曰:「先王作樂崇德,殷薦之上帝,

嘉至之樂,猶古降神之樂也。

皇帝入廟門,奏永至之樂,以爲行步之節,猶古采薺、肆

古,三雍四始,實稱 經,雖變其名,大抵皆因秦舊事。 至於魏、晉,皆用古樂。魏之三祖,並制樂辭。 廟 傳受,得曲 播越,五都 四時之**儛**,以示天下安和, 改名文始,以示不相襲也。 在齊聞韶 皇帝就 也。 奏武德、文始、五行之儛。 東廂坐定,奏永安之樂,美禮成也。其休成、永至二曲,叔孫通所制也。 ,三月不知肉味是也。 豆上薦,奏登歌之樂,猶古清廟之歌也。 傾蕩,樂聲南度,是以大備江東。宋、齊已來,至于梁代,所行樂事,猶皆傳 而 不用之於宗廟朝廷也。 大盛。及侯景篡逆,樂師分散, 四時順也。 五行儛者,本周大武樂也,始皇改曰五行。 當春秋時,陳公子完奔齊,陳是舜後,故齊有韶樂。 秦始皇滅齊,得齊韶樂。漢高祖滅秦,韶傳於漢,高祖 孝景采武德儛以爲昭德,孝宣又采昭德以爲盛 登歌 其四儛、三調悉度爲齊。 再終,奏休成之樂,美神饗也。 及于孝文,復作 齊氏雖知 漢高祖 自 永嘉 孔子

陳於殿庭者,亦悉附之於後。 正 庶得流傳古樂。 果云是梁人所教。 於 來葉,豈不美歟 臣 少好音律,留意管絃,年雖耆老,頗皆記憶。 然後 今三調、四儛並皆有手,雖不能精熟,亦頗具雅聲。 ! 謹具錄三調、四舞曲名,又製歌辭如別。 取其會歸,撮其指要,因循損益, 及東土剋定,樂人 ",更制 嘉 名。 其有聲曲流宕,不可以 歌盛德於當今,傳雅 悉返,訪其逗遛, 若令教習傳授,

書奏, 所傳宗廟雅樂,數十年唯作大呂,廢黃鍾。 別勑太常取妥節度。於是作淸、平、瑟三調聲,又作八佾、鞞鐸巾拂四舞 安又以深乖古意,乃奏請用黃鍾。 韶下公卿議, 先是,太常

從之。

指斥當 尋為 沈 同,每言變之短。 詔許之。 重等撰三十六科鬼神感應等大義九卷,封禪書一卷,樂要一卷,文集十卷,並行於世 國 時 俄 子 世 有負笈遊學者,妥皆爲講說教授之。爲刺史箴,勒于州門外。 而 祭酒。 別黨。 復 安子 蔚爲秘書郎,有罪當刑,上哀之,滅死論。 知學事。 卒官。 於是蘇威及吏部尚書盧愷、侍郎薛道衡等皆坐得罪。 高祖 時上方使蘇變在太常,參議鍾律。變有所建議, 下其議,朝臣多排妥。 諡 日 肅 撰周易講疏十三卷,孝經義疏三卷,莊子義疏四卷,及與 安復 上封事,指陳得失, 是後恩禮漸薄。六年,出爲龍州刺 在職三年,以疾請還, 大抵論時政損益,幷 朝士多從之,妥獨不 除 伊州刺史,不行,

蕭該

書、春秋、禮記並通大義,尤精漢書, 奉詔書與安正定經史,然各執所見,遞相是非,久而不能就,上譴而罷之。 蘭 凌 蕭 該者 梁鄱陽王 恢之孫 也。 甚爲貴 少封 攸侯。 (遊所 禮。 梁 荆州 開 皇 陷 初, 與 賜爵 何妥 Щ 同 陰 至 縣公, 長 安。 該後撰漢書 拜國 性篤學, 子博

列

傳

第

四

+

儒

林

及文選音義,咸爲當時所貴。

包愷

究。 東海 大業中,爲國子助敎。 包愷, 字和樂。 其兄愉,明五經,愷悉傳其業。 于時漢書學者,以肅、包二人爲宗匠。 又從王仲通受史記、漢書, 聚徒教授,著錄者數千 尤稱精

房暉遠

卒,門人爲起墳立碣焉。

周3. 房暉遠字崇儒,恒山真定人也。 兼善圖 緯,恒以教授爲務。 遠方負笈而從者,動以千計。 世傳儒學。 暉遠幼有志行,治三禮、春秋三傳、詩、書、 齊南陽王綽爲定州刺史,聞

其名,召爲博士。 周武帝平齊,搜訪儒俊,暉遠首應辟命,授小學下士。

臧否。 博 擢 士。 爲 國 及高 尋與 祭酒元善怪問之,暉遠曰:「江南、河北, 子博士。 祖 沛公鄭譯修正樂章。 受禪、遷太常博士。 會上令國子生通 太常卿牛弘每稱爲五 1 一經者,並悉薦舉, 母憂解任。 後數歲,授殄寇將軍,復爲太常 義例不同,博士不能偏涉。 將擢用 經 庫。 之。 吏部尚書韋世康薦之,爲太學 旣策問訖, 博 學生皆持其所 土 博士。未幾, 不能時定

卒官,時年七十二,朝廷嗟惜焉,赗賻甚厚,贈員外散騎常侍。 聞『窈窕淑 高祖嘗謂羣臣曰:「自古天子有女樂乎。」楊素以下 無疑滯。 短,稱己所長,博士各各自疑,所以久而不決也。」祭酒因令暉遠考定之,暉遠覽筆便下,初 所 試 或有 四五 女, 一百人,數日便決,諸儒莫不推 不服者,暉遠問 鍾鼓樂之』,此卽王者房中之樂, 其所傳義 疏,輒爲始末誦之,然後出其所短, 其通博,皆自以爲 著於雅頌,不得言無。」高祖大悅。 莫知所出, 不能測 遂言無女樂。 也。 尋 暉遠進 奉詔預修令式。 自是無敢飾 日: 一臣

馬光

學,光剖析疑滯,雖辭非俊辨,而理義弘贍,論者莫測其淺深,咸共推服,上嘉而勞焉。 死。 子學,王公以下畢集。 仁等俱至,並授太學博士、時人號爲六儒。然皆鄙野, 上其狀,竟坐誅。 爲儒者 仲讓未幾告歸鄉里,著書十卷,自云此書若奏,我必爲宰相。 馬光字榮伯 所宗。 ,武安人也。 孔籠、張黑奴、劉祖仁未幾亦被譴去。唯光獨存。嘗因釋奠,高祖 開皇初,高祖徵山東義學之士,光與張仲讓、孔籠、竇士榮、張黑奴、劉祖 光升座講禮,啓發章門。 少好學,從師數十年,晝夜不息,圖書讖緯,莫不畢覽,尤明三 已而諸儒生以次論難者十餘人,皆當時碩 無儀範,朝廷不之貴也。 又數言玄象事。 士榮尋病 州 親 山東 幸國 縣 列

列

傳

第四

+

倡

林

三禮 學者 自 熊 安 生 土後, 唯宗光一人。 初,教授瀛 博間, 門徒千數, 至 是多負笈從

後數年,丁母憂歸鄉里,遂有終焉之志 0 以疾卒於家,時年七十三。

劉焯

賾等於 精博。 弘、國子 書省考定羣言,因 作 食 熊安生 郎 王 繼,晏如 劉 少與河間 一,皆不 劭 六年,運 國 「焯字士元,信都昌亭人也。 父洽,郡功曹。焯犀額龜背,望高 祭酒蘇威 子 同 修 共 卒業 也。 國 劉炫結盟 論古今滯 洛陽 史,兼參議 遂 ()國子 而去。 假還鄉里,縣令韋之業引爲功 石經 以儒 祭酒元善、博士蕭該、何妥、太學博士房暉 爲友,同受詩於同郡劉軌思,「三」受左傳於廣平郭懋當,問禮於阜 義,前賢所不通者。 武强交津橋劉智海家素多墳籍,焯與炫就之讀書,向經十載,雖 學知 至 (律曆) 京 師,文字磨滅,莫能 名,爲州 仍直 博士。 |門下省,以待顧問。 毎升座 刺 曹。 史趙煚引爲從事,舉秀才,射策甲科。 知 者 一,論 尋復 奉 難 鋒 敕 入京,與左僕射楊素 起,皆不能屈,楊素 俄除員外將軍。 與 劉 炫等考定 遠、崔崇德、 視遠,聰敏沈深,弱 後 () 吏 等莫 晉王 與諸 部 不服 文 儒 尙 學催 書件 與著 不好 於 祕 城

優 遊 一鄉里,專以教授著述爲務,孜孜不倦。 後 因 或 子 釋奠,與炫二 人 論 義, 深 挫 諸 賈、馬、汪、鄭所傳章句, 儒 咸 懷 妬 恨, 遂 爲 飛章 所謗, 多所是非。 除 名 爲民。 九章算術 於是

聞 出 名儒 十卷,曆書十卷,五經述議,並行於世。 其右者。 而 後進,質疑受業,不遠千里而至者,不可勝數。 召之,未及進謁,詔令事蜀王,非其好也,久之不至。 層書十餘部,推步日月之經,量度山海之術, 然懷抱不曠,又嗇於財,不行束脩者,未嘗有所敎誨,時人以此少之。 劉炫聰明博學,名亞於焯,故時人稱二劉焉。 論者以爲數百年已來,博學通儒,無能 莫不覈其根本,窮其祕奧。 王聞而大怒,遣人枷送於燭,配之 廢太子勇 著稽極 天下

令張胄玄多不同 煬帝 即位 ,遷太學博士,俄以疾去職。 ,被駁不用。 大業六年卒,時年六十七。 數年,復被徵 以待顧問,因上所著曆書,與太史 劉炫爲之請諡,朝廷不許。

王以罪廢,焯又與諸儒修定禮律,除雲騎尉

軍防。

其後典校書籍。

劉炫

曆,兼於內史省考定羣言,內史令博陵李德林甚禮之。 有遺失。 子 精明,視日不眩 歲餘,奉勑與著作郎王劭同修國史。 劉 炫字光伯,河間景城 周武帝平齊,瀛州刺史宇文亢引爲戶曹從事 一,强記默識,莫與 人也。 〈爲儔。 少以聰敏見稱, 左畫 俄直門下省, 一方,右畫 與信都劉焯閉戶讀書, o 炫雖偏直三省,竟不得官,爲縣司責 圓,口 後刺 以待顧問。 史李繪署禮曹從 誦 ,目數,耳聽,五 叉 與諸 十年不出。 術者 事 事 ,以吏幹 修天文律 同 . 舉, 炫眸 知 無

列

傅

其賦 微妙。至於公私文翰,未嘗假手。」吏部竟不詳試,然在朝知名之士十餘人, 並堪講授。 役。 茲自陳於內史,內史送詣吏部,吏部尚書韋世康問其所能。 、尚書、公羊、左傳、孝經、論語孔、鄭、王、何、服、杜等注,凡十三家,雖義 周易、儀禮、穀梁,用功差少。 史子文集,嘉言美事,咸誦於心。 炫自爲狀曰:「周禮、 天文律曆,窮覈 保明炫所陳不 有精粗,

衞。 官,取賞而去。後有人訟之,經赦免死,坐除名,歸于家,以敎授爲務。太子」勇聞而召之,旣 至京師,勑令事蜀王秀,遷延不往。蜀王大怒,枷送益州。 時牛弘奏請購求天下遺逸之書,炫遂偽造書百餘卷,題爲連山易、魯史記等,錄上送 旣而配爲帳內,每使執杖爲門

謬

一,於是除殿內將軍

與古旣異,何降之有。今之貴者,多忽近親,若或降之,民德之疎,自此始矣。」遂寢 以爲然。 降 一等。今之上柱國,雖不同古諸侯,比大夫可也。官在第二品,宜降傍親一等。 俄而釋之,典校書史。 炫因擬屈原下居,為鑑逢以自寄。 及蜀王廢,與諸儒修定五禮,授旅騎尉。吏部尚書牛弘建議,以爲禮諸侯絕傍春,大夫 族 |炫駁之曰:「古之仕者,宗一人而已,庶子不得進。由是先王重適,其宗子有 人與宗子雖疎遠,猶服縗三月,良由受其恩也。今之仕者,位以才升,不限適庶, 其 議者多 事 分祿

開皇二十年,廢國子四門及州縣學,唯置太學博士二人,學生七十二人。」
炫上表言學

校 可伐,作撫夷論以諷焉,當時莫有悟者。及大業之季,三征不克,炫言方驗 不宜廢,情理甚切,高祖不納。 開皇之末,國家殷盛,朝野皆以遼東爲意。 炫以爲遼東不

由。」弘 萬 不可 第,除太學博士。 歸子河間 事 大小之官,悉由 紀,郡置守丞,縣唯令而 過數十,三府行臺,遞相統領,文書行下,不過十條。今州三百,其繁一 殿最,案不重校,文不繁悉,府史之任,掌要目而已。今之文簿,恒慮覆治,鍛鍊若其不密, 以 而 府 不省而望從容,其可得乎。」弘甚善其言 [里追證百年舊案,故諺云『老吏抱案死』。古今不同,若此之相懸也,事繁政弊,職此之 風 俗陵遲、婦人無節。於是立格、州縣佐史、三年而代之、九品妻無得再醮。 史少,今令史百倍於前,判官減則不濟,其故何也。」炫對曰:「古人委任責成,歲終考其 ,弘竟從之。 煬帝卽位,牛弘引炫修律令。高祖之世,以刀筆吏類多小人,年久長姦,勢使然也。 叉問 :``「魏、齊之時,令史從容而已,今則不遑寧舍,其事何由。」」炫對曰:「齊氏立州不 .吏部,纖介之迹,皆屬考功,其繁二也。 諸郡置學官,及流外給廪,皆發自於炫。弘嘗從容問炫曰:「案周禮士多 歲餘,以品卑去任,還至長平,奉勑追詣行在所。 已。 其所具僚,則長官自辟,受詔赴任,每州不 而 不能用。 納言楊達舉炫博學有文章, 省官不如省事, 或言其無行,帝遂罷之, 過數十。 也。 省事不 往者州唯置綱 炫著論以爲 如淸心。 今則不 射 策高 官 叉

于 時羣 ·盜蜂起,穀食踊貴,經籍道息,教授不行。 炫與妻子相去百里,聲問斷絕,

不得志,乃自爲贊曰

野,親故莫照其心,後人不見其迹,殆及餘喘,薄言胸臆,貽及行邁, 先達,貽笑從昆。徒以日迫桑楡,大命將近,故友飄零,門徒雨散,溘死朝露 通 人司馬相如、揚子雲、馬季長、鄭康成等, 皆自敍風徽, 傳芳來葉。 傳示州里, 余豈敢仰均 使夫將 埋 魂 朔

驥 俗 多 得博覽典誥,窺涉今古,小善著於丘 循終始,其 耆艾,數接後 弗 來俊哲知 改價,其幸三也。 之及。 騄 , 數 此 余 手 添 從 翼 啓足,庶幾 徒勞之職 暨乎 縮 余鄙 大幸 鵷 髮以來,迄於白首,嬰孩爲慈親所恕,棰楚未嘗加,從學爲明師所矜,榎楚 生。 鴻,整緗素於鳳池,記言動 志耳。 敦敍邦族,交結等夷,重物輕身,先人後已。 ·有 學則 ,久執城旦之書, 四,其深 畫漏方盡,大耋已嗟,退反初服,歸骸故里,玩文史以怡神,閱魚鳥以 可免,其幸二也。 服 而不 **水恨有一** 厭 游 0 名不挂於白簡, 性 一園,虛名聞 則勞而 以此 本愚蔽,家業 於 、麟閣,參謁 庸 不倦,幽 虚,屢動 於邦國, 事 貧窶,爲父兄所饒,廁 情寡適, 宰 神 不 輔 眷 其 幸 染於丹筆 一造請 了, 以 昔在幼弱,樂參 心事方違。 此 也。 羣 卑 公, 賤, ٠, 立 隱 身立 厚 毎 顯 禮 升 內省生平,顧 人 縉 殊 行 長者,爰及 間 天 紳之末,遂 恩 府 沈浮 慚 增 齊 应 榮 實 世 鐮

散 陵 人願,途不我與。 遲,蹈先儒之逸軌,傷羣言之蕪穢,馳騖墳典,釐改僻謬,修撰始畢, 慮,觀省野物,登臨園沼,緩步代車,無罪爲貴,其幸四也。 世路未夷、學校盡廢、道不備於當時、業不傳於身後。 仰休明之盛世,慨道敎之 圖 事 銜恨泉壤, 適成,天違

知,恐爲後變,遂閉門不納。是時夜冰寒,因此凍餒而死,時年六十八。其後門人諡曰宣德 炫爲賊所將,過城下堡。 時在郡城、糧餉斷絕,其門人多隨盜賊、哀炫窮乏、詣郡城下索炫、 未幾,賊爲官軍所破,炫飢餓無所依,復投縣城。 郡官乃出炫與之。 長吏意炫與賊相

在茲乎。其深恨一也。

十卷,春秋攻昧十卷,五經正名十二卷,孝經述議五卷,春秋述議四十卷,尚書述議二十卷, (毛詩述議四十卷,注詩序一卷,算術一卷,並行於世。 |炫性躁競,頗俳諧,多自矜伐,好輕侮當世,爲執政所醜,由是官塗不遂。 著論語述議

先生。

褚輝

論。 吳 輝博辯,無能屈者,由是擢爲太學博士。 郡褚輝字高明,以三禮學稱於江南。 煬帝時,徵天下儒術之士,悉集內史省,相次講 撰禮疏一百卷。

列

一七二四

顧彪

餘杭顧彪字仲文,明尚書、春秋。 煬帝時爲祕書學士,撰古文尚書疏二十卷。

魯世達

餘杭魯世達,煬帝時爲國子助教,撰毛詩章句義疏四十二卷,行於世。

張沖

七十餘事,喪服義三卷,孝經義三卷,論語義十卷,前漢音義十二卷。 吳郡張沖、字叔玄。 仕陳爲左中郎將、非其好也,乃覃思經典,撰春秋義略,異於**杜氏** 官至漢王侍讀。

王孝籍

中,召入秘書,助王劭修國史。 平原王孝籍,少好學,博覽羣言,徧治五經,頗有文翰。 劭不之禮,在省多年,而不免輸稅。 與河間劉炫同志友善。 孝籍鬱鬱不得志,奏記 開皇

於吏部尚書牛弘曰:

爲蹙。況懷抱之內,冰火鑠脂膏,腠理之間,風霜侵骨髓,安可齰舌緘唇,吞聲飲氣,惡 竊以毒螫瘠膚,則申旦不寐,飢寒切體,亦卒歲無聊。何則?痛苦難以安,貧窮易

呻吟之響,忍酸辛之酷哉!

間,子野未會聞,離朱所不見,沈淪東觀,留滯南史,終無薦引,永同埋殯。三世不移, 恨入冥,則虛緣恩顧,此乃王稽所以致言,應侯爲之不樂也。潛鬢髮之內,居眉睫之 發梅福之狂。非仙所能避。愁疾甚乎厲鬼,人生異夫金石,營魂且散,恐筮予無徵,齎 **閼,關山超遠,齧臂爲期,前塗逾邈,倚閭之望,朝夕已勤。謝相如之病,無官可以줲, 貢禹之田,供釋之之費,有弱子之累,乏强兄之產。 加以老母在堂,光陰遲暮,寒暑遠** 言無不履,猶恐拯溺遲於援手,救經緩於扶、足,待越人之舟楫,求魯匠之雲梯,則必 蘭之氣,暖布帛之詞,許小人之請,聞大君之聽。雖復山川不遠,鬼神在茲,信而 懸於槁樹之枝,沒於深淵之底矣。夫以一介貧人,七年直省,課役不免,慶賞不霑。 伏惟明尚書公動哀矜之色,開寬裕之懷,咳睡足以活枯鱗,吹噓可用飛窮羽。芬椒 有徵, 實

人所以爲明尚書幸也。坐人物之源,運銓衡之柄,反披狐白,不好緇衣,此小人爲明尚 夫不世出者,聖明之君也,不萬一者,誠賢之臣也。以夫不世出而逢不萬一,此小 雖由寂寞,十年不調,實乏知已。

修第四十

儒林

書不取也。 離憂之詞,記志於前修,通心於來哲,使千載之下哀其不遇,追咎執事,有點淸塵,則不 資,增耳目之明,無手足之蹙,憚而弗爲,孰知其解!夫官或不稱其能,士或未申其屈, 一夫竊議,語流天下。勞不見圖,安能無望!儻病未及死,狂還克念,汗窮愁之簡,屬 昔||剂玉未剖,則下和之足,百里未用,碎禽息之首。 居得言之地,有能用之

涉傷爽,神情警悟,雅有口才,氣擅詞筆,然計以爲直、失儒者之風焉。劉焯道冠縉紳,數 弘亦知其有學業,而竟不得調。 窮天象,旣精且博,洞幽究微,鉤深致遠,源流不測,數百年來,斯人而已。劉炫學實通儒, 風韻閑遠,清談高論,籍甚當年。彦之敦經悅史,砥身礪行,志存典制,動蹈規矩。何妥通 下風,稱珍席上。或聚徒千百,或服冕乘軒,見重明時,實惟稽古之力也。江陽從容雅望, 方,流聲後胤者,其唯學乎。」信哉斯言也。 暉遠、榮伯之徒,篤志不倦,自求諸己,遂能聞道 史臣曰:"古語云:「容體不足觀,勇力不足恃,族姓不足道,先祖不足稱。然而顯聞四 後歸鄉里,以教授爲業,終于家。注倘書及詩,遭亂零落。 **肖之軀,死生爲累,小人之罪,方且未刊。願少加憐愍,留心無忽!**

之所與者聰明,所不與者貴仕,上聖且循不免,焯、炫其如命何! 知,時不我與,或纔登於下士,或餒棄於溝壑,惜矣。子夏有言:「死生有命,富貴在天。」天 才堪成務,九流、七略,無不該覽。雖探蹟索隱,不逮於悼,裁成義說,文雅過之。並道亞生

校勘記

[1] 攘奪之心 「奪」,各本作「寇」,宋小字本作「憨」。「鬼」即古「奪」字。一个據改。

ハニ 父羅 按"魏書及北史元叉傳、元羅傳,元羅是元叉之弟,非父子。 叉本名夜叉,羅本名羅刹。

此處有誤。

(三) 父細胡 北史本傳、「胡」上有「脚」字。

29 夫姦聲感人而逆氣應之□逆氣成象而淫樂興焉正聲感人而順氣應之□順氣成象□而和樂興焉□

方括號內的文字,據册府五六八補。

八五 同受詩於同郡劉軌思 「受」原作「授」,據北史本傳改。

列

僔

隋書卷七十六

列傳第四十一

文學

民。或離讒放逐之臣,塗窮後門之士,道轗軻而未遇,志鬱抑而不申,憤激委約之中,飛文 行之不遠。」故堯曰則天,表文明之稱,周云盛德,著煥乎之美。然則文之爲用,其大矣哉! 魏闕之下,奮迅泥滓,自致靑雲,振沈溺於一朝,流風聲於千載,往往而有。 上所以敷德敎於下,下所以達情志於上,大則經緯天地,作訓垂範,次則風謠歌頌,匡主和 湯曰:「觀乎天文,以察時變,觀乎人文,以化成天下。」標曰:「言,身之文也,言而不文, 是以凡百君子,

間,洛陽、江左,文雅尤盛。于時作者,濟陽江淹、吳郡沈約、樂安任昉、濟陰溫子昇、河間邢 自漢、魏以來,迄乎晉、宋,其體屢變,前哲論之詳矣。 暨永明、天監之際,太和、天保之 莫不用心焉。

列傳第四

+ -

文學

荆,此風扇於關右,狂簡斐然成俗,流宕忘反,無所取 其詞 雅 若 然 瀾 而 才、鉅 繁,其文匿 道 能 彼 浩 淪 ,清綺 蕩 掇彼清音,簡茲累句,各去所短,合其兩長,則文質斌 此 缺, 好 筆 鹿 尙 則 有 魏 漸 .',互有 文過 餘 伯起等,並學窮書圃,思極人文,縟綵鬱於雲霞,逸響振 而彩,詞尚輕險,情多哀思 乖 力,詞 典則, 」其意,理深者便於時用,文華者宜於 異同。 無竭 爭馳新巧。 江左宮商發越,貴於清綺,河朔詞 源。 方諸張、蔡、曹、王,亦各 簡文、湘東、啓其淫放、徐陵、庾信,分路 格以延陵之聽,蓋亦亡國之音乎! 裁。 詠 一時之選 歌, 斌、盡善盡 義 此其 貞剛,重乎氣 也。 南 美矣。 北 於金石。 聞 詞人得 其 風 質 揚 梁自大同之後, 者 英華 周氏吞併梁、 失之大較 鐮 氣 聲 質 馳景慕, 秀發,波 其 則 意淺 理 也。 勝

綴文之士,遂得依 韶、冬至受朝詩及擬飲馬長城窟,並存雅體,歸於典制。 執法,屢飛霜簡。 高 祖初統萬機,每念斲彫爲樸,發號施令,咸去浮華。 而 煬帝初習藝文,有非輕側之論,暨乎即位,一變其風。其與越公書、建東都 取正焉。 所謂 能言者未必能行,蓋亦君子不以人廢言也。 雖意在驕淫, 而詞無浮蕩, 然時俗詞藻, 猶多淫麗, 故當 故憲臺

之中,俱爲大國 爱自 人,見稱當世,則范陽盧思道、安平李德林、河東薛道衡、趙郡李元操、鉅鹿魏澹、會稽 東帝歸秦,逮乎靑蓋入洛,四隩咸暨,九州 一之寶。 言 川 '其楚,片善無遺,潤 不圓流,不能十數,才之難 、攸同,江、漢英靈,燕、趙奇俊,並 也,不其 (然乎 網 時

虞世 傳,論 基、河東柳晉、高陽許善心等,或鷹揚河朔,或獨步漢南,俱騁龍光,並驅雲路, m 叙之。 其潘徽 、萬壽之徒,或學優而 不切,或才高 而無貴仕,其位可得而 卑,其名不 各有本

可堙沒。

今總之於此,爲文學傳云。

從者曰 忘。 室,軍書羽檄,多成其手。 臻 好 其 子 元帝 子 勇引為 、噉蜆,以音同 尙 答曰 未 時,遷中書舍人。江陵陷沒,復歸蕭詧,以爲中書侍郎。 有 高 劉 劉 祖 臻字宣擊,沛國相人也。 悟 汝 受禪,進位儀同三司。 劉臻 :「此是大人家。」於是顧盼, 外之乃悟, 訥者,亦任 學士,甚褻狎之。 ,謂至訥家。 知 劉儀同 父諱、 1儀同,俱爲太子學士,情好甚密。 家乎。」從者不知尋謝,謂糜還家,答曰「知。」於是引之而 呼爲扁螺。 乃據鞍大呼曰:「劉儀 後爲露門學士,授大都督,封饒陽縣子,歷藍田令、畿伯下大夫。 臻無吏幹,又性恍惚, 耽悅經史, 終日覃思, 至於世事, 多所遺 左僕射高頻之伐陳也,以臻隨軍,典文翰,進爵爲伯。 父顯,梁尋陽太守。臻年十八,舉秀才,爲邵陵王東閣祭酒 其疎放多此類也。 同 可 叱從者曰:「汝大無意, 出 矣。」 精於兩漢書,時人稱為漢聖。開皇十八 臻住城南,訥住城東,臻嘗欲尋訥 其子 迎門, 周冢宰字文護辟爲中外府 臻驚 日:此 吾欲 造劉 汝 去,旣扣門, 亦 訥耳。」 來 皇太 性 記

列

年卒,年七十二。有集十卷行於世。

王頍

好讀諸 談論。 尙 「,乃歎曰:「書無不可讀者!」勤學累載,遂逼通五經,究其旨趣,大爲儒者所稱。解綴文,善 不知書。 王 子,偏記異書,當代稱爲博物。 年二十二,周武帝引爲露門學士。 |類字景文,齊州刺史頒之弟也。 爲其兄顒所責怒,於是感激,始讀孝經、論語,晝夜不倦。遂讀左傳、禮、易、詩、 又曉兵法,益有縱橫之志,每數不逢時,常 年數歲,值江陵陷,隨諸兄入關。少好遊俠,年二十. 每有疑決,多類所爲。 而類性識甄明,精 力不倦, 以將 相

用。 志。 歸突厥,至山中,徑路斷絕,知必不免,謂其子曰「吾之計數,不減楊素,但坐言不見從,遂歸突厥,至山中,徑路斷絕,知必不免,謂其子曰「吾之計數,不減楊素,但坐言不見從,遂 南。 頍 自 與 相 楊素至蒿 類遂陰勸諒繕治兵甲。 數 開 載 論 皇 ,授漢王諒府諮議參軍,王甚禮之。 難,詞義鋒起,善往往見屈。 五年,授著作佐郎。 澤,將戰,類謂 及高祖崩、諒遂舉兵反,多類之計也。 其子曰:「氣候殊不佳,兵必敗。 尋令於國子講授。 高祖大奇之,超授國子博士。[1] 時諒見房陵及秦、蜀二王相 會高祖親臨釋奠,國子祭酒元善講孝經, 汝可 隨從我。」旣 類後數進 奇策,諒 後坐事 次廢黜, 解職,配防嶺 而 兵敗,類將 潛 不 有 能 異

中。 至於 此。 其 子 不能 數日不得食,逐過其故人,竟爲所擒。 五經大義三十卷,有集十卷,並因兵亂,無復存者。 坐受擒執,以成豎子名也。 吾死之後, 楊素求類屍,得之,斬首,梟於太原。時年五 汝愼勿過親故。」於是自殺, 瘞 之石窟

崔 儦

十四。

撰

恃才 年十六, 議五 多所 郡爲功曹,州補主簿 郎 中。 禮 地,忽略世 通 崔儦字岐叔,清河武城人也。 一,兼修律令。 涉。 儦 太守請爲功曹,不就。 與 頓丘李若俱見稱重,時人爲之語曰:「京師灼灼 解屬文,在齊舉秀才,爲員外散騎侍郎,遷殿中侍御史。 人。 大署其戶曰:「不讀五千卷書者,無得入此室。」數年之間,遂博覽羣言, 尋兼散騎侍郎, 少與范陽 祖休、魏靑州刺史。父仲文、齊高陽太守。 聘于陳。 盧思道、隴西辛德源同志友善。 使還,待韶文林館。 ,崔儦、李若。」齊亡,歸鄉里,仕 歷殿 尋與熊安生、馬敬德等 中、膳部、員外三曹 每以讀書爲務,負 世爲著姓。儦

騎侍 卿滿座,素令騎迎儦,儦故敝其衣冠,騎驢而至。 鄎。 越國 公楊素時方貴倖,重儦門地,爲子玄縱娶其女 素推令上座,儦有輕素之色,禮甚倨,言又 為 妻。 聘禮甚厚。親迎之始,公

開皇四年,徵授給事郎,尋兼內

]史舍人。後數年,兼通直散騎侍郎,聘于陳,還授員外散

列

傳

第

四

一七三四

不遜。 素忿然拂衣而起,竟罷座。 後數日,應方來謝,素待之如初。 仁壽中, 卒於京師, 時

諸葛潁

年七十二。子世濟。

起家 深邵陵王參軍事,轉記室。侯景之亂,奔齊,待韶文林館。歷太學博士、太子舍人。 諸葛潁字漢,丹陽建康人也。祖銓,梁零陵太守。父規,義陽太守。潁年八歲,能屬文, 周

武平齊,不得調,杜門不出者十餘年。習周易、圖緯、倉、雅、莊、老,頗得其要。

洲苑,侍講肅成門。 位,遷著作郎,甚見親倖。出入臥內,帝每賜之曲宴,輒與皇后嬪御連席共楊。潁因 所譖毀,是以時人謂之「冶葛」。 從征吐谷渾,加正議大夫。 清辯有俊才,晉王廣素聞其名,引爲參軍事,轉記室。及王爲太子,除藥藏監。 名理窮研覈,英華恣討論。 後從駕北巡,卒於道,年七十七。 後錄恩舊,授朝散大夫。 實錄資平允,傳芳導後昆。」其見待遇如此。 帝常賜潁詩,其卒章曰:「參翰長 間隙,多 煬帝卽

鑾駕北巡記三卷,幸江都道里記一卷,洛陽古今記一卷,馬名錄二卷,並行於世。有子嘉會**。** 潁 性褊急,與 柳晉每相忿鬩,帝屢責怒之,而猶不止。於後帝亦薄之。 有集二十卷,撰

就 阜城熊安生受五經,略通大義,兼博涉子史。 孫萬壽字仙期,信都武强人也。 祖寶, 魏散騎常侍。父靈暉,齊國子博士。萬壽年十四, 善屬文,美談笑,博陵李德林見而奇之。 在

齊,年十七,奉朝請。

高祖受禪,滕穆王引爲文學,坐衣冠不整,配防江南。行軍總管宇文述召典軍書。萬壽

本自書生,從容交雅,一旦從軍,鬱鬱不得志,爲五言詩贈京邑知友曰:

欲 乃西浮,非狂 飛無假翼,思鳴不值晨。如何載筆士,翻作負戈人!飄飄如木偶,棄置同芻狗。 賈誼長沙國,屈平湘水濱,江南瘴癘地,從來多逐臣。 粤余非巧宦,少小拙謀身。 亦東走。 晚歲出函關,方春度京口。 石城臨獸據,天津望牛斗。牛斗盛妖 失路

楚山 彦 不 爭 何糾紛。 勳。 羇遊歲月久,歸思常搔首。非關不樹萱,豈爲無杯酒!數載辭鄉縣,三秋別 驚波上濺日,喬木下臨雲。 繋越恒資辯,喻蜀幾飛文。 魯連唯救 息,吾

郗超初入幕,王粲始從軍。裹糧楚山際,被甲吳江潰。

吳江

一浩蕩,

氛,梟獍已成羣。

親友。壯志後風雲,衰鬢先蒲柳。

心 緖 亂 如絲, 空懷疇昔時。 昔時遊帝里,弱歲逢知己。 旅食南館中,飛蓋西園裏。

列

懷抱 河間 斾 熟,陽翟曲新調。 盛賓僚,麗景相携招。 不堪搖 本 百憂銷。 好 書,東平唯愛士。 夢想猶如昨,尋思久寂寥。 繞樹烏啼夜,雊麥雉飛朝。 舟汎昆明水,騎指渭津橋。 英辯接天人,清言洞名理。 朝牽世網,萬里逐波潮。 細塵梁下落,長袖掌 祓除臨灞岸,供帳 鳳池時寓直 中嬌。 一,麟閣常遊止 出東郊。宜城醞始 廻輪常自轉,懸 歡 娛三樂至, 勝 地

詩至京、盛爲當 斷 絕 登高 心難續 視衿帶,鄉關白雲外。 ,惝恍魂屢驚。 時 之所吟誦,天下好事 羣、紀通家好,鄒、 廻首望孤城,愁人益不平。 者 多 書壁 魯故 而 玩之。 鄉情。 若値 華亭筲鶴唳,幽谷早鶯鳴。 南飛雁、時能訪 死

此

時年五十二。 王文學。 後 歸 當 鄉里,十餘年不得調。 時 有集十卷行於世。 諸王官屬 多被 夷滅 仁壽 由是彌不自安,因謝病免。 初,徵拜豫章王長 (史,非 其好也。 **外之**, 授大理司直, 王轉封于齊,即 卒於官, 爲 齊

王貞

家,無不畢覽。善屬文詞,不治產業,每以諷讀爲娛。 貞字孝逸,梁郡陳留人也。 少 /聰敏, 七歲好學,善毛詩、禮記、左氏傳、周易,諸子百 開皇初,汴州刺史樊叔略引為主簿,

後舉秀才、授縣尉、非其好也、謝病于家。

煬帝卽位,齊王陳鎭江都,聞其名,以書召之曰:

比高天流火,早應凉飆,陵雲仙掌,方承清露,想攝衞攸宜,與時休適。 孫慧文詞,來遷東海。顧循寡薄,有懷髦彥,籍甚淸風,爲日久矣,未獲披覿,良深佇遲。 丘壑之情,左琴右書,蕭散煙霞之外。|茂陵謝病,非無封禪之文,彭澤遺榮,先有歸來 夫山藏美玉,光照廊廡之間,地蘊神劍,氣浮星漢之表。是知毛遂穎脫,義感平原, 前園 後圃,從容

之作。優游儒雅,何樂如之!

邑。今遣行人,具宣往意,側望起予,甚於飢渴,想便輕舉,副此虛心。無信投石之談, 卿道冠鷹揚,聲高鳳舉,儒、墨泉海,詞章苑囿,棲遲衡泌,懷寶迷邦,徇兹獨善,良以於 渚,飛蓋西園,託乘乏應、劉,置醴闕申、穆,背淮之賓,徒聞其語,趨燕之客,罕值其人。 **空慕鑿坏之逸,書不盡言,更慚詞費。** 余屬當藩屛,宣條揚、越,坐棠聽訟,事絕詠歌,攀桂摛詞,眷言高遁。 至於揚旌北

及貞至,王以客禮待之,朝夕遣問安不。又索文集,貞啓謝曰:

道、雅志傳於游、夏、餘波鼓於屈、宋、雕龍之迹、具在風騷,而前賢後聖,代相師祖。 賞 屬賀德仁宣教,須少來所有拙文。昔公旦之才藝,能事鬼神,夫子之文章,性與天

列傳

逐時移,出門分路,變淸音於正始,體高致於元康,咸言坐握蛇珠,誰許獨爲麟角。

謂横 背淮千里,望章臺之後塵。與懸黎而並肆,將駿驥而同阜,終朝擊缶,匪黃鍾之所諧,日 暇,怖甚眞龍之降,慚過白豕之歸,伏紙陳情,形神悚越。 暮却行,何前人之能及!顧想平生,觸塗多感,但以積年沈痼,遺忘日久,拙思所存,纔 成三十三卷。 居可封之屋,每懷貧賤之恥。適鄢郢而迷塗,入邯鄲而失步,歸來反覆,心灰遂寒。 議過實,虛塵睿覽,枉高車以載鼷,費明珠以彈雀,遂得裹糧三月,重高門之餘地, 孝逸生於戰爭之季,長於風塵之世,學無半古,才不逮人。往屬休明,寸陰已昃,雖 仰而不至,方見學仙之遠,窺而不覩,始知游聖之難。 咫尺天人,周章不

齊王覽所上集,善之,賜良馬四匹。 貞復上江都賦,王賜錢十萬貫,馬二匹。未幾,以疾甚還

虞綽 辛大德

俊才,尤工草隸。陳左衞將軍傅縡有盛名於世,見綽詞賦,歎謂人曰:「虞郎之文,無以尙 虞綽字士裕,會稽餘姚人也。父孝曾,陳始興王諮議。 解身長八尺,姿儀甚偉,博學有

也」仕陳、爲太學博士、遷永陽王記室。

自 等撰長洲玉鏡等書十餘部 及 陳亡,晉王廣 引爲學士。 大業初 綽所筆 ,轉爲祕 削,帝未 書學士,奉詔與秘書郞虞世南、著作佐郎 嘗 不稱善, 而官 竟不遷。 初爲 校書郎,以 庾

左右,加宣惠尉。遷著作佐郎,與虞世南、庾自直、蔡允恭等四人常居禁中

,

以

文翰待

詔,恩盼隆洽。

藩邸

從征遼東,帝舍臨海頓,見大鳥,異之,詔綽爲銘。 其辭曰

宗 之間,儵焉 施 邁,行宮次于柳城縣之臨海頓焉。 美,猶方册 西王 乘 暉於羽翮,激 風 與淮 於河 輿。 ,降望大壑。 青 維大業八年,歲在壬申,夏四月丙子,皇帝底定遼碣,班師振旅,龍駕南轅 鳥 上,想汾射以開襟,望蓬瀛而載佇。 雨,休符 不 藉 東海 靈 不泯,遺文可觀。況盛德成功,若斯懿鑠,懷眞味道,加 揮 感 丹華於觜距。 琴,非因拊 忽有 息清蹕,下輕輿,警百靈,綏萬福,踐素砂,步碧沚。同軒皇之襄野,邁 赤雁 潛威,表重潤於夷波。 一,豈可 祥禽 石 同 ,皎同鶴鷺,出自霄漢,翻然雙下。高逾一丈,長乃盈尋,靡霜 「樂我 鸞翔 年 而 鳳時,鵲起鴻騫, 語哉 君 山川明秀,實仙都也。 德 壁日 ,是用來儀 1 竊以 **窅然齊肅,巍屬殊庭,兼以聖德遐宣,息別** 曬光,卿雲舒采,六合開朗,十洲澄鏡。少選 銘 基 。斯固 或蹶 華岳, 或啄、載飛載 類仙 事 旌門外設,款跨重阜,帳 乖 人之 靈 異, 此 騏 感通 止 驥 紀 污冠 一,徘 迹 ,不鐫名山,安 徊 羽 鄒 族 Ш 馴 、鸞旗 之宗長, 擾,咫尺 ,義非盡 殿周 漢

列

用 銘 異 ! 臣拜稽首, 敢勒銘云:

林並 明 靈禽效祉。 明。 壑。 來 文德上暢,靈武外薄,車徒不擾,苛慝靡作。 蘇 興怨 停輿海澨,駐驆巖阯,窅想遐凝,藐屬千里。 飛來淸漢,俱集華泉,好音玉響,皓質氷鮮。 ,帝自東征,言復禹績,乃御軒營。六師薄伐,三韓肅淸,襲行天罰,赫赫 凱歌載路,成功允鑠,反旆還軒,遵 金臺銀闕,雲浮岳峙,有處斯應, 狎仁馴德,習習翩翩,絕迹無

帝

且末。 綽於預,類曰:「虞綽粗人也。」帝領之。 令大理卿鄭善果窮治其事,綽曰:「羇旅薄遊,與玄感文酒談款,實無他謀。」帝怒不解,徙綽 玄感敗後,籍沒其家,妓妾並入宮。帝因問之,玄感平常時與何人交往,其妾以虞綽對。 之友。綽數從之遊。其族人虞世南誠之曰:「上性猜忌,而君過厚玄感。 大德,大德舍之。歲餘,綽與人爭田相訟,因有識綽者而告之,竟爲吏所執,坐斬江都,時年 君改悔,可以無咎,不然,終當見禍。」綽不從。 覽而善之,命有司勒於海上。以渡遼功,授建節尉。 綽恃才任氣,無所降下。 泯,於萬斯年 綽至長安而亡,吏逮之急,於是潛渡江,變姓名,自稱吳卓。遊東陽,抵信安令天水辛 著作郎諸葛潁以學業倖於帝,綽每輕侮之,由是有隙。帝嘗問 時禮部尚書楊玄感稱爲貴倨,虛襟禮之, 尋有告綽以禁內兵書借玄感,帝甚銜之。 若與絕交者,帝知 與結布衣 及

五十四。所有詞賦,並行於世。

詔,死罪得以擊賊自効。信安吏民詣使者叩頭曰:「辛君人命所懸,辛君若去,亦無信安矣。」 日之事,豈不哀哉」大德笑曰「我本圖脫長者,反爲人告之,吾罪也。 大德爲令,誅翦羣盜,甚得民和。 與綽俱爲使者所執,其妻泣曰:「每諫君無匿學士,今 當死以謝綽。」會有

王胄

使者留之以討賊。

帝怒,斬使者,大德獲全。

陳,起家鄱陽王法曹參軍,歷太子舍人、東陽王文學。 王胄字承基,琅邪臨沂人也。祖筠,梁太子詹事。父祥,陳黃門侍郎。 胄少有逸才,仕

神阜 鑪。」帝覽而善之,因謂侍臣曰:「氣高致遠,歸之於胄,詞淸體潤,其在世基,意密理新,推 郎,以文詞爲煬帝所重。 正東指,天駟廼西驅。 「河、洛稱朝市,崤、函實奧區。 ·華實敷。 及陳滅,晉王廣引爲學士。 皇情感時物,睿思屬枌楡。詔問百年老,恩隆五日酺。 展輪齊玉軑,式道耀金吾。 帝常自東都還京師,賜天下大酺,因爲五言詩,詔冑和之。其詞曰 周營曲阜作,漢建奉春謨。 仁壽末,從劉方擊林邑,以功授帥都督。 千門駐罕單,四達嚴車徒。 大君苞二代,皇居盛 小人荷鎔鑄,何由答大 大業初,爲著作佐 是節春之暮, 兩都。 招搖

列

庾 自直直 過此者,未可以言詩也。」帝所有篇什,多令繼和。 與虞綽齊名,同志友善,于時後

進之士咸 以二人爲准的。 從征遼東,進授朝散大夫。

之於帝,帝愛其才而 冑 性 ·疎率不倫,自恃才大,鬱鬱於薄宦,每負氣陵傲,忽略時人。 不罪。 禮部尚書楊玄感虛禁 與交,數遊其第。 及玄感敗,與虞綽俱 爲諸葛潁所嫉,屢 謟

邊。 **胄遂亡匿,潛還江左,爲吏所捕,坐誅,時年五十六。所著詞賦,多行於世**

俱爲學士。 **冑兄**資,字元恭 煬帝即位,授祕書郎,卒官。 ,博學多通。 少 有盛名於江左。 仕陳、歷太子洗馬、中舍人。陳亡、與冑

庚自直

庾 自直 一,潁川人也。 父持,陳羽林監。 自直少好學,沉靜寡欲。 **仕陳,歷豫章王府外兵**

參軍、宣惠記室。

帝輒改之,或至於再三,俟其稱善,然後方出。 及作逆,以之北上,自載露車中,感激發病卒。 言詩尤善。 陳亡,入關,不得調。 性恭慎,不妄交遊,特爲帝所愛。 晉王廣聞之,引爲學士。 帝有篇章,必先示自直,令其詆訶。自直所難, 其見親禮如此。後以本官知起居舍人事。化 有文集十卷行於世。 大業初,授著作佐郎。自直解屬文,於五

混漫。 報。 極貴 灣立議曰:「曲禮注曰:『禮主於敬。』詩曰:『維桑與梓,必恭敬止。』孝經曰:『宗廟致敬。』又 總甚敬之。 說,此可復並謂極重乎。至若『敬謝諸公』,固非尊地,『公子敬愛』,止施賓友,『敬問』『敬 云:『不敬其親,謂之悖禮。』孔子敬天之怒,成渴聖敬日躋。宗廟極重,上天極高,父極尊,君 於 張 ,爲啓於陳主曰:「敬奉弘慈,曲垂餞送。」徽以爲「伏奉」爲重,「敬奉」爲輕,却其啓而不奏。 人敬其名也』。 `,四者咸同一敬,五經未有異文,不知以敬爲輕,竟何所據。]徽難之曰:「向所論敬字, 、譏,並 全以爲輕,但施用處殊,義成通別。 彌 潘 見雷 徽 今云『敬奉』,所以成疑。 字伯彦,吳郡 通大義。 同。『敬聽』。敬酬』,何關貴隔!當 釋褐新蔡王國侍郎,選爲客館令。 春秋有冀缺,夫妻亦云『相敬』。 尤精三史。善屬文,能持論 人也。 性聰敏,少受禮於鄭灼,受毛詩於施公,受書於張沖,講莊、老 聊舉一隅,未爲深據。」澹不能對,遂從 禮主於敬,此是通言,猶如男子『冠而字之』,注云 · 知敬之爲義,雖是不輕,但敬之於語,則有時 隋遣魏澹聘于陳,陳人使徽接對之。 陳尚書令江總引致文儒之士,徽 旣於子則有敬名之義,在夫亦有敬妻之 而 改 焉 澹將返

列傅第四十一 文學

及陳

滅

,爲州博士,秦孝王俊聞其名,召爲學士。

嘗從俊朝京師,在塗,令徽於馬上爲

賦,行一驛而成,名曰述恩賦。俊覽而善之。復令爲萬字文,幷遣撰集字書,名爲韻纂。

爲序曰

勛、華之運,金繩玉字,表殷、夏之符,銜甲示於姬壇,吐卷徵於孔室,莫不理包遠邇,迹 物,爲生民之耳目,作後王之模範,頌美形容,垂芬篆素。 是八卦爱始,爻文斯作,繩用旣息,墳籍生焉。至如龍策授河,龜威出洛,綠綈白檢,述 會幽明,仰協神功,俯照人事。其制作也如彼,其祥瑞也如此,故能宣流萬代,正名百 文字之來尙矣。初則義皇出震,觀象緯以法天,次則史頕佐軒,察蹄迹而取地。於

降靈霄極,禀秀天機,質潤珪璋,文兼黼黻。 薄技無遺,片言便賞。 神於索隱。 彰大定而銘鍾鼎,春干秋羽,盛禮樂於膠庠,省俗觀風,採歌謠於唐、衞。 史。 暨大隋之受命也,追蹤三、五,並曜參辰,外振武功,內修文德。飛英聲而勒嵩、岱, 加以降情引汲,擇善芻微,築館招賢,攀枝佇異。剖連城於井里,賁束帛於丘園, **尊儒好古**,三雍之對已遒,博物多能,百家之工彌洽。 所以人加脂粉,物競琢磨,俱報稻粱,各施鳴吠。 楚詩早習,頗屬懷於言志,沛陽先通,每留 遨遊必名教,漁獵唯 我秦王殿下,

智之心,煙霞發文彩之致,賓僚霧集,教義風靡。乃討論羣藝,商略衆書,以爲小學之 時歲次鶉火,月躔 一夷則,驂駕務隙,靈光意 静。 前臨竹沼,却倚桂巖,泉石瑩仁

鄙 汗簡 混,酌古會今,未臻功要。 楚、夏、三蒼、急就之流,微存章句、說文、字林之屬,唯別體形。 徒以犬馬識養,飛走懷仁,敢執顚沛之辭,遂操狂簡之筆 據,過傷淺局,詩賦所須,卒難爲用。 士,西河之彦,幸不誚於索居,東里之才,請能加於潤色。 會舊轍 :懸金之不定。 爰命末學,製其都序。 尤多舛雜,雖復周禮、漢律,務在貫通,而巧說邪辭,遞生同異。且文訛篆隸, 云 「畢,題爲韻纂, ,創立新意,聲別相從,即隨注釋。 、凡三十卷,勒成 末有李登聲類、呂靜韻集,始判淸濁,纔分宮羽,而 遂躬紆睿旨, 摽摘是非, 撮 一家。 徽業術已寡, 詳之詁訓,證以經 方可藏彼名山,副諸 思 理彌殫, o 而齊、魯富經學,楚、鄭多良 史,備包騷雅 至於尋聲推韻,良爲 舉宏綱,裁斷篇部。 心若死 石室,見羣玉之爲淺, 灰,文慚生氣 ,博牽子 全無 音謬 集, 引

未幾,俊薨,晉王廣復引爲揚州博士,令與諸儒撰江都集禮 部。 復令徽作序曰

之前 進 知)退俯仰,去兹安適!若璽印塗,猶防止水,豈直譬彼耕耨,均斯粉澤而已哉! 也。 ()即萌其理,龜文鳥迹以後,稍顯其事。 禮之爲用至矣。 至如秩宗三禮之職,司徒五禮之官,邦國以和, 大與天地同節, 明與 日 雖情存簡易,意非玉帛,而夏造 月齊照,源開三本,體合四端。 人神惟敬,道德仁義,非此莫成, 殷因,可得 巢居穴處

列

自

世

屬坑焚,時移漢、魏,叔孫通之碩解,高堂隆之博識,專門者霧集,制作者風

퉨

車書之所會通,觸境斯應,雲雨之所霑潤,無思不韙。東探石簣之符,西蠹羽陵之策,鳴 ,節文頗備,枝條互起。 皇帝負扆垂旒,辨方正位,纂勛、華之曆象,綴文、武之憲章。

鑾太室,偃伯靈臺,樂備五常,禮兼八代。

之論 不探, 才,闢 總 求諸述作、未聞兹典。 文遞改, **沅汪通論,不獨擅於前修,寧朔新書,更追慚於往册。徽幸棲仁岳,忝遊聖海,謬承恩** 昔者龜、蒙令后,雕、渙名藩,誠復出警入蹕,擬乘輿之制度,建韣載旂,用天子之禮樂。 域,理窟 居周、邵,業冠河、楚,允文允武,多才多藝。 活油素,躬披緗縹,芟蕪刈楚,振領提綱, ,

簡牒雖盈,

菁華蓋鮮。

乃以宣條暇日,

聽訟餘晨,

娛情窺實之鄉,

凝相觀濤 上柱 康 事 凡十二帙,一百二十卷,取方月數,用比星周,軍國之義存焉,人倫之紀備矣。 「談叢之內,謁者所求之餘,侍醫所校之逸,莫不澄經辨渭,拾珠棄蚌。 有難而 莊之館。 損益 國、太尉、揚州總管、晉王握珪璋之寶,履神明之德,隆化讚傑,藏用顯仁。地 |不同,明堂、曲臺之記,南宮、東觀之說,鄭、王、徐、賀之答,崔、譙、何、庾 必綜。 加以佃漁六學,網羅 方可韜之頻水,副彼名山,見刻石之非工,嗤懸金之已陋。 至於采標綠錯,華垂丹篆,刑名長短,儒、墨是非,書圃翰林之 百氏,繼稷下之絕軌,弘泗上之淪風,蹟無隱 去其繁雜,撮其指要,勒 戎衣而籠關塞, 朝服而掃江湖, 收杞梓之 成 一家, 名日江都 以為 之岸, 是知 質 而

正藏。

獎,敢叙該博之致云。

薨 以玄感故人,爲帝所不悅,有司希旨,出徽爲西海郡威定縣主簿。 而 岸 煬帝嗣位,詔徽與著作佐郎陸從典、太常博士褚亮、歐陽 授京兆郡博士。 楊玄感兄弟甚重之,數相 !來往。 及玄感敗,凡交關多罹其患。 詢等助越公楊素撰魏書,會素 意甚不平,行至隴西,發 徽

杜正玄 弟正藏

病卒。

而辭 正玄倉卒之際,援筆立成。 對,無所屈撓,素甚不悅。 開皇末,舉秀才,尚書試方略,正玄應對如響,下筆成章。僕射楊素負才傲物,正玄抗 以文學相授。 理 杜 華贍,素乃嘆曰:「此眞秀才,吾不及也」授晉王行參軍,轉豫章王記室,卒官。 正玄字愼徽,其先本京兆人,八世祖曼,爲石趙從事中郎,因家於鄴。自曼至正玄,世 正玄尤聰敏,博涉多通。兄弟數人,俱未弱冠,並以文章才辯籍甚三河之間。 久之,會林邑獻白鸚鵡,素促召正玄,使者相望。及至,即· 素見文 不加 點,始異之。 因令更擬諸雜文筆十餘條,又皆立成, 令作賦 辭酬 弟

一七四八

章體式,大爲後進所寶,時人號爲文軌,乃至海外高麗、百濟,亦共傳習,稱爲杜家新書。 通,應詔舉秀才,兄弟三人俱以文章一時詣闕,論者榮之。 IE | 藏字爲善,尤好學,善屬文。 弱冠舉秀才,授純州行參軍,歷下邑正。大業中,學業該 著碑誄銘頌詩賦百餘篇。又著文

常得志

時 人所重。 京兆常得志,博學善屬文,官至秦王記室。 復爲兄弟論,義理可稱。 及王薨,過故宮,爲五言詩,辭理悲壯,甚爲

尹式

河 間 尹式,博學解屬文,少有令問。 仁壽中,官至漢王記室,王甚重之。及漢王敗,式自

殺。其族人正卿、彦卿俱有儁才,名顯於世

劉善經

河 間劉善經,博物洽聞,尤善詞筆。歷仕著作佐郎、太子舍人。著酬德傳三十卷,諸劉譜

東平郡書佐。 范陽祖君彥,齊尚書僕射孝徵之子也。「三容貌短小,言辭訥澀,有才學。 郡陷於翟讓,因爲李密所得。 密甚禮之、署爲記室、軍書羽檄、 皆成於其手。 大業末,官至

及密敗,爲王世充所殺。

孔德紹

會稽孔德紹,有淸才,官至景城縣丞。 竇建德稱王,署爲中書令,專典書檄。及建德敗,

伏誅。

劉斌

中書侍郎,與劉闥亡歸突厥,不知所終。 南陽 劉斌,頗 有詞藻,官至信都 郡司功書佐。 **竇建德署爲中書舍人。建德敗,復爲劉闥**

列傳第四十一 文學 校勘

記

宇,得人爲盛,秀異之貢,不過十數。 正玄昆季三人預焉,華萼相耀,亦爲難兄弟矣。 離咎悔,鮮克有終。 崔儦、孝逸之倫,或矜氣負才,遺落世事,或學優命薄,調高位下,心鬱抑而孤憤,志盤桓而 不定,嘯傲當世,脫略公卿。是知跅弛見遺,嫉邪忤物,不獨漢陽趙壹、平原禰衡而已。故多 史臣 . 曰:魏文有言「古今文人,類不護細行,鮮能以名節自立」,信矣! 王胄、虞綽之輩, 然其學涉稽古,文詞辨麗,並鄧林之一枝,崐山之片玉矣。 有隋總一寰

校勘記

超授國子博士 「超」原作「起」,據北史本傳及御覽二三六改。

孝徵之子也 「徴」原作「徽」,據北齊書及北史祖珽傳改。 君彦父祖珽字孝徵。

隋書卷七十七

列傳第四十二

隱逸

者,何哉?以其道雖未弘,志不可奪,縱無舟楫之功,終有賢貞之操。 善,鮮汲汲於棄濟。 右琴書,拾遺粒而織落毛,飲石泉而蔭松柏。 則安苦節,甘賤貧。 風,七人作乎周年,四皓光乎漢日,魏、晉以降,其流逾廣。其大者則輕天下,細萬物,其小者 下之人歸心焉」。雖出處殊途,語默異用,各言其志,皆君子之道也。 王侯」,詩云「皎皎白駒,在彼空谷」,禮云「儒有上不臣天子,下不事王侯」,語曰「舉逸民,天 自肇有書契,綿歷百王,雖時有盛衰,未嘗無隱逸之士。故易稱「遁世無悶」,又曰「不事 或與世同塵,隨波瀾以俱逝,或違時矯俗,望江湖而獨往,狎玩魚鳥,左 而受命哲王,守文令主,莫不束帛交馳,蒲輪結轍,奔走巖谷,唯恐不逮 放情宇宙之外,自足懷抱之中,然皆欣欣於獨 洪崖兆其始,箕山扇其 足以立懦夫之志,息

列傳第四

-l-=

隠逸

一七五二

貪競之 風 與 夫 帯 得之徒,不可同年共日。所謂無用以爲用,無爲而無不爲者也。故敍其人,

李士謙

列

其

行

i, 以

備隱逸篇

嘗之。 脫 辟開府參 郎 固辭,得免。 別身而 趙 李 郡 Щ 伯 士 王 父魏岐 軍事 謙 叡舉德行,皆稱疾不就。 字子約 **詣學請業,研精不倦,** 隋有天下,畢志不 後丁 州 刺 趙郡 史瑒, 母憂,居喪骨立。 平棘 深所 人也。 住 嗟 石尚, **遂博覽羣籍,兼善天文術數。** 和士 髫齓 每稱日「此兒吾家之顏子也。」年十二,魏廣平 有姊適宋氏,不勝哀 |開亦重其名,將諷朝廷,擢爲國子祭酒。 喪父,事母 以孝 聞 而 死。 母 會嘔 齊吏部尚書辛術召署 士謙 吐 一,疑為 服闋,捨宅爲伽 中毒, 士謙 因 知 員 王贊 跪 外 而 而

乃爲 不倦。 少 而 先 長 肅 爲 人所疎,頓至於此!家富於財,躬處節儉,每以振施爲務。 自 然,不 設 李氏宗黨豪盛,每至春 以 少 黍 、孤,未嘗飲酒食肉,口無殺害之言。 敢 謂羣從日:「 弛 惰 退 而 孔子 相謂 稱 秋 曰:「 旣 黍 二社,必高會極 為五 見君 穀之長,荀卿 子, 歡,無不沉醉諠 方覺吾徒之不 至於親賓來萃, 輒陳樽爼, 亦云食先黍稷,古人所尚,容 德也。」 州里有 亂。嘗集士謙所,盛饌 士 喪事不辦者, 謙聞 對之危坐,終日 而 自 責 可 達乎? 上謙 日 盈 軱 何

奔 令放之。 盜 刈 走赴之,隨乏供濟。有兄弟分財不均,至相鬩訟,土謙聞而出財,補其少者, 兄弟 其禾黍者,默而避之。其家僮嘗執盜粟者,土謙慰諭之曰:「窮困所致,義無 其奴嘗 、愧懼,更相推讓,卒爲善士。 與鄉人董震因醉角力,震扼其喉,斃於手下。震惶懼請罪,士謙謂之曰:「卿 有牛犯其田者,士謙 奉置凉處飼之,過於 本主。 令與多者相 相責。」遽 望見

本

無殺心

,何爲相謝!然可遠去,無爲吏之所拘。」性寬厚,皆此類

也

令罷 本圖 陰德者何? 資,爲之糜粥,賴以全活者將萬計。 其後 去。明年大熟,債家爭來償謙,謙拒之,一無所受。 振贍,豈求利哉」於是悉召債家,爲設酒食, |謙善談玄理,嘗有一客在坐,不信佛家應報之義,以爲外典無聞焉。 | | 謙喩之曰: | 積 出粟數千石,以貸鄉人,值年穀不登,債家無以償,皆來致謝。土謙曰:「吾家餘粟, 猶耳鳴,己獨聞之,人無知者。今吾所作,吾子皆知,何陰德之有!」 收埋骸骨,所見無遺。 對之燔契,曰「債了矣、幸勿爲念也。」各 他年 至春,又出糧種,分給貧乏。 又大饑,多有死者, 、士謙 罄竭家 趙

爲黃熊、杜宇爲鶗鴂,褒君爲龍,牛哀爲獸,君子爲鵠,小人爲猿,彭生爲豕,如意爲犬,黃母 則賈誼所言,千變萬化,未始有極,忽然爲人之謂也。佛道未東,而賢者已知其然矣。至若鯀 善餘慶,積惡餘殃,高門待封,掃墓望喪,豈非休咎之應邪?

佛經云輪轉五道,無復窮已,此

士

七五三

列

儒,五星也。」客亦不能難而 之談也。 爲黿,宣武爲鼈,鄧艾爲牛,徐伯爲魚,鈴下爲烏,書生爲蛇,羊祜前身,李氏之子,此非佛家 變受異形之謂邪。」客曰:「邢子才云,豈有松柏後身化爲樗櫟,僕以爲然。」士謙曰:「此不類 變化皆由心而作,木豈有心乎。」客又問三敎優劣,土謙曰:「佛,日 止 也;道,月也;

,可以死恐之。』愚謂此罪宜從肉刑,刖其一趾,再犯者斷其右腕。流刑刖去右手三指,又犯 裔,職爲亂階,適所以召戎矣,非求治之道也。博弈淫遊,盜之萌也,禁而不止,黥之則可。」 者下其腕。小盜宜黥,又犯則落其所用三指,又不悛下其腕,無不止也。無賴之人,竄之邊 制 有識者頗以爲得治體。 法,沿革不同,自可損益,無爲頓改。今之贓重者死,是酷而不懲也。語曰:『人不畏死,不

死乎 ,」會葬者萬餘人。鄉人李景伯等以土謙道著丘園,條其行狀,詣尚書省請先生之諡, 開皇八年,終於家,時年六十六。趙郡士女聞之,莫不流涕曰:「我曹不死,而令李參軍

好施,今雖殞歿,安可奪其志哉!」於是散粟五百石以賑窮乏。 其妻范陽盧氏,亦有婦德,及夫終後,所有賻贈,一無所受,謂州里父老曰:「參軍平生 事寢

不行,遂相與樹碑於墓。

著論,言刑名之理,其義甚精,文多不載。 死,廓哭之慟,爲之作傳,輸之秘府。 所 齒。 既還鄉里,不應辟命。與趙郡李士謙爲忘言之友,[1]每相往來,時稱崔、李。 崔 初爲里佐、屢逢屈辱、於是感激、逃入山中。 鄭字士玄,博陵安平人也。 父子元,齊燕州司馬。 士謙妻盧氏寡居,每有家事,**輒令人諮**廓取定。 大業中,終于家,時年八十。 遂博覽書籍,多所通涉, 廓少孤貧而 母賤, 有子日賾。 山東學者皆宗 由是不爲邦族 及士謙 摩嘗

日。 定禮樂,授校書郎。 徵爲河南、豫章二王侍讀,每 賾字祖濬,七歲能屬文,容貌短小,有口才。 尋轉協律郎,太常卿蘇威雅重之。 更日來往二王之第。 開皇初,秦孝王薦之,射策高第,詔與諸儒 及河南爲晉王,轉記室參軍,自此去 母憂去職,性至孝,水漿不入口者五

豫章。王重之不已,遺賾書曰:

每覽史傳,嘗切怪之,何乃脫略官榮,棲遲藩邸? 昔漢氏西京,梁王建國,平臺、東苑, 慕義如林。 馬卿辭武騎之官, 以今望古,方知雅志。彼二子者 枚乘罷 弘農之

列傳第四十

隠逸

甚,何樂如之!高視上京,有懷德祖,才謝天人,多慚子建,書不盡意,寧俟繁辭 藉 方 兄 七 欽 玳筵,躡 賢重 字籠 士,敬愛忘疲,先築郭隗之宮,常置穆生之醴。 博 珠履、歌 聞 曲阜,城兼七十,包舉臨淄,大啓南陽, 强 記,鉤深致遠,視漢臣之三篋,似涉豪山,對梁相之五 山桂之偃蹇,赋 池竹之檀欒。其崇貴 方開 也 今者重開 東閣。 如彼,其風 想得 土宇, 流 奉飛蓋, 車,若吞雲夢 也 更誓山河, 如此、幸甚幸 地

| 韓答日

詎盡 塵,悠然路絕 東平,文藝高於北海。漢則馬遷、蕭望,晉則裴楷、張華,雞樹騰聲,鵷池播美,望我清 郭 璞注而 输揚, 郢客之奏陽春, 誰堪赴節! 伏惟令王殿下, 禀潤天潢, 承輝日觀, 雅道貴於 一昨伏奉教書,榮貺非恒,心靈自失。 ·未詳。至於五色相宣,八音繁會,鳳鳴不足喻,龍章莫之比。吳札之論周頌, 若乃理高象、繫,管輅思而不解,事富山海,

股,讀論唯 **崘以爲池,匹酬恩而反易。** 以燕求馬首,薛養雞鳴,謬齒 祖濬 燕南贅客,河朔惰遊,本無意於希顏,豈有心於慕藺!未嘗聚螢 取 一篇,披莊 不過盈尺。 忽屬周桐錫瑞,唐水承家,門有將相,樹宜桃李。眞龍將下 鴻儀,虚班驥 復況桑楡 阜。 漸暮 挾太山 ,藜藿 而 超 人人,學燭無成,穿楊 北 海, 比 報 德 而 映雪,懸 非 難 盡棄。但 堙 頭 刺

逮。 誰 好有名,濫吹先逃,何須別聽!但慈旨抑揚,損上益下,江海所以稱王,丘陵爲之不 曹植儻預聞高論,則不隕令名,楊修若切在下風,亦詎虧淳德。無任荷戴之至,謹

奉啓以聞。

像章得書,齊米五十石,幷衣服錢帛。

時晉邸文翰,多成其手。王入東宮,除太子齋帥,俄遷舍人。及元德太子薨,以疾歸于

家。後徵授起居舍人。

區字圖 賀,天子大悅,賜鎌二百匹。從駕登太行山,詔問賾曰:「何處有羊腸坂?」賾對曰:「臣按漢書 隱,出則令世延長。 所制作也。 起令視事。 十里有羊腸坂。」帝曰:「是也。」因謂牛弘曰:「崔祖濬所謂問一知二。」五年,受詔與諸儒撰 班理志,上黨壺關縣有羊腸坂。」帝曰:「不是。」又答曰:「臣按皇甫士安撰地書云,太原北九地理志,上黨壺關縣有羊腸坂。」帝曰:「不是。」又答曰:「臣按皇甫士安撰地書云,太原北九 領衣,冠幘,奏之。 大業四年,從駕汾陽宮,次河陽鎮。 志二百五十卷,奏之。帝不善之,更令虞世基、許善心衍爲六百卷。以父憂去職,尋 臣見魏大司農盧元明撰嵩高山廟記云,有神人,以玉爲形,像長數寸,或出或 遼東 之役,授鷹揚長史,置遼東郡縣名,皆賾之議也。奉詔作東征記。九年,除越 韶問羣臣,莫有識者,賾答曰:「謹按漢文已前,未有冠幘,即是文帝以來 伏惟陛下應天順民,定鼎嵩、洛,岳神自見。臣敢稱慶。」因再拜,百官畢 藍田令王曇於藍田山得一玉人,長三尺四寸,著大

列傳

四十

一七五八

宇文化及 压 長 史。 于時 之弑帝也 山東盜賊蜂起,帝令撫慰高陽、襄國,歸首者八百餘人。十二年,從駕江都。 了引爲著作郎,稱疾不起。 在路發疾,卒於彭城,時年六十九。

善,每因 賾 與洛陽元善、河東柳晉、太原 休假,清談竟日。 所著詞賦碑誌十餘萬言,撰洽聞志七卷, 王劭、 吳興姚察、 琅邪諸葛潁 八代四科志三十卷,未 信都劉焯、 河間 劉炫相

徐則

及施行,江都傾覆,咸爲煨燼。

則 歎 絕 謝 曰:「名者實之賓,吾其爲賓乎」」遂懷棲隱之操,杖策入縉雲山。 穀養性,所資唯松水而已,雖隆冬冱寒,不服綿絮。太傅徐陵爲之刊山立頌 而 徐則,東海郯人也。幼沈靜,寡嗜欲。受業於周弘正,善三玄,精於議論,聲擅都邑,則 遣之。不娶妻,常服巾祸。陳太建時,應召來憩於至眞觀。 **春月,又辭入天台山,因** 後學數百人,苦請教授,

虚 鎭 息 煙霞。 湯州 行。 初 先 在 ,知其名,手書召之曰:「夫道得衆妙,法體自然,包涵二儀,混成萬物,人能弘道,道不 ,生履德養空,宗玄齊物,深明義昧,曉達法門。 [縉雲山,太極眞人徐君降之曰:「汝年出八十,當爲王者師,然後得道也。」晉王廣 望赤城而待風雲,遊玉堂而駕龍鳳,雖復藏名台岳,猶且騰實江淮,藉甚嘉猷,有 悦性沖玄,怡神虛白,餐松餌朮,棲

有在 承道 休念 塵羽 蒲 空谷。 勞寤 壟! 常朝禮之儀。 徵。」於是遂詣 已說,導凡述聖,非先生而 衣 寐。 但杖舃猶存,示同俗法,宜遣使人送還天台定葬。」是時自江都至於天台,在道多見則 ,雖忘怛化,猶愴于懷,喪事所資,隨須供給。 化,反真靈府。身體柔軟,顏色不變,經方所謂屍解地仙者哉!誠復 風,久餐德素,頻遣使乎,遠此延屈,冀得虔受上法,式建良緣。至止甫爾,未 ,餐松餌朮,棲隱靈岳,五十餘年。卓矣仙才,飄然勝氣,千尋萬顷,莫測其涯。 晉王 昔商山四皓、輕舉漢庭、淮南八公、來儀藩邸。 希能屈己, |下書曰:「天台眞隱東海徐先生,虛確居宗,沖玄成德,齊物處外,檢行安身。 欽承素道,久積虛襟,側席幽人,夢想巖穴。 湯州。 至于五 竚望披雲。」則謂門人曰:「吾今年八十一,王來召我,徐君之旨,信而有 晉王將請受道法,則辭以時日不便。 更而死,支體柔弱如生,停留數旬,顏色無變。 誰!故遣使人往彼延請,想無勞束帶,賁然來思,不待蒲輪,去彼 霓裳羽蓋,旣且騰雲,空椁餘衣,詎藉墳 古今雖異,山谷不殊,市朝之隱,前賢 霜風已冷,海氣將寒,偃息茂林,道體 其後夕中, 命侍者取香火,如平 師禮 未 申,而 淹 旬日 寡人欽 草褐 心許 「, 厭

於此

徒步

,云得放還。

益異

之,賵物千段,遣畫工圖其狀貌,令柳晉爲之讚曰:「可道非道,常道無名。

|然後跨石梁而去,不知所之。 須臾,屍柩至,方知其靈化。

至其舊居,取經書道法分遺弟子,仍令淨掃一房,曰:「若有客至,宜延之

時年八十二。晉王聞而

上德不德,

將 至 侶 德 茅嬴 無 盈 我 玄 王 風 遙 扇 屬 矣, 爱 而 感 有 先 靈 誠 生 柱 夙 錬 下暫啓, 金 液 河上沉精。 怡 神 玉 清。 留符告信,化杖飛聲。 石 髓 方軟 雲 丹 欲 成 永思 言追 **靈迹**, 葛 稚

時 有建安宋玉泉、會稽孔道茂、丹陽王遠知等,亦行辟穀,以松水自給,皆爲煬帝所重

張文詡

曷

用

攄

情?

時

披

素

繪

如

臨

赤城。

時朝 其門 孔籠 以自 解 明 ,以爲 經自達。 致 彦 生多 之徒,並延之於博士之位。 張 也。 文翮,河東人也。 ,恒執弟子之禮。 通 詣文翮,請質 博,其諸儒異說,亦皆詳究焉。 文詡博覽文籍、特 右僕射 蘇威 、凝滯,文詡 聞 父琚,開皇中爲洹水令,以清 適至南 其名 精三禮,其周易、詩、書及春秋 而 文詡 臺,邊飾 召之, 輒 博引 時遊太學,暉遠等莫不推伏之, 與語, 所乘 證據,辨說無 高祖引致天下名儒碩學之士,其 馬,就 大悦 勸 學 寫,唯 正聞。 令 邀 從官。 屈 其所擇。 三漢傳, 文 有書數千卷, 文詡 詡 毎 並皆 意不 牽馬 學內 治書侍御 通 在仕 **多然** 步進,意 房暉 習。 教訓子 遠、張 固 史皇甫 毎 咸 辭 好 在 姪, 共宗 不因 鄭玄注 仲 皆以 誕 仰 人

化 人,鄉黨頗移風俗。 仁壽 末, 學廢 文詡 嘗有人夜中竊刈其麥者,見而避之,盜因感悟,棄麥而 策 杖 而 歸 灌 園 爲 業。 州 郡 頻 舉,皆不 應 命。 事 母 以 謝。 孝 聞 文詡慰諭 毎 以 德

四十。 伏牀枕。 之短,皆此類也。 文翻因毀舊堵以應之。文翮嘗有腰疾,會醫者自言善禁,文翮令禁之,遂爲刃所傷,至於頓 之,自誓不言,固令持去。經數年,盜者向鄉人說之,始爲遠近所悉。鄰家築牆,心有不直, 也。 而將至,恐修名之不立!以如意擊几,皆有處所、時人方之閔子騫、原憲焉。 其於成名一也,美哉! 樸之士矣。崔廓感於屈辱,遂以肥遁見稱,祖濬文籍之美,足以克隆先構,父子雖動靜殊方, 能至於斯乎。然士謙聞譽不喜,文翮見傷無慍,徐則志在沉冥,不可親疎,莫能貴賤,皆抱 不違親,貞不絕俗,不敎而勸,虛往實歸,愛之如父母,懷之如親戚,非有自然之純德,其孰 蓋以恬淡爲心,不皦不昧,安時處順,與物無私者也。 史臣曰:古之所謂隱逸者,非伏其身而不見也,非閉其言而不出也,非藏其智而不發 鄉人爲立碑頌、號曰張先生。 列 醫者叩頭請罪,文翮遽遣之,因爲其隱,謂妻子曰:「吾昨風眩,落坑所致。」其掩人 州縣以其貧素,將加振賉,輒辭不受。每閑居無事,從容長歎曰:[老冉冉 ic 士謙等忘懷纓冕,畢志丘園,隱 終於家、年

校勘記

【一」忘言之友 「言」原作「年」,據北史崔廓傳及御覽五○六改。崔廓與李士謙年紀相差不大,說 不上是「忘年之友」,應是「忘言之友」。莊子外物:「言者所以在意,得意而忘言。」此處「忘言」

是說兩人友誼之深。

隋書卷七十八

列傳第四十三

藝術

性命者也,音律所以和人神,節哀樂者也,相術所以辯貴賤,明分理者也,技巧所以利器用, 濟艱難者也。 夫陰陽所以正時日,順氣序者也,卜筮所以決嫌疑,定猶豫者也,醫巫所以禦妖邪,養 此皆聖人無心,因民設敎,救恤災患,禁止淫邪。自三、五哲王,其所由來

久矣"

則文摯、扁鵲、季咸、華佗、其巧思,則奚仲 ト筮、則史扁、史蘇 探賾索隱,咸詣幽微、思侔造化,通靈入妙,殊才絕技。 或弘道以濟時,或隱身以利物,深不 然昔之言陰陽者,則有箕子、裨竈、梓愼、子韋,曉音律者,則師曠、師擊、伯牙、杜夔,敍 嚴君平,司馬季主,論相術,則內史叔服、姑布子卿、唐舉、許負,語醫, 墨翟、張平子、馬德衡。 凡此諸君者,仰觀俯察,

列僔

四

+ =

藝術

陽,曲 而 可 測, 固 成君欲,或假託神怪,熒惑民心。 藝成 無得而 而下,意在茲乎? 近古涉乎斯術者,鮮有存夫貞一,多肆其淫僻,厚誣天道。 **遂令時俗妖訛,不獲返其真性,身罹災毒,莫得壽終** 或變亂陰

乎勸戒。 歷觀經史百家之言,無不存夫藝術,或敍其玄妙,或記其迁誕,非徒用廣異聞,將以明

曰「朕 恐非天意也。」帝初然之,後與吏部尚書宗懷等議,乃止。 荆 世尸掌,魏高堂隆猶領此職,不無前例,卿何憚焉。」帝亦頗明星曆,因共仰觀,從容謂季才 十二通 于南郡江陵縣。 陝 庾季才字叔奕,新野人也。八世祖滔,隨晉元帝過江,官至散騎常侍,封遂昌侯,因家 整旆還都,以避其患。 猶慮禍起蕭牆,何方可息。」季才曰:「顷天象告變,秦將入郢,陛下 周易,好占玄象。居喪以孝聞。梁廬陵王續辟荆州主簿,湘東王繹重其術藝,引授外 西臺建,累遷中書郎,領太史,封宜昌縣伯。 是以後來作者,或相祖述,故今亦採其尤著者,列爲藝術篇云。 庚季才 子質 祖詵,梁處士,與宗人易齊名。父曼倩,光祿卿。季才幼穎悟,八歲誦尚書, 假令羯寇侵蹙,止失荆 湘 季才固辭太史,元帝曰:漢司 ,在於社稷,可得 俄而江陵陷滅,竟如其言。 無慮。 宜留 重臣, 必久停留 馬遷歷 作鎭

帝問:「何能若此。」季才曰:「僕聞魏克襄陽,先昭異度,晉平建業,喜得士衡。 伐國求賢,古 誠事我,當以富貴相答。」初,郢都之陷也,衣冠士人多沒爲賤。季才散所賜物,購求親故。文 并奴婢牛羊什物等,謂季才曰:「卿是南人,未安北土,故有此賜者,欲絕卿南望之心。 贖購耳。」太祖乃悟曰:「吾之過也。微君遂失天下之望!」因出令免梁俘爲奴婢者數千口。 之道也。 周太祖一見季才,深加優禮,令參掌太史。每有征討,恒預侍從。賜宅一區,水田十頃, 今郢都覆敗,君信有罪,搢紳何咎,皆爲賤隸!鄙人羈旅,不敢獻言,誠切哀之,故 宜盡

未獲免耳。 同木石。頃上台有變,不利宰輔,公宜歸政天子,請老私門。此則自享期頤,而受旦、庾之美, 大冢宰宇文護執政,謂季才曰:「比日天道,有何徵祥。」季才對曰:「荷恩深厚,若不盡言,便 加驃騎大將軍、開府儀同三司,增邑三百戶。 石,帛二百段。 災祥,宜反政歸權。 其書記,武帝親自臨檢,有假託符命,妄造異端者,皆致誅戮。 子孫藩屏,終保維城之固。 武成二年,與王褒、庾信同補麟趾學士。累遷稍伯大夫、車騎大將軍、儀同三司。其後 公旣王官,可依朝例,無煩別參寡人也。」自是漸疎,不復別見。及護滅之後,閱 遷太史中大夫,詔撰靈臺祕苑,加上儀同,封臨潁伯,邑六百戶。 帝謂少宗伯斛斯徵曰:「庾季才至誠謹慇,甚得 不然者,非復所知。」護沈吟久之,謂季才曰「吾本意如此,但辭 唯得季才書兩紙,盛言緯候 人臣之禮。」因賜粟三百 宣帝嗣位,

帝以二月甲午卽帝位,享年四百,故知甲子、甲午爲得天數。今二月甲子,宜應天受命。」上 九 段,曰:「愧公此意,宜善爲思之。」大定元年正月,季才言曰:「今月戊戌平旦,青氣如樓闕, 之事乎。」高祖默然久之,因舉首曰:「吾今譬猶騎獸,誠不得下矣。」因賜雜綵五十匹,絹二百 |才曰:「天道精微,難可意察,切以人事卜之,符兆已定。|季才縱言不可,公豈復得爲箕、 願 見於國城之上,俄而變紫,逆風西行。氣經云『天不能無雲而雨,皇王不能無氣而立。』今 王氣已見,須卽應之。二月日出卯入酉,居天之正位,謂之二八之門。日者,人君之象,人 爲 正位,宜用二月。其月十三日甲子,甲爲六甲之始,子爲十二辰之初,甲數九,子數又九, 天 及高 數。 祖 其日卽是驚蟄,陽氣壯發之時。 爲丞相,嘗夜召季才而問曰:「吾以庸虛,受茲顧命,天時人事,卿以爲何如?」季 昔周武王以二月甲子定天下,享年八百,漢高

才曰:「朕自今已後,信有天道矣。」於是令季才與其子質撰垂象、地形等志,上謂季才曰: 計。」高祖愕然,謂願等曰:「是何神也」」遂發詔施行,賜絹三百段,馬兩匹,進爵爲公。 代不同。且漢營此城,經今將八百歲,水皆鹹鹵,不甚宜人。 「臣仰觀玄象,俯察圖記,龜兆允襲,必有遷都。 開 (皇元年,授通直散騎常侍。 高祖將遷都,夜與高頗、蘇威二人定議,季才 且堯都平陽,舜都冀土,是知帝王居止,世 願陛下協天人之心,爲遷徙之 旦而奏曰:

「天地秘 奧,推測多途,執見不同,或致差舛。朕不欲外人干預此事,故使公父子共爲之也。」

及書成奏之,賜米千石,絹六百段。

八十八。 言充謬。 以年老,頻表去職,每降優旨不許。會張胄玄曆行,及袁充言日影長。上以問季才,季才因 九年,出爲均州刺史。策書始降,將就藩,時議以季才術藝精通,有詔還委舊任。 上大怒,由是冤職,給半祿歸第。所有祥異,常使人就家訪焉。仁壽三年卒,時年

靈臺 河東裴政及宗人信等,爲文酒之會。 一一百二十卷,垂象志一百四十二卷,地形志八十七卷,並行於世。 季才局量寬弘,術業優博,篤於信義,志好賓遊。常吉日良辰,與琅琊王褒、彭城劉敦、 次有劉臻、明克讓、柳晉之徒,雖爲後進,亦申遊欵。撰

齊場 屬,帝謂質曰:「汝不能一心事我,乃使兒事齊王,何向背如此邪。」質曰:「臣事陛下,子事齊 王,實是一心,不敢有二。」帝怒不解,由是出爲合水令。 立言忠鯁,每有災異,必指事面陳。 王記室。 庾質字行修,少而明敏,早有志尚。八歲誦梁世祖玄覽、言志等十賦,拜童子郎。 開皇元年,除奉朝請,歷鄢陵令,遷隴州司馬。大業初,授太史令。 而煬帝性多忌刻,齊王陳亦被猜嫌。 質子儉時為齊王 操履貞憝, 仕周

列

斗 勢雖隆,德望非素,因百姓之勞苦,冀僥倖而成功。今天下一家,未易可動。」帝曰:「熒惑入 大懼,遽而 遣人去,豈有成功也」,帝遂行。旣而禮部尚書楊 猶 行。」帝作色曰:「朕今總兵至此,豈可未見賊而自退也?」質又曰:「陛下若行,慮損軍威。 對曰:「臣實愚迷、猶執前 地 日言 願安駕住此,命驍將勇士指授規模,倍道兼行,出其不意。事宜在速,緩必無功。」帝不悅 如何?」對曰:「斗,楚之分,玄感之所封也。今火色衰謝,終必無 人民,纔當我一郡,卿以爲剋不。」質對曰:「以臣管窺,伐之可剋,切有愚見,不願陛下親 汝旣 八年,帝親伐遼東,徵詣行在所。至臨渝謁見,帝謂質曰:「朕承先旨,親事高麗,度其土 難行 西還,謂質曰:「卿前 ,,可住此也。」及師還,授太史令。 見。 陛下若親動萬乘,糜費實多。」帝怒曰:「我自行尚不能剋, 不許我行,當爲此耳。 九年,復征高麗,又問質曰:「今段復 玄威據黎陽反,兵部侍郎斛斯政奔高麗,帝 今者玄感其成事乎。」質日 成 . . . 玄威地 [何如] 直 臣

從。 力歸農。三五年間,令四海少得豐實,然後巡省,於事爲宜。陛下思之。」帝不悅,質辭疾不 帝聞之、怒、遣使馳傳、鎖質詣行在所。至東都、詔令下獄、竟死獄中。 十年,帝自西京將往東都,質諫曰:「比歲伐遼,民實勞敝,陛下宜鎭撫關內,使百 .姓畢

時有盧太翼、耿詢、並以星曆知名。 子檢,亦傳父業,兼有學識。 仕歷**襄武令、元德太子學士、齊王屬。義寧初,爲太史令。**

Щ 閑居味道,不求樂利。博綜羣書,**爰及佛道,皆得其精微。尤善占候算曆之術**。 配爲官奴。久之,乃釋。其後目盲,以手摸書而知其字。 爲嗣、謂所親曰:「吾拘逼而來,不知所稅駕也」」及太子廢,坐法當死,高祖惜其才而不害, 物,與弟子數人廬於巖下,蕭然絕世,以爲神仙可致。皇太子勇聞而召之,太翼知太子必不 ,數年徙居林慮山茱萸墹,請業者自遠而至,初無所拒,後憚其煩,逃於五臺山。 盧太翼字協昭,河間人也,本姓章仇氏。 七歲詣學,日誦數千言,州里號曰神童。及長, 隱於白鹿 地多藥

是行鑾輿不反。」高祖大怒,繫之長安獄,期還而斬之。高祖至宮寢疾,臨崩,謂皇太子曰: 章仇翼,非常人也,前後言事,未嘗不中。吾來日道當不反,今果至此,爾宜釋之。」 仁壽末,高祖將避暑仁壽宮,太翼固諫不納,至于再三。太翼曰:「臣愚豈敢飾詞,但恐

盧氏。 果敗。 異之,數加賞賜。 及煬帝卽位,漢王諒反,帝以問之。答曰:「上稽玄象,下參人事,何所能爲。」未幾,諒 帝常從容言及天下氏族、謂太翼曰:「卿姓章仇,四岳之胄,與盧同源。」於是賜姓爲 大業九年,從駕至遼東,太翼言於帝曰:「黎陽有兵氣。」後數日而玄感反書聞,帝甚 太翼所言天文之事,不可稱數,關諸秘密,世莫得聞。 後數載,卒於洛陽。

列

傅

耿詢

甚信之。 時,合如符契。 詢從之受天文算術。 是特原其罪。 討擒之,罪當誅。 於嶺南。 耿詢字敦信,丹陽人也。 及秀廢,復當誅,何稠言於高祖曰:「耿詢之巧,思若有神,臣誠爲朝廷惜之。」上於 勇卒,詢不歸,遂與諸越相結,皆得其歡心。 **詢作馬上刻漏,世稱其妙。** 世積知而奏之,高祖配詢爲官奴,給使太史局。 自言有巧思,世積釋之,以爲家奴。久之,見其故人高智寶以玄象直太史, 詢創意造渾天儀,不假人力,以水轉之, 滑稽辯給,伎巧絕人。 陳後主之世,以客從東衡州刺史王勇 會郡俚反叛,推詢爲主。 施於闇室中,使智寶外候天 後賜蜀王秀,從往益州, 柱國王世積 秀

宇文必敗,李氏當王,吾知所歸矣。」詢欲去之,爲化及所殺。 書曰:「遼東不可討,師必無功。」帝大怒,命左右斬之,何稠苦諫得觅。 言爲中,以詢守太史丞。 煬帝卽位,進欹器,帝善之,放爲良民。 宇文化及弑逆之後,從至黎陽,謂其妻曰:「近觀人事,遠察天文, 歲餘,授右尙方署監事。 著鳥情占一卷,行於世。 七年,車駕東征,詢上 及平壤之敗,帝以詢

韋鼎

韋鼎字 超盛 ,京兆杜陵 入也。 高祖 玄,隱於商 Щ 因 mi 歸宋。 祖阁, 梁開府儀同三司

鼎所,鼎切異之。 鼎兄昂卒於京城、鼎負屍出、寄于中興寺。 父正 遭父憂,水漿不 ,黃門侍 郎 o 往見,乃新棺也,因以充殮。 鼎少通倪,博涉 入口者五日,哀 經史,明 毁過禮,殆將滅性。 陰 求棺 陽 元帝聞之,以爲精誠所感。侯景平,司徒王 逆刺, 無所得,鼎哀憤慟哭,忽見江中有物, 尤善 服闋,爲邵陵 相 術。 仕梁, 王 起家湘 主 簿。 東王法 侯景之亂 流

僧辯以爲戶曹屬,歷太尉掾、大司馬從事、中書侍郎

郡 觀 尉 禪,拜黃門侍郎,俄遷司農卿、司徒右長史、貞威將軍,領安右晉安王長史、行府國事, 四 主 卿 歲 事 明公天縱神武,繼絕統者,無乃是乎!」武帝陰有圖僧辯意,聞其言,大喜,因而定策。及受 氣 , 梁其代終, 天之曆數當歸舜後。 昔周滅殷氏, 封嬀滿于宛丘, 其裔子孫因爲陳氏。 陳武帝在南徐州,鼎望氣知其當王,遂寄孥焉。 太建 盡於 入爲 此 太 中,爲聘周主使,加散騎常侍。 公府卿。 矣。 吾 至德 與 爾 當葬長安。 初,鼎盡質貨田 期運 [宅,寓居僧寺。友人大匠 之將及 尋 爲 了故破 秘書監、宣遠將軍,轉臨海王長史,行 因謂陳武帝曰:「明年有大臣誅死,後 《產耳。」 卿 毛彪問其故,答曰 轉廷 吳 興

羣賢所逮也。 初 |鼎 之聘周 不久必 也。嘗 大貴, 與高 貴則天下一 祖 相 遇 別鼎調高 家,歲一周天, 祖 日 _____觀 公容貌 老夫當委質。 故 非常 人,而 公相不可言, 願深自 神 監深遠,亦非

衛柳述 容謂之曰:「韋世康與公相去遠近。」 鼎對曰: 「臣宗族分派,南北孤絕,自生以來,未嘗訪 問。」帝曰:「公百世卿族,何得爾也。」乃命官給酒肴,遣世康與鼎還杜陵,樂飲十餘日。 乃考校昭穆,自楚太傅孟以下二十餘世,作韋氏譜七卷。時蘭陵公主寡,上爲之求夫,選親 愛。」及陳平,上馳召之,授上儀同三司,待遇甚厚。 上每與公王宴賞,鼎恒預焉。 及蕭瑒等以示於鼎。 鼎曰:「**陽當封侯,而無貴妻之相,**述亦通顯,而守位不終。」上 高祖嘗從 鼎

僧,并獲贓物。自是部內肅然不言,咸稱其有神,道無拾遺。尋追入京,以年老多病,累加 之曰:「此客實姦,而殺非也。乃某寺僧該妾盜物,令奴殺之,贓在某處。」卽放此客,遣掩 懼,卽自首伏。又有人客遊,通主家之妾,及其還去,妾盜珍物,於夜亡,尋於草中爲人所 軌,常爲劫盜。

鼎於都會時謂之曰:「卿是好人,那忽作賊。」因條其徒黨謀議逗留,其 主家知客與妾通,因告客殺之。縣司鞫問,具得姦狀,因斷客死。獄成,上於鼎, 開皇十二年,除光州刺史,以仁義教導,務弘淸靜。 州中有土豪,外修邊幅,而內行不 鼎覽 八人驚

與之,非臣敢預知也。」上笑曰:「不肯顯言乎。」

曰:「位由我耳。」遂以主降述。

上叉問鼎:「諸兒誰得嗣。」答曰:「至尊、皇后所最愛者,卽當

優賜。

頃之,卒,年七十九。

來和

入公卿之門。 來 和 字弘順,京兆長安人也。 初爲夏官府下士,累遷少卜上士,賜爵安定鄉男。 少好相術,所言多驗。 大冢宰宇文護引之左右,由是出 遷畿伯下大夫,進封洹水

縣男。

高祖微時,來詣和相,和待人去,謂高祖曰:「公當王有四海。」及爲丞相,拜儀同, 旣受

禪,進爵爲子。開皇末,和上表自陳曰:

日 眼 懼!愚臣不任區區之至,謹錄陛下龍潛之時,臣有所言一得,書之祕府,死無所恨。 區宇。此乃天授,非由人事所及。臣無勞效,坐致五品,二十餘年。臣是何人,敢不慚 日 將領,陣無不破。」臣卽於宮東南奏聞。 「隋公 …「諸公皆汝所識,隋公相祿何如。」臣報武帝曰:「隋公止是守節 如 、曙星,無所不照,當王有天下,願忍誅殺。 昔陛下在周,嘗與永富公竇榮定語臣曰:「我聞有行聲,卽識其人。」臣當時卽言公 臣早奉龍顏,自周代天和三年已來,數蒙陛下顧問,當時具言至尊膺圖受命,光宅 「非人臣。」帝尋以問臣,臣知帝有疑,臣詭報曰:「是節臣,更無異相。」于時 陛下謂臣, 建德 此語 四年五月,周武帝在雲陽宮,謂臣 不忘。 明年,烏 人,可鎭一方。 丸軌言於 若爲 武

、梁彦光等知臣此語。大象二年五月,至尊從永巷東門入,臣在永巷門東,北 面立,陛

下問臣曰:「我無災障不。」臣奏陛下曰:「公骨法氣色相應,天命已有付屬。」末幾,遂總

百揆。

上覽之大悅,進位開府,賜物五百段,米三百石,地十頃。

和 同 郡韓則,嘗詣和相,和謂之曰:「後四五當得大官。」人初不知所謂。 大官,椁也。」和言多此 則至開皇十五

|月而終,人問其故,和曰:「十五年爲三五,加以五月爲四五。

類。 著相經四十卷。 年五

道 士張賓、焦子順、雁門人董子華,自此三人,當高祖龍潛時,並私謂高祖曰:「公當爲

天子,善自愛。」及踐阼,以賓爲華州刺史,子順爲開府,子華爲上儀同

蕭吉

歸于周,爲儀同。 蕭吉字文体,梁武帝兄長沙宣武王懿之孫也。博學多通,尤精陰陽算術。 宣帝時,吉以朝政日亂,上書切諫,帝不納。 及隋受禪,進上儀同,以本官 江陵陷,遂

太常考定古今陰陽書。

吉性孤峭,不與公卿相沉浮,又與楊素不協,由是擯落於世,鬱鬱不得志。 見上好徴祥

『天元十一月朔旦冬至,聖王受享祚。』今聖主在位,居天元之首,而朔旦冬至,此慶一也。辛 本命,此慶四也。夏至陰始,祀地之辰,卽是皇后本命,此慶五也。至尊德並乾之覆育,皇 天地合也,甲寅之年,以辛酉冬至,來年乙卯,以甲子夏至。冬至陽始,郊天之日,卽是至尊 **寶經云:『角音龍精,其祚日强。』來歲年命納音俱角,曆之與經,如合符契。又甲寅、乙卯,** 十一月陽之始,朔旦冬至,是聖王上元。正月是正陽之月,歲之首,月之先。朔旦是歲之元, 年與歲合德,而在元旦之朝,此慶三也。陰陽書云:『年命與歲月合德者,必有福慶。』洪範傳 合,而居元朔之首,此慶二也。 庚申之日,即是行年,乙德在庚,卯德在申,來年乙卯,是行 酉之日,卽是至尊本命,辛德在丙,此十一月建丙子。酉德在寅,正月建寅爲本命,與月德 以辛酉爲冬至。來年乙卯,正月朔旦,以庚申爲元日,冬至之日,卽在朔旦。樂汁圖徵云: 之說,欲乾沒自進,遂矯其迹爲悅媚焉。開皇十四年上書曰:「今年歲在甲寅,十一月朔旦, 后仁同地之載養,所以二儀元氣,並會本辰。」上覽之大悅,賜物五百段。 月之朝,日之先,嘉辰之會。而本命爲九元之先,行年爲三長之首,並與歲月合德。所以靈 云:『歲之朝,月之朝,日之朝,主王者。』經書並謂三長應之者,延年福吉。 況乃甲寅蔀首,

坐,有廻風從艮地鬼門來,掃太子坐。一吉以桃湯葦火驅逐之,風出宮門而止。又謝土,於未 房陵王時爲太子,言東宮多鬼勉,鼠妖數見。上令古詣東宮,禳邪氣。於宣慈殿設神

列傅

行數步,忽然不見。上大異之,賞賜優洽。又上言,太子當不安位,時上陰欲廢立,得其言 地設壇,爲四門,置五帝坐。于時至寒,有蝦蟇從西南來,入人門,升赤帝坐,還從人門而出。

是之。由此每被顧問

納。 終不忘也。今卜山陵,務令我早立。我立之後,當以富貴相報。』吾記之曰:『後四載,太子御 前給云卜年二千者,是三十字也,卜世二百者,取三十二運也。吾言信矣,汝其誌之。」 天下。』今山陵氣應,上又臨喪,兆益見矣。且太子得政,隋其亡乎!當有眞人出治之矣。吾 發殯,古復奏上曰:「至尊本命辛酉,今歲斗魁及天岡,臨卯酉,謹按陰陽書,不得臨喪。」上不 七八里,幷有人往來檢校,部伍甚整,日出乃滅,同見者十餘人。 謹案葬書云 『氣王與姓相 皇后山陵西北,鷄未鳴前,有黑雲方圓五六百步,從地屬天。東南又有旌旗車馬帳幕,布滿 奏之。上曰:「吉凶由人,不在於地。高緯父葬,豈不卜乎。國尋滅亡。正如我家墓田,若 生,大吉。』今黑氣當冬王,與姓相生,是大吉利,子孫無疆之候也。」上大悅。其後上將親臨 云不吉, 朕不當爲天子; 若云不凶, 我弟不當戰沒。」然竟從吉言。 吉表曰: 「去月十六日, 退而告族人蕭平仲曰:「皇太子遣宇文左率深謝余云:『公前稱我當爲太子,竟有其驗, 及獻皇后崩,上令吉卜擇葬所,吉歷筮山原,至一處,云「卜年二千,卜世二百」,其圖而

及煬帝嗣位,拜太府少卿,加位開府。嘗行經華陰,見楊素冢上有白氣屬天,密言於帝。

六卷、樂譜二十卷及帝王養生方二卷,相手版要決一卷,太一立成一卷,並行於世 帝問其故, 吉曰:「其候」素家當有兵禍, 滅門之象。 玄感以反族滅,帝彌信之。 曰:「公家宜早改葬。」玄感亦微知其故,以爲吉祥,託以遼東未滅,不遑私門之事。 後歲餘,卒官。 著金海三十卷, 改葬者,庶可免乎」帝後從容謂楊玄感 相經要錄一卷,宅經八卷,葬經 未幾而

時有楊伯醜、臨孝恭、劉祐,俱以陰陽術數知名。

楊伯醜

陽狂,遊行市里,形體垢穢,未嘗櫛沐。 皆汝之。人不能測也。 楊伯 醜,馮翊武鄉人也。好讀易,隱於華山。開皇初,被徵入朝,見公卿不爲禮,無貴賤 高祖召與語,竟無所答。 上賜之衣服,至朝堂捨之而去。於是被髮

尋 幽 入微。 嘗有張永樂者,賣卜京師,伯醜每從之遊。 永樂嗟服,自以爲非所及也。 永樂爲卦有不能決者,伯醜輒爲分析爻象,

其夫意妻有異志,將逐之。 北 壁 上, 伯 醜亦開肆賣卜。 有青裙女子抱之,可往取也。」如言果得。 有人嘗失子,就伯醜筮者。卦成,伯醜曰:「汝子在懷遠坊南門道東 其妻稱冤,以詣伯醜,爲筮之曰:「金在矣。」悉呼其家人,指一人 或者有 金數兩,夫妻共藏之,於後失金,

列

以爲天然獨得,非常人所及也。 之,卿且 所失馬 馬,來詣伯醜卜者。時伯醜爲皇太子所召,在塗遇之,立爲作卦,卦成,曰:「我不遑爲卿占 知常逃歸京師。知常先與楊素有隙,及素平幷州,先訪知常,將斬之,賴此獲免。又人有失 之,果得 必不得已,當早還。不然者,楊素斬汝頭。」未幾,上令知常事漢王諒。俄而上崩,諒舉兵反, 曰:「可取金來」其人赧然,應聲而取之。道士章知常詣伯醜問吉凶,伯醜曰:「汝勿東北行, 有物出自水中 「何用鄭玄、王弼之言乎!」久之,微有辯答,所說辭義,皆異先儒之旨,而思理玄妙,故論者 而至,遂擒之。 本珠。 |向西市東壁門南第三店,爲我買魚作膾,當得馬矣。」其人如此言,須臾,有一人牽 ·,質圓而色光,是大珠也。 今爲人所隱。」 具言隱者姓名容狀。 上如言簿責 上奇之,賜帛二十匹。 崖州嘗獻徑寸珠,其使者陰易之,上心疑焉,召伯醜令筮。 竟以壽終。 國子祭酒何妥嘗詣之論易,聞安之言,倏然而笑曰: 伯醜曰:

臨孝恭

定陰陽。 <u> 辰經十卷,元辰厄一百九卷,百怪書十八卷,祿命書二十卷,九宮龜經一百一十卷,太</u>二式 臨孝恭,京兆人也。 官至上儀同。著欹器圖三卷,地動銅儀經一卷,九宮五墓一卷,遁甲月令十卷,元 明天文算術,高祖甚親遇之。 每言災祥之事,未嘗不中,上因令考

劉祐

法一卷,安曆志十二卷,歸正易十卷,並行於世。 初與張賓、劉暉、馬顯定曆。後奉詔撰兵書十卷,名曰金韜,上善之。復著陰策二十卷,觀 臺飛候六卷,玄象要記五卷,律曆術文一卷,婚姻志三卷,產乳志二卷,式經四卷,四時立成 劉祐、滎陽人也。開皇初,爲大都督,封索盧縣公。其所占候,合如符契,高祖甚親之。

張胄玄

宏 **暉及黨與八人皆斥逐之。改定新曆,言前曆差一** 步甚精密,上異之。 太史,參議律曆事。 改顓頊曆作太初曆,云後當差一日。八百年當有聖者定之。計今相去七百一十年,術者 暉杜口一無所答,胄玄通者五十四焉。由是擢拜員外散騎侍郎,兼太史令,賜物千段, 張胄玄,渤海蓨人也。 令楊素與術數人立議六十一事,皆舊法久難通者, 時輩多出其下,由是太史令劉暉等甚忌之。然暉言多不中,胄玄所推 博學多通,尤精術數。 日。 冀州刺史趙煚薦之,高祖徵授雲騎尉,直 內史通事顏敏楚上言曰:「漢時落下 令暉與胄玄等辯析

列

一七八〇

舉其成數,聖者之謂,其在今乎!」上大悅,漸見親用。

胄玄所爲曆法,與古不同者有三事:

隔,追檢古注,所失極多,遂折中兩家,以爲度法。冬至所宿,歲別漸移,八十三年却行一度, 至梁虞劇曆法,嫌沖之所差太多,因以一百八十六年冬至移一度。 胄玄以此二術,年限懸 其一,宋祖沖之於歲周之末,創設差分,冬至漸移,不循舊軌。每四十六年,却差一度。

則上合堯時日永星火,次符漢曆宿起牛初。

明其前後,並皆密當

理未 月逐 行一百七十六度。 時術者,多不能曉。張賓因而用之,莫能考正。胄玄以爲加時先後,逐氣參差,就月爲斷,於 勢速,計一百八十二日而行一百八十度。 日少遲,令合朔加時晚。檢前代加時早晚,以爲損益之率。日行自秋分已後至 ·可。乃因二十四氣列其盈縮所出,實由日行遲則 其二,周馬顯造丙寅元曆,有陰陽轉法,加減章分,進退蝕餘,乃推定日,創開此數。 每氣之下,即其 來也。 自春分已後至秋分,日行遲,計一百八十二日而 月逐日易及,令合朔加時早,日 |春分,其 行速則

黄道內十三日有奇而出,又行黃道外十三日有奇而入,終而復始,月經黃道,謂之交。 朔望 明。 其三,自古諸曆,朔望值交,不問內外,入限便食。限賓立法,創有外限:應食不食,猶未 冑玄 [以日行黃道,歲一周天,月行月道,二十七日有餘一周天。 月道交絡黃道,每行

黃道之南也,雖遇正交,無由掩映,食多不驗。遂因前法,別立定限,隨交遠近,逐氣求差,損 去交前後各十五度已下,卽爲當食。若月行內道,則在黃道之北,食多有驗。月行外道,在

益食分,事皆明著。

其超古獨異者有七事:

不同。 數,與古不同。其差多者,至加減三十許日。 在小雪氣,則均減二十五日。加減平見,以爲定見。諸星各有盈縮之數,皆如此例,但差數 其一, 古曆五星行度皆守恒率, 見伏盈縮, 悉無格准。 胄玄推之, 各得其眞率, 合見之 特其積候所知,時人不能原其意旨。 即如熒惑平見在雨水氣,即均加二十九日,見

若平晨見在啓蟄氣者,去日十八度外,三十六度內,晨有木火土金一星者,亦相隨見。 星一終之中,有時一見,及同類感召,相隨而出。卽如辰星平晨見在雨水氣者,應見卽不見, 其二,辰星舊率,一終再見,凡諸古曆,皆以爲然,應見不見,人未能測。胄玄積候,知辰

前 五. [疾初見在立冬初,則二百五十日行一百七十七度,定見在夏至初,則一百七十日行九十 星遲速留退眞數皆與古法不同,多者至差八十餘日,留廻所在亦差八十餘度。即如熒惑 其三、古曆步術、行有定限、自見已後、依率而推。進退之期、莫知多少。胄玄積候、知

二度。

追步天驗,今古皆密。

行有向背。 其四 ,古曆食分,依平卽用,推驗多少,實數罕符。胄玄積候,知月從木、火、土、金四星 月向四星卽速,背之則遲,皆十五度外,乃循本率。遂於交分,限其多少。

其五 一,古曆加時,朔望同 術。 胄玄積候,知日食所在,隨方改變,傍正高下,每處不同。

交有淺深,遲速亦異,約時立差,皆會天象。

乃旣。 分,最爲詳密。 」玄積候,知當交之中,月掩日不能畢盡,其食反少,去交五六時,月在日內,掩日便盡,故食 每近一度,食益一分,當交卽食旣。其應少反多,應多反少,自古諸曆,未悉其原。 其六,古曆交分卽爲食數,去交十四度者食一分,去交十三度食二分,去交十度食三 自此已後,更遠者其食又少。交之前後在冬至皆爾。若近夏至,其率又差。所立食

遲疾盈縮使其然也。 其七、古曆二分、晝夜皆等。胃玄積候、知其有差、春秋二分、晝多夜漏华刻、皆由日行

凡此胄玄獨得於心、論者服其精密。大業中卒官。

許智藏

許智藏,高陽人也。 祖道幼,嘗以母疾,遂覽醫方,因而究極,世號名醫。 誠其諸子曰:

「爲人子者,嘗膳視藥,不知方術,豈謂孝乎。」由是世相傳授。 **仕梁,官至員外散騎侍郎。**父

景,武陵王諮議參軍。

登御牀。 其人若到,當必相苦,爲之奈何。」明夜,俊又夢崔氏曰:「妾得計矣,當入靈府中以避之。」及 賚物百段。 智藏至,爲俊診脉,曰:「疾已入心,郎當發癇,不可救也。」果如言,俊數日而薨。 會秦孝王俊有疾,上馳召之。俊夜中夢其亡妃崔氏泣曰:「三」「本來相迎,如聞許智藏將至, 智藏 少以醫術自達,仕陳爲散騎侍郎。及陳滅,高祖以爲員外散騎侍郎,使詣揚州。 智藏爲方奏之,用無不效。年八十,卒于家。 煬帝即位,智藏時致仕于家,帝每有所苦,輒令中使就詢訪,或以轝迎入殿,扶 上奇其妙,

名、『一〕拜上儀同三司。澄有學識,傳父業,尤盡其妙。歷尚藥典御、諫議大夫,封賀川縣伯。 父子俱以藝術名重於周、隋二代。 史失事,故附見云。 宗人許澄,亦以醫術顯。父奭,仕梁太常丞、中軍長史。 隨柳仲禮入長安,與姚僧垣齊

萬寶常 王令言

是寶常被配爲樂戶,因而妙達鍾律,遍工八音。 萬寶常,不知何許人也。父大通,從梁將王琳歸于齊。後復謀還江南,事泄,伏誅。 造玉磬以獻于齊。 又嘗與人方食,論及聲 由

列

傳

第四十三

遊

人 調 所賞。 時無樂器 然歷周泊隋,俱不得調 寶常因 取前食器及雜物,以箸扣之,品其高下,宮商畢備,諧於絲竹,大爲時

毁之。 常 已來,知音者皆不能通,見寶常特創其事,皆哂之。至是,試令爲之,應手成曲,無所疑滯, **諸樂器,其聲率下鄭譯調二律。 幷撰樂譜六十四卷, 具論八音旋相爲宮之法,改絃移柱之** 見者莫不嗟異。於是損益樂器,不可勝紀,其聲雅淡,不爲時人所好,太常善聲者多排 後譯樂成奏之,上召寶常,問其可不,寶常曰:「此亡國之音,豈陛下之所宜聞」」上不悅。 因極言樂聲哀怨淫放,非雅正之音,請以水尺爲律,以調樂器。 爲八十四調,一百四十四律,變化終於一千八百聲。 開皇初,沛國公鄭譯等定樂,初爲黃鍾調。寶常雖爲伶人,譯等每召與議,然言多不 時人以周禮有旋宮之義,自漢、魏 上從之。 寶常奉詔,遂造 甪。 寶

以行矣。」寶常然之,遂如其言以答威。威怒曰:「胡僧所傳,乃是四夷之樂,非中國所宜行 祥者,上皆悅之。先生當言就胡僧受學,云是佛家菩薩所傳音律,則上必悅。先生所爲,可 數詣公卿怨望,蘇威因詰實常,所爲何所傳受。有一沙門謂實常曰:「上雅好符瑞,有言徵 也。」其事竟寢。 又太子洗馬蘇變以鍾律自命,尤忌實常。變父威,方用事,凡言樂者,皆附之而短實常 寶常嘗聽太常所奏樂,泫然而泣。人問其故,寶常曰「樂聲淫厲而哀,天

下不久相殺將盡。」時四海全盛,聞其言者皆謂爲不然。大業之末,其言卒驗。

寶常貧無子,其妻因其臥疾,遂竊其資物而逃。 寶常飢餒,無人贍遺,竟餓 而死。 將死

又習鄭聲,而寶常所爲,皆歸於雅。 於天然識樂,不及寶常遠矣。 也,取其所著書而焚之,曰:「何用此爲?」見者於火中探得數卷,見行於世,時論哀之。 開皇之世,有鄭譯、何妥、盧賁、蘇夔、蕭吉,並討論墳籍,撰著樂書,皆爲當世所用。 安馬駒、曹妙達、王長通、郭令樂等,四能造曲,爲一時之妙, 此輩雖公議不附實常,然皆心服,謂以爲神。 至

興自早晚?」其子對曰:「頃來有之。」令言遂歔欷流涕,謂其子曰:「汝愼無從行,帝必不返。」 **琶,作翻調安公子曲。** 子問其故,令言曰:「此曲宮聲往而不反,宮者君也,吾所以知之。」帝竟被殺於江都。 時 有樂人王令言,亦妙達音律。大業末,煬帝將幸江都,令言之子嘗從,於戶外彈胡琵 令言時臥室中,聞之大驚,蹶然而起曰:「變,變」,急呼其子曰:「此曲

則 博 :利時俗,行非其義,則咎悔及身,故昔之君子所以戒乎妄作。今韋、來之骨法氣色,庾、 史臣曰:陰陽卜祝之事,聖人之敎在焉,雖不可以專行,亦不可得而廢也。人能弘道,

列傳第四

+

藝術

校勘

記

脹之推步盈虛,雖落下、高堂、許負、朱建,不能尙也。 伯醜龜策,近知鬼神之情,耿詢渾儀, 許氏之運鍼

石,世載可稱,蕭古之言陰陽,近於誣誕矣。 不差辰象之度,寶常聲律,動應宮商之和,雖不足遠擬古人,皆一時之妙也。

校勘記

[一] 雁門 「雁」原作「應」,據通志一八三改。

俊夜中夢其亡妃崔氏泣曰 「俊」原作「後」,據北史許智藏傳及御覽七二三改。

[三]姚僧垣 「垣」原作「坦」、據北史本傳改。

〔四〕郭令樂 本書音樂志下、御覽五六四作「郭金樂」。

隋書卷七十九

列傳第四十四

外戚

足以利物,自矜於已,以富貴驕人者乎!此呂、霍、上官、閻、梁、竇、鄧所以繼踵而亡滅 及之。夫其誠著艱難,功宣社稷,不以謙沖自牧,未発顚蹶之禍。 之患,何哉?皆由乎無德而尊,不知紀極,忽於滿盈之戒,罔念高危之咎,故鬼瞰其室,憂必 歷觀前代外戚之家,乘母后之權以取高位厚秩者多矣,然而鮮有克終之美,必罹顚覆 而況道不足以濟時,仁不

重灼四方,將三司以比儀,命五侯而同拜者,終始一代,寂無聞焉。考之前王,可謂矯其弊 不易。然內外親戚,莫預朝權,昆弟在位,亦無殊寵。 昔文皇潛躍之際,獻后便相推轂,煬帝大橫方兆,蕭妃密勿經綸,是以恩禮綢繆,始終 至於居擅玉堂,家稱金穴,暉光戚里,

者也。

列

傳第

一七八八

乘其 矣。 故雖 非 據 時經擾攘,無有陷於不義,市朝遷貿,而皆得以保全。比夫憑藉寵私, ,旋就顚隕者,豈可同日而言哉! 此所謂愛之以禮,能改覆車。 輒敍其事,爲外戚 階緣恩澤,

高祖外家呂氏

[傳

呂永吉,自稱有姑字苦桃,爲楊忠妻。[1] 勘驗知是舅子,始追贈 後去官,不知所終。 立廟、置守冢十家。 八州諸軍事、靑州刺史、封齊郡公、諡曰敬、 高 祖外家呂氏,其族蓋微,平齊之後,求訪不知所在。 以永吉襲舒,留在京師。 外祖母姚氏為齊敬公夫人。 大業中,授上黨郡太守,性識庸劣,職務不理 至開皇初, 外祖 雙周爲上柱國 濟南郡上言, 詔並改葬,於齊州 、太尉、 有男子

苦之。 道貴還 乃命高 容, 但連呼高祖名,云「種末定不可偸,大似苦桃姊。」是後數犯忌諱,動致違忤,上甚恥之。 永吉從父道貴,性尤頑騃,言詞鄙陋。初自鄉里徵入長安,上見之悲泣。 至 頌 後郡廢、終於家、子孫無聞焉。 厚加供給,不許接對朝士。 本郡,高自崇重,每與人言,自稱皇舅。 拜上儀同三司,出爲濟南太守,令卽之任,斷其入朝。 數將儀衞出入閭里,從故人遊宴,官民咸 道貴略無成

資畜。 西歸 弟見羅少長貧賤,每輕侮之,不以兄禮事也。然性長者,亦不與諸弟校競長短,后由是重之。 馬財物。 齊亡,高祖爲定州總管,獻皇后遣人尋羅,得之,相見悲不自勝,侍御者皆泣。於是厚遺車 始 見釋,寓居中山,孤貧無以自給。 長安, 獨 初,信入關之後,復娶二妻,郭氏生子六人,善、穆、臟、順、陁、整,崔氏生獻皇后。 孤羅字羅仁,雲中人也。 未幾,周武帝以羅功臣子,久淪異域,徵拜楚安郡太守。以疾去官,歸于京師。諸 歷職顯貴,羅由是遂爲高氏所囚。信後仕周爲大司馬。 父信,初仕魏爲荆州刺史。 齊將獨孤永業以宗族之故,見而哀之,爲買田宅,遺以 武帝之入關也,信棄父母妻子 及信爲宇文護所誅,羅

承襲。 太師 通 見規,追遠愼終,前王盛典。 道著於弼諧,緯義經仁, 眷言令範,事切於心。今景運初開, 、上柱 上以問后,后曰:「耀誠嫡長,不可誣也。」於是襲爵趙國公。 國、冀定等十州刺史、趙國公,邑萬戶。」其諸弟以羅母沒齊,先無夫人之號,不當 事深於拯濟。 故柱國信,風宇高曠,獨秀生民,叡哲居宗,清獻映世。 椒聞肅建,載懷塗山之義,無忘廢、紀之典。 方當宣風廊廟, 亮采台階, 而運屬艱危, 以其弟善爲河內郡公, 宏謀長 可贈 弗

及高祖爲丞相,拜儀同,常置左右。旣受禪,下詔追贈羅父信官爵曰:「褒德累行,往代

列

穆 大 遷 將 左 爲 衞 金 軍 泉 將 縣 煬 軍 帝 前 公, 藏 後賞 位, 為武 賜 改 封 平縣公,随爲武喜縣公,整爲千牛備身。 不 蜀 可 勝 公。 計。 未 幾,卒官,諡 而 出 爲涼 州 總管, 恭 進 位 F 柱 擢拜羅 國 爲 壽 左領 中 , 左右將 徴 拜左 軍 武 衞

嗣

或

日

賊 弒 所 逆 執 也 子 一,裴 纂 賊 嗣 虔 義 而捨之。 通 仕 率賊入 至 河 陽 成 善後官至柱國。 郡 象 尉 殿 0 • 纂弟 宿衞兵 武 都 士皆從逆, 大業 卒,子覽嗣,仕至左候衞將軍 末, 亦爲 開遠時為千牛,與 河 陽 郡 尉。 庶長子開遠, · ,大業末卒。 獨 孤 盛力戰於閤 宇文 化及之 下,為

濉 拜上開府、右領左右將軍。 獨 孤 施字 黎邪。 仕周胥附上士,坐父徙蜀郡十餘年。 **外之,出爲郢州刺** 史,進位 上大將軍,累轉延州刺史。 宇文護被誅,始歸長安。 高祖受

是意陁 鄭氏 家 尼言,本從 出 財 怨言。 物潛移於畜猫鬼家。 .俱有疾,召醫者視之,皆曰:「此猫鬼疾也。」上以**陁后之**異 好 左道。 所為,陰令其兄穆以情喻之。上又避左右諷 上令左僕射 施母家來, 其妻母先事猫鬼, [三] 因轉入其家。 高頻、納言蘇威、大理 常事 猫 鬼。 每以子 H ,其妻曰: 夜祀之。 正皇甫孝緒、 上微聞而不之信也。 施, 陁言無有。 「無錢可酤。」 言子者鼠 大理 丞楊遠等雜治之。 母弟,陁妻楊素之異母妹,由 也。 施因謂阿尼曰:「可 上不悦,左轉 其猫 會獻皇后及楊素妻 鬼 毎 殺 人 遷州 ||陁||婢 刺 冷猫 所 徐 死 िया

於園 中。」外之,阿尼色正青,若被牽曳者,云猫鬼已至。上以其事下公卿,奇章公牛弘曰:「妖由 鬼向越公家,使我足錢也。」阿尼便咒之歸。 怒而遣之。 於是冤陁死,除名爲民,以其妻楊氏爲尼。先是,有人訟其母爲人猫鬼所殺者,上以爲妖妄, 人興,殺其人可以絕矣。」上令以犢車載陁夫妻,將賜死於其家。陁弟司勳侍中整詣闕求哀, 下外省遣阿尼呼猫鬼。 中謂 阿尼曰:「可令猫鬼向皇后所,使多賜吾物。」阿尼復呪之,遂入宮中。 及此,詔誅被訟行猫鬼家。 阿尼於是夜中置香粥一盆,以匙扣而呼之曰:「猫女可來,無住宮 陁未幾而卒。 數日、猫鬼向素家。 十一年,上初從幷州還,陁 楊遠乃於門

氏之尊、戚屬斯重、而降年弗永、凋落相繼。 念渭陽 二子:延福、延壽。 煬帝即位,追念舅氏,聽以禮葬,乃下詔曰:「外氏衰禍,獨孤陁不幸早世,遷卜有期。言 之情,追懷傷切,宜加禮命,允備哀榮。 緬惟先往,宜崇徽秩。 可贈正議大夫。」帝意猶不已,復下詔曰:「舅 復贈銀靑光祿大夫。」有

随弟整,官至幽州刺史,大業初卒,贈金紫光祿大夫、平鄉侯。

蕭歸 子琮 琮弟瓛

蕭歸 字仁遠,梁昭明太子統之孫也。父營,初封岳陽王,鎭襄陽。侯景之亂,其兄河東

列

以營 令歸 號 里 王 天保 譽 之 起 爲 地 與 舞,歸曰:「 梁 其 稱 歸俊辯,有才學,兼 叔 主 皇 変 帝 遣 湘 於 柱 東王 陛 其 國 于謹 下親御五 國 釋 車 不 等率 服 協, 好內 節 騎五 爲 絃,臣敢 文 繹 二同 典 所害。 萬 襲繹 周武 不 王 者 同百獸! 下滅之。 及繹 帝平齊之後, 仍置 嗣 位, 營 江 陵 遂 營稱 都江 總管,以兵戍 歸來賀,帝享之甚 藩 陵,有 于西魏 荆 之。 郡 乞 其西 師 **營** 請 一歡 平 討 , 州 歸 親 延 嗣 彈琵琶, 袤 周 立, 三百 太 年

焉 實無遺恨。」幷獻所服金裝劍, 專制 聖 甲冑,身先 臨 舊 親 歸 藩 終 待 111: 都 高 其 帝親 故 歸 感 表 獻 祖 或 置位在王 鄕 戀 受禪,思禮 皇后言於上曰:「梁主 H 之念, 一錢於產水之上。後備禮納其女爲晉王妃,又欲以其子陽尙蘭陵公主。 嗚 士 歲餘 卒 咽 一公之上。 歸 遺嗣 良 掃 以 修懷 湯 庸 又來朝,賜 彌厚,遣使賜金五 逋 闇 孤 藐 寇, 曲 抱。 歸被服端麗,進退閑雅,天子矚目,百僚傾慕。 特特 荷 F 肸 報 芜 上覽而嗟悼焉。 乞 縑 **於當振** |通家,腹心所寄,何勞猜防也。」上然之,於是罷 降 慈 明 萬 慈 時。 匹,珍玩 竉 旅 長江, 百兩、銀千兩,布帛萬 冠外 伏 而 願 攝 藩 稱是。 相 聖 生 一, 思 送旋反耳 歸在位二十三年,年四十四薨, 躬 乖 舛 踰 與 及還,上親 Ш 遽 連 山 岳 雇 。」歸 同 痾疾、屬纊 爱及子 固 匹,馬五 , 皇 執手曰:「梁主 拜 謝 基 女, 而 等天日 百 在 去。 尙主 匹。 辰 賞賜以億計。 其 俱 顧 婚 歸來朝, 年五 **久滯荆楚,未復** 永 陰 王 江 梁之臣子諡) 臣 待 陵總管, 月, 謝 由 毎 雖 是漸 上甚 願 寢疾, 九 月 長 躬 泉, 餘 違 見 敬

寄非 射之, 武 號廣 堂構,其事甚重,雖窮憂勞,常須自力。 之。 守、咫尺陳人、水潦之時、特宜警備。 虜居 我必不可干,勿得輕人而不設備。 各給守墓十戶。 率其臣下二百餘 公安,不克而還。 鄉 琮所署大將軍許世武密以城召陳將<u>宜黃侯陳紀,謀洩,</u>踪誅之。 輕 民而 運,有識者日 琮字溫文,性寬仁,有大度,倜儻不羈,博學有文義。 公崔弘度將兵戍之。 一十發十中,持帖者亦不懼。 一,爲國爲民,深宜抑割,恒 叛 於是廢梁國 拜琮爲柱國,賜爵莒國公。 人朝于京 「運之爲字軍走 徵踪叔父岑入朝,拜爲大將軍,封懷義公,因留 o 軍至都州 師,江陵父老莫不隕涕相謂 上遣左僕射高與安集之,曲赦江陵死罪,給民復十年。 加 初封康陽王,尋立爲梁太子。及嗣位,上賜璽書曰:「負荷 脫與 : 饘粥 也,吾君將奔走乎?」其年, ,踪叔父巖及弟瓛等懼 陳氏比日雖復朝聘相尋,疆場之間猶未清肅,唯當恃 梁國積世相知 輯諧內外,親任才良,聿遵世業,是所望也。 ,以禮自存。」 又賜 梁之大臣 ,重以親姻,情義彌厚。 曰:「吾君其不反矣」」上以除 兼善弓馬,遣人伏地著帖,踪馳馬 弘度掩襲之, 踪遣大將軍 不遣。 . 璽書,誠勉之。 後二歲,上徵琮 復置 遂引陳人至城下, 戚昕以舟 江陵總管以監 江陵 來朝,遣 之地,朝 彼之疆 時琮 師 入朝, 襲陳 年

列傳

第

與琮 見北 陳,虜也, 由 笑而 才 .是忌之,遂廢於家,未幾而卒。 擢 何乃適妹 間豪貴,無所降下。 退。 從焉,遂於宮中多行淫穢。江都之變,爲宇文化及所殺。 用 鉅 同 煬 列, 小名藏,煬帝甚昵之,以爲千牛,與宇文皛出入宮掖,伺察內外。帝每有遊宴,與未 帝 ,於是諸 何得相比」」素意以虜優羌劣。琮曰:「以羌異虜,未之前聞。」」素慚 約兄素,時為 嗣 帝令約宣旨 位 鉗耳氏 「以皇后之故,甚見親重。拜內史令,改封梁公。」
宗之宗族,總麻以 蕭 昆弟 ·乎。」」琮曰:「前已嫁妹於侯莫陳氏,此復何疑!」素曰:「鉗耳,羌也,侯莫 誠 布 尚書令,見踪嫁從父妹於鉗耳氏,因謂琮曰:「公, 嘗與賀若酮深相友善,酮旣被誅,復有童謠曰:「蕭蕭 勵,約復 列 朝廷。 贈左光祿大夫。子鉉,襄城通守。 以私 踪性澹雅, 情喩之。 不 **踪答曰:「踪若復事** 以 職務自嬰, 退朝 縦 事 復以琮弟子鉅爲梁公。 ٠, 酒 則 而 帝王之族, 何異於公哉 Ę 而 止。琮 亦復起。」帝 內史令楊約 上, 雖羈旅 望高 並隨 約 戚

巋之第三子也,深自矜負。 子 與 也 其 叔 瓛 父巖 及陳亡,吳人 字欽文,少聰敏,解屬文。在梁爲荆州刺史,頗有能名。 奔于陳。 推 陳主以爲侍中、安東將軍 瓛 爲主。 有謝異者,頗知廢興,梁、陳之際,言無不驗,江南人甚敬信之。 吳人見梁武、簡文及營、歸等兄弟並第三而踐尊位 、吳州 刺史,甚得 物情,三吳父老皆曰 崔弘度以兵至郡州 「吾君

示

拒述。 及陳主被擒,異奔於臟,由是益爲衆所歸。 述遣兵別道襲吳州,哀懼,衣道士服,棄城而遁。 褒國公宇文述以兵討之,瓛遣王哀守吳州,自將 **熾衆聞之,悉無鬭志,與述**一 ٥ 戰而

败。 職將左右數人逃于太湖,匿於民家,爲人所執,送於述所,斬之長安,時年二十一 弟 璟,爲朝請大夫、尚衣奉御。 陽,歷衞尉卿、秘書監、陶丘侯。 瑀,歷內史侍郎、河池

太守。

均梁、竇, 顛覆繼軌, 史臣曰:三、五哲王,防深慮遠,舅甥之國,罕執鈞衡,母后之家,無聞傾敗。爰及漢、晉, **豈全於大業之後!** 皆由乎進不以禮, 故其斃亦速。 今或不隕舊基, 或更隆先構, 豈非處之以道, 不預權寵之所 若使獨孤權侔呂、霍,必敗於仁壽之前,蕭氏勢

校勘記

致乎!

△一□楊忠妻 「忠」原爲空格,各本多作「諱」,今補「忠」字。

其妻母先事猫鬼 「其妻母」、北史獨孤陁傳作「其外祖母高氏」。

第四十四 校勘記

列

傅

隋書卷八十

列傳第四十五

列女

之靜女,各勵松筠之操,甘於玉折蘭摧,足以無絕今古。故述其雅志,以纂前代之列女云。 霑良史之筆,將草木以俱落,與麋鹿而同死,可勝道哉!永言載思,實庶姬之恥也。 王公大人之妃偶,肆情於淫僻之俗,雖衣繡衣,食珍膳,坐金屋,乘玉輦,不入彤管之書,不 公、把植之妻,魯之義姑,梁之高行,衞君靈主之妾,夏侯文寧之女,或抱信以含貞,或蹈忠 柔,仁之本也;貞烈,義之資也。非溫柔無以成其仁,非貞烈無以顯其義。是以詩書所記, 而踐義,不以存亡易心,不以盛衰改節,其修名彰於旣往,徽音傳於不朽,不亦休乎!或有 風俗所在,圖像丹青,流聲竹素,莫不守約以居正,殺身以成仁者也。若文伯、王陵之母,白 自昔貞專淑媛,布在方策者多矣。婦人之德,雖在於溫柔,立節垂名,咸資於貞烈。溫 觀夫今

列傳第

蘭陵公主

初 《嫁儀同王奉孝,卒,適河東柳述,時年十八。諸姊並驕貴,主獨折節遵於婦道,事舅姑甚 ,遇有疾病,必親奉湯藥。 蘭陵公主字阿五, 高祖第五女也。 高祖聞之大悅。由是述漸見寵遇。 美姿儀,性婉順,好讀書,高祖於諸女中特所鍾愛。

表 家 死乞葬於柳氏。」帝覽之愈怒,竟不哭,乃葬主於洪瀆川,資送甚薄。 請発主號,與述同徙。 ,,今其有罪,妾當從坐,不願陛下屈法申恩。」 帝不從, 曰:「昔共姜自誓,著美前詩,鄎嬀不言,傳芳往誥。 高祖旣崩,述徙嶺表。 初,晉王廣欲以主配其妃弟蕭陽,高祖初許之,後遂適述,晉王因不悅。及述用事,彌惡 帝大怒曰:「天下豈無男子,欲與述同徙耶。」主曰:「先帝以妾適于柳 煬帝令主與述離絕,將改嫁之。公主以死自誓,不復朝謁,上表 妾雖負罪,竊慕古人。生旣不得從夫, 主憂憤而卒,時年三十二。 朝野傷之。 臨終上

南陽公主

述子士及,以謹肅聞。 南陽 公主者,煬帝之長女 及述病且卒,主親調飲食,手自奉上,世以此稱之。 也。 美風儀,有 志節,造 次 必以 禮。 年十四,嫁於許國公宇文

留之。」主泣曰:「武賁旣是隋室貴臣,此事何須見問」」建德竟殺之。主尋請建德削髮爲尼。 敬異焉。及建德誅化及,時主有一子,名禪師,年且十歲。建德遣武賁郎將於士澄謂主曰: 復爲夫妻。主拒之曰:「我與君讎家。今恨不能手刃君者,但謀逆之日察君不預知耳。」因與 不能報怨雪恥,淚下盈襟,聲辭不輟,情理切至。建德及觀聽者莫不爲之動容隕涕,咸肅然 衣冠並在其所,建德引見之,莫不惶懼失常,唯主神色自若。 「宇文化及躬行殺逆,人神所不容。今將族滅其家,公主之子,法當從坐,若不能割愛,亦聽 及建德敗、將歸西京、復與士及遇於東都之下、主不與相見。士及就之、立於戶外、請 及宇文化及殺逆,主隨至聊城,而化及爲竇建德所敗,士及自濟北西歸大唐。 建德與語,主自陳國破家亡, 時隋代

乃拜辭而去。 告絕,訶令速去。 | 士及固請之, 主怒曰: 「必欲就死, 可相見也。」 | 士及見其言切, 知不可屈,

襄城王恪妃

於道。 相、娉以爲妃。 襄城王恪妃者,河東柳氏女也。父旦,循州刺史。 恪與辭訣,妃曰:「若王死,妾誓不獨生。」於是相對慟哭。 未幾而恪被廢,妃修婦道,事之愈敬。 煬帝嗣位,恪復徙邊, 妃姿儀端麗,年十餘,以良家子合法 恪旣死,棺斂訖,妃謂使者 帝令使者殺之

列 傳

書 卷 八 +

日 一一妾誓 與楊 氏 同 若身死之後得不別埋,君之惠也。」遂撫棺號慟, 自經 而卒。 見者莫

不爲之涕流

華 陽 医性性

也。 之色,輒陳義理以慰諭之,楷甚敬焉。及江都之亂,楷遇宇文化及之逆,以妃賜其黨元武達。 收 因 武達初以宗族之禮,置之別舍,後因醉而逼之。妃自誓不屈,武達怒,撻之百餘,辭色彌厲。 涸 縣公。 取甓自毁其面,血淚交下,武達釋之。 而殺之。 因 華陽 不食而卒。 煬帝嗣位,坐與柳述連事,除名爲民,徙南海。 王楷妃者, 妃有姿色,性婉順,初以選爲妃。 河南元氏之女也。 父巖,性明敏,有氣幹。 妃謂其徒曰:「我不能早死,致令將見侵辱,我之罪 未幾而楷被幽廢,妃事揩踰謹,每見楷有憂懼 後會赦,還長安。 仁壽中,爲黃門侍郎, 有人譖巖 逃歸, 封龍

譙國夫人

明,多籌略,在父母家,撫循部衆,能行軍用 譙國 夫人者,高涼洗氏之女 也。 世爲南越首領,跨據 師、壓服諸越。 山洞, 每勸親族爲善,由是信義結於本 部落十餘萬家。 夫 人幼賢

宗,使從民禮。 爲 所 鄉。 浮海歸宋, 其子 規諫,由是怨隙止息,海南、儋耳歸附者千餘洞。梁大同初,羅州 越人之俗,好相攻擊,夫人兄南梁州刺史挺,恃其富强,侵掠傍郡,嶺表苦之。 高涼太守寶娉以爲妻。 因留于新會。 每共實參決辭訟,首領有犯法者,雖是親族,無所舍縱。 自業及融 融本北燕苗裔。 ,三世爲守牧,他鄉羈旅,號令不行。 初,馮弘之投高麗 也,遺融大父業以三百人 刺 史馮融聞夫人有志 自此政令有序, 至是,夫人誠約本 夫

莫敢違。

千餘 戰 物,不設備 被召援臺,乃稱有疾,鑄兵聚衆,而後喚君。今者若往,必留質,追君兵衆。 **廣,驍將也,領兵入讚石,即與官兵相拒,勢未得還。** 無行,以觀 鬭 止之曰:"「刺史無故不合召太守,必欲詐君共爲反耳。」寶曰:"何以知之。」 夫人曰:「刺史 人,步擔雜 遇侯景反,廣州都督蕭勃徵兵援臺。高州刺史李遷仕據大皐口,遣召寶。 宜遣使詐之,卑辭厚禮,云身未敢出,欲遣婦往參。 [其勢。]數日,遷仕果反,遣主帥杜平虜率兵入讚石。 夫 人擊之,大捷。 物,唱言輸赕, 得至栅下, 遷仕 逐走,保于寧都。 賊 必可圖。」實從之,遷仕果大喜,覘夫 遷仕在州,無能爲也。 夫人總兵與長城侯陳覇先會于灣石 彼聞之喜,必無防慮。 寶知之,遽告,夫人曰:「严 此意可見,願 若君自往,必有 實欲往, 人衆皆擔 於是我 夫 將 且

還謂寶曰:「陳都督大可

畏,極得衆心。

我觀此人必能平賊,君宜厚資之。」

節 迎章 爲 詔 使 首 丁,其鹵 使持節册夫人爲中郎將、石龍太夫人,賚繡幰油絡駟馬安車一 歸 領 聖母,保境安民 一昭達。 朝于 告夫人,夫人曰:「 及 寶 簿 丹陽, 卒 內外逼之,紀徒潰散。 如 嶺 刺史之儀。 起家 表 大 亂 拜陽春郡 我爲忠貞,經今兩代,不能惜汝輒負國 夫 人懷集百越 至德中,僕卒。後遇陳國亡,嶺南未有所附,數郡共奉夫 守。 僕以夫人之功,封信都侯, 後 廣州 數州 刺 晏然 史歐陽紇 至陳永定二年, 謀 反, 召僕至高安, 国家。」遂 加平越中郎將, 乘,給鼓吹一 其子僕 一發兵拒境,帥百越酋長 誘與爲亂 年 九 部,幷麾幢旌 轉石龍太守。 歲, 遣帥諸 僕 遣

爲信 定。 扶 南 表 犀杖 高 魂 夫 祖 爲 人 遣 獻 儀 見杖 学陳, 總管韋洸安撫嶺外,陳將徐璒以南康拒守。 同 験 三司 主,至此,晉王廣遣 知陳亡,集首領數千, 册 夫 人為 宋康 郡 陳主遺夫 夫 盡 人 日 人書, 慟哭。 諭 遣 以國 其孫 光至嶺 亡, 魂帥衆迎洸 令其歸化, 下,逡巡 不敢進。初,夫人以 弁以犀杖 八至廣州 嶺 及 南 兵符

領 出 暄 討 · 敷騎,衛詔使裴矩巡撫諸州,其蒼梧首領陳坦、 與 (逆黨 佛智 未 幾, 陳佛智 戦剋 番禺 人王仲宣反,首領皆 素 斬之。進兵至 相 友善,故遲留 南 海 , 不 與 應 進。 鹿 之, 愿 夫 圍洗於州 軍 人 會, 知 共敗 岡州馮岑翁、梁化鄧馬頭、藤州李光略、羅 之,大怒,遣 城 心仲宣 ,進兵屯衡嶺 使執暄 夫 人親被甲,乘 0 夫人 繋 於 遣 州 孫暄 介馬,張 獄 帥 叉 師 八遣孫盘 錦 救 光

夫人。

勑書曰 甚有大功。 篋 宜訓導子孫,敦崇禮教,遵奉朝 民,所以遣往誅翦,爲百姓除害。 開 羅 州龐靖等皆來參謁 l,幷梁、陳賜物各藏于一庫**。** 譙 州 我事三代主、唯用一好心。 或 刺 夫人 史。 幕府,置長史以 今賜夫人物五千段。 追贈 寶 爲 ō 廣州 還令統其部落,凝表遂定。 總管、譙國公,册夫人爲譙國夫人。 下官屬,給印 化,以副股心。」皇后以首飾及宴服一 每歲時大會、皆陳于庭,以示子孫,曰:「汝等宜盡赤心 今賜物具存,此忠孝之報也,願汝皆思念之。」 ,欲使率土清淨 暄不進愆,誠合罪責, 夫人情在 ·章,聽發部落六州兵馬, 奉國 .,兆庶安樂。 ,深識正 高祖異之,拜盎爲高州刺史,仍赦出暄 以夫人立此 理,遂令孫盎斬獲 而王仲宣等輒 以宋康日 若有機急, 誠效, 襲賜之,夫人並盛於金 邑廻授僕 故特 佛智,竟破羣賊 相聚結、 便宜 妾洗 原発。 行 漫亂 事。 氏。 向天 拜 彼 降 仍

湯沐邑, 親 訥 載 罪狀,不可以招懷遠人。 詔 時番州總管趙訥貪虐,諸俚獠多有亡叛。 書, 自稱使者,歷十餘州,宣述上意,諭諸悝獠,所至皆降。 千五五 百戶。 贈 僕爲崖州總管、平原郡公。 上遣推訥, 得其贓賄, 竟致於法。 夫人遣長史[張融上封事, 論安撫之宜, 仁壽初,卒, 降勑委夫人招慰亡叛。 高祖嘉之,賜夫人臨 賻物一千段,諡爲誠敬 振 縣

鄭善果母

幸有此 果以 公。 母 年二十而寡,父彦穆欲奪其志,母抱善果謂彥穆曰:「婦人無再見男子之義。且鄭君 年十四,授沂州刺史,轉景州刺史,尋爲魯郡太守。 父 鄭 死 見。 善 王事、年數歲、拜使持節、大將軍、襲爵開封縣公、邑一千戶。 展母者,清河崔氏之女也。 棄兒爲不慈,背死爲無禮。 年十三,出適鄭誠,生善果。而誠討尉迥,力戰死于 寧當割耳截髮以明素心,違禮滅慈,非敢聞命。」善 開皇初,進封武德郡 雖 陣。

泣,終 望汝 其剖斷 墮於 乎? 汝家婦,獲奉灑 見汝先人於地下乎? 副 汝 公 母 日不食。 政 自 性 其 合理,歸 童 賢 此 子承 ì 、明,有節操、博涉書史,通曉治方。 每善果出聽事,母恒坐胡牀,於鄣後察之。聞 內 則 掃, 善果伏於牀前,亦不敢起。母方起謂之曰:「吾非怒汝, 則大悅,即賜之坐,相對談笑。 汝旣年 襲茅土,位至方伯,豈汝身致之邪? 墜 爾家風,或亡失官爵,外則虧天子之法,以取罪戾。 如汝先君,忠勤之士也,在官淸恪,未嘗問私,以身徇國,繼之以死,吾亦 小而 孤, 吾寡婦耳, 有慈無威, 若行事不允,或妄瞋怒,母乃還堂,蒙被而 安可不思此 使汝不知 事而妄加瞋怒,心緣驕樂, だ禮訓、 吾死之日,亦何面目 乃愧汝家耳。吾爲 何 可負荷忠臣之業

邪 其利,以爲富貴哉!又絲枲紡織,婦人之務,上自王后,下至大夫士妻,各有所製。若墮業 乎?今此秩俸,乃是天子報爾先人之徇命也。當須散贍六姻,爲先君之惠,妻子奈 ?」答曰:「嗚呼!汝年已長,吾謂汝知天下之理,今聞此言,故猶未也。 母 恒自紡績,夜分而寐。 善果曰:「兒封侯開國,位居三品,秩俸幸足,母 至於公事 何 自勤 ,何 何 如是 獨 由 擅 濟

端居、未嘗輒 賜所得,雖親族禮遺,悉不許入門。 自初寡,便不御脂粉,常服大練。性又節儉,非祭祀賓客之事,酒肉不妄陳於前。 出門閣。 內外姻戚有吉凶事,但厚加贈遺,皆不詣其家。非自手作及莊園祿 靜室

者,是爲驕逸。吾雖不知禮,其可自敗名乎。」

僚佐。 其母卒後,善果爲大理卿,漸驕姿,清公平允遂不如疇昔焉。 善果歷任州郡,唯內自出饌,於衙中食之,公廨所供,皆不許受,悉用修治廨宇及分給 善果亦由此克己,號爲清吏。 煬帝遣御史大夫張衡勞之,考爲天下最。徵授光祿卿

孝女王舜

謀殺子春。 孝 女王舜者,趙郡王子春之女也。 舜時年七歲,有二妹,繁年五歲,蹯年二歲,並孤苦,寄食親戚。 子春 與從兄長忻不協, 屬齊滅之際,長忻與其妻同 舜撫育二妹,恩

列

傳

詣 其二妹曰 義甚 何?」二妹皆垂 !縣請罪,姊妹爭爲謀首,州縣不能決。 一篤。 :「我無 而 舜 泣 陰 日:「唯姊所 兄弟,致使父讎不復。 有復讎之心,長忻殊不爲備。姊妹俱長,親戚欲嫁之,輒拒不從。 命。」是夜,姊妹各持刀踰牆而 吾輩雖是女子, 高祖 聞而嘉歎,特原其罪 何用 入,手殺長忻夫妻,以告父墓 生爲? 我欲 共汝報復, 汝意 乃密謂 一。因 如

韓覬妻

聞 家,絕不來 |隆 感行路。 腴,家門鼎盛,而動遵禮度,躬自儉約,宗黨敬之。年十八,覬從軍戰沒,于氏哀毀骨立,慟 令家人敦喻,于氏晝夜涕泣,截髮自誓。其父喟然傷感,遂不奪其志焉。 而 爲嗣,身自 嘉歎,下 韓覬妻者,洛陽于氏女也,字茂德。父實,周大左輔。 每至朝夕奠祭,皆手自捧持。 往。 部褒美,表其門閭,長安中號爲節婦闕。 撫育,愛同已生,訓導有方,卒能成立。 有尊卑就省謁者,送迎皆不出戶庭。 及免喪,其父以其幼少無子,將嫁之。 自孀居已後,唯時或歸寧,至於親族之 蔬食布衣,不聽聲樂,以此終身。 終于家,年七十二。 于氏年十四,適于覬。 因養夫之孽子世 誓無異志。復 雖生長 高祖 膏

陸讓母

冤,上復令治書侍御史撫按之,狀不易前。乃命公卿百僚議之,咸曰「讓罪當死」。 數有聚斂, 陸讓母者,上黨馮氏女也。 贓貨狼籍, 爲司馬所奏。 性仁愛, 上遣使按之皆驗, 有母儀, 讓即其擊子也。 於 是 囚 詣 仁壽中, 長安, 親 爲番州刺史, 臨 問 韶 河其 讓 稱

馮者 侍御 勸讓 段。」集諸命婦,與馮相識,以寵異之。 憲章,宜從極法,躬自詣闕,爲之請命, 風俗。 朱雀門,遣舍人宣詔曰:「馮氏以嫡母之德,足爲世範,慈愛之道,義感人神,特宜矜免,用獎 愍汝,何故治書覆汝。豈誠臣。豈孝子。不誠不孝,何以爲人!」於是流涕嗚咽,親持盂 鴻 .恩,而反違犯憲章,贓貨狼籍。 若言司馬誣汝,百姓百官不應亦皆誣汝。 令食。 ,豈不閨門雍睦, .史柳彧進曰:「馮氏母德之至,有感行路。 讓 將就刑,馮氏蓬頭垢面詣朝堂數讓曰:「無汗馬之勞,致位刺史,不能盡誠奉國,以答 讓可減死,除名爲民。」 旣而上表求哀,詞情甚切,上愍然爲之改容。獻皇后甚奇其意,致請於上。治書 風俗 和 李 復下 Ŷ 朕每嘉歎不能已。 ·詔曰:「馮氏體備仁慈,夙閑禮度。 匍匐 「頓顙 如或殺之,何以爲勸。」上於是集京城士庶於 **朕哀其義**, 宜摽揚優賞,用章有德。 特免死辜。 摩||譲 使天下婦人皆如 非其所生,往犯 若言至尊不憐 可賜 物五百 粥

劉昶女

辮 年 妃 毎韝鷹紲 能 主 不 老,奉養甚薄。 頭 與高 反縛,籧篨上作獠儛。」取公卿子弟膂力雄健者,輒將至家,以車輪括其頸而 ,莫敢與校者。 屈者,稱爲壯士,釋而 劉 一般女者,河南長孫氏之婦也。
一般在周,尚公主,官至柱國、彭國公,數爲將帥,位望隆 犬,連騎道中,毆擊路人,多所侵奪。 祖有舊。 其女時寡居,哀昶如此,每歸寧于家,躬勤紡績,以致其甘脆。 及受禪、甚親任、歷左武衞大將軍、慶州總管。其子居士、爲太子千牛備 其女則居士之姊也,每垂泣誨之,殷勤墾惻。 與交。 黨與三百人,其趫捷者號爲餓鶻隊,武力者號爲蓬轉隊。 長安市里無貴賤, 見之者皆辟易,至於公卿 居士不 改,至破 棒之。殆死 家 昶

當 持、詣大理餉其父。見獄卒、長跪以進、歔欷嗚咽、見者傷之。居士坐斬、昶竟賜死于家。詔百 與,治之甚急。 復如 有人告居士與其徒遊長安城,登故未央殿基,南向坐,前後列隊,意有不遜,每 《何。〕昶猶恃舊恩,不自引咎,直前曰:「黑白在于至尊。」 上大怒,下昶獄,捕居士黨 死耳。」又時有人言居士遣使引突厥令南寇,當於京師應之。上謂昶曰:「今日之事, 憲司又奏昶事母不孝。 其女知昶必不免,不食者數日,每親調飲 食,手自捧 相 約日

皆 僚 不忍聞見。 :臨視。時其女絕而復蘇者數矣,公卿慰諭之。其女言父無罪,坐子以及於禍。詞情哀切,人 遂布衣蔬食以终其身。 上聞而歎曰:「吾聞衰門之女,興門之男,固不虛也」

鍾士雄母

覆,每質蔣氏於都 尋爲官軍所敗。 德忘義者,我當自殺於汝前。」士雄於是遂止。蔣氏復爲書與子茂等,論以禍福。子茂不從, 在揚都,備嘗辛苦。今逢聖化,母子聚集,沒身不能上報,焉得為逆哉!汝若禽獸其心,背 而 同郡虞子茂、鍾文華等作亂,舉兵攻城,遣人召士雄,士雄將應之。蔣氏謂士雄 鍾 士雄母者,臨賀蔣氏女也。 上聞蔣氏,甚異之,封爲安樂縣君。 下。 及晉王廣平江南,以土雄在嶺表,欲以恩義致之,遣蔣氏歸臨賀。 士雄仕陳,爲伏波將軍。 曰:「我前 旣

皆守險不從叛逆,封爲密陵郡君 時 · 尹州寡婦胡氏者,不知何氏妻也。 甚有志節,爲邦族所重。當江南之亂,諷諭宗黨,

孝婦覃氏

孝婦 覃氏者,上郡鍾氏婦也。 與其夫相見未幾而夫死,時年十八。 事後姑以孝聞。 數

列

年之間,姑

及伯叔

皆相繼而死,覃氏家貧,無以葬。 於是躬自節儉,晝夜紡績,蓄財十年,而

葬八喪,爲州里所敬。 上聞而賜米百石,表其門閭

元務光母

地。 死自誓。 學,盧氏每親自教授,勖以義方,世以此稱之。 良以務光爲記室。 元務光母者,范陽盧氏女也。少好讀書,造次以禮。盛年寡居,諸子幼弱,家貧不能就 政爲人凶悍,怒甚,以燭燒其身。 及良敗,慈州刺史上官政簿籍務光之家,見盧氏,悅而逼之,盧氏以 盧氏執志彌固,竟不屈節。 仁壽末,漢王諒舉兵反,遣將綦良往山 東 略

裴倫妻

倫 已死,我 垂泣曰:「唯母所命。」柳氏遂自投于井,其女及婦相繼而下,皆重死於井中。 遇害。 裴倫妻,河東柳氏女也,少有風訓。 自念不能全汝。 柳時 年四十,有二女及兒婦三人,皆有美色。 我門風有素,義不受辱於羣賊,我將與汝等同 大業末,倫爲渭源令。屬薛舉之亂,縣城爲 柳氏]謂之曰:「我輩遭逢 死,如何?其女等皆 禍 亂 賊 所陷, 汝父

趙元楷妻

爲僕射,家富於財,重其門望,厚禮以聘之。元楷甚敬崔氏,雖在宴私,不妄言笑,進止容 趙元楷妻者,淸河崔氏之女也。父應,在文學傳。 家有素範,子女皆遵禮度。 元楷父

服,動合禮儀。

婦,終必不能。」羣賊毀裂其衣,形體悉露,縛於牀簀之上,將凌之。崔氏懼爲所辱,詐之曰: 所拘,賊請以爲妻,崔氏謂賊曰:「我士大夫女,爲僕射子妻,今日破亡,自可卽死。 「欲殺我,任加刀鋸。 · 今力已屈,當聽處分,不敢相違,請解縛。」 賊遽釋之。 化及之反也,元楷隨至河北,將歸長安。至滏口,遇盜攻掠,元楷僅以身免。崔氏爲賊 若覔死,可來相逼」」賊大怒,亂射殺之。 催因著衣,取賊佩刀,倚樹而 元楷後得殺妻者,支解之,以 遺爲賊 立日:

祭崔氏之極。

貞心峻節,志不可奪,唯義所在,考之圖史,亦何世而無哉。 史臣 曰:夫稱婦人之德,皆以柔順爲先,斯乃舉其中庸,未臻其極者也。至於明識遠圖 蘭陵主質邁寒松,南陽主心踰

列傳

第

四十

Ŧi.

列女

陽之妃,裴倫、元楷之婦,時逢艱阻,事乖好合,甘心同穴,顚沛靡它。 匪石,洗媼、孝女之忠壯,催、馮二母之誠懇,足使義勇慚其志烈, 蘭玉謝其貞芳。 志勵冰霜,言踰皎日, 襄城、華

雖詩詠|共姜之自誓,傳述|怕姫之守死,其將復何以加焉!

隋書卷八十

列傳第四十六

東夷

高麗

可越。 及壯,因從獵,所獲居多,又請殺之。其母以告朱蒙,朱蒙棄夫餘東南走。 生一 大卵,有一男子破殼而出,名曰朱蒙。 高麗之先,出自夫餘。 朱蒙曰:「我是河伯外孫,日之子也。今有難,而追兵且及,如何得渡。」於是魚鼈積 夫餘王嘗得河伯女, 因閉於室內, 為日光隨而照之, 感而遂孕, 夫餘之臣以朱蒙非人所生, 咸請殺之, 王不聽。 遇一大水,深不

至裔孫位宮,以魏正始中入寇西安平,毌丘儉拒破之。 朱蒙建國,自號高句麗,以高爲氏。 朱蒙死,子閭達嗣。 位宮玄孫之子曰昭列帝,爲慕容氏 至其孫莫來興兵、遂幷夫餘。 而成橋,朱蒙遂渡。

追騎不得濟而還。

列

傳第四十六

東夷

闕

世 所 一孫湯, 破 ,進授大將軍,改封 》 逐 Í 入丸都,焚其宮室,大掠而還。 在周 遣 使朝貢, 高麗王。 武帝拜湯上開府、 昭列帝後爲百濟所殺。 遼東郡公、 遼東王。 其會孫 高祖受禪 璉,遣使後魏。 湯復遣 使詣 | 連六

歲遣使朝貢不絕

繏。 次 十人共細布一匹。 息。 取 以 每 則 反拱,行 浿 償 ·男女相悅,然卽爲之,男家送猪酒而已,無財聘之禮。 水 年初,聚戲於頂水之上,王乘腰輿,列羽儀以觀之。 事畢,王以衣服入水,分左右爲二部, (小使者,次褥奢,次翳屬,次仙人,凡十二等。復有內評、外評、五部褥薩。人皆皮冠,使 水。 加插鳥羽。 一倍。 兵器 石 官有太大兄,次大兄,次小兄,次對盧,次意侯奢,回次烏拙,次太大使者, 其 相 復 或 必搖 濺擲,諠呼馳逐,再三而止。 有 東 與中國略同。 用刑旣峻,罕有犯者。樂有五絃、琴、筝、篳篥、橫吹、簫、鼓之屬,吹蘆以和 或 西二千里,南北千餘里。 手。性 貴者冠用紫羅 內城、漢城,並其都會之所,其 租戶一石,次七斗,下五斗。反逆者縛之於柱,爇而斬之,籍沒其家。 多詭伏。 每春秋校獵,王親臨之。人稅布五匹,穀五石。遊人則三年一稅, ,飾以金銀。 服大袖衫,大口袴,素皮帶,黃革屨。 父子同 川而 都於平壤城,亦曰長安城,東西六里,隨山 俗好蹲踞,潔淨自喜,以趨走爲敬,拜則 浴,共室 國中呼爲「三京」。 一而寢。 或有受財者,人共恥之。 婦 人淫 一奔,俗多遊 與新羅每相 女。 侵 曳一脚,立各 婦人裙襦加 (奪) 戰 屈曲, 次大使者, 有婚嫁者, 死者殯於 爭不 南臨 曲。

作樂以送之。 屋內,經三年,擇吉日而葬。居父母及夫之喪,服皆三年,兄弟三月。初終哭泣,葬則鼓儛 埋訖,悉取死者生時服玩車馬置於墓側,會葬者爭取而去。敬鬼神,多淫祠。

開皇初,頻有使入朝。及平陳之後,湯大懼,治兵積穀,爲守拒之策。十七年,上賜湯

墾書日:

察?又數遣馬騎,殺害邊人,屢騁姦謀,動作邪說,心在不賓。 空館、嚴加防守、使其閉目塞耳,永無聞見。 有何陰惡, 弗欲人知, 禁制官司, 畏其訪 臧,恐有外聞,故爲盜竊?時命使者,撫慰王藩,本欲問彼人情,敎彼政術。王乃坐之 之,自可聞奏。 諸藩頓顙,爲我臣妾,忿善人之慕義,何毒害之情深乎。 太府工人,其數不少,王必須 人,歲常朝貢,雖稱藩附,誠節未盡。王旣人臣,須同朕德,而乃驅逼靺鞨,固禁契丹。 朕受天命,愛育率土,委王海隅,宣揚朝化,欲使圓首方足各遂其心。王每遣使 昔年潛行財貨,利動小人,私將弩手逃竄下國。 豈非修理兵器,意欲不

貴,實稱朕心。彼之一方,雖地狹人少,然普天之下,皆爲朕臣。今若黜王,不可虛置, 寬恕,今日以後,必須改革。守藩臣之節,奉朝正之典,自化爾藩,勿忤他國,則長享富 自猜疑、常遣使人密覘消息、純臣之義豈若是也。蓋當由朕訓導不明、王之愆違、一已 朕於蒼生悉如赤子,賜王土宇,授王官爵,深恩殊澤,彰著遐邇。 王專懷不信,恒

列

也? 忽加兵,自餘藩國謂朕何也!王必虛心納朕此意,愼勿疑惑,更懷異圖 須 昔帝王作法,仁信爲先,有善必賞,有惡必罰,四海之內,具聞朕旨。 更選官屬,就彼安撫。 王若洒心易行,率由憲章,即是朕之良臣,何勞別遣才彥 王若無罪,朕

致悲 謂遼水之廣 待多力 不盈旬月,兵騎不過數千。 年,彼則恃長江之外,聚一隅之衆,惛狂驕傲,不從朕言。 傷 往 · 者陳叔寶代在江陰,殘害人庶,驚動我烽侯,抄掠我邊境。 ,黜陟幽明,有司是職,罪王不爲陳滅,賞王不爲陳存 慇懃曉示,許王自新耳。 何如長江?高麗之人多少陳國? 歷代逋寇,一朝淸蕩,遐邇乂安,人神胥悅。 子元嗣立。 宜得朕懷,自求多福 高祖使使拜元爲上開府、儀同三司,襲爵遼 朕若不存含育, 故命將出師,除彼 ",樂禍 責王前愆,命一 **朕前後誡勑,經歷十** 好亂,何爲 聞 王歎 凶逆,來往 爾 將軍,何 也 恨, 王 獨

湯 東 郡公,賜衣一襲。 得書惶恐,將奉表陳謝,會病卒。 元奉表謝恩,并賀祥瑞,因請封王。 高祖優册元為王

不振。 爲元 帥,總水陸討之,下詔黜其爵位。 明年,元率靺鞨之衆萬餘騎寇遼西,營州總管韋沖擊走之。 及次遼水、元亦惶懼、遣使謝罪、上表稱「遼東糞土臣元」云云。 時飽運不繼,六軍乏食,師出臨渝關,復遇疾疫,王師 高祖聞而大怒, 上於是罷兵,待之如 命漢王諒

初,元亦歲遣朝貢。

卽宜 禦亦備,隨出拒戰。 下。高麗率兵出拒,戰多不利,於是皆嬰城固守。 禮 頗 煬帝 「無納,不得縱兵。」城將陷,賊輒言請降,諸將奉旨不敢赴機,先令馳奏。 闕 大業七年,帝將討元之罪,車駕渡遼水,上營於遼東城, 嗣位,天下全盛,高昌王、突厥啓人可汗並親詣闕貢獻, 如此者再三,帝不悟。 由是食盡師老,轉輸不繼,諸軍多敗績,於是班 帝令諸軍攻之,又勑諸將「高麗若降者, 於是徵元入朝。 分道出師 各頓 比報至,賊守 兵於其城 元懼

師。 是行也,唯於遼水西拔賊武厲邏,置遼東郡及通定鎭而還。 九 (年)帝復親征之,乃勑諸軍以便宜從事。 諸將分道攻城,賊勢日蹙。 會楊玄感作亂

至京 困 軍多敗。 反書至,帝大懼,卽日六軍並還。兵部侍郎斛斯政亡入高麗,高麗具知事實,悉銳來追,殿 盛弊, 遣: 師 以高麗使者親告於 使乞降,囚送斛斯 十年,又發天下兵,會盜 太廟,因拘留之。 政以贖罪。 一賊蜂起,人多流亡,所在阻 帝許之,頓於懷遠鎭 仍徵元入朝,元竟不至。 一絕,軍 ,受其降款。 多失期。 帝勑諸軍嚴裝,更圖 仍以俘囚 至 遼水,高麗亦 軍實歸

百濟

後舉,會天下大亂,遂不克復行

百濟之先, 出自高 麗 國 共國王有一 侍婢,忽懷孕,王欲殺之。 婢云:「有物狀如雞子,

列

海 明。 爲 始 來 立 感 因 開 其 及 於 號 府 國于帶方故地。 我 長 百濟。 门高 故 、帶方郡公、百濟 麗 有 歷十餘代,代臣 王忌之,東明懼,逃至 娠 也。」王捨之。後遂生一男,棄之廁溷,久而 漢 遼 王 東 中國,前史載之詳矣。 太守公孫度 一淹水, 夫餘人共奉之。東明 以女妻之,漸以 開皇初, 昌盛,為東 不死,以 其王餘昌遣使貢方物, 之後,有仇台者,篤 爲 夷 神,命養之,名曰東 强 國 初 以 於仁信, 百 拜昌 家 濟

氏、木氏 六品 武, 羅 地 則 部、部有五巷、士人居焉。五方各有方領一人、方佐貳之。方有十郡、郡有將。其人雜 、高麗、倭等,GB 亦有中國人。其衣服與高麗略同。婦人不加粉黛,女辮髮垂後,已出 爲 分為 ·次固德,赤帶;次李德,[8] 青帶;次對德以下,皆黃帶;次文督,[8] 次武督,次佐軍,次振 次剋虞,皆用白帶。其冠 敬 其 長日 行 或 兩道、盤於頭上。俗尙騎射、讀書史、能夷事、亦知醫藥、蓍龜、占相之術。 、首氏。行婚娶之禮,略同於華。 宋元 東西 有 左平,「三次大率,次恩率,次德率,次杆率,次奈率,次將德,服紫帶;次施德,皂 僧尼,多寺塔。 嘉曆,以建寅月爲 四 百五 一十里,南北 有鼓角、箜篌、筝、竿、箎、笛之樂,投壺、圍棊、樗蒲、握槊、弄 (制並同,唯奈率以上飾以銀花。長史三年一交代。 九百餘里,南接新羅,北拒高 歲首。 國 喪制 中 大姓 如高麗。 有 八族, 有 五穀、牛、猪、雞,多不火食。 沙氏、燕氏、刕氏、解氏、貞氏、國 麗。 其都曰居拔城。 畿內為 以 兩 官有十 有 手 據 新 嫁 厥 珠

城,歲四祠之。 田 下濕,人皆山居。 國西南人島居者十五所,皆有城邑。 有巨栗。 每以四仲之月,王祭天及五帝之神。 立其始祖仇台廟於 國

傷損。 奉表賀平陳。 平陳之歲,有一戰船漂至海東鄉牟羅國,其船得還,經于百濟,昌資送之甚厚,幷遣使 百濟王心迹淳至, 朕已委知。相去雖遠, 事同言面, 何必數遣使來相體悉。 高祖善之,下詔曰:「百濟王旣聞平陳,遠令奉表,往復至難,若逢風浪,便致 自今以

後,不須年別入貢,朕亦不遣使往,王宜知之。」使者舞蹈而去。

詔日 之,不可致伐。」厚其使而遣之。 : 「往歲爲|高麗不供職貢,無人臣禮,故命將討之。 開皇十八年,昌使其長史王辯那來獻方物,屬興遼東之役,遣使奉表,請爲軍導。帝下 高麗頗知其事,以兵侵掠其境。 高元君臣恐懼,畏服歸罪,朕已赦

昌死,子餘宜立,死,子餘璋立。

水請| 嚴兵於境, 令覘高麗 軍 大業三年,璋遣使者燕文進朝貢。 期 動靜。 聲言助軍,實持兩端。 帝大悅,厚加賞錫,遣尚書起部郎席律詣百濟, 然璋內與高麗通 和, 尋與新羅有隙,每相戰爭。 挾詐以窺 其年,又遣使者王孝鄰入獻,請討高麗。 中 國。 七年, 與相 帝親征高麗,璋使其臣 十年,復遣使朝貢。 知 o 明年,六軍渡遼,璋亦 煬帝許之, 後天下 國 智牟

亂,使命遂

絕

— 八二〇

其 南 海 行三月 ,有<u></u>
納牟羅國,南北千餘里,東西數百里,土多麞鹿,附庸於百濟。 百濟

自西行三日,至貊國云。

新羅

其後復 不堪 高 新 歸故 祖 羅 其王本百濟人,自海逃入新羅,遂王其國。 拜眞平爲上開府、樂浪郡公、新羅王。其先附庸於百濟,後因百濟征高麗,高麗人 國,在高麗東南,居漢時樂浪之地,或稱斯羅 國, 留者遂為新羅焉。 故其人雜有華夏、高麗、百濟之屬, 傳祚至金眞平,開皇十四年,遣使貢方 o 魏將毌丘儉討高麗,破之,奔沃沮 \mathbb{Z} 兼有沃沮、不耐

會, 烽、戍 聚羣官詳議而定之。 次 阿尺干, 班 其官 一戎役,相率歸之,遂致强盛,因襲百濟附庸於迦羅國。 邏 賚羣官。 次大鳥,次小鳥,次造位。 俱 有十七等:其一日伊罰干,貴 次乙吉干, 次沙 有 屯管部伍。[10] 其 日 拜月 服色尙素。 月 神 咄干,次及 風俗、刑政、衣服, o 至八月十五 外有郡 婦人辮髮繞頭,以雜綵及珠爲飾。 《伏干, 如相國,次伊尺干,次迎干,次破彌干,次大阿尺干, 縣。 日 其文字、甲兵同於 次大奈摩干,次奈摩,次大舍,次小舍, 設樂, 略與高麗、百濟 令官 人射,賞 、中國。 同。 以馬布。 毎 婚嫁之禮,唯 選 正 月 人壯健者悉入軍, 且 其 相 有 賀,王設宴 :大事 酒 食 則 而

朝貢。 喪,持 已,輕重隨貧富。 服一年。 新羅地多山險,雖與百濟構隙,百濟亦不能圖之。 田甚良沃,水陸兼種。 新婚之夕,女先拜舅姑,次即拜夫。 其五穀、果菜、鳥獸物產,略與華同。 死有棺斂,葬起墳陵。 大業以來,歲遣 王及父母妻子

靺鞨

涅以東,矢皆石鏃,即古之肅愼氏也。所居多依山水,渠帥曰大莫弗瞞咄,東夷中爲强國 骨部,在伯咄東北。其四曰拂涅部,在伯咄東。其五曰號室部,在拂涅東。其六曰黑水部, 嚼 居,開口向上,以梯出入。 在安車骨西北。 接,勝兵數千,多驍武,每寇高麗中。其二曰伯咄部,在栗末之北,勝兵七千。其三曰安庫 有徒太山者,俗甚敬畏,上有熊羆豹狼,皆不害人,人亦不敢殺。 而 (米爲酒, 飲之亦醉。婦人服布, 男子衣猪狗皮。 妬,其妻外婬,人有告其夫者,夫輒殺妻,殺而後悔,必殺告者,由是姦婬之事終不發 靺鞨,在高麗之北,邑落俱有酋長,不相總一。凡有七種:其一號栗末部,四月與高麗相 人皆射獵爲業,角弓長三尺,箭長尺有二寸。常以七八月造毒藥,傅矢以射禽獸,中者 其七日白山部,在栗末東南。 相與偶耕、土多粟麥穄。 勝兵並不過三千,而黑水部尤爲勁健。 俗以溺洗 水氣鹹,生鹽於木皮之上。 手面,於諸夷最爲 地卑濕,築土如堤,鑿穴以 不潔。 其畜多猪 其俗 自拂

列

傳第四

+

六

東

夷

立死。

輒相 來朝 隔,唯粟末、白山 折多戰鬭 懷。 相劫掠。 攻擊,甚乖 拜。 股視 開 皇初,相率遣使貢獻。 之容。 爾等如子,爾等宜敬股如父。」對曰:「臣等僻處一方,道路悠遠,聞內國有聖 旣蒙勞賜,親奉聖顏,下情不勝歡喜,願得長爲奴僕也。」其國西北與契丹相接,每 後因其使來,高祖誠之曰:「我憐念契丹與爾無異, 我意」使者謝罪。 [為近。 上顧謂侍臣曰:「 高祖韶其使曰:「朕聞彼土人庶多能勇捷,今來相見,實副朕 天地間乃有此物,常作用兵意,何其甚也!」然其國與隋懸 高祖因厚勞之, 令宴飲於前。 宜各守土境, 豈不安樂? 使者與其徒皆起舞, 一人,故 其曲 何爲

徒 邊 兵邀之,前後十餘戰,僅而得免。 以從,每 人來往。 煬帝初 有戦 與高麗戰,頻敗其衆,渠帥度地稽率其部來降。 悦中國 功, 風俗,請被冠帶,帝嘉之,賜以錦綺而褒寵之。 賞賜優厚。 十三年,從帝幸江都,尋放歸 至高陽,復沒於王須拔。 未幾,遁歸羅藝 拜爲右光祿大夫,居之柳城, 柳城。 及遼東之役,度地稽率其 在塗遇李密之亂,密遣 與

流求國

角輔 爲之, 條纖 兜, 令臣 斂 共 珠 及 冠 三重,環以流 兩 乘 有 和和 於 雑 ?,裝以珠貝,飾以赤毛,形製不同。 机 陣 不知 助之。 毛 加 下 解 相 頸 流 鏤 事 自相 、髮,然 當 以爲衣,製裁不一。 共 求 為 則 其 了,勇者 議 收 織 國 均 潤 樹立,理一村之事。 由 定之。 編紵 取 藤爲笠,飾以毛羽。 稅。 形。 下 水 居海島之中,當 來 鬭 三五 垂 樹 有國 爲 死者,共聚 用 或 甲 棘爲 獄 國 刑 人 人 代數 ٠, 無 好 有 出 亦 或 枷 藩。 四 相 無 前 用 也 鎖, 常 綴 Ŧ. 而 攻擊,人皆驍 跳噪,交言相罵 熊豹皮。 王所 建安 食之, 帥 准, 毛 唯 彼 男女皆以白紵繩纏髮, ٠, 垂螺為飾 用 有刀、矟、弓、箭、劍、鈹之屬。 土人呼之爲 郡 居舍,其大一十六間 皆 統 繩 東,水行 仍 臨 諸洞、洞 縛 婦人以羅紋白布爲帽,其形 王乘木獸, 以 事 健善走, 髑 科 決死 ^一雜色相間,下垂小貝,其聲 为 因 決。 髏將 五日 有小王。 可老羊, 刑 相 向王 犯 撃射 令左右輿之而行,導從不過數十人。 難死 以 而 罪皆 鐵 至。 所 ·; 琱 妻曰 錐 而 往往有村, 從項後盤繞至 斷 ,大如筯,長尺餘,鑽頂而 如 土 耐創。 刻 於 王 其不 多拔 多 禽獸。 鳥 則 Щ 其處少鐵,刃皆薄小,多以骨 賜 了 勝,一 茶。 洞。 諸 正方。 之以 帥; 村有 洞 多鬭 所 其王姓歡斯氏, 各爲部隊,不相救助。 不伏 軍皆走,遣 額 冠, 一如珮 鳥 居 織鬭鏤皮幷雜色紵 0 鏤樹,似 了帥 日 使爲 り則 其男子用鳥 o 波羅 綴鐺 T,並以² Ŀ 隊 請 人致 橘 檀 殺之。 帥 施釧 於王 洞 而 **沙善戰者** 名渴 入謝,即 葉密, 羽 塹 無 懸 賦 爲 棚 刺

罪

甪

杖。

俗

無文字

,

望月

虧

盈

以紀時節,候草藥枯以爲年歲。

境風俗· 相弔。 蹄,一人唱,衆皆和,音頗哀怨。 娉,或男女相悅,便相匹偶。 子 凡 木槽中暴海水爲鹽,木汁爲酢,釀米麫爲酒,其味甚薄。 拔 有宴會,執酒者必待呼 去 人 浴其屍,以布帛纏之,裹以葦草,親土而殯,上不起墳。 一髭鬢, 深 少異,人有死者,邑里共食之。 目長 身上有毛之處皆亦除去。 (鼻)頗類於胡,亦有小慧。 名而後飲。 婦人產乳,必食子衣,產後以火自灸,令汗出,五日便平復。以 扶女子上膊,搖 上王酒者, 亦呼王名。 婦人以墨黥手,爲蟲蛇之文。嫁娶以酒肴 無君臣上下之節,拜伏之禮。父子同牀而寢。男 手而舞。 其死者氣將絕,舉至庭,親賓哭泣 食皆用手。 銜杯共飲, 頗同突厥。 子爲父者,數月不食肉。 偶得異味,先進尊者。 珠貝 歌 呼蹋 南

樟、松、楩、楠、杉、梓、竹、籐、果、薬同於江表、風土氣候與嶺南相類 爲刃,長尺餘,闊數寸,而墾之。 有熊羆豺狼,尤多猪雞,無牛羊驢馬。厥田良沃,先以火燒而引水灌之。持一插,以石 土宜稻、粱、床黍、麻、豆、赤豆、胡豆、黑豆等,木有楓、栝、

於樹上,以箭射之,或累石繫幡以爲神主。王之所居,壁下多聚髑髏以爲佳。人間門戶上 俗 事山海之神,祭以酒肴,鬭戰殺人,便將所殺人祭其神。或依茂樹起小屋,或懸髑髏

大業元年,海師何蠻等,每春秋二時,天清風靜,東望依希,似有煙霧之氣,亦不知幾千

安獸

頭骨角。

至高 之曰:「此夷邪久國人所用也。」帝遣武賁郎將陳稜、朝請大夫張鎭州率兵自義安浮海擊之。 其男女數千人,載軍實而還。 解其語 通,掠一人而 三年,煬帝令羽騎尉朱寬入海求訪異俗,何蠻言之,遂與蠻俱往,因到流求國。言不相 華嶼,又東行二日至鼅鼊嶼,又一日便至流求。 遣 人慰諭之,流求不從,拒逆官軍。 返。 明年,帝復令寬慰撫之,流求不從,寬取其布甲而還。 自爾遂絕。 |稜擊走之,進至其都,頻戰皆敗,焚其宮室,虜 初,稜將南方諸國人從軍,有崐崘人頗 時倭國使來朝,見

倭國

十餘 使朝貢、謂之倭奴國。桓、靈之間,其國大亂,遞相攻伐,歷年無主。 海。 並一萬二千里,在會稽之東,與儋耳相近。 有男子二人給王飲食,通傳言語。 鬼道惑衆,於是國人共立爲王。 其地勢東高西下。 國,皆自稱王。 倭國,在百濟、新羅東南,水陸三千里,於大海之中依山島而居。 夷人不知里數,但計以日。其國境東西五 都於邪靡堆,則魏志所謂邪馬臺者也。 有男弟,佐卑願理國。其王有侍婢千人,罕有見其面者,唯 其王有宮室樓觀,城栅皆持兵守衞,爲法甚嚴。 漢光武時, 遣使入朝, 自稱大夫。 一月行, 古云 有女子名卑彌呼,能以 去樂浪郡境及 南北三月行, 魏時,譯通中國。 安帝時,又遣 自魏至 帶方郡 各至於

列

丁齊、梁、代與中國相通。

飾。 袖 弟。 奏其國樂。 弓、矢、刀、矟、弩、穳、斧,漆皮爲甲,骨爲矢鏑。 義,次大 相 國 利 風 牧宰。 微 連 歌 俗 婦 小 而 彌 高 開 履 無縫。 多弗 祖 皇二十年,倭王姓阿每,字多利思比孤,三三號阿輩雞彌,遣使詣闕。上令所司訪其 人束髮於後,亦衣 使者言倭王以天爲兄,以日爲弟,天未明時出聽政,跏趺 禮,次小禮,次大智,次小智,次大信,次小信,員無定數。 八十戶置 曰:「此太無義理。」於是訓令改之。 如 戶可十萬 利。 屨形,漆其上,繫之於 頭亦 無城郭。 無冠,但垂髮於 一伊尼翼, 裙襦,裳皆 內官有十二等:一 如今里長 脚。 兩耳上。 「有襈。 人庶 也。 **攕竹爲** 至隋,其王始制冠,以錦綵爲之,以金銀 日大德,次小德,次大仁,次小仁,次 多跣足。 十伊尼翼屬一軍 王妻號雞彌,後宮有女六七百人。名太子爲 雖有兵、無征戰。 梳,編草爲薦, 不得 用金銀為 尼。 坐,日出 雜皮爲表,緣以文皮。 有軍尼一 其服 其王朝會,必陳設儀仗, 飾。 飾, 便停理務,云委我 故時衣橫幅 男子: 百二十 衣 大義,次 裙襦, ·人,猶 鏤花爲 门結束 有 其 中 小

究獄 云理曲者卽手爛。或置蛇甕中,令取之,云曲者卽螫手矣。人頗恬靜,罕爭訟,少盜賊。樂有 訟,不承引者,以木壓膝,或張强弓,以弦鋸其項。 其俗殺人强盜及姦皆死,盜者計贓酬物,無財者沒身爲奴。自餘輕重,或流或杖。 或置小石於沸湯中,令所競者探之, 毎訊

捕魚 佛 斂 不 五 有 弦 如 以 取 經 屍 "; 意 ,始有文字。 船 棺 同 , 槊、樗浦之戲。 琴、笛。 寶珠 姓 上,陸 槨 得 ·',親 ,男女相悅者卽爲婚。 百餘頭。 賓就 地 其色青, 男女多黥臂點 牽之, 屍 知 俗無盤 卜筮,尤信 歌舞,妻子兄弟以白布製服。貴人三年殯於外,庶人卜日而 氣候溫暖,草木冬青,土地膏 或以小輿。 大如 雞卵, 俎 面文身, ,藉以檞葉, 巫 婦入夫家,必先跨犬,三三乃與夫相見。 覡。 夜則 有阿 沒水 每至 有光, 蘇 Щ, 捕 食用手餔之。 正月 魚 其石 云魚眼精也。 日 無文字,唯刻 [腴,水 無故火起接天者,俗以爲異, ,必射 多陸 性質 戲飲酒, 新羅 少。 木結 道, 、百濟皆以倭爲大國,多珍 有雅 以 繩 其 小 餘節 風。 敬佛 環挂鸕鷀項,令入 婦人不淫妬。 略 女多男 法,於百濟 與 華 因行 瘞。 同 少,婚 ·禱祭。 及葬, 求得 死者 好 水 嫁 基

不悅 拜, 物, 百濟 並 兼沙門數十 謂謂 大業三年, 一敬仰 附庸於倭。 國 至 鴻 竹島 臚 之,恒通 其 卿 人 日:一日: 南 人來學佛法。」 同於 其王 倭王 使往 望納 蠻夷書有 、華夏, 多利 遣小德阿輩臺,從數百人,設儀仗,鳴鼓角來迎。 來 羅 思 國 以爲 比 經 無 其 孤遣 禮者 都 夷 或 洲 斯 書 使朝 ·,勿復 麻 目 疑 國 日日 貢。 不 以聞 逈 1出處天 能 使者曰:「聞海西菩薩天子 在 明 大 也。 海 明 子 中。 又經 年 致 書 上遣 叉 日 -|-東至 餘 沒處天子無恙」云云。 文林 國 達於 支國 郎裴清使於倭 海岸。 ,重與佛 後十日 叉至 竹斯 自竹 法, 國 又遣大禮 國 故遣 斯 。二四度 帝覽之 文 國 東 朝 以

第

74

宣諭 待大使,冀聞大國惟新之化。」清答曰:「皇帝德並二儀,澤流四海,以王慕化,故遣行人來此 國,故遣朝貢。我夷人,僻在海隅,不聞禮義,是以稽留境內,不卽相見。今故淸道飾館,以 哥多毗,從二百餘騎郊勞。旣至彼都,其王與淸相見,大悅,曰:「我聞海西有大隋,禮義之 。」旣而引淸就館。 其後清遣人謂其王曰:「朝命旣達,請卽戒塗。」於是設宴享以遣淸,

祖撫 志而 忠信,行篤敬,雖蠻貊之邦行矣。」誠哉斯言。其俗之可採者,豈徒楛矢之貢而已乎?自高 頻踐三韓之域,屢發千鈞之弩。小國懼亡,敢同困獸,兵連不戢,四海骚然,遂以土崩,喪身 遊學於京都者,往來繼路,或亡沒不歸。非先哲之遺風,其孰能致於斯也。故孔子曰:「言 感,千載不絕。今遼東諸國,或衣服參冠冕之容,或飲食有俎豆之器,好尙經術,愛樂文史, 復令使者隨淸來貢方物。 **「有周餘,惠此中國,開皇之末,方事遼左,天時不利,師遂無功。 二代承基,志包宇宙,** 夏、殷之代,時或來王。暨箕子避地朝鮮,始有八條之禁,疎而不漏,簡而可久,化之所 通其俗也。 史臣曰:廣谷大川異制,人生其間異俗,嗜欲不同,言語不通,聖人因時設敎,所以達其 九夷所居,與中夏懸隔,然天性柔順,無礦暴之風,雖縣邈山海,而易以道 此後遂絕。

外思廣地,以驕取怨,以怒興師。若此而不亡,自古未之聞也。然則四夷之戒,安可不深 奉貢、無闕於歲時,二代震而矜之,以爲人莫若己,不能懷以文德,遽動干戈。內恃富强, 滅國。兵志有之曰:「務廣德者昌,務廣地者亡。」然遼東之地,不列於郡縣久矣。諸國朝正

校勘記

念哉!

- [1] 璉六世孫湯 [湯],本書高祖紀上作「陽」。
- □□ 意侯奢 「侯」,周書異域傳作「俟」。
- [1] 左平 通典一八五作「左率」。
- 「图」李德 北史百濟傳作「季德」。
- # 次對德以下皆黃帶次文督 北史百濟傳了皆黃帶」在「次文督」下。
- 或作「倭」」「緌」或作「綏」。「俀」應是「倭」字的別體。本書場帝紀上作「倭」。本卷和他處作「俀」 其人雜有新羅高麗倭等 「倭」原作「俀」。 按:古從「委」和從「妥」的字,有時可以通用。如「桵」
- 者,今一律改爲「倭」。
- 了、七 】 首氏 「 吉 」原作 「 苗 」 「 據通典一八五改。

一八三〇

因襲百濟附庸於迦羅國 通典一八五作「因襲加羅、任那諸國滅之。」據三國史記,有金官、古

寧諸加邪國,均爲新羅所併,疑「於」字是「諸」字之訛。

「ガン 吉土」三國史記三八作「吉士」。

[10] 烽戍邏俱有屯管部伍 通典一八五]管]作「營」。

粟末 原作「栗未」,據册府九五六、新唐書黑水渤海靺鞨傳、通鑑武德四年胡注改。 下同。

多利思比孤 「比」原作「北」、據北史倭國傳、通典一八五、通鑑大業四年改。下同。

[1] 必先跨大 北史倭國傳、「犬」作「火」。

裴清 應作「裴世淸」,唐人避諱,省「世」字。

隋書卷八十二

列傳第四十七

南蠻

復詳載。大業中,南荒朝貢者十餘國,其事迹多湮滅而無聞。 謂百越是也。其俗斷髮文身,好相攻討,浸以微弱,稍屬於中國,皆列爲郡縣,同之齊人,不 南蠻雜類,與華人錯居,曰「蜒,曰)獲,曰「健,,曰「短,,俱無君長,隨山洞而居,古先所 今所存錄,四國而已。

林邑

文將兵,極得衆心。 范熊代立,死,子逸立。 林邑之先,因漢末交阯女子徵側之亂,內縣功曹子區連殺縣令,自號爲王。 文因間其子弟,或奔或徙。及逸死,國無嗣,文自立爲王。 日南人范文因亂爲逸僕隸,遂教之築宮室,造器械。 逸甚信任,使 其後范佛爲 無子,其甥

列

倳

第四十七

南鐵

晉揚威將 軍 戴 桓 所 破。 宋 交 州 刺 史 檀 和 之 將 兵 擊 之 ,深 入 其 境 。 至梁、陳,亦 通使往來。

裝刀。 尊官 冠 次 鼓以警衆,吹蠡以卽戎。 乙他 形 有二.其 其 如章甫,衣朝霞布,珠璣瓔珞,足躡 伽 有弓、箭、刀、槊,以竹爲弩,傅毒於矢。 國 崩。 延袤數千里, 一日西那婆帝,其二日薩婆地 外官 分爲二百餘部。 土多香木金寶,物產大抵 其長 革履、時復錦 官 歌。 日 弗 與交阯 樂有琴、笛、琵琶、五絃,頗與中國同 其屬官三等: 羅 , 次日 袍。 同。 一可輪, 良家子侍衞者二百許人,皆執金 以塼 其一 為城, 如 曰倫 牧宰之差也。 蜃灰: 多姓, 塗之, 次歌 王戴 倫 東 致 向 金花 毎撃

海; 對。 止 席 一,歸則 奉佛,文字同 有官者以銅甖,沉之於海口,庶人以瓦,送之於江。 日。皆以函盛屍,鼓儛導從,輿至水次,積薪焚之。 女家請一婆羅門,送女至男家,壻盥手,因牽女授之。 每有婚媾, 其 人深目高鼻,髮拳色黑。 不哭。 毎七 於天竺。 令媒者齎金銀釧、酒二壺、魚數頭至女家。 日,然香散花,復哭,盡哀而止,盡七七而罷,至百日、三年,亦 俗皆徒跣, 以幅布纏身。 男女皆截髮,隨 收 王死七日 冬月衣袍。 於是擇日,夫家 其餘骨,王則 ·而葬, 婦人椎髻。 喪至 內 金甖中,沉之於 有官者三日,庶 會親賓,歌舞相 一水次, 如 施 盡哀 椰 葉 而

高祖旣平陳,乃遣使獻方物,其後朝貢遂絕。 時天下無事,羣臣言林邑多奇寶者。

壽末 草覆 騎萬 驚駭 枚、皆鑄金爲之、蓋其有國十八葉矣。 ,上遣大將軍劉方為聽州道行軍總管,率欽州刺史甯長眞、驩州刺史李暈、開府秦雄步 餘 其上,因以兵挑之。 軍遂亂 及 犯罪者數千人擊之。 方縱兵擊之,大破之。 梵志悉衆 其王梵志率其徒乘巨象而 而陣,方與戰、僞北,梵志逐之,至坑所, 方班師,梵志復其故地,遣使謝罪,於是朝貢不絕。 頻戰輒敗, 遂棄城而走。 戰,方軍 方入其 不利。 不都,獲其 方於是多掘 其衆多陷,轉相 廟主十八 小坑,

力十

花鈴 楊後作一 國 波 而 而 不知有國近遠。 立 王 羅 坐 '毦',婦女數十人,或奏樂,或捧金花。 又飾四婦人,容飾如佛塔邊金剛力士 一之女也。居僧祗城,有門三重,相去各百許步。每門圖畫飛仙、仙人、菩薩之像,縣金 赤土 刺國,西婆羅娑國,南訶羅旦國 坐三重之榻。 門外者持兵仗,門內者執白拂。 木龕,以金銀 國,扶南之別種也。 稱其父釋王位出家爲道,傳位於利富多塞,在位十六年矣。有三妻,並 衣朝 五 香木雜鈿之。 震布,冠金花 在南海中,水行百餘日而達所都。 ,北拒大海,地方數千里。其王姓瞿曇氏,名利富多塞, 冠,垂雜 夾道垂素網,綴花。 龕後懸一金光焰,夾榻又樹二金鏡,鏡前 寶瓔珞。 四女子立侍,左右兵衞 王宮諸屋悉是重閣,北戶,北 土色多赤,因以爲號。 百餘 一之狀,夾門 並陳 金甕, 人。王 東 面

列

傅

第四

十七

南

鑾

甕前

各有

金香爐

當前置一金伏牛,牛前樹壹寶蓋,蓋左右皆有寶扇。 婆羅 門等數百

羅 東西 末帝一人, [重行 ',相向 掌刑法。 而 坐。 其官有薩陀迦羅一人,陀拏達义二人,迦利蜜迦三人,共掌政事,俱 每城置那邪迦一人,鉢帝十人。

每婚嫁 阯。 瓶,藏於 居,唯幼子 項 燒香建幡 後。 以甘蔗作酒、雜以紫瓜根 其俗等皆穿耳剪髮,無跪拜之禮。 男女通以朝霞、朝雲雜色布爲衣。豪富之室,恣意華靡,唯金鎖非王賜不得服用。 ,擇吉日,女家先期五日,作樂飲酒,父執女手以授壻,七日乃配焉。 旣娶則分財別 廟 屋。 與父同居。 吹蠡擊鼓以送之,縱火焚薪,遂落於水。 冬夏常溫,雨多霽少,種植無時,特宜稻、穄、白豆、黑麻,自餘物產多同於交 父母兄弟死則剔髮素服,就水上構竹木爲棚, 酒色黃赤,味亦香美。 以香油塗身。 貴 其俗敬佛、尤重婆羅門。 亦名 賤皆同。 椰漿為酒。 唯 國王燒訖,收灰貯 棚內積薪,以屍置上。 婦人作髻於 以 金

煬 帝即位, 募能 通 絕域者。 大業三年,屯田主事常駿、 虞 部 主事 È 君 政等請使赤土。

海 帝 達雞籠島,至於赤土之界。 有 郡 大悦,賜 洞 乘 焉。 舟,晝夜二旬,每值 駿等帛各 叉南 行,至師子石,自是島 百匹,時服 便風 其王遣婆羅門鳩摩羅以舶三十艘來迎,吹蠡擊鼓,以樂隋使,進 0 襲而 至焦石 遣。 嶼連接。 Щ 齎物五千段,以賜赤土王。 而 過, 又行二三日 東南泊 陵伽 ,西望見狼牙須國 鉢拔 多洲 其年 西 與林邑相對,上 十月,駿等自南 之山,於是南

帽之肉 赤土 邪迦 行。 王前 婆羅門以香花奏蠡鼓而送之。旣入海,見綠魚羣飛水上。 迦隨駿貢方物,幷獻金芙蓉冠、龍腦香。 駿等還館, 鏡鑷 金鎖以纜駿船。 二人導路,至王宮。、駿等奉詔書上閣,王以下皆坐。 其海水闊千餘步,色黃氣腥,舟行一日不絕,云是大魚糞也。循海北岸,達于交阯 設 國 又將象二頭,持孔雀蓋以迎使人,幷致金花、 ,金合二枚,貯香油, 百餘品 矣。 兩牀、牀上幷設草葉盤、方一丈五尺、上有黃白紫赤四色之餅、牛、羊、魚、鼈、猪、蝳 又遣婆羅門就館送食,以草葉爲盤 飲食疎薄, 延駿升牀,從者坐於地席,各以金鍾置酒,女樂迭奏,禮遺甚厚。 月餘,至其都,王遣其子那邪迦請與駿等禮見。 願爲大 金瓶八枚,貯香水, (國意 而食之。」 以鑄 白疊布 後數 金爲多羅葉,隱起成文以爲表,金函封之,令 ,其大方丈。 金盤以藉 日 四條,以 , 宣詔訖,引駿等坐,奏天竺樂。 請駿等入宴,儀衞導從 浮海十餘日,至林邑東南,並山 詔 因謂駿曰:「今是大國中人,非復 擬供 函。 先遣人送金盤,貯香花弁 使者盥洗。 男女百人奏蠡鼓,婆羅 其 如 日未 初見之禮 尋遣那邪 一。駿以 時, 事畢 闁 而 那

眞臘

六年

春與那邪迦於弘農謁,帝大悅,賜駿等物二百段,俱授秉義尉,那邪迦等官賞各有差。

眞臘 國,在 一林邑西南,本扶南之屬國也。 去日南郡舟行六十日,而南接車渠國,西有朱

列

傅

第

四

+

閣, 其帳 弟 輒以階下三稽首。 側 人行 孤落支,二曰高相 十,城有數千家,各有部帥,官名與林邑同。其王三日一聽朝,坐五香七寶牀, 子伊奢那先代立。 國 並 侍衛有千餘人,被甲持仗。 |刑殘之,或去一 :止皆持甲仗,若有征伐,因而用之。 常服白疊,以象牙爲屩。 以文木爲竿,象牙、金鈿爲壁,狀如小屋,懸金光焰,有同於赤土。前有金香鑪,二人侍 王着朝霞古貝,瞞絡腰腹,下垂至脛,頭戴金寶花冠,被眞珠瓔珞,足履革屣,耳懸金 其 主 姓刹利氏,名質多斯那。 憑,三日婆何多陵,[I]四日舍摩陵,五日髯多婁,及諸 居伊奢那城,郭下二萬餘家。 王喚上階,則跪,以兩手抱膊,遶王環坐。 指,或劓其鼻,別處供給,不得 若露髮,則不加瓔珞。臣人服製,大抵 其國與參半、朱江二國和 自其祖漸已强盛,至質多斯那,逐兼扶南而 其俗 :非王正妻子,不得爲嗣。 城中有一大堂,是王聽政之所。 仕進。 親,數 議 政事 與林邑、陀桓二國 相類。 王初立之日,所有兄 小 臣。 有五大臣,一日 去。 有之。 朝於王者, 上施寶帳 一戰 總大城三 階 爭。 [庭門 其

娶妻者,唯送衣一具,擇日遣媒人迎婦。男女二家各八日不出,晝夜燃燈不息。 手爲淨,左手爲穢。 人 呢。 形 小而 飲食多蘇酪、沙糖、秔栗、米餅。 色黑。 每旦澡洗,以楊枝淨齒, 婦 人亦有白者。 悉拳髮垂耳,性氣 讀誦經呪。 欲食之時,先取雜肉羹與餅相和 又澡洒乃食,食罷還用楊枝 捷勁。 居處器物頗類赤土。 手擩 男婚禮畢, 泛淨齒, 以右 食。

列傳第四十七 南蠻

皆七日不食,剔髮而哭,僧尼、道士、親故皆來聚會,音樂送之。以五香木燒屍,收灰以金銀 瓶盛,送于大水之內。貧者或用瓦,而以彩色畫之。亦有不焚,送屍山中,任野獸食者。 卽 與父母分財別居。父母死,小兒未婚者,以餘財與之。 若婚畢,財物入官。其喪葬,兒女

似楡 野樹 日南、 吸水上噴,高五六十尺。 如 Щ ,花似木瓜,葉似杏,實似楮,婆田羅樹,花葉實並似棗而 而厚大,實似李,其大如升。 其國北多山阜,南有水澤,地氣尤熱,無霜雪,饒瘴癘毒蠚。 九眞 相類。 異者有婆那娑樹,無花,葉似柿,實似冬瓜;菴羅樹,花葉似棗,實似李;毗 有浮胡魚,其形似鰛,嘴如鸚鵡,有八足。 自餘多同 九眞。 海中有魚名建同,四足,無鱗,其鼻如象, 小異,歌畢他樹,花似林檎,葉 土宜粱稻,少黍粟,果菜與 多大魚,半身出水,望之

畜多死,人衆疾疫。 多利,祭用人肉。其王年別殺人,以夜祀禱,亦有守衞者千人。其敬鬼如此。多奉佛法,尤 信道士,佛及道士並立像於館。 毎 五六月中,毒氣流行,卽以白豬、白牛、白羊於城西門外祠之。 近都有陵伽鉢婆山,上有神祠,每以兵五千人守衞之。 不然者,五穀不登,六 城東有神名婆

大業十二年,遣使貢獻,帝禮之甚厚,其後亦絕。

婆利

月, 殺人及盜,截其手,姦者鎖其足,春年而止。祭祀 有竅、外鋒如鋸、遠以投人、無不中。其餘兵器與中國略同。 王姓剎利邪伽,名護濫那婆。官曰獨訶邪挐,次曰獨訶氏挐。國人善投輪刀,其大如鏡,中 必設大祭。 婆利國,自交阯浮海,南過赤土、丹丹,乃至其國。 海出珊瑚。有鳥名舍利,解人語。 必以月晦,盤貯酒肴,浮之流水。每十一 國界東西四月行,南北四十五日行。 俗類眞臘,物產同於林邑。其

產,大抵相類云。 大業十二年、遣使朝貢、後遂絕。于時南荒有丹丹、盤盤二國,亦來貢方物,其風俗物

甘心遠夷、志求珍異、故師出於流求、兵加於林邑、威振殊俗、過於秦、漢遠矣。雖有荒外之 境分吳、閩,時經晉、宋,道有污隆,服叛不一。高祖受命, 實繁,代爲紛梗。 史臣曰: 禮云:「南方日蠻,有不 自秦幷二楚,漢平百越,地窮 火食者矣。」書稱:「蠻夷猾夏。」詩曰:「蠢爾蠻荆。」種類 丹徼,景極 日南,水陸可居,咸爲 克平九字,煬帝纂業,威加八荒。 郡縣。 暨乎

校勘記

[一] 亦名椰漿為酒 求是:「名」殆「以」之訛。

「三」婆何多陵「何」,御覽七八六作「阿」。

一八三九

列傳第四

十七

校勘記

隋書卷八十二

列傳第四十八

西域

校尉以相統攝。 西域遂絕。 漢氏初開西域,有三十六國,其後分立五十五王,置校尉、都護以撫納之。 至於後漢,班超所通者五十餘國,西至西海,東西四萬里,皆來朝貢,復置都護、 其後或絕或通,漢朝以爲勞弊中國,其官時廢時置。暨魏、晉之後,互相吞 王莽篡位,

滅,不可詳焉。

引致之。 得佛經,史國,得十儛女、師子皮、火鼠毛而還。帝復令聞喜公裴矩於武威、張掖間往來以 相 率而來朝者三十餘國,帝因置西域校尉以應接之。 煬帝時,遣侍御史韋節、司隸從事杜行滿使於西蕃諸國。至罽賓,得碼碯杯,王舍城, 其有君長者四十四國。 矩因其使者入朝,啗以厚利,令其轉相諷諭。 尋屬中國大亂,朝貢遂絕。 大業年中, 然事多亡

列

傳

第四十

八

西域

廥 書 卷 八 -|-

失,今所存錄者,二十國

吐谷渾

驄焉。 避 風 制,葬訖 髮,綴以珠 都伏俟城,在青海西十五里。 冰之西,南極白蘭山,數千里之地,其後遂以吐谷渾爲國氏焉。 歸 馬於其上,言得龍 其主以阜爲帽, 其患。 之將 死,若洛廆代統部落,是爲慕容氏。 吐谷渾,本遼西鮮卑徒河涉歸子也。 至,老駝預知之,則引 多氂牛、饒銅、鐵、朱砂。地兼鄯善、且末。 而 除。 貝。 性皆貪忍。 國無常稅。 妻戴金花。 種。 吐谷渾嘗得波斯草馬,放入海,因 有大麥、粟、豆。 殺人及盜馬者死,餘坐則徵物以贖罪。 其器械衣服略與中國同。 項而鳴,聚立,以口 有城郭而不居,隨逐水草。官有王公、僕射、尚書、郎中、將軍。 吐谷渾與若洛廆不協,遂西度隴,止于甘松之南,洮 初,涉歸有二子,庶長曰吐谷渾,少曰若洛廆。 青海周迴千餘里, 鼻埋沙中。 西北 有 其王公貴人多戴羃羅,婦人裙 流沙數百 生驄駒, 人 中有 見則知之, 當魏、周之際, 能 里,夏有 小山, 風俗頗同突厥。 日行千里, 熱風 以氊擁蔽 其俗至冬 故時 ,傷斃行旅 始稱可汗。 喪有服 輒 П 稱 襦 鼻而 青海 放 牝

其主呂夸,「己在周數爲邊寇,及開皇初, 以兵侵弘州。 高祖以弘州地曠人梗,因而廢

拒戰,爲賊所敗,子信死之。汶州總管梁遠以銳卒擊之,斬千餘級,奔退。俄而入寇廓州 爲大將軍,封河南王,以統降衆,自餘官賞各有差。未幾,復來寇邊,旭州刺史皮子信出兵 懼,率其親兵遠遁。其名王十三人, [三]各率部落而降。 河西總管、定城王鍾利房及其太子可博汗, 遣上柱國元諧率步騎數萬擊之。 賊悉發國中兵,自曼頭至於樹敦,甲騎不絕。 前後來拒戰。 上以其高寧王移茲裒素得衆心,拜 諧頻擊破之,俘斬甚衆。 呂夸大 其所署

州兵擊走之。

戚內 受命於天,撫育四海,望使一切生人皆以仁義相 謀率部落萬五千人戶將歸國,遣使詣闕,請兵迎接。 溥天之下,皆是朕臣妾,各爲善事,即稱朕心。 輝主旣是嵬王之父,嵬王是吐谷渾主太子,父有不是,子須陳諫。 旣不慈,子復不孝。 嵬 兵於邊吏。 王 外諷 訶爲太子。 呂夸在位百年,屢因喜怒廢其太子而殺之。 諭 秦州 必不可, 總管、河間王弘請將兵應之,上不許。 疊州刺史杜粲請因其釁而討之,上又不許。六年,鬼王訶復懼其父誅之, 朕以德訓人,何有成其惡逆也! 泣涕而道之。 人皆有情, 鬼王旣有好意,欲來投朕,朕唯敎鬼王爲臣 向。 其後太子懼見廢辱,遂謀執呂夸而降,請 必當 吾當教之以義方耳。」乃謂使者曰:「朕 上謂侍臣曰:「渾賊風俗,特異人倫,父 況父子天性,何得不相親 國語。 太子謀洩,爲其父所殺,復立其少子 不可潛謀非法,受不孝之名。 若諫而不從,當令近臣親 愛 也! 吐谷

列

第

遁逃保險,不敢爲寇。 意,不勞勸誘也。」是歲河南王移茲裒死,高祖令其弟樹歸襲統其衆。平陳之後,呂夸大懼, 子懷怖,並思歸化,自救危亡。然叛夫背父,不可收納。又其本意,正自避死,若今遣拒,又 子之法,不可遠遣兵馬,助爲惡事。」嵬王乃止。八年,其名王拓拔木彌請以千餘家歸化。 復不仁。 上曰:「溥天之下,皆曰朕臣,雖復荒遐,未識風敎,朕之撫育,俱以仁孝爲本。 若更有意信,但宜慰撫,任其自拔,不須出兵馬應接之。其妹夫及甥欲來,亦任其 渾賊惛狂,妻

便當 l伏,伏上表稱公主爲天后,上不許。 子女以實後宮乎?」竟不許。 王 日:「此非至誠,但急計耳。」 相學。 十一年,呂夸卒,子伏立。使其兄子無素奉表稱藩,幷獻方物,請以女備後庭。 一許一塞,是謂 不平。 十二年, 乃謂無素曰:「朕知渾主欲令女事朕,若依來請,他國聞之, 若並許之,又非好法。 遣刑部尚書宇文強撫慰之。 **朕情存安養,欲令遂性,豈可聚斂** 十六年, 以光化公主妻 上謂滕

請依俗尙主,上從之。 明 (年,其 、國大亂,國人殺伏,立其弟伏允爲主。 〔三〕使使陳廢立之事,幷謝專命之罪, 自是朝貢歲至,而常訪國家消息,上甚惡之。 且.

煬帝. 鐵勒遣使謝罪,請降,帝遣黃門侍郎裴矩慰撫之,諷令擊吐谷渾以自効。鐵勒許諾, 即位,伏允遣其子順來朝。 時鐵勒犯塞,帝遣將軍馮孝慈出敦煌以禦之,孝慈戰

周爲輔 允無以自資,率其徒數千騎客於党項。 四千里,南北二千里,皆爲隋有。 懼,南遁於山谷間。 平以掩之,大破其衆。伏允遁逃,部落來降者十萬餘口,六畜三十餘萬。述追之急,伏允 卽 勒兵襲吐谷渾,大敗之。伏允東走,保西平境。帝復令觀王雄出澆河、許公宇文述出西 至西平, 其部下殺洛周,順不果入而還。大業末,天下亂,伏允復其故地,屢寇河 其故地皆空,自西平臨羌城以西,且末以東,祁連以南,雪山以北,東西 置郡縣鎭戍,發天下輕罪徙居之。於是留順不之遣。 帝立順爲主,送出玉門,令統餘衆,以其大寶王尼洛

党項

右,郡縣不能禦焉

戚不哭。少而死者,則云大枉,共悲哭之。有琵琶、横吹,擊缶爲節 文字,但候草木以記歲時。三年一聚會,殺牛羊以祭天。人年八十以上死者,以爲令終,親 賦,不相往 護,南北數千里,處山谷間。 毛以爲屋。 党項羌者,三苗之後也。 |來。牧養氂牛、羊、猪以供食,不知稼穡。 服裘褐,披氊以爲上飾。 每姓別爲部落,大者五千餘騎,小者千餘騎。 其種有岩昌、白狼、皆自稱獼猴種。東接臨洮、西平,西拒葉 俗尚武力,無法令,各爲生業,有戰陣則相 其俗淫穢蒸報,於諸 織氂牛尾及粘攊 夷中最爲甚。 屯聚。 無徭 無

列

州 相 謙 內附 ",請因 、率請降,願爲臣妾,遣子弟入朝謝罪。 魏 , 授 還 周 大將軍,其部下各有差。十六年,復寇會州 師 之 以討之,高 際, 數來 擾 祖 邊。 不 許。 高 祖 開 爲丞 皇 四 相 年 高祖謂之曰:「還語爾父兄,人生須有定居,養老長 時, ·,有千餘家 中原 多故,因 歸 韶發隴西兵以討之, 化 此 五. 大爲 年,拓拔 寇 掠。 寧叢 蔣 ,大破 等各 公 梁睿 其衆 率 既平王 衆詣 叉 旭

幼。 始 叉 與 高 多 王,以鞏 國 (殺儒 昌王, 臣 號 大 大,益爲國 于 Щ 高 而乃乍還乍走,不羞鄕里邪!自是朝貢不絕。 高 立 昌國者,則漢車師前王庭也,去敦煌十三日行。 初,蠕蠕立闞伯周爲高昌王。 顧、麴嘉二 車 高昌 昔漢武帝遣兵西討,師旅頓敝,其中尤困者因住焉。 又爲高 嘉 ်ဝ 為三。 人所服。 屬焉 車 阿伏 省 人為左右長 嘉字 爲 嘉死,子堅立 至羅 挹 靈 怛 鳳, 所 所 金城 破, 史。 殺。 衆不 儒 楡 以敦煌人張 (四)伯周死, 中 又通使後 能自 人, 旣 統,請主於嘉。 立, 魏,請 孟 子義成 明為 叉 臣 內屬 主。 其境東西三百里,南北五百里,四面 立,爲從兄首歸所 于 **茹** 孟 嘉遣其第二子爲焉耆王,由是 內屬 其地 明 爲國 及茹茹主 人皆戀上, 有漢時高 人 所殺, 殺。 爲 不 昌壘,故 高 首歸 更以 願 車 東遷, 所殺 馬儒 自立 以為 相 爲 爲

欲往者 馬牧 有 其 其風俗政令與華夏略同。 事、省事。 有令尹一人,次公二人,次左右衞,次八長史,次五將軍,次八司馬,次侍郎、校郎、主簿、從 上生 積 於 雪。 其都城周迴一千八百四十步,於坐室畫魯哀公問政於孔子之像。國內有城十八。 隱 一蜜,而味甚佳。 ,尋有人畜骸骨而 此山之北,鐵勒界也。 一僻之處,以避外寇,非貴人不知其所。 大事決之於王,小事長子及公評斷,不立文記。男子胡服,婦人裙襦,頭上作髻。 出赤鹽如朱,白鹽如玉。 去。 地多石磧,氣候溫暖,穀麥再熟,宜蠶,多五果。 路中或聞歌哭之聲,行人尋之,多致亡失,蓋魑魅魍魎也。 從武威西北,有捷路,度沙磧千餘里,四 北有 多蒲陶酒。俗事天神,兼信佛法。 赤石山,山北七十里有貪汗山,至夏 面茫然,無有蹊徑。 有草名為羊刺, 國中羊 故

女,其父死,突厥令依其俗,伯雅不從者久之。 開 皇十 年,突厥破其四城,有二千人來歸中國。 突厥逼之,不得已而從。 堅死,子伯雅立。 其大母本突厥可汗

商客往來,多取伊吾路

高麗, 政,以全濟爲大。先者以國處邊荒,境連猛狄,同人無咎,被髮左衽。今大隋統 一,普天率土,莫不齊向。 煬帝嗣位,引致諸蕃。 還尙宗女華容公主。 孤旣沐浴和風,庶均大化,其庶人以上皆宜解辮削袵。」帝聞而甚 大業四年,遣使貢獻,帝待其使甚厚。 八年冬歸蕃,下令國中曰:「夫經國字人,以保存爲 明年,伯雅來朝。 御, 貴, 宇宙 因 寧邦緝 從擊

一八四七

列

傳

識 窮毁冕,翦 善之,下 量經遠,器懷 詔 爲胡 日 溫 服 彰德嘉善,聖哲所隆,顯誠遂良,典謨貽則。 裕,丹款 自我 皇隋 夙著,亮節 平 一宇宙,化偃九 遐宣。 本自 圍, 諸 華, 德加 歷 四表。 祚 光祿大夫、弁國公、高昌王伯 西 壤 伯 了,昔因 雅 踰 多難, 沙忘阻, 淪迫 奉 賮 獯 戎, 來 數 雅

之國 觀 之具,仍班製造之式。 。」然伯雅先臣鐵勒,而鐵勒恒遣 幷遣 使 人部領將 重 臣在 送。 高 被以采章,復見車服之美,棄彼氊毳,還 昌國 有商胡往來者, 則稅之送於鐵勒 爲 冠

汗女也 花,衣綾羅 有此令取悅中華,然竟畏鐵勒而不敢改也。 右 人 諸 也。 禮容於舊章,慕威儀之盛典。 米國、史國 或 康 國 並 舊 者,康居之後也。 都 居 康 以 錦 昭 於薩寶水 祁 國 繡 武 連 白 曹國 Щ 爲 疊。 姓 北昭武城,因被匈奴所破,西踰葱嶺,遂有其國。 上阿祿迪城 ,示不忘本也。 何國 其 妻有髻, 、安國、小安國 遷徙無常,不恒故地,然自漢以來相承不絕。其王本姓溫, 於是 幪 以 城多衆居。 襲纓解辮, 王字代失畢,爲人寬厚,甚得 皂 ण् 、那色波國 自是歲令使人貢其方物 丈夫翦 削 大臣三人共掌 衽 曳裾,變夷 髮錦袍。 烏那曷國 國 名 從夏,義光 事。 爲 穆國皆歸附之。 衆心。 强國 支庶各分王,故康 其王 面 索 其妻突厥 前 髮, 載。 西 域 冠 諸 可 有 達度 賜 或 七 胡律, 月氏 國 衣 多 寶 冠 金 雖 可

置於祆祠,決罰則取而斷之。 重罪者族,次重者死,賊盜截其足。

人皆深目高

鼻,多鬚髯。

善於商賈,諸夷交易多湊其國。

有大小鼓、琵琶、五絃、箜篌

笛。 溫,宜五穀,勤修園蔬,樹木滋茂。出馬、駝、騾、驢、封牛、黃金、鐃沙、聞香、阿薩那香、瑟 瑟、麖皮、氍蚝、錦疊。 婚姻喪制與突厥同。國立祖廟,以六月祭之,諸國皆來助祭。 多蒲陶酒、富家或致千石、連年不敗。 俗奉佛,爲胡書。 氣候

大業中,始遣使貢方物,後遂絕焉。

安國

位之後,遣司隸從事杜行滿使於 對,大臣三人評理 那密水南,城有五 安國,漢時安息國也。 國 重,環以流水。 事。 風俗同於康國,唯妻其姊妹,及母子遞相 王姓昭武氏,與康國王同族,字設力登。 西域,至其國,得五色鹽而 宮殿皆爲平頭。 王坐金駝座,高七八尺。 返。 禽獸,此爲異也。 妻,康國王女也。 每聽政,與 煬帝卽 金相 都在

或 「之西百餘里有畢國,可千餘家。 其國無君長,安國統之。 大業五年、遺使貢獻、後遂

絕焉。

一八五

石國

月六日、七月十五日以王父母燒餘之骨,金甕盛之;置于牀上,巡遶而行,散以花香雜果,王 俗善戰,曾貳於突厥,射匱可汗興兵滅之,令特勤甸職攝其國事。「己南去錣汗六百里,東南 率臣下設祭焉。禮終,王與夫人出就別帳,臣下以次列坐,享宴而罷。有粟麥,多良馬。其 石國,居於藥殺水,都城方十餘里。其王姓石,名涅。國城之東南立屋,置座於中,正

甸職以大業五年遣使朝貢,其後不復至。

去瓜州六千里。

女國

曰金聚,不知政事。 女國,在葱嶺之南,其國代以女爲王。王姓蘇毗,字末羯,在位二十年。女王之夫,號 國內丈夫唯以征伐爲務。山上爲城,方五六里,人有萬家。 王居九層

之樓,侍女數百人,五日一

一聽朝。

復有小女王,共知國

政。

人皆被髮,以皮爲鞋,課稅無常。 其俗貴婦人,輕丈夫,而性不妬忌。「打男女皆以彩色塗面,一日之中,或數度變改之。 氣候多寒,以射獵爲業。出鍮石、朱砂、麝香、氂牛、駿馬、

蜀馬。 人祭,或用獼猴。 肉置於瓶內而埋之。經一年,又以其皮內於鐵器埋之。俗事阿修羅神,又有樹神, 則厚斂金錢,求死者族中之賢女二人,一爲女王,次爲小王。 尤多鹽,恒將鹽向天竺興販, 祭畢,入山祝之,有一鳥如雌雉,來集掌上,破其腹而視之,有粟則年豐, 其利數倍。 亦數與天竺及党項戰爭。 貴人死, 剝取 皮,以金屑 其女王死, 歲初以 國中 和骨

開皇六年,遣使朝貢,其後遂絕。

沙

石則有災,謂之鳥卜。

焉耆

持服 南去瓜州二千二百里。 九 城, 七 焉耆國,都白山之南七十里,漢時舊國也。其王姓龍,字突騎。都城方二里。 勝兵千餘人。 日 男子剪髮。 國無綱維。 大業中,遣使貢方物。 有魚鹽清葦之利。 其俗奉佛書, 東去高昌九百里,西去龜茲九百里,皆沙磧。 類婆羅門。 婚姻之禮 有同華夏。 死者焚之, 國內有 東

龜茲

龜茲國 ,都白山之南百七十里,漢時舊國也。 其王姓白, 字蘇尼咥。 都城方六里。 勝

列

傅

餘里,東南去瓜州三千一百里。大業中,遺使貢方物。 良馬、封牛。 坐金師子座。 兵者數千。 俗殺人者死,劫賊斷其一臂,幷則一足。俗與焉耆同。王頭繫綵帶,垂之於後, 東去焉耆九百里,南去于闐千四百里,西去疏勒千五百里,西北去突厥牙六百 土多稻、栗、菽、麥,饒銅、鐵、鉛、麖皮、氍蚝、鐃沙、鹽綠、雌黃、胡粉、安息香、

疏勒

百里。 稻、粟、麻、麥、銅、鐵、錦、雌黃,〔<〕每歲常供送於突厥。 卽不育。都城方五里。國內有大城十二,小城數十,勝兵者二千人。王戴金師子冠。 五百里,西去鏺汙國千里,南去朱俱波八九百里,東北去突厥牙千餘里,東南去瓜州四千六 疏勒國,都白山南百餘里,漢時舊國也。其王字阿彌厥,手足皆六指。 大業中,遺使貢方物 南有黃河,西帶葱嶺,東去龜茲千 產子非六指者, 土多

于闐

五,小城數十,勝兵者數千人。俗奉佛,尤多僧尼,王每持齋戒。 于闐國,都葱嶺之北二百餘里。 其王姓王,字卑示閉練。 都城方八九里。 城南五十里有贊摩寺者, 國中大城有

南去女國三千里,西去朱俱波千里,北去龜茲千四百里,東北去瓜州二千八百里。 胡成佛之所。 云,若見王髮,年必儉。 云是羅漢比丘比盧旃所造,石上有辟支佛徒跣之跡。 俗無禮義,多賊盜淫縱。 土多麻、麥、粟、稻、五果,多園林,山多美玉。 王錦帽, 金鼠冠,妻戴金花。 于闐西五百里有比摩寺,云是老子化 其王髮不令人見。 東去鄯善千五百里, 大業中, 俗

鏺汗

頻遣使朝貢。

百里,西北去石國五百里,東北去突厥牙二千餘里,東去瓜州五千五百里。 兵數千人。王坐金羊牀,妻戴金花。 **鐵汗國,都葱嶺之西五百餘里,古渠搜國也。** 俗多朱砂、金、鐵。東去疏勒千里,西去蘇對沙那國 王姓昭武,字阿利柒。都城方四里。 大業中,遣使貢 勝

吐火羅

方物。

俗 奉 佛 吐火羅國,都葱嶺西五百里,與挹怛雜居。 兄弟同 妻,迭寢焉,每一人入房,戶外挂其衣以爲志。 都城方二里。 勝兵者十萬人, 生子屬其長兄。 皆習戰。 其山穴

列

八五四

中 有 消神馬, 每歲牧牝馬於穴所, 必產名駒。 南去漕國千七百里, 東去瓜州五千八百里。 大

業 中,遣使朝貢

挹 怛

業中, 遣使貢方物。 夫者、冠一角帽、夫兄弟多者、依其數爲角。 亂,突厥遣通設字詰强領其國。 挹怛 國,都烏滸水南二百餘里,大月氏之種類也。 都城方十餘里。 南去漕國千五百里,東去瓜州六千五 多寺塔、皆飾以金。 勝兵者五六千人。 兄弟 同妻。 俗善戰。 婦 百里。 先時 人有 大 或

米國

東去瓜州六千四百里。 城 方二里。 米國 都那密水西,舊康居之地也。 勝兵數百人。 大業中,頻貢方物。 西北 去康國百里,東去蘇對沙那國五百里,西南去史國二百里, 無王。 其城主姓昭武,康國王之支庶,字閉拙。

都

史國

城方二里。 波國二百里,東北去米國二百里,東去瓜州六千五百里。 史國 ,都獨莫水南十里,舊康居之地也。 勝兵千餘人。 俗同康國。 北去康國二百四十里,南去吐火羅五百里,西去那色 其王姓昭武,字逖遮,亦康國王之支庶也。 大業中,遣使貢方物。 都

曹國

康國 里。 有五尺, 高下相稱。 勝兵千餘人。 百里,西去何國 曹國,都那密水南數里,舊是康居之地也。 國中有得悉神,自西海以東諸國並敬事之。其神有金人焉,金破羅闊丈 百五十里,東去瓜州六千六百里。 每日以駝五頭、馬十匹、羊一百口祭之,常有千人食之不盡。 國無主,康國王令子烏建領之。 大業中,遣使貢方物。 都城方三 東南去

何國

千七百五十里。 方二里。 何國,都那密水南數里,舊是康居之地 勝兵千人。其王坐金羊座。 大業中,遣使貢方物。 東去曹國 也。 百五十里,西去小安國三百里,東去瓜州六 其王姓昭武,亦康國 王之族類,字敦。 都城

一八五六

烏那曷

里。 勝兵數百人。王坐金羊座。 鳥那曷國,都鳥滸水西,舊安息之地也。 東北去安國四百里,西北去穆國二百餘里,東去瓜州七千 王姓昭武,亦康國種類,字佛食。 都城方二

穆國

五百里。

大業中,遣使貢方物。

也,字阿濫密。 去波斯國 穆國, 四千餘里,東去瓜州七千七百里。 都烏滸河之西,亦安息之故地,與烏那曷爲鄰。 都城方三里。勝兵二千人。東北去安國五百里, 大業中,遣使貢方物 其王姓昭武, 東去烏那曷二百餘里,西 亦康國王之種類

波斯

異。人年三歲已上,出口錢四文。 兵二萬餘人,乘象而戰。 波斯國, 都達曷水之西蘇藺城即條支之故地也。 國無死刑,或斷手則足,沒家財,或剃去其鬚,或繫排於項,以爲標 妻其姊妹。人死者,棄屍于山,持服一月。王著金花冠, 其王字庫薩和。 都城方十餘里。 勝

綠,雌黃。 餘里,西北去拂菻四千五百里,東去瓜州萬一千七百里。 薰陸、鬱金、蘇合、青木等諸香,胡椒,畢撥,石蜜,半蜜,千年棗,附子,訶黎勒,無食子,鹽 大鳥卵,真珠,頗黎,獸魄,珊瑚,瑠璃,碼碯,水精,瑟瑟,呼洛羯,呂騰,火齊,金剛,金,銀,鍮 石,銅,鑌鐵,錫,錦疊,細布,氍蚝,毾毲,護那,越諾布,檀,金縷織成,赤麖皮,朱沙,水銀, 坐金師子座,傅金屑於鬚上以爲飾。 突厥不能至其國,亦羈縻之。波斯每遣使貢獻。 衣錦袍,加瓔珞於其上。 西去海數百里, 東去|穆國四千 土多良馬,大驢,師子,白象,

煬帝遣雲騎尉李昱使通波斯,尋遣使隨昱貢方物。

漕國

黛,安息、青木等香,石蜜,半蜜,黑鹽,阿魏,沒藥,云白附子。 王戴 華,金銀鍱爲屋,以銀爲地,祠者日有千餘人。 里。 六百里,東北去瓜州六千六百里。 金魚頭冠,坐金馬座。 勝兵者萬餘人。 漕國,在葱嶺之北,漢時罽賓國也。 國法嚴整,殺人及賊盜皆死。 土多稻、粟、豆、麥;饒象,馬,封牛,金,銀,鑌鐵,氍蚝,朱砂, 大業中,遣使貢方物。 其王姓昭武,字順達,康國王之宗族。 祠前有一 其俗淫祠。 魚脊骨,其孔中通,馬騎 葱嶺山有順 北去帆延七百里,東去封國 天神者、儀制 出 都城方四 入。 或 極

附 國

於下級開小門,從內上通,夜必關閉,以防賊盜。 里,東南千五百里,無城栅,近川谷,傍山險。 領, .至十餘丈,下至五六丈,每級丈餘,以木隔之。 土俗與附國同,言語少殊,不相統一。其人並無姓氏。附國王字宜繒。 附國 一者,蜀郡西北二千餘里,即漢之西南夷也。 俗好復讎,故壘石爲隟而居,以避其患。 國有二萬餘家,號令自王出。 基方三四步,隟上方二三步,狀似浮圖。 有嘉良夷,即其東部,所居種姓自相率 其國南北八百 嘉良夷政令 其隟

或帶 胸 甲,覆以獸皮。 兄 三聲而 m 前懸一金花,徑三寸。其土高,氣候涼,多風少雨。 亦納其妻。 大葬,其葬必集親賓,殺馬動至數十匹。 累羅 人 止。 皆 輕捷,便於擊劍。 婦人哭,必以兩 衣多毛毼皮裘,全剝牛脚皮為靴。 好歌儛,鼓簧,吹長笛。 子孫不哭,帶甲儛劍而 手掩面。 漆皮爲牟甲,弓長六尺,以竹爲弦。妻其羣母及嫂, 死家殺牛,親屬 呼云:「我父爲鬼所取, 有死者,無服制,置屍高牀之上,沐浴衣服,被 立其祖父神而 項繫鐵鎖,手 以猪酒 土宜小麥、青樑。[10]山出金、銀,多白 事 之。 貫鐵釧。 相遺,共飲噉而 我欲報冤殺鬼。」 其俗以皮爲帽,形圓 王與 瘞之。死後 帥,金爲 自餘 見弟死, 父 親 首飾, 如 十年 以牟 戚哭

雉。水有嘉魚,長四尺而鱗細。

大業四年,其王遣使素福等八人入朝。 明年,又遣其弟子宜林率嘉良夷六十人朝貢。

欲獻良馬,以路險不通,請開山道以修職貢。 煬帝以勞人不許。

嘉良 有水,闊六七十丈,附國有水,闊百餘丈,並南流,用皮爲舟而濟。

有羌:大、小左封,昔衞,葛延,白狗,向人,望族,林臺,春桑,利豆,迷桑,婢藥,大硤,白蘭 附國 南有薄緣夷,風俗亦同。 西有女國。其東北連山,縣亘數千里,接於党項。 往往

叱利摸徒,自己那縣,當迷,渠步,桑悟,千礪,並在深山窮谷,無大君長。其風俗略同於党項

或役屬吐谷渾,或附附國。

大業中,來朝貢。緣西南邊置諸道總管,以遙管之。

筆於後,或結之以重寶,或懾之以利劍,投軀萬死之地,以要一旦之功,皆由主尙來遠之名, 圖記以蕩 臣殉輕生之節。 史臣曰:自古開遠夷,通絕域,必因宏放之主,皆起好事之臣。 張騫鑿空於前,班超投 "其心, 故萬 是知上之所好,下必有甚者也。 乘親出玉門關,置伊吾、且末,而關右暨於流沙,騷然無聊生矣。 煬帝規摹宏侈,掩吞秦、漢,裴矩方進西域 若使

列

傳第

能被? 之捷, 豈及江都之禍乎! 即叙之義,固辭都護之請,返其千里之馬,不求白狼之貢,則七戎九夷,候風重譯,雖無遼東 戶口減半。 輸,將何以堪其敝哉! 北狄無虞,東夷告捷,必將修輪臺之戍,築烏壘之城,求大秦之明珠,致條支之鳥卵,往來轉 蓋不以四夷勞中國,不以無用害有用也。 隋室恃其强盛,亦狼狽於青海。[三]此皆一人失其道,故億兆罹 古者哲王之制,方五千里,務安諸夏,不事要荒。 是以秦戍五嶺,漢事三邊,或道殣相望,或 豈威 不能 其毒。 加,德不 若深思

校勘記

〔一〕呂夸 周書及北史吐谷渾傳、通典一九○作「夸呂」。

ハニン 其名王十三人 本書元諧傳作「名王十七人、公侯十三人」。

[》] 伏允 北史吐谷渾傳或作「允伏」,或作「伏允」。

、□〕蠕蠕 下文作「茹茹」,同音異譯。

 $\overline{ }$ 五 貪汗山 「汗」原作「污」,據本書突厥傳、北史高昌傳、通典一九一改。

【六〕甸職 新唐書西域傳作「匐職」。

. -L 其俗貴婦人輕丈夫而性不妬忌 原脫「貴」字,據通典一九三補 肥

[九]沒藥 原脫「沒」字,據通典一九三補。

C10〕青樑 北史附國傳作「靑稞」。

叱利摸徒 「叱」原作「北」、據通典一九〇、顧頡剛白蘭考說改。

青海 「靑」原作「淸」,據北史西域傳論、通典一九三、御覽七九二改。

隋書卷八十四

列傳第四十九

北狄

突厥

兒,而狼在其 居金山,工於鐵作。 北,下有洞穴,狼 最賢,遂爲君長,故牙門建狼頭纛,示不忘本也。 每卿肉至其所,此兒因食之,得以不死。 上,爲鄰國所滅,男女無少長盡殺之。至一兒,不忍殺,刖足斷臂,棄於大澤中。 突厥之先,平凉雜胡也,姓阿史那氏。後魏太武滅沮渠氏,阿史那以五百家奔茹茹,世 側。 入其中,遇得平壤茂草,地方二 使者將殺之,其狼若爲神所憑,歘然至於海東,止於山上。 金山狀如兜鍪,俗呼兜鍪爲「突厥」,因以爲號。 其後遂與狼交,狼有孕焉。 百餘里。 其後狼生十男,其 彼鄰國者,復令人殺此 或云,其先國於西海之 一姓阿史那氏 其山在高昌西 有一牝狼

狄 弟俟斗、三稱爲木杆可汗。 利 可汗,以兵擊鐵勒,大敗之,降五萬餘家,遂求婚於茹茹。 斬 悉歸之,抗衡中夏。 其使,率衆襲茹茹,破之。 有 阿賢設者,率部落出於穴中,世臣茹茹。 後與西魏師入侵東魏,至于太原 木杆勇而多智,遂擊茹茹,滅之,西破挹怛, 卒,弟逸可汗立,[]又破茹茹。 至大葉護,種類漸强。 茹茹主阿那瓌大怒,遣使駡之。伊 病且卒,捨其子攝圖,立其 當後魏之末,有伊利 東走契丹,北方戎

反叛 角弓 老貴 神、信巫 母 者 馬,盜者 血 及 形 淚交下,七度而 嫂。 、鳴鏑 殺 儀 壯。 其俗 及 人者皆死,淫者割 一覡,重 則 五. 其 官 畜牧爲事,隨 償 、甲、稍、刀、 月 生 有 贓十倍。 一時 兵 中,多殺羊馬以祭天。 棄護,次設特勤,次俟利發,次吐屯發,下至小官,凡二十八等,皆世 死 所經戰陣之狀。 止。 而 耻病終,大抵 劍。 逐水草,不恒厥處。穹廬氊帳,被髮左衽,食肉飲酪,身衣 於是擇 有 勢而 死者, 停屍 善騎射,性 腰斬 日 置屍馬上而焚之, 嘗 與匈 之。 殺一人,則立一石, 帳 男子好樗蒲,女子踏鞠,飲馬酪取醉,歌呼相對。 以中,家 一殘忍。 奴同 鬭 傷 人目者償之以 人親屬 無文字,刻木爲契。 取灰 多殺牛馬 而 有至千百者。 葬。 女, 而祭之,遶帳 表木爲塋,立屋 無女則 候 月將滿,輒 輸 父兄死, 婦財, 號呼, 其 爲 折支體者輸 、中、圖 以刀劃 弟妻 寇 爲 一类褐, 抄。 之。 敬鬼 女其羣 畫死 面 謀 賤

木杆在位二十年,卒,復捨其子大邏便而立其弟,是爲佗鉢可汗。佗鉢以攝圖爲爾伏可

其母 齊 圖 者,竟立菴羅爲嗣。 弟以事之;如立大邏便,我必守境,利刃長矛以相待矣。」攝圖 亦躬 周、齊爭結 俱 號沙 有 可汗子,各承父後。爾今極尊,我獨無位,何也。」沙鉢略患之,以爲阿波可汗,還領所部 統其東面,又以其弟褥但可汗子爲步離可汗,居西方。 國中相與議曰「四可汗之子,攝圖最賢。」因迎立之,號伊利俱盧設莫何始波羅 賤,衆不服。 自齋戒, 沙門惠琳,被掠入突厥中,因謂佗鉢曰:「齊國富强者,爲有佛法耳。」 沙 鉢略。 佗鉢聞 鉢略勇而得衆,北夷皆歸附之。 吾兄不親其子,委地於我。 加姆好 **遶塔行道**, 治都斤山。 而信之,建一伽藍,遺使聘于齊氏,求淨名、涅槃、華嚴等經,幷十誦律。 了傾府藏以事之。 菴羅 大邏便不得立,心不服菴羅,每遺人罵辱之。 母貴,突厥素重之。 恨不生內地。 菴羅降居獨洛水,稱第二可汗。 佗鉢益驕,每謂其下曰:「我在南兩兒常孝順,何患貧也! 我死,汝當避大邏便也。」及佗鉢卒,國中將立 及高祖受禪,待之甚薄,北夷大怨。 在位十年,病且卒,謂其子菴羅曰:「吾聞親莫過 攝圖 最後至,謂國中曰:「若立菴羅者,我當率兄 時佗鉢控弦數十萬,中國憚之, 大邏便乃請沙鉢略曰:「我與爾 長 而且 菴羅 |雄,國人皆憚,莫敢拒 不能制,因以國 遂說 以因緣果報 大邏便,以 可汗 佗

寶寧作亂 沙沙 |鉢略與之合軍,攻陷臨渝鎭。 上勑緣邊修保鄣,峻長城,以備之, 會營州刺史高 仍命 重將出

略妻,宇文氏之女,曰千金公主,自傷宗祀絕滅,每懷復隋之志,日夜言之於

鎭幽

并。

沙

鉢

沙 臨洮,上柱國李崇屯幽州,達奚長儒據周槃,皆爲虜所敗。於是縱兵自木硤、石門兩道來 鉢略。 由 .是悉衆爲寇,控弦之士四十萬。 上令柱國馮昱屯乙弗泊,蘭州總管叱李長叉守

寇,武威、天水、安定、金城、上郡、弘化、延安六畜咸盡。 天子震怒,下詔

思減一邊之防。 慮,恐齊好之深,齊氏西虞,懼周交之厚。 往者魏道衰敝,禍難相尋,周、齊抗衡,分割諸夏。 竭生民之力,供其來往,傾府庫之財,棄於沙漠,華夏之地,實爲勞擾。 謂虜意輕重,國逐安危,非徒並有大敵之憂, 突厥之虜,俱通二國。 周人東

餘。 嘗感 北,契丹之徒、同切齒磨牙,常伺其便。 北 未 **猶復劫剝烽戍,殺害吏民,無歲月而不有也。** 知)已奔北,應弦染鍔,過半不歸。且彼渠帥,其數凡五,昆季爭長,父叔相猜,外示彌 邊,朕分置軍旅,所在邀截,望其深入,一舉滅之。而遠鎭偏 心腹, 深旨,將大定之日,比戰國之時,乘昔世之驕,結今時之恨。 因 恩,資而 朕 次受天 入賊之物,加賜將士,息道路之民,務於耕織。 世行暴虐,家法殘忍。 、明命,子育萬方,愍臣下之勞,除旣往之弊。 爲賊,違天地之意,非帝王之道。節之以禮,不爲虛費,省徭薄賦 東夷諸國,盡挾私讎,西戎羣長,皆有宿 達頭前攻酒泉,其後于闐、波斯、挹怛三國一 惡積 ·禍盈,非止今日 清邊制 以爲厚斂兆庶,多惠豺狼,未 師 勝,成策在心。凶 ",逢而 近者盡其巢窟,俱犯 推剪,未 怨。 ,國用有 及南上, 醜 突厥之 愚闇,

所 時即叛。沙鉢略近趣周槃,其部內薄孤、束紇羅尋亦翻動。 破 、娑毗設 又爲紇支可汗所殺。 與其爲鄰、皆願誅剿。 部落之下、盡異純民、千種萬 往年利稽察大爲高麗、靺鞨

類,仇敵怨偶,泣血拊心,銜悲積恨。

圓首方足,皆人類也,有一於此,更切朕懷

幽 亡,人畜相半。 震,觸地火生,種類資給,惟藉水草。去歲四時,竟無雨雪,川枯蝗暴,卉木燒盡,饑疫死 朔野之追躡,望天崖而一掃。此則王恢所說,其猶射癰,何敵能當,何遠不服 撻單于之背,雲歸霧集,不可數也。東極滄海,西盡流沙,縱百勝之兵,橫萬里之衆,亘 [明合契,今也其時。故選將治兵,贏糧聚甲,義士奮發,壯夫肆憤,願取名王之首,思 彼 地咎徵妖作,年將一紀,乃獸爲人語,人作神言,云其國亡,訖而不見。 舊居之所,赤地無依,遷徙漠南,偸存晷刻。斯蓋上天所忍,驅就齊斧, 每冬雷

其擁 終 殺,無勞兵革,遠規溟海。 逸,制 抑,放聽復舊。 但皇王舊迹,北止幽都,荒遐之表,文軌所棄。得其地不可而居,得其民不忍皆 御夷狄,義在斯乎!何用侍子之朝,寧勞渭橋之拜。 廣闢邊境,嚴治關塞,使其不敢南望,永服威刑。 諸將今行,義兼含育,有降者納,有違者死。 普告海內,知股意焉 臥 異域殊方,被 鼓息烽,暫勞

於是以 沙鉢略率阿波、貪汗二可汗等來拒戰,皆敗走遁去。時虜飢甚,不能得食,於是粉骨爲糧, 河 間 王 弘、上柱國豆盧勣、竇樂定、左僕射高頗、右僕射虞慶則並爲元帥,出塞擊之。

列

又多災疫,死者極衆。

歸 略 波 所 阿波 奪 率 歸 兵而 其 ,西奔達頭可汗。 旣 衆 而 沙鉢略以阿波驍悍,忌之,因其先歸,襲擊其部,大破之,殺阿波之母。 連兵不已,各遣使詣闕,請和求援,上皆不許 而廢之,貪汗亡奔達頭。 東,其部落歸之者將十萬騎,遂與沙鉢略相攻。 達頭者,名玷厥,沙鉢略之從父也,舊爲 沙鉢略從弟地勤察別統部落,與沙鉢略有隙,復以 又有貪汗可汗,素睦於阿波,沙鉢 西面可汗。旣而大怒, 阿波還無 衆叛 遣 四

至萬 能起,且曰:「我父伯以來,不向人拜。」慶則責而喩之。 有 此 帝是婦父,即是翁,此是女夫,即是兒例。 子、伊利俱盧設莫何始波羅 請因其釁 今特別遣 好 有 世不 心 何異也 會千金公主上書, 向 斷,上天爲證,終不違負。 大臣虞慶則往彼 此 而乘之,上不許。 也。旣是沙鉢略婦翁,今日看沙鉢略共兒子不異。 一」高祖報書曰:「大隋天子貽書大突厥伊利俱盧設莫何沙鉢 請爲一 看女,復看沙鉢略也。」沙鉢略陳兵,列 沙鉢 可汗致書大隋皇帝:使人開府徐平和 子之例, 略遣使致書曰:「辰年九月十日,從天生大突厥天下賢聖天 此國 高祖遣開府徐平和使於沙鉢略。 所有羊馬,都是皇帝畜生,彼 兩境雖殊,情義是一。 千金公主私謂慶則日「可汗豺狼 旣以親舊厚意,常使之外, 其寶物,坐見慶則,稱病不 今重疊親舊,子子 至,辱告言語,具聞 有繒綵,都是此物,彼 略 晉王廣時鎭幷州, 可 汗:得書,知大 孫孫,乃 也。

羣下因相聚慟哭。 性,過與爭,將齧人。」長孫晟說諭之,攝圖辭屈,乃頓顙跪受璽書,以戴於首。旣而大慚,其 慶則 又遣稱臣,沙鉢略謂其屬曰:「何名爲臣?」報曰:「隋國稱臣,猶此

阿拔 詔 奴耳。」沙鉢略曰:「得作大隋天子奴,虞僕射之力也。」贈慶則馬千匹,幷以從妹妻之。 許 國部落乘虛掠其妻子。 時沙 |鉢略旣爲達頭所困, 叉東畏契丹, 遺使告急, 請將部落度漠南, 寄居白道川內, 有 詔晉王廣以兵援之,給以衣食,賜以車服鼓吹。 官軍爲擊阿拔,敗之,所獲悉與沙鉢略。 沙鉢略因 西擊阿波, 沙鉢略大喜,乃立約, 破擒之。 而

以磧爲界,因上表曰:

書,兼宣慈旨,仰惟恩信之著,逾久愈明,徒知負荷,不能答謝。 萬世之一聖,千年之一期,求之古昔,未始聞也。 海,上契天心,下順民望,二儀之所覆載,七曜之所照臨,莫不委質來賓,回首面內。實 大突厥伊利俱盧設始波羅莫何可汗臣攝圖言:大使尚書右僕射虞慶則至,伏奉詔 伏惟大隋皇帝之有四

戎 、夷,抗禮華夏,在於北狄,莫與爲大。 頃者氣候淸和,風雲順序,意以華夏其有大聖 突厥自天置以來,五十餘載,保有沙漠,自王蕃隅。 况今被霑德義,仁化所及,禮讓之風,自朝滿野。竊以天無二日,土無二王,伏惟 ,真皇帝也。 豈敢阻兵恃險,偷竊名號,今便<u>國慕淳</u>風,歸心有道,屈膝稽類 地過萬里,士馬億數,恒力兼

傳

一八七〇

歲貢 永為 藩 朝夕 附 恭承,唯 雖復 南瞻魏闕,山川悠遠,北面之禮,不敢廢失。 命是視。 至於削衽 一解辮, 革音從律,習俗已久, 當令侍子入朝, 未 能 改變。 回神馬 闔 國 同

千金 引見皇后,賞勞甚厚。 作君臣,便成 高 有 祖 蕭告郊廟,宜普 公主,賜姓楊氏,編之屬籍,改封大義 下詔曰:「沙鉢略稱雄漠北,多歷世 J. 無 不衡荷,不任下情欣慕之至。 一體。 情深義厚,朕甚嘉之。 頒天下,咸使知聞。」自是詔答諸 沙鉢略大悅,於是歲時貢獻不絕。 年,百蠻之大,莫過於此。 謹遣第七兒臣窟含真等奉表以 公主。 荷天之休,海外有截,豈朕薄 策拜窟含眞爲柱國,封安國公,宴於內殿, 事並不稱其名以異之。 往雖 與和, 聞 德所能 其 猶 妻 致 是二國 此 미 賀敦周 已勑

所燒,沙鉢略惡之,月餘而卒。 鉢略率部落再拜受賜。 七年正月,沙鉢略遣其子入貢方物,因請獵於恒、代之間,又許之,仍遣人賜其酒食。沙 沙鉢略一日手殺鹿十八頭,齎尾舌以獻。 上爲廢朝三日,遣太常弔祭焉。贈物五千段 還至紫河鎭,其牙帳爲火

嗣位 處羅 我 作主,令根本反同枝葉,令叔父之尊下我卑稚!又亡父之命,其可廢乎!願叔勿疑。」相 了我不憚拜汝也。」<u>雍虞闆又遣使謂處羅侯曰:「叔與我父,共根連體,我是枝葉</u>。 侯曰:「我突厥自木杆可汗以來,多以弟代兄,以庶奪嫡,失先祖之法,不相敬畏。 初, 攝圖以其子雍虞閭性愞,遺令立其弟葉護處羅侯,雍虞閭遣使迎處羅侯,將立之。 汝當

者五六,處羅侯竟立,是爲葉護可汗。 以雍虞閭 爲葉護。 遣使上表言狀, 上賜之鼓吹

幡旗。

患。 肉 助 相 多來降附, 遂生擒 今遠窮北海,皆爲臣妾,此之盛事,振古未聞,臣敢再拜上壽。」 殘,敎之蠹也。 處羅侯長頤僂背,眉目疎朗,勇而有謀,以隋所賜旗鼓西征阿波。敵人以爲得隋兵所 存養以示寬大。」上曰:「善。」與因奉觴進曰:「自軒轅以來,獯粥多爲邊 阿波。 旣而上書請阿波死生之命,上下其議。 左僕射高頻進日

虞閭 邊置市,與中國貿易,詔許之。 康國公。 强盛,都藍忌而擊之,斬首於陣。其年,遣其母弟縟但特勤獻于闐玉杖,上拜褥但爲柱國、 與宇文氏謀反,令大義公主發兵擾邊。 遣使詣闕,賜物三千段。 其後處羅侯又西征,中流矢而卒。 明年,突厥部落大人相率遣使貢馬萬匹,羊二萬口,駝、牛各五百頭。 每歲遣使朝貢。時有流人楊欽亡入突厥 其衆奉雍虞閭爲主,是爲頡伽施多那都藍 都藍執欽以聞,并貢葧布、魚膠。 中,謬云彭國公劉昶 其弟欽羽設部落 尋遣使請緣 可汗。

辭曰「盛衰等朝暮,世道若浮萍。 盃酒恒無樂,弦歌詎有聲!余本皇家子,飄流入虜庭。 平陳之後,上以陳叔寶屛風賜大義公主,主心恒不平,因書屛風爲詩,敍陳亡自寄。其 榮華實難守,池臺終自平。富貴今何在? 一朝覩成敗,懷抱忽縱橫。 空事 寫丹青。

列傳

第四十九

北狄

厥 如 泥 此 非非 利 可汗連結,上恐其爲變,將圖之。 我獨申名。 唯有明君曲,偏傷遠嫁情。」上聞而惡之, 會主與所從胡私通,因發其事,下詔廢黜之。 禮賜益薄。公主復與西面突 恐都

遣 藍 使求婚。上令裴矩謂之曰:「當殺大義主者,方許婚。」突利以爲然,「も〕復譖之,都藍因發 不從,遣奇章公牛弘將美妓四人以啗之。 時沙鉢略子曰染干、「私」號突利可汗,居北方,

遂殺公主於帳。 都藍與達頭 可汗有隙,數相征伐,上和解之,各引 兵而 去

于_! 本居北 染干辭直,上乃厚待之。 河、入蔚州 出 元 夷,故特厚 靈州 帥,左僕射高頌率將軍王營、上柱國 於是朝貢遂絕, 十七年, 方,以尚主之故,南徙度斤舊鎮,錫賚優厚。 上柱國燕榮出 其 染干夜以五 禮,遣牛弘、蘇威、 突利 遣使來逆女, 數爲 幽 州,以擊之。 騎與隋使長孫晟 雍虞閭弟都速六棄其妻子,與突利歸朝, 邊患。十八年, 斛律孝 上舍之太常, 教習六禮, 趙仲卿並出 雍 卿 婦朝。 虞閭 相 韶蜀王秀出靈州道以擊之。 繼 與站厥 爲使、突厥 上令染干與雍虞閭使者因頭特動相辯詰 朔州道,右僕射 雍虞閭 舉兵攻染干, 前後遣使入 妻以宗女安義 怒曰:「我, 楊素 上嘉之。 盡殺其兄弟子姪, 朝三百七十 大可汗 明年, 率 公主。 柱 國李徹 敕染干與都速 又遣漢王諒 也, 上欲離 反不 輩。 韓 遂度 僧壽 如染 間北 突利 爲

夏六月,高頗、楊素擊玷厥,大破之。 拜染干為意利珍豆啓民可汗,華言「意智健」也。 六**摴蒲,稍稍輸以寶物,用慰其心**

東西拒 間 於 啓民 朔 又擊之,上復令入塞。 州 上 |表謝恩曰:「臣旣蒙豎立,復改官名,昔日姦心,今悉除去,奉事至尊,不敢違法。」上 河 築大利城 ,盡爲啓民畜牧之地。 以居之。 雍虞閭侵掠不已,遷於河南,在夏、勝二州之間,發徒掘塹數 是時安義主已卒,上以宗女義成公主妻之,部落歸者甚 於是遺越國 公楊素出 靈州,行軍總管韓僧壽出 慶州, 百里, 雍 虞

公史萬歲出燕州,大將軍姚辯出河州,以擊都藍。

恩,赤心歸 染干譬 民 逃 出 L 而 朔 表 去 州 師 如枯 陳謝日:「大隋聖 未 以擊之, 尋遣其弟子俟利伐從磧東攻啓民。 出 服,並將部落歸投聖 木 塞,而 重起枝葉,枯骨重生皮肉,千萬世 遇達頭於大斤山 都藍 爲其麾下所殺, 一人莫緣可汗,憐養百姓, 人可 一,虜不 汗來也。 戰而 達頭自立為步迦可汗,其國 遁 或南入長城,或住白道,人民羊馬,偏滿 上又發兵助啓民守要路,俟利伐退走入磧。啓 ,追斬首虜二千餘人。 長與大隋典羊馬也。」 如天 八無不 覆也, 如 一大亂。 地 晉王 無 不 廣 載 遣太平公史萬 出 也。 靈 州, 諸 達頭 姓蒙威 山谷。 遁

啓民 破俟斤,悉得人畜以歸啓民。 掠啓民男女六千口、雜畜二十餘萬而去。 北 征 **斛薛等諸姓初附于啓民,至是而叛。** 素又遣柱國張定和、 素率上大將軍梁默 素軍河北,值突厥 領軍大將軍劉昇別路邀擊, 輕騎追之,轉戰六十餘里,大 阿勿思 力俟斤等南度, 並多斬獲而

壽

元

年,代州總管韓洪爲虜所敗於恒安,

廢爲庶人。

詔楊素爲雲州道行

:軍元:

渾。啓民遂有其衆 歲遣朝貢。

是歲 泥 度 河, 利 可汗及葉護俱被鐵勒所敗。步迦尋亦大亂,奚、霫五部內從,「八步迦奔吐谷 賊復掠啓民部落,素率驃騎范貴於窟結谷東南奮擊, 復破之,追奔八十餘

物萬 性之至理,非包含之遠度。衣服不同,旣辨要荒之敍,庶類區別,彌見天地之情。」仍璽書答 遭 啓民,以爲磧北未靜,猶須征戰,但使好心孝順,何必改變衣服也。 身,咸安其性,旃裘卉服,各尚所宜,因而利之,其道弘矣。 卿請依所奏。 或 盡,並至尊聖心 下看 無 天 **灬少**短。 [服飾法用,一同華夏。 下四方坐也。 臣 作大可汗坐著也。 只 二千段。 大業三年四月,煬帝幸楡林,啓民及義成公主來朝行宮,前後獻馬三千匹。 見 地,實憶聖人先帝言語,投命去來。 臣 .種末爲聖人先帝憐養,臣兄弟姤惡,相共殺臣,臣當時無處去,向上 啓民 帝以爲不可,乃下詔曰:「先王建國,夷夏殊風,君子敎民,不求變俗。 裏在。 還養活臣及突厥百姓,實無少短。 上表曰:「已前 臣今非是舊 其突厥百姓,死者以外, 臣今率部落, 敢以上聞伏願天慈不違所請。」 聖人先帝莫緣 日邊地突厥可汗,臣卽是至尊臣民,至尊憐臣 聖人先帝見臣,大憐臣,死命養活,勝於 可汗存在之日,憐臣,賜臣 還聚作百姓也。 臣今憶想聖人及至尊養活事 何必化諸削衽,縻以長纓,豈遂 至尊今還如聖 表奏, 安義公主,種 帝下 人 **着只** 時,乞依 帝大悅,賜 ·,具奏不 - 其議, 先帝,捉 斷髮文 往 、見天, 可 大

下認 開。 襲冠 啓民及主金甕各一,及衣服被褥錦綵,特勤以下各有差。 奉觴上壽,跪伏甚恭。帝大悅,賦詩曰:「鹿塞鴻旗駐,龍庭翠輦廻。 馬、鼓吹、幡旗、贊拜不名,位在諸侯王上。」帝親巡雲內,派金河而東北幸啓民所居。啓民 入奉朝覲,率其種落,拜首軒墀,言念丹款,良以嘉尙。宜隆榮數,式優恒典。可賜路車、乘 矣。朕以薄德,祗奉靈命,思播遠猷,光融令緒,是以親巡朔野,撫寧藩服。 甲兵之衆,收其破滅之餘,復祀於旣亡之國,繼絕於不存之地。 可汗志懷沈毅、乙世修藩職。 呼韓頓顏至,屠耆接踵來。索辮擎羶肉,韋韝獻酒杯。 《解辮,同彼臣民。 是故王會納貢,義彰前册,呼韓入臣,待以殊禮。 ·曰:「德合天地,覆載所以弗遺,功格區宇,聲敎所以咸洎。 至於梯山航海,請受正朔, 法駕御千人大帳,享啓民及其部落酋長三千五百人,賜物二十萬段,其下各有差。復 往者挺身違難,拔足歸仁,先朝嘉此款誠,授以徽號。 何如漢天子,空上單于臺。」帝賜 斯固施均亭育,澤漸要荒者 氊帳望風舉,穹廬向日 突厥意利珍豆啓民 啓民深委誠心, 資其

懼。 知,宜早來朝,勿自 令牛弘宣旨謂之曰:「**朕以**啓民誠心奉國 先是,高麗私通使啓民所,啓民推誠奉國,不敢隱境外之交。 啓民仍扈從入塞,至定襄,詔令歸藩。 疑懼。 存育之禮,當同於啓民。 ,故親至其所。 如或不朝,必將啓民巡行彼土。」使人甚 明年當往涿郡。 是日,將高麗使人見,勑 爾還日 ,語高麗王

列傳

汗。 其種落入寇,圍帝於雁門。詔諸郡發兵赴行在所,援軍方至,始畢引去。 表請尙公主,韶從其俗。十一年,來朝於東都。其年,車駕避暑汾陽宮,八月,始畢 明 年 ·,朝於東都,禮賜益厚。 是歲,疾終,上爲之廢朝三日,立其子咄吉世,是爲始畢可 由是朝貢遂絕。明 率

建德、王世充、劉武周、梁師都、李軌、高開道之徒,雖僭尊號,皆北面稱臣,受其可汗之號。

西越金 寺。 諸胡國。 卒,向氏又嫁其弟婆實特勤。開皇末,婆實共向氏入朝,遇達頭亂,遂留京師,每舍之鴻 子,是爲泥 使者往來,相望於道也。 年,復寇馬邑,唐公以兵擊走之。 處羅 西突厥者,木杆可汗之子大邏便也。 隋末亂離,中國人歸之者無數,遂大强盛,勢**陵中夏。迎蕭皇后,置於定襄**。 山,龜茲、鐵勒、伊吾及西域諸胡悉附之。 一居龜茲北,其地名應娑。官有俟發、閻洪達,以評議國事,自餘與東國同。 西突厥 可汗居無恒處,然多在鳥孫故地。復立二小可汗,分統所部。 利可汗。卒,子達漫立,號泥撅處羅可汗。 與沙鉢略有隙,因分爲二,漸以强盛。 大邏便爲處羅侯所執,其國立 其母向氏, 本中國人,生達漫而 在石國北,以制 鞅素特勤之 東拒都斤, 薛舉、竇 泥利 毎五 臚

月八日,相聚祭神,歲遣重臣向其先世所居之窟致祭焉。

其輟策。向夫人又匍匐謝罪,因請發使以召可汗,令入內屬,乞加恩禮,同於啓民。天子從 歸在京師,處于賓館。聞天子之詔,懼可汗之滅,旦夕守闕,哭泣悲哀。是以天子憐焉,爲 大國,欲滅可汗耳。百官兆庶咸請許之,天子弗違,師出有日矣。顧可汗母向氏,本中國人, 萬,入臣天子,甚有丹誠者,何也。但以切恨可汗而不能獨制,故卑事天子以借漢兵,連二 歲交兵,積數十年而莫能相滅者,明知啓民與處羅國其勢敵耳。今啓民舉其部落,兵且百 慰諭之。處羅甚踞,受詔不肯起。君肅謂處羅曰:「突厥本一國也,中分爲二,自相仇敵。每 裴矩在敦煌引致西域,聞國亂,復知處羅思其母氏,因麥之。煬帝遣司朝謁者崔君肅齎書 當大業初,處羅可汗撫御無道,其國多叛,與鐵勒屢相攻,大爲鐵勒所敗。時黃門侍郎

何。君肅日、一吐谷渾者,啓民少子莫賀咄設之母家也。今天子又以義成公主妻於啓民,廢 之爭寵,須深結於天子,自表至誠。旣以道遠,未得朝覲,宜立一功,以明臣節。」處羅曰:「如 惜兩拜之禮,剿慈母之命,客一句稱臣,喪匈奴國也」處羅聞之,矍然而起,流涕再拜,跪受 君肅又說處羅曰:「啓民內附,先帝嘉之,賞賜極厚,故致兵强國富。今可汗後附,與

列

傳第四十九

北 狄 當取戮而傳首房庭。發大隋之兵,資北蕃之衆,左提右挈,以擊可汗,死亡則無日矣。奈何

之,故遣使到此。可汗若稱藩拜詔,國乃永安,而母得延壽,不然者,則向夫人爲誑天子,必

遂遣使朝貢。

其內,可汗攻其外,破之必矣。然後身自入朝,道路無阻,因見老母,不亦可乎。」處羅大喜, 民畏天子之威而與之絕。吐谷渾亦因憾漢故,職貢不修。可汗若請誅之,天子必許。 漢撃

爲婚 羅 寧曉諭之,遂入朝,然每有怏怏之色。 遣裴矩將向氏親要左右,馳至玉門關晉昌城。 子,將左右數千騎東走。 爲可汗 羅 經處羅,處羅愛箭,將留之,使者譎而得免。 風殿召其使者,言處羅不順之意,稱射匱有好心,吾將立爲大可汗,令發兵誅處羅,然後當 可汗,則突厥勢分,兩從我矣。」帝曰:「公言是也。」 不朝 謝使者,辭以他故。 也。 帝將西符,六年,遺侍御史韋節召處羅,令與車駕會於大斗拔谷。「10〕其國人不從,處 君臨 ,恃强大耳。 帝取桃竹白羽箭一枝以賜射匱,因謂之曰:「此事宜速,使疾如箭也。 西面。 臣請以計弱之,分裂其國,卽易制也。射匱者,都六之子,達頭之孫,世 今聞其失職,附隸於處羅,故遣使來,以結援耳。 帝大怒,無如之何。 在路叉被劫掠,遁於高昌東,保時羅漫山。 適會其酋長射匱遣使來求婚,裴矩因奏曰「處 射匱聞而大喜, 矩遣向氏使詣處羅所, 因遺裝矩朝夕至館,微諷諭之。 興兵襲處羅, 高昌王麴伯 論朝廷弘養之義,丁 願厚禮其使,拜爲大 處羅大敗, 使者返, 雅 上狀,帝 帝於仁 棄妻

以七年冬,處羅朝於臨朔宮,帝享之。處羅稽首謝曰:「臣總西面諸蕃,不得早來朝拜,

所照,唯有聖人可汗。今是大日,願聖人可汗千歲萬歲常如今日也。」詔留其累弱萬餘口, 抱豁然歡喜,處羅亦當豁然,不煩在意。」明年元會,處羅上壽曰:「自天以下,地以上,日月 有兩箇三箇日,萬物何以得安?比者亦知處羅總攝事繁,不得早來相見。今日見處羅,懷 四海旣清,與一家無異,朕皆欲存養,使遂性靈。譬如天上止有一箇日照臨,莫不寧帖;若 今參見遲跪,罪責極深,臣心裏悚懼,不能道盡。」

一一往者與突厥相侵擾,不得安居。今

至河北。化及將敗,奔歸京師,爲北蕃突厥所害。 綵袍千具,綵萬匹。帝將復其故地,以遼東之役,故未遑也。每從巡幸。江都之亂,隨化及 處羅從征高麗,賜號爲曷薩那可汗,江三賞賜甚厚。十年正月,以信義公主嫁焉,賜錦

令其弟達度闕牧畜會寧郡。[II]

鐵勒

萬。 僕骨、同羅、韋紇、拔也古、覆羅並號俟斤,蒙陳、吐如紇、斯結、渾、斛薛等諸姓,勝兵可二 座、於尼蘿等,CIED勝兵可二萬。 金山西南有薛延陀、咥勒兒、十樂、達契等,一萬餘兵。 康 伊吾以西,焉耆之北,傍白山,則有契弊、薄落職、乙咥、蘇婆、那曷、烏讙、自己乾骨、也 鐵勒之先,匈奴之苗裔也,種類最多。自西海之東,依據山谷,往往不絕。獨洛河北有

列

傳第四十九

北狄

其用,以制北荒。 婪尤甚,以寇抄爲生。 謂爲鐵勒。並無君長,分屬東、西兩突厥。居無恒所,隨水草流移。人性凶忍,善於騎射,貪 | 菻東則有恩屈、阿蘭、北褥九離、伏嗢昏等,近二萬人。 北海南則都波等。雖姓氏各別,總 等,自己有三萬許兵。 國 北 傍阿得水,則有訶咥、曷巖、口亞撥忽、比干、CIKJ具海、曷比悉、何嗟蘇、拔也未渴達 得嶷海東西有蘇路羯、三索咽、蔑促、こら隆忽等諸姓、こら八千餘。 近西邊者,頗爲藝植,多牛羊而少馬。自突厥有國,東西征討,皆資 拂

是一 爲鄰國所憚,伊吾、高昌、焉耆諸國悉附之。 陀內俟斤字也咥爲 可汗擊鐵勒諸部,厚稅歛其物,又猜忌薛延陀等,恐爲變,遂集其魁帥數百人,盡誅之。 時反叛,拒處羅,遂立俟利發俟斤契弊歌楞爲易勿眞莫何可汗,居貪汗山。 開皇末,晉王廣北征,納啓民,如己大破步迦可汗,鐵勒於是分散。大業元年,突厥處羅 小可汗。 處羅可汗旣敗,莫何可汗始大。莫何勇毅絕倫,甚得衆心, 復立薛延 曲

異也。 其俗大抵與突厥同,唯丈夫婚畢,便就妻家,待產乳男女,然後歸舍,死者埋殯之,此其 大業三年,遣使貢方物,自是不絕云。

樹上。 潔,而善射 五. 部 契箇 中爲盛,諸部皆歸之。 **溪本日庫莫奚,東部胡之種也。** 自突厥稱藩之後,亦遣使入朝,或通或絕,最爲無信。 獵 四 日木昆,五日 ,好爲寇 鈔。 室得。 初臣 每與契丹相攻擊,虜獲財畜,因而 於突厥 每部俟斤一人為 爲慕容氏所破,遺落者竄匿松、漠之間。 ()後稍 强盛,分爲 其 帥。 江部:一 隨逐水草, 得賞。 大業時,歲遣使貢方物。 日辱紇王,三二日莫賀弗 死者以葦薄裹屍,懸之 頗同突厥。有阿會氏, 其俗甚爲不

契丹 室韋

黄龍 使我 於 山 (多得猪鹿。」其無禮頑嚚,於諸夷最甚。 . 樹之上,經三年之後,乃收其骨而焚之。 之北數百里。其俗頗與靺鞨同。 契丹之先,與庫莫奚異種而同類,並爲慕容氏所破,俱竄於松、漠之間。 好爲寇盜。父母死而悲哭者,以爲不壯,但以其屍置 因酹而祝曰:「冬月時,向陽食。 若我射獵時, 其後稍大,居

契丹 其諸 寄於 別部 部 高 當 麗 後 相 (魏時,爲高麗所侵,部落萬餘口求內附,止于白雞河。 出伏等背高麗,率衆內附。 攻擊,久不止,又與突厥相侵,高祖使使責讓之。 開皇四年,率諸莫賀弗來謁。 高祖納之,安置於渴奚那頡之北。 五年,悉其衆款塞,高祖納之,聽居其故 其國 遣 其後爲突厥所逼,又以萬家 使詣闕,頓 開皇末,其別部四 類謝 罪。 地。六年, 其後

列

傳

第

與議 南 辭 餘 北 不 三百 去 背突 里, 部 落 厥 分爲 來降。 漸 衆,遂北徙逐水草,當遼西正北二百里,依託紇臣水而居。 十部。兵多者三千,少者千餘,逐寒暑,隨水草畜牧。 上方與突厥和好,重失遠人之心, 悉令給糧還本, 勑突厥撫納之。 有征伐, 東西亘五 古

爲屋, 叉多 則 弟代立 韋、北室韋、鉢室韋、深末怛室韋、太室韋。 田 屈 收 然後送)蚊蚋, 《甚薄,無羊,少馬,多猪牛。 之,興兵動衆合符契。 爲屋,以籧篨覆上,移則載行。 南 室章,契丹之類也。〔三〕其南者爲契丹,在北者號室章,分爲五部,不相總一 部落共爲大棚,人死則置屍其上。 如突厥氊車之狀。渡水則束薪爲栰,或以皮爲 嗣嗣 室韋在契丹北三千里,土地卑濕,至夏則移 半馬 絕 人皆巢居,以避其 則擇賢豪而立之。 爲娉,更將歸家。 突厥沙鉢略可汗遣吐屯潘垤統之。 患。 其俗丈夫皆被髮,婦人槃髮,衣服與 造酒食噉,與靺鞨同 待有娠,乃相隨還舍。 漸分爲二十五部,每部有餘莫 以猪皮為席,編木 居喪三年, 年唯四哭。 並 無君長,人民貧弱,突厥 向 俗。 西北貸勃、欠對二山, 舟者。 爲 藉。 婦人不再嫁,以爲死 婚嫁之法,二家相 馬則織 婦女皆抱 (弗 瞞 其國無鐵,取給於高麗。 草爲韉, 咁 契 常以三吐屯 丹同 膝 ·; 獪 而 酋 多 ŏ 許 坐。 草 人 長 結 乘牛 ,壻輒盜 ,所謂南室 木 之妻難 也。 繩 氣候 總領 爲轡。 ,饒禽獸, 車 死 邃 以共 婦將 則

多貂

咄,每部有莫何弗三人以貳之。氣候最寒,雪深沒馬。 饒鏖鹿,射獵爲務,食肉衣皮。鑿氷,沒水中而網射魚鼈。地多積雪,懼陷坑穽,騎木而行。 南室韋北行十一日至北室韋,分爲九部落,繞吐紇山而居。 冬則入山,居土穴中, 牛畜多凍死。 其部落渠帥號乞引莫賀

俗皆捕貂爲業,冠以狐狢,衣以魚皮。

又北行千里,至鉢室韋,依胡布山而住,人衆多北室韋,不知爲幾部落。 用樺皮蓋屋,

其餘同北室韋。

從鉢室韋西南四日行,至深末怛室韋,因水為號也。冬月穴居,以避太陰之氣。

北室韋時遣使貢獻,餘無至者。 又西北數千里、至大室韋、徑路險阻、語言不通。尤多貂及靑鼠。

時也。 丸、鮮卑焉;後魏及周,則蠕蠕、突厥焉。 史臣曰:四夷之爲中國患也久矣,北狄尤甚焉。 五帝之世,則有獯粥焉,其在三代,則獫狁焉,逮乎兩漢,則匈奴焉,當塗、典午,則烏 此其

,相繼

互爲

君長

者也。 種落實繁,迭雄邊塞,年代遐邈,非一 皆以畜牧爲業。侵

列

傅

好息民 鼎,厥 突厥 掠, 鈔爲 鄣,殘毁我雲、代,搖蕩我太原,肆掠於涇陽 禮。 南向 下。 天地之含容,同陰陽之化育,斯乃大道之行也,固無得而稱焉。 及、書契所未聞。由此言之、雖天道有盛衰、亦人事之工拙也。 驕 於是推亡固存,返其舊地,助討餘燼,部衆遂强。 '曆',未有若斯之甚也。 世不羈之虜一 以 始 煬帝撫之非道,始有雁門之圍。 點憑陵, 徒孔熾,負其衆力,將蹈秦郊。 申 大,至於木杆,遂雄朔野。 臨周、齊。二國莫之能抗,爭請盟好,求結和親。 事 -異態, 倏來 無恒 於是分置官司、總統 忽往 一規,權無定勢,親疎因其强弱,服叛在其盛衰。 和親約結之謀,行師用兵之事,前史論之備矣,故不詳而究焉。 强弱相反。 舉而滅,瀚海、龍庭之地畫爲 一,雲飛鳥集。 及聖哲膺期,掃除氛祲,暗於時變,猶懷 正朔所不及,冠帶所不加,唯利是視,不顧盟誓。 中國、子女玉帛、相繼於道、使者之車、往來結轍。 智謀之士,議和親於廟堂之上,折衝之臣,論奮擊於塞垣之 東極東胡舊境,西盡烏孫之地,彎弓數十萬,列 俄屬羣盜 內自相圖 ,飲馬於 九州,幽都窮髮之民隸於編戶。 並 ,遂以乖 興,於此寖以雄盛,豪傑雖建名號,莫不請 卒於仁壽,不侵不叛, 潤洌。 亂, 乃與周 聖上奇謀潛運,神機密動, 達頭可 衰則款塞頓顙 加以爲而弗恃,有而弗居,類 合從, 旅 汗遠遁, 拒 , 終亡 率其羣 暨乎始畢 啓民 齊國 及蠕蠕衰 盛 實帝皇所不 至於莫相救 醜,屢隳亭 願保塞下。 處 自古蕃 則彎弓寇 ٠, 於代陰, 未虧 高祖 遂使 夷 遷 臣

- 弟逸可汗立 問書突厥傳作「子科羅立,科羅號乙息記可汗
- [三] 俟斗 周書突厥傳作「俟斤」。
- (川) 契丹 北史突厥傳作「契骨」。
- [图] 當令侍子入朝 「令」原作「今」,據北史突厥傳改。
- (五) 窟含真 本書高祖紀作「庫合真」。

. . . .

時沙鉢略子日染干

本書長孫晟傳作「處羅侯之子曰染干」。

岑仲勉突厥集史卷二:「通典一九

- 七作『沙鉢略之弟處羅侯之子染干』,隋傳殆有脱文。」
- 突利 「利」原作「厥」,據北史突厥傳、册府九七八改。
- (ス) 奚霫五部内徙 「徙」原作「從」,據北史突厥傳改。
- 意利珍豆啓民可汗「豆」原作「寶」,據上文及文館詞林六六四改。
- 大斗拔谷 「斗」原作「升」,據北史突厥傳及本書煬帝紀上、又楊玄感傳改。
- 達度闕 「闕」原作「闕」,據北史突厥傳改。本書裴矩傳作「闕達度設」。
- 曷薩那可汗 今從隋書。」是司馬光所見隋書與今本不同 <u>(通鑑煬帝大業八年作「曷婆那可汗」。通鑑考異:「唐李軌傳作</u> 『曷娑那可汗』。

列

傳第

四

十九

校

勘記

- 烏讙 北史鐵勒傳作「烏護」。
- 於尼讙 北史鐵勒傳作「於尼護」
- 曷嶻 北史鐵勒傳作「曷截」。

二

比干

- 拔也未渴達 或作「比千」。北史鐵勒傳作「比干」。 北史鐵勒傳作「拔也末謁達」。
- 蔑促 北史鐵勒傳作「篾促」。
- 二九 隆忽 北史鐵勒傳作「薩忽」。
- 晉王廣北征納啓民 原脱「啓」字,據北史鐵勒傳補。
- (三) 室韋契丹之類也 辱紇王 「王」,周書庫莫奚傳、北史奚傳、通典二〇〇作「主」。 「室韋」原缺,據北史室韋傳補。

列傳第五十

釁,斵棺焚骨,明篡殺之咎,可以懲夫旣往,未足深誡將來。 昔<u>孔子修春秋,而</u>亂臣賊子知 臣不可以不臣。故曰君猶天也,天可讎乎!是以有罪歸刑,見危授命,竭忠貞以立節,不 懼,抑使之求名不得,欲蓋而彰者也。今故正其罪名,以冠於篇首,庶後之君子見作者之意 姦宄, 世荷權寵, 行王莽之桀逆, 生靈之所讎疾, 犬豕不食其餘。 前哲者矣。至於委質策名,代卿世祿,出受心膂之寄,入參帷幄之謀,身處機衡,肆趙高之 臨難而苟免。 三,事之如一。」然則君臣父子,其道不殊,父不可以不父,子不可以不子, 夫肖形天地,人稱最靈,以其知父子之道,識君臣之義,異夫禽獸者也。 故聞其風者,懷夫慷慨,千載之後,莫不願以爲臣。此其所以生榮死哀,取貴 雖薦社污宮, 彰必誅之 君不可以不君, 傳曰:「人生在

列修

宇文化及 弟智及

煬帝 **心意** 突厥交市。 卿間,言辭不遜,多所陵轢。見人子女狗馬珍玩,必請託求之。常與屠販者 賄,再三発官。 長安謂之輕薄公子。 尉元武達陰問驍果, 釋,幷智及並賜述爲奴。述薨後,煬帝追憶之,遂起化及爲右屯衞將軍,智及爲將作少監。 將如之何?」虔通曰:「上實爾,誠爲公憂之。」德戡謂兩人曰:「我聞關中陷沒,李孝常以華陰 陛下性忌,惡聞兵走, 「今聞陛下欲築宮丹陽, 即位,拜太僕少卿,益恃舊恩,貪冒尤甚。大業初,煬帝幸楡林,化及與弟智及違禁與 宇文化及,左翊 ,謀欲叛歸。 是時李密據洛口,煬帝懼,留淮左,不敢還都。從駕驍果多關中人,久客羈旅,見帝無 帝大怒,囚之數月。還至靑門外,欲斬之而後入城,解衣辮髮,以公主故,久之乃 太子嬖昵之,俄而復職。 時武賁郎將司馬德戡總領驍果,屯於東城,風聞兵士欲叛,未之審,遣校 衞大將軍述之子 煬帝爲太子時,常領千牛,出入臥內。 知其情, 卽恐先事見誅。 勢不還矣。 因謀構逆。 所部驍果莫不思歸,人 也。 今知 性兇險,不循法度,好乘肥挾彈,馳騖道中, 又以其弟士及尚南陽公主。 共 面 所善 不言,其後 武賁郎將元禮、直閣裴虔通互相扇惑曰: 事發,又當 人耦語,並謀逃去。 累遷至太子僕。 族滅我矣。 化及 由此 遊,以規 數以 益 我欲言之, 進退爲戮, 驕,處公 受 其利。 納 由是 貨

外交通,所謀益急。趙行樞者,樂人之子,家產巨萬,先交智及,勳侍楊士覽者,宇文甥,二 頸之交,情相款昵,言無迴避,於座中輒論叛計,並相然許。時李孝質在禁,令驍果守之,中 秉,符璽郎李覆、牛方裕,直長許弘仁、薛良,城門郎唐奉義,醫正張愷等,日夜聚博,約爲刎 通等日一一誠如公言,求生之計,無以易此。」因遞相招誘。又轉告內史舍人元敏、鷹揚郎將孟 自保,正恐旦暮及誅,計無所出。」德戡曰「同相憂,當共爲計取。驍果若走,可與俱去。」虔 叛,陛下收其二弟,將盡殺之。吾等家屬在西,安得無此慮也!」虔通曰:「我子弟已壯,誠不 人同告智及。智及素狂悖,聞之喜,卽共見德戡,期以三月十五日舉兵同叛,劫十二衞武

化及性本駑怯,初聞大懼,色動流汗,久之乃定。 人,因行大事,此帝王業也。」德戡然之。行樞、薛良請以化及爲主,相約旣定,方告化及。 義寧二年三月一日,德戡欲宣言告衆,恐以人心未一,更思譎詐以脅驍果,謂許弘仁、

馬,虜掠居人財物,結黨西歸。

智及曰:「不然。當今天實喪隋,英雄並起,同心叛者已數萬

張愷 奉義主閉城門,乃與虔通相知,諸門皆不下鑰。至夜三更,德戡於東城內集兵,得數萬人, 謀叛逾急。 欲叛,多醞毒酒,因享會盡鴆殺之,獨與南人留此。」弘仁等宣布此言,驍果聞之,遞相告語, 曰:「君是良醫,國家任使,出言惑衆,衆必信。君可入備身府,告識者,言陛下聞說驍果 德戡知計旣行,遂以十日總召故人,諭以所爲。 衆皆伏曰:「唯將軍 命」其夜,

列傳

第五

+

字

文化

及

舉 至 外 隔 火與城外相 更中 絕 一,帝以爲然。孟秉、智及於城外得千餘人,劫候衞武賁馮普樂,共布兵分捉郭下街巷。 ,德戡授虔通兵,以換諸門衞士。 應。 帝聞有聲、問是何事。處通爲曰:「草坊被燒,外人救火,故諠囂耳。」中 虔通因自開門,領數百騎,至成象殿,殺將軍獨

在! 有美 (人出,方指云:「在西閤。」從往執帝。 帝謂虔通曰:「卿非我故 郎將元禮遂引兵進,宿衞者皆走。虔通進兵,排左閤,馳入永巷,問三陛下安 人乎 1 何 恨 而反ご

孤

武賁

虔通 曰 :「臣不敢反,但將士思歸,奉陛下還京師耳。」帝曰:「與汝歸。」 虔通因 勒兵守之。

智及, 賊,因復將入。遣令狐行達弑帝於宮中,又執朝臣不同己者數十人及諸外戚,無少長害之, 答云「罪過」。 至 久之乃 旦、孟秉以甲騎迎化及。 見釋。 時士及在公主第,弗之知 化及至城門,德戡迎 化及 未 也。 知事果,戰慄不能言,人有來謁之者, 謁 ,引入朝堂,號爲 智及 遣家僮莊桃樹就 丞相 0 第殺之, 令將帝出江都門 桃樹 但低頭據鞍, 不忍, 以示羣 執詣

事者, 及,反爲所害。 十餘 默然不對。 日,奪江 化及於是入據六宮,其自奉養一如煬帝故事。 一都人舟楫 下牙時, 方收取啓狀,共奉義、方裕、良、愷等參決之。 ,從水路 西歸。 至顯福宮,宿公麥孟才、折衝郎將沈光等謀擊化 每於 帳 中 南 行至徐州 面 端 坐, 一水路不 人 有白

了,復奪人車牛,得二千兩,並載宮人珍寶。 其戈甲戎器,悉令軍士負之。 道遠疲極,三軍

唯留秦孝王子浩,立以爲

通

以 事 始 將 怨。 後軍萬餘兵襲殺化及,更立德戡爲主。 必 敗、當若之何。」行樞曰:「在我等爾、廢之何難 德戡失望,竊謂行樞曰:「君大謬誤我。 弘仁 知之,密告化及,盡收捕德戡及其支黨十餘 當今撥亂, 」因共李本、宇文導師、尹正卿等謀, 必藉英賢,化及庸暗,羣小在側

人

,皆殺之。

引兵向東郡,通守王軌以城降之。

我 腹 叛歸李密。 自 不利 黎 歎 由 由 遂入汲郡求軍糧,又遣使拷掠東郡吏民以責米粟。 心稍 汲郡 汝 陽 曰:「人生故當死, 以 汝 降 為計 縣,分兵圍勣。 乎。持其兩子而 · , 其 將 軍 于 弘 達 爲 密 所 擒 , 送 於 侗 所 , 鑊 素 之 。 元文都推越王侗爲主,拜李密爲太尉,令擊化及。 建德 盡 將率衆圖 ,兵勢日蹙, ,强來立我。 []]兄弟數相 化及尚有衆二 以北諸州。 。密壁清淇,與勣以烽火相應。 豈不一日爲帝乎。」於是鴆殺浩, 僭皇帝位於魏縣, 國號許, 建元爲天 泣 兄弟更無他計,但相聚酣宴,奏女樂。 今所向無成,士馬日散,負殺主之名,天下所不納。 、鬭鬩、言無長幼、醒 0 智及怒曰:「事捷之日,都不賜尤,及其將敗,乃欲歸罪。 萬,北走魏縣。 其將陳智略率嶺南 張愷等與其將陳伯謀去之, 而復飲,以此 · 驍果萬餘人,張童兒率江東驍果數千人,皆 化及每攻倉, 密輒引兵救之。 化及數戰 化及糧盡,渡永濟渠,與密決戰於童山 王軌怨之,以城歸於李密。 密遣徐勣據黎陽倉。化及渡河,保 爲 恒 醉後,因尤智及曰:「我初 其衆多亡,自知必敗,化及 事覺, **今者滅族**, 豈不 爲化及所殺。 化及 何 不知 大懼 不殺

列

第

五十

字

文化

及

一署置百官。

進兵圍 附。 賊。 承趾皆斬之,傳首於突厥義成公主,梟於虜庭。 孟秉、楊士覽、許弘仁,皆斬之。 時遣士及徇濟北,求 化及信之、與共居守。至是、薄引建德入城、生擒化及、悉虜其衆。 攻元寶藏於魏州,四旬不剋,反爲所敗,亡失千餘人。乃東北趣聊城,將招攜海曲諸 之,十餘日不剋而退。 魄餉。 竇建德悉衆攻之。 先是,齊州賊 乃以轞車載化及之河間,四數以殺君之罪,并二子承基、 大唐遣淮安王神通安撫山東,幷招 士及自濟北西歸長安。 帥王薄聞其多寶物, 化及。 先執 化及不 智及、元武達、 從,神 詐 來投 通

兩釋。 親 必 **爵濮陽郡公。蒸淫醜穢,無所不爲。其妻長孫,妬而告述,述雖爲隱,而大忿之,纖芥之愆,** 呢。 加鞭箠。弟士及恃尚主,又輕忽之。唯化及每事營護,父再三欲殺,輒救免之,由是頗相 智及幼頑凶,好與人羣鬭,所共遊處,皆不逞之徒,相聚鬭雞,習放鷹狗。 述將 遂勸化及遣人入蕃,私爲交易。事發,當誅,述獨證智及罪惡,而爲化及請命。 死,抗表言其凶勃,必且破家。帝後思述,授智及將作少監。 初以父功,賜 帝因

號 ,封齊王。竇建德破聊城,獲而斬之,幷其黨十餘人,皆暴屍梟首。 其 江都 殺逆之事,智及之謀也。化及爲丞相,以爲左僕射,領十二衞大將軍。化及僭

司馬德戡

漢王諒,充內營左右,進止便僻,俊辯多姦計,素大善之。以勳授儀同三司。大業三年,爲 通德戡母和氏,三逐撫教之,因解書計。 司馬德戡,扶風雍人也。父元謙,仕周爲都督。德戡幼孤,以屠豕自給。有桑門釋粲, 開皇中,爲侍官,〔三〕漸遷至大都督。 從楊素出計

鷹揚郎將。從討遼左,進位正議大夫,遷武賁郎將。煬帝甚昵之。

立足下,而又甚之。 于後軍。 外示美遷,實奪其兵也。由是憤怨,所獲賞物皆賂於智及,智及爲之言。行至徐州,捨舟登 大夫、仍統本兵。 化及意甚忌之。後數日, 化及署諸將, 分配士卒, 乃以德戡爲禮部尙書, 內,出於 爲外助。 陸,令德戡將後軍,乃與趙行樞、李本、尹正卿、宇文導師等謀襲化及,遣人使于孟海公,結 旣獲煬帝,與其黨孟秉等推化及爲丞相。化及首封德戡爲溫國公,邑三千戶,加光祿 從至江都,領左右備身驍果萬人,營於城內。因隋末大亂,乃率驍果謀反,語在化及事 萬死。今始事成,願得同守富貴,公又何爲反也。」德戡曰:「本殺昏主,苦其毒害。推 遷延未發,以待使報。許弘仁、張愷知之,以告化及,因遣其弟士及陽爲遊獵,至 德戡不知事露,出營參謁,因命執之,幷其黨與。化及責之曰「與公勠力共定海 逼於物情,不獲已也。」化及不對,命送至幕下,縊而殺之,時年三十九。

列

傅

裴虔通

逆之罪,除名,徙於嶺表而死 也,令鎭徐州。 至成象殿,殺將軍獨孤盛,擒帝于西閤。化及以虔通爲光祿大夫、莒國公。 右、授宣惠尉、遷監門直閣。 裴虔通,河東人也。 化及敗後、歸於大唐、卽授徐州總管,轉辰州刺史,封長蛇男。 初,煬帝爲晉王,以親信從,稍遷至監門校尉。 累從征役,至通議大夫。 與司馬德戡同謀作亂,先開宮門,騎 煬帝卽位,擢舊左 化及引兵之北 尋以隋朝殺

王充台

爲人言也。 懷、汴二州長史。 充捲髮豺聲,沉猜多詭詐,頗窺書傳,尤好兵法,曉龜策推步盈虛,然未嘗 合,生子曰瓊,粲遂納之以爲小妻。其父收幼孤,隨母嫁粲,粲愛而養之,因姓王氏,官至 王充字行滿,本西域人也。 祖支頹稺,徙居新豐。 頹痿死,其妻少寡,與儀同王粲野

下其心。或有駁難之者,充利口飾非、辭義鋒起、衆雖知其不可而莫能屈、稱爲明辯。 開皇中,爲左翊衞,後以軍功拜儀同,授兵部員外。善敷奏,明習法律,而舞弄文墨,高

煬帝時,累遷至江都郡丞。時帝數幸江都,充善候人主顏色,阿諛順旨,每入言事,帝

又以郡丞領江都宮監,乃雕飾池臺,陰奏遠方珍物以媚於帝,由是益昵之。

大業八年,隋始亂,充內懷徼倖,卑身禮士,陰結豪俊,多收衆心。 江淮間人素輕悍,又

晉陵 屬盜 **"贼羣起,人多犯法,有繫獄抵罪者,充皆枉法出之,以樹私恩。及楊玄處反,吳人朱變、** 人管崇起兵江南以應之,自稱將軍,擁衆十餘萬。 帝遣將軍吐萬緒、魚俱羅討之,不能

·

元募江都萬餘人,擊頻破之。每有剋捷,必歸功於下,所獲軍實,皆推與士卒,身無所

受。由此人爭爲用,功最居多。

剋。

遁去,斬首萬人,六畜、軍資莫不盡獲。 弱、保都梁山爲五 十年,齊郡賊帥孟讓自長白山寇掠諸郡,至盱眙,有衆十餘萬。 然性矯偽,詐爲善,能自勤苦,以求聲譽。 一栅,相持不戰。 後因其懈弛,出兵奮擊,大破之,乘勝盡滅賊,讓以數十騎 帝以|充有將帥才略,始遣領兵,討諸小盜,所向皆 充以兵拒之,而嬴師示

夜 不解甲,藉草而臥。帝聞之,以爲愛已,益信任之。 十一年,突厥圍帝於雁門,充盡發江都人,將往赴難。 在軍中,反首垢面,悲泣無度,曉

斬之,威振羣賊。 十二年,遷爲江都通守。 又擊盧明月,破之於南陽,斬首數萬,虜獲極多。 時厭次人格謙爲盜數年,兵十餘萬,在豆子鹹中。 後還江都,帝大悅,自執 充帥師破

列傳

第五十

裴虔通

Œ

充

是後益見親昵。 賊起,使者苦役,於淮泗中沉船溺之者,前後十數。或有發露,充爲秘之,又遽簡閱以供進。 勑別用,不顯其實。有合意者,則厚賞充,或不中者,又以賚之。後令以船送東京,而 密令閱 杯 酒 以賜之。 [視諸女,姿質端麗合法相者,取正庫及應入京物以娉納之。 時充又知帝好內,乃言江淮良家有美女,並願備後庭,無由自進。 所用不可勝計,帳上云 帝逾喜,因 道路

收合亡散,復得萬餘人,屯於含嘉城中,日不敢復出 水,逼 在 發兵,將討焉。 道凍死者又數萬人,比至河陽,纔以千數。 遇李密攻陷興洛倉,進逼東都,官軍數却,光祿大夫裴仁基以武牢降于密,帝惡之,大 () 倉城。 。李密與戰,充敗績,赴水溺死者萬餘人。 發中詔遣充爲將軍,於洛口以拒密,前後百餘戰,互有勝負。 時天寒大雪,兵士旣渡水,衣皆霑濕, 充乃引軍渡洛

屬無類矣。」出此言以激怒其衆。文都知而大懼,與楚等謀,將因充入內,伏甲而殺之。期 吾觀 以 復 以兵拒 充為吏部尚書,封鄭國公。及侗取元文都、盧楚之謀,拜李密爲太尉、尚書令,密遂稱臣, 其 宇文化及殺帝於江都,充與太府卿元文都、將軍皇甫無逸、右司郎盧楚奉侗爲主。侗 勢,必爲李密所擒。 化及於黎陽,遺使告捷。 且吾軍人每與密戰,殺其父兄子弟,前後已多,一旦爲之下,吾 衆皆悅,充獨謂其麾下諸將曰:「文都之輩,刀筆更耳。

門 授其兄惲爲內史令,入居禁中。 此,不敢背國。」侗與之盟。充尋遺韋節等諷侗, 文都聞變入,奉侗於乾陽殿,陳兵衞之。令將帥乘城以拒難,兵敗,又獲文都殺之。侗命開 扣門言於侗曰:「元文都等欲執皇帝降于李密,段達知而以告臣。 於東太陽 有日矣,將軍段達遣其女婿張志以楚謀告之。 以納充,充悉遣人代宿衞者,乃入謁,頓首流涕而言曰:「文都等無狀,謀相屠害,事急爲 門外。 曜軍敗, 充遂攻門而入, 無逸以單騎遁走。獲楚, 殺之。時宮門尙閉, 充令 **充夜勒兵圍宮城,將軍費曜、田世闍等與戰** 令拜爲尚書左僕射、總督內外諸軍事。 臣非敢謀反,誅反者耳。」 叉

設壁 明而 功,不則兵皆疫死。、充兵多楚人,俗信妖妄,故出此言以惑之。 乃假託鬼神,言夢見周公,乃立祠於洛水之上,遣巫宣言周公欲令僕射急討李密,當有大 二萬餘人,馬千餘,遷營於洛水南。密軍偃師北山上。 薄密。 未幾,李密破化及還,其勁兵良馬多戰死,士卒皆倦。 **充夜遣二百餘騎潛入北山,伏溪谷中,令軍** 密出兵應之,陣未成列而 兩軍合戰,其伏兵蔽山而上,潛登北原,乘高下馳,壓 ·秣馬蓐食。 時密新得志於化及,有 衆皆請戰。充簡練精勇,得 旣而宵濟, 人奔馬馳,遲 輕充之心,不

初,充兄偉及子玄應隨化及至東郡,密得而囚之於城中,至是,盡獲之。 31 傳 又執密長史邴元眞

密營。

營中亂,

無能拒者,

即入縱火。

密軍大驚而潰,降其將張童兒、陳智略,

進下

偃師

第

Ŧi.

+

王 充

象等舉倉城以應之。 妻子、司馬鄭虔象之母及諸將子弟,皆撫慰之,各令潛呼其父兄。兵次洛口,邴元眞 攻壽安, 充又令章節 云 不利而旋。 諷 侗,拜爲太尉,署置官屬,以尚書省爲其府。 密以數十騎遁逸,充悉收其衆。 又帥師攻圍穀州 ,三日而退。 明年,自稱相 而東盡于海,南至于江,悉 尋自稱 鄭王。 國,受九錫備 遣其將高略帥師 物,是後 來 歸附。 ()鄭虔

朝侗矣。

羊。 建德以詣城下。 城相繼降款。 宮,僭即皇帝位,建元曰開明,國號鄭。 鳥,書帛繫其頸,自言符命而散放之。 應符命爲天子也。」充大悅曰:「此天命也。」再拜受之。 世、德充符二篇上之,法嗣 法嗣 有道 云:「楊,隋姓 士桓法嗣者,自言解 充窘迫,遣使請救於竇建德,建德率精兵援之。 充將潰圍而出,諸將莫有應之者,自知潛竄無所,於是出降。 也。 釋曰:「上篇言世,下篇言充,此卽相國名矣。 干一者,王字 圖讖,充昵之。 或有彈射得鳥而來獻者,亦拜官爵。 大唐遣秦王率衆圍之,充頻出兵,戰輒不利,都外諸 也。 居羊後, 法嗣乃以孔子閉房記,畫作丈夫持一干以驅 明相國代隋爲帝也。」又取莊子人間 即以法嗣 師至武牢,爲秦王所破, 爲 源議 大夫。 明當德被人間 旣而廢侗於別 至長安,為讎 充又羅取雜

獨

孤修德所殺。

段達,武威姑臧人也。 父嚴,周朔州刺史。 達在周,年始三歲,襲爵襄垣縣公。

身長八尺,美鬚髯,便弓馬。

高祖爲丞相,以大都督領親信兵,常置左右。及踐阼,爲左直齋,累遷車騎將軍,兼晉

王參軍。高智惠、李積等之作亂也,達率衆一萬,擊定方、滁二州,賜縑千段,遷進儀同。

破汪文進等於宣州,加開府,賜奴婢五十口,縣絹四千段。仁壽初,太子左衞副率。

大業初,以蕃邸之舊,拜左翊衞將軍。征吐谷渾,進位金紫光祿大夫。帝征遼東,百姓

爲金稱等所挫,亡失甚多。諸賊輕之,號爲段姥。 後用鄃令楊善會之計,更與賊戰,方致剋

苦役,平原祁孝德、淸河張金稱等並聚衆爲羣盜,攻陷城邑,郡縣不能禦。

帝令達擊之,數

捷。還京師,以公事坐免。

歷 山飛,寇掠燕、趙。 明年,帝征遼東,以達留守涿郡。俄復拜左翊衞將軍。 達率涿郡通守郭絢擊敗之。 于時盜賊旣多,官軍惡戰,達不能因機決 高陽魏刀兒聚衆十餘萬, 自號

十二年,帝幸江都宮,詔達與太府卿元文都留守東都。 李密據洛口,縱兵侵掠城下,達

列

勝

~,唯持重自守,頓兵饋糧,多無剋獲,時皆謂之爲怯愞。

九〇〇

密復進據北芒,來至上春門,達與判左丞郭文懿、「中」尚書韋津出兵拒之。 與 監門郎將龐玉、武牙郎將霍舉率內兵出禦之。 頗有功, 遷左驍衞大將軍。 達見賊盛,不陣 王充之敗也,

而走,爲密所乘,軍大潰,津沒於陣。 由是賊勢日盛。

崇重。 平,坐誅,妻子籍沒。 文都等謀誅王充也,達陰告充,爲之內應。 及帝崩於江都,達與元文都等推越王侗爲主,署開府儀同三司,兼納言,封陳國公。 既破李密、達等勸越王加充九錫備物、尋諷令禪讓。 及事發,越王侗執文都於充,充甚德於達, 特見 元

毁冕。 屬 冈 魁,相尋葅戮,蛇豕醜類,繼踵誅夷,快忠義於當年,垂炯戒於來葉。 崩剝之期,不能致身竭命,乃因 史臣曰:化及庸愞下才,負恩累葉,王充斗筲小器,遭逢時幸,俱蒙獎擢,禮越舊臣。 或躬爲戎首,或親行鴆毒,釁深指 利乘便,先圖干紀,率羣不逞, 鹿, 事切食蹯,天地所不容, 職爲 亂階,拔本塞源, 人神所同 嗚呼,為人臣者可不 憤。 故梟獍

殷鑒哉!可不殷鑒哉

勘 記

- 河間 北史本傳作「大陸縣城下」。
- 和氏 北史本傳作「娥氏」。
- 侍官 「官」原作「宮」、據北史本傳改。
- ГЧ Ш 王充 即王世充,見卷七一校記〔五〕。

高略 「嘉」原作「喜」、據北史本傳、本書元文都傳、通鑑武德元年改。

ハベン

Œ

含嘉城

-Б

郭文懿「文」原作「大」,據本書越王侗傳、通鑑武德元年改。 本書煬帝紀下、册府三五七作「高毗」。

宋天聖二年隋書刊本原跋

授洪 真觀七年爲侍中,十年,五代史成, 无忌,從衆本所載 云侍中、鄭國公魏徵撰。 无忌傳又云,永徽三年,始受詔監修,疑當時先已刊修,无忌因成書而進。 孫 郎韋安仁、符璽郎李延壽同修五代史志。凡勒成十志三十卷。顯慶元年五月己卯,太尉長 傳 作郎許敬宗撰隋史。 體。 左僕射房喬總監。 令封德彝、舍人顏師古修隋史,縣歷數載,不就而罷。 五十。 無忌等詣朝堂上進,詔藏秘閣。後又編第入隋書,其實別行,亦呼爲五代史志。案魏徵本傳, 7/1 唐武 司馬。 隋書自開皇、仁壽時,王劭爲書八十卷,以類相從,定爲篇目。 十年正月壬子,徵等詣闕上之。 德五年,起居舍人令狐德棻奏請修五代史。 龍朔三年,始拜太子少師。 也。 紀傳亦有題太子少師許敬宗撰。 徵又奏於中書省置秘書內省,令前中書侍郎顏師古、給事中孔頴達、著 徵總知其務,多所損益,務存簡正。序、論皆徵所作。 加光祿大夫,進封鄭國公。俄請遜位,拜特進。今諸本並云特進。又經籍志四卷,獨 與今錄年月官位不同,疑後人所益。 十五年,又詔左僕射于志寧、太史令李淳風、著作 案敬宗傳,貞觀八年,除著作郎,修國史,遷中書舍人。 五代謂梁、陳、齊、周、隋也。 貞觀三年,續詔秘書監魏徵修隋史、 房喬、 志寧初並受詔。 至於編年紀傳, 十二月, 今紀傳題以徵,志以 凡成帝紀五,列 又李延壽傳云, 詔中書 並闕其 十年,左 被

韶與著作佐郎敬播同修五代史志。 按延壽貞觀三年與顏師古同被勑修隋史,其年以內憂去職。今諸本並不載喬等名位。

天文、律曆、五行三志,皆淳風獨作。 五行志序,諸本云褚遂良作。案本傳未嘗受詔撰述,疑祗爲一序,今故略其名氏。

六月五日,勃差官校勘,時命臣緩、臣燁提點,右正言、直史館張觀等校勘。 天聖二年五月十一 日上。 御藥供奉藍元用奉傳聖旨,齎禁中隋書一部,付崇文院。 觀尋爲度支判官,續命黃鑑代之。 仍 至

內出版式雕造。

九〇四

